



**Bibliothèque de la Faculté  
de Théologie**

**Les Fontaines - CHANTILLY**

M 62/3<sub>b</sub>

llly

M-504

# HOMO APOSTOLICUS

INSTRUCTUS IN SUA VOCATIONE

*ad audiendas Confessiones ,*

SIVÈ

PRAXIS ET INSTRUCTIO CONFESSARIORUM ,

AUCTORE ILLUSTRISS. ET REVERENDISS.

D. Alfonso De Liguorio,

Olim Episcopo S. Agathæ Gothorum, etc. etc.

CUM NOTABILIORIBUS DOCTRINIS SUPER OMNIBUS TRACTATIBUS  
THEOLOGIE MORALIS, ERUTIS, ET IN COMPENDIUM REDACTIS  
EX ALIO OPERE EJUSDEM AUCTORIS, IN QUO UBERIORI CALAMO  
QUESTIONES MORALES FUSIUS EXPOSITÆ INVENIUNTUR.

*Adsunt in fine Operis appendices perutiles.*

EDITIO SEPTIMA,

*A mendis omnibus maximâ cum curâ expurgata. Et  
in hac editione additur Elenchus quæstionum  
quas reformavit auctor.*

TOMUS SECUNDUS,

DE SACRAMENTIS IN GENERE, ET IN PARTICULARI : DE  
CENSURIS, ET IRREGULARITATIBUS.



MECHLINIÆ ;

Typis P. J. HANICQ, Typographi Celsiss. Domini Principis  
DE MÊAN, Archiep. Mechliniensis. — 1824.







## **TOMUS II.**

**T**RACTATUS XIV. *De Sacramentis in genere,  
et in specie. Hic de Baptismo, et Chrismate.*

**TRACTATUS XV. De Eucharistiá.**

**TRACTATUS XVI. De Pœnitentiá.**

**TRACTATUS XVII. De Extremâ Unctione, et  
Ordine.**

**TRACTATUS XVIII. De Matrimonio.**

**TRACTATUS XIX. De Censuris, et Irregularita-  
tibus.**





# INDEX

## TRACTATUUM ET CAPITUM ,

*Quibus adduntur omnia Summaria, ad hoc, ut  
præ oculis habeantur cunctæ materiæ, quæ  
in hoc Secundo Tomo continentur.*

## TRACTATUS XIV.

*De Sacramentis in genere, et præsertim de Baptismo,  
et Confirmatione.*

**C**APUT I. *De Sacramentis in genere.* pag. 1

De attentione et intentione 1. Quæ intentio requi-  
ratur in ministro 2. De administratione sub con-  
ditione 3. An denegandum sit Sacramentum pec-  
catori 4. Quandò Communio 5. Si Sponsi sint in  
peccato 6.

**CAP. II. De Sacramento Baptismi.** pag. 6

**PUNCTUM I. De Materiâ, Formâ, et Ministro Bap-  
tismi.** *ibid.*

Quotuplex est Baptismus 7. De materiâ remotâ 8.  
De proximâ, et an possit abscindi mater 9. An  
possit baptizari proles in utero etc. in quo mem-  
bro 10. 11. et 12. An requiratur trina ablutio  
13. De formâ 14. De ministro 15. De ordine Mi-  
nistrorum 16. De exteris qui baptizantur 17. De  
Baptismi dilatione, et de Baptismo domi etc. 18.  
et 30.

**PUNCT. II. De iis qui baptizare possunt.** pag. 9

Pœna rebaptizantium 19. De foetis abortivis, et de  
filiis infidelium 20. Si parentes repugnant 21.  
An liceat vendere filios infidelium 22. De Bap-  
tismo sub conditione 23. De infantibus expositis  
24. De baptizatis à laicis 25. Ab hæreticis 26. Si

Baptismus est dubius 27. Dispositiones ad Baptismum 28. De Cæremoniis, et I. de aquâ consecratâ 29. II. De Ecclesiâ 30.

PUNCT. III. *De Patrinis et eorum munere.* pag. 22  
Munus Patrinorum 31. Qualitas 32. Quando et à quibus contrahitur cognatio etc. 33. An parentes etc. 34. An Patrini debeant designari 35. Cujus sexûs 36. Quibus sit vetitum esse Patrinos 37. Quando in hoc peccat Parochus 38.

CAP. III. *De Confirmatione.* pag. 27  
De Materiâ remotâ 39. An Chrisma debeat esse benedictum; et an à simplici Sacerdote possit etc. 40. De materiâ proximâ; et an sit materia extensio manuum quam adhibet Episcopus etc. 41. An manu dexterâ, aut instrumento etc. 42. De formâ 43. De Ministro. An possit esse simplex Sacerdos 44. Quid si exterus sit chrismandus 45. De obligatione ministrandi Confirmationem 46. De obligatione eam suscipiendi 47. An qui suscipit Ordines etc. 48. An amentibus et infantibus etc. 49. De Cæremoniis 50. De Patrino 51. De aliis Cæremoniis 52. De effectibus Confirmationis 53.

## TRACTATUS XV.

### *De Sacramento Eucharistiæ.*

CAP. I. *De essentiâ Eucharistiæ.* pag. 38  
In quo consistit essentia Eucharistiæ, et in quo ratio specifica, et undè desumitur unitas 1. An sit necessaria necessitate medii 2. An Consecratio in unica specie sit illicita et invalida. Non licet consecrare in unâ specie tantùm 3. Casus excepti 4. Effectus Eucharistiæ 5. An quamdiù durant species etc. 6. Qui communicat cum veniali 7. De ceteris agetur in *Appendice III. de Examine* ex n. 96.

CAP. II. *De administratione Eucharistiæ,* pag. 43  
Quomodò teneantur Parochi servare Eucharistiam, et ad eam dispensandam. An Regularis et quilibet Sacerdos possint Communionem ministrare 8. Et an Diaconi 9. An Viaticum possit in necessi-

tate administrari à Clericis, et etiam à Laicis, et an à seipsis etc. 10. An Sacerdos ex devotione possit communicare ex seipso 11. Quomodò debeat et possit dari Viaticum 12. An possit dari Viaticum digitis posterioribus, et an Communio 13. An in utrâque specie; et an pars Hostiæ majoris. An pueris et amentibus 14. An peccatoribus publicis, et an condemnatis 15. An in Missâ Defunctorum 16. In quâ horâ potest dari Communio 17. Si remanent fragmenta 18.

CAP. III. *De perceptione Eucharistiæ.* pag. 52

PUNCT. I. *De obligatione sumendi Eucharistiam.* ibid.

De Viatico, et quandò sumendum est 19. Si infirmus vexatur vomitu 20. Si tussi 21. De Præcepto Paschali, vide *Tract. XII. n. 39.*

PUNCT. II. *De animæ dispositione.* pag. 54

De Confessione præmittenda 12. qui post Confessionem reminiscitur peccati 23. Quænam necessitas excuset à prius confitendo 24. Si Sacerdos celebrando recordetur peccati aut censuræ 25. Si desit Confessarius 26. Si peccatum est reservatum 27. Si tunc dicendum sit reservatum 28. Si annexa est excommunicatio 29. Quomodò intelligendum est *quam primùm* 30. An tale præceptum obliget post Consecrationem 31. An obliget celebrantem sacrilegè 32. An obliget Laicos 33. An possit communicare qui dubitat de peccato 34.

PUNCT. III. *De dispositione corporis.* pag. 64

De jejunio naturali. In dubio jejunii. Si horologia sint discordantia. Frangit jejunium quod ab extrâ suscipitur 35. De reliquiis ciborum 36. De reliquiis aquæ, sacchari, etc. 37. De tabaco per nares sumpto 38. An fumus tabaci 39.

De tabaci foliis, et aromatibus dentibus contritis 40. De aquâ, aut similibus, per narices voluntariè haustâ, aut casu 41. An capilli, lapilli, chartæ, etc. frangant jejunium 42. et 43. Qui non factâ digestionem etc. 44. Expuere statim à Communionem 45. In quibus casibus non requiratur jejunium, et I. in Viatico. An possit replicari Viaticum 46. et quoties 47. An qui ex devotione paucis antè diebus communicavit, etc. 48. An qui eodem

manè 49. An possit omitti verba : *Accipe Viaticum* 50. An possit celebrare non jejunus ad dandum Viaticum 51. II. Non requiritur jejunium, si timetur de injuriâ Sacramenti 52. III. Si timetur scandalum. Si celebrans recordetur se non esse jejunum 53. IV. Si perficiendum sit Sacrificium. Quid agendum, si advertatur error vini; et quid in dubio, etc. 54. V. An ad evitandam mortem possit celebrare non jejunus 55. An pollutio impediât Communionem 56. An copula conjugalis 57. Qui externè est sordidus, aut leprosus, vel menstruata, aut accedit immodestè. Sacerdos qui laicorum more communicat 58.

CAP. IV. *De Sacrificio Missæ.*

pag. 80

*Videnda quæ dicuntur in Examine Ordinandorum in III Tomo in Append. III.* Licitum est recipere

stipendium etiam divitibus 59. Qui pro unâ Missâ recepit duplex stipendium 60. Quodnam judicatur justum stipendium 61. Potest exigi majus taxâ; sed potest prohiberi minùs; An qui accipit minus possit diminuere Missas 62. Qui omittit celebrare Missam, quam promisit pro parvo stipendio 63. Qui paciscitur de stipendio 64. Qui retinet sibi partem; aut celebrat per alium collato ei minori stipendio; et cui restituenda est pars retenta 65. Si eleemosyna pinguis data est intuitu personæ 66. De Capellanis 67. De administratoribus Ecclesiarum 68. Si celebrans partem retentam remittit, et si executor testamenti etc. 69. Qui colligit eleemosynas, etc. 70. Qui permutat Missas 71. Pro quo debent applicare Missas Curati 72. Pro quo alii Beneficiati, et Capellani Monialium, etc. Et an aliquandò possint applicare pro aliis, aut abstinere. Si infirmantur. De Missâ Conventuali 73. An Missæ præscribantur 74. An Capellanus possit mutare Ecclesiam, Altare, etc. Si non celebrat in Altari Privilegiato. Si celebrat per alium 75. De reductione 76. Deficientibus redditibus, an possit Episcopus diminuere Missas 77. An possit reductionem facere Capellanus. De Missis Gregorianis 78. An Religiosus possit applicare contra voluntatem Prælati 79. An

sufficiat applicatio habitualis 80. De applicatione in confuso 81. De conditionatâ 82. Si in die Defunctorum, etc. De Altari Privilegiato 83. Peccat graviter qui festinanter celebrat 84. ad 86. De resolutionibus Sacræ Congregationis Rituum 87. Catalogus Decretorum Sacræ Congregationis 88. De Requisitis ad celebrandum, vide *Tom. III. Append. III. in fin. ex num.* 97.

*Catalogus quorundam Decretorum notabiliorum Sacræ Congregationis circa Celebrationem. pag. 98*

## TRACTATUS XVI.

*De Sacramento Pœnitentiæ.*

CAP. I. *De materiâ, et formâ.* pag. 106

De materiâ remotâ, et proximâ 1. An Religiosi debeant confiteri semel in mense 2. An peccata confessa sint materia apta 3. An distinguenda peccata jam confessa à non confessis 4. An sit necessarium verbum *Te*. An verba à *peccatis tuis*. An cetera verba. An per verbum *absolvo* possint absolvi censuræ. Requiritur præsentia pœnitentis 5. De absolutione sub conditione 6.

CAP. II. *De Contritione et Proposito.* pag. 112

PUNCT. I. *De Contritione.* ibid.

In quo consistit Contritio 8. Ex quo motivo producit 9. Quandonam tenemur ad Contritionem 10. An in articulo mortis, etc. 11. An sufficiat dolor generalis 12. An actus Fidei, Spei etc. 13. An sufficiat attritio sinè amore prædominante 14. 15. et 16. An sufficiat attritio ex timore pœnarum temporalium 17. An detur Sacramentum validum et informe 18. An dolor debeat præcedere Confessionem 19. Quantum temporis perduret dolor 20. An dolor debeat elici in ordine ad Confessionem 21. Qui mox se reconciliat, an novum dolorem elicere debeat 22. De dolore peccatorum venialium 23.

PUNCT. II. *De Proposito.* pag. 126

Propositum I. Debet esse firmum. An qui credit se lapsurum etc. 24. II. Debet esse universale 25.

III. Debet esse efficax. An relapsus sit semper signum invaliditatis Confessionum, et an Propositum debeat esse explicitum 26.

CAP. III. *De Confessione.* pag. 129

PUNCT. I. *De Conditionibus Confessionis.* ibid.

Confessio I. Debet esse *Vocalis*. II. Debet esse *Secreta* 27. III. Debet esse *Vera*. Qui mentitur in Confessione 28. IV. Debet esse *Integra*. De circumstantiis aggravantibus 29. De peccatis dubiis 30. 31. et 32. De peccatis dubiè confessis 33. Qui confessus est peccatum dubium, cùm novit esse certum etc. 34. Quomodò excuset impotentia physica mutos, surdos, ignorantes linguam, et moribundos 35. De moribundo qui dedit signa per testes 36. De iis qui nullum dant signum 37. De iis qui in actuali peccato corripuntur 38. Quomodò excuset impotentia moralis 39. Qui debet complicem aperire etc. 40. Non potest Confessarius inquirere nomen complicitis 41.

PUNCT. II. *Quandonam Confessio sit invalida, et quomodo revalidanda sit.* pag. 144

Quandonam Confessio sit nulla ex parte Confessarii 42. Quandonam ex parte Pœnitentis. De complice in peccato turpi 43. Quomodò convalidanda Confessio apud eundem Confessarium, et an sufficiat recordari pœnitentiæ impositæ 44. De rudibus qui non explicarunt nec species, nec numerum 45. Quomodò repetenda est Confessio 46.

CAP. IV. *De Satisfactione, sive de Pœnitentiâ.* p. 149

PUNCT. I. *De impositione Pœnitentiæ.* ibid.

De obligatione imponendi pœnitentiam. An post absolutionem etc. 47. Pœnitentia debet imponi ex obligatione 48. Quomodò possit diminui. De infirmis corpore 49. De infirmis spiritu 50. et 51. Quæ species pœnitentiarum debent imponi 52. 53. et 54.

PUNCT. II. *De acceptance et satisfactione Pœnitentiæ.* pag. 158

Obligatio acceptandi Pœnitentiam 55. Obligatio adimplendi eam 56. Qui differt pœnitentiam 57. An requiratur intentio satisfaciendi 58. Si pœnitens obliviscatur pœnitentiæ 59. Quid si adim-



pleat in mortali 60. Quis possit mutare poenitentiam 61.

PUNCT. III. *De satisfactione per Indulgentias.* p. 163  
De Indulgentiis 62. An quis possit lucrari Plenariam ex parte 63. De Jubilæo, et de pluribus declaratis circa Jubilæum à Benedicto XIV. 64. An opera debeant omnia in unâ hebdomadâ adimpleri; et hic de oratione et eleemosynâ, et etiam de commutatione 65. An ex invalidâ Confessione auferantur reservatio et censura 66. An peccet absolutus postea non adimplendo opera 67. Qui reservati obliviscitur 68. Qui peccat in confidentiam Jubilæi 69. An antequàm damno satisfiat etc. 70. In Jubilæo à quibus casibus et censuris potest absolvi 71. Nonnulla circa annum sanctum adnotantur 72.

CAP. V. *De Ministro Sacramenti Poenitentiae.* p. 171

PUNCT. I. *De approbatione Confessarii.* p. 172  
Necessitas approbationis 73. Non est necessarium examen 74. Si approbatio injustè revocetur. An successor possit ad examen revocare etc. 75. An Sacerdos simplex possit absolvere à venialibus 76. An Parochus possit sibi adsciscere Parochum alterius Diœcesis 77. An ejusdem Diœcesis 78. Quinam Episcopus approbare possit 79. An Regulares approbati in unâ Diœcesi, etc. 80.

PUNCT. II. *De jurisdictione Confessarii.* p. 177

Quinam habeat jurisdictionem ordinariam, et quinam delegatam 81. An delegata spiret morte etc. Si habetur à Principe, aut ad causarum universitatem 82. De consensu præsumpto Episcopi, 83. Qui absolvit cum jurisdictione dubiâ 84. Quis possit sibi eligere Confessarium 85. Quilibet potest confiteri approbato 86. Cuinam confiteri possunt Peregrini 87. Cuinam Religiosi 88. Cui Moniales 89. De titulo colorato et de errore communi 90. De jurisdictione probabili 91. An Excommunicati, etc. possint absolvere moribundos 92. An Sacerdotes simplices coram approbatis 93. Casus excepti 94. De Confessario complici in peccato turpi 95. An Confessarii simplices coram superiore 96. An à casibus papalibus 97. An mori-

bundus teneatur per litteras facultatem petere à superiore 98.

CAP. VI. *De Officio, et aliis muneribus Confessarii.* pag. 193

De Scientiâ necessariâ Confessario 99. et 100. Quot sunt munera Confessarii 101. I. De examine 102. et 103. II. De judicio peccatorum 104. III. De instructione 105. IV. De admonitione 106. et 107. Si admonitio non est profutura 108. ad 112. Si Matrimonium est nullum 113. Si sponsi sint parati ad nuptias 114. Si adest obligatio restitutionis. Si admonitio sit postmodum profutura 115. Si pœnitens interrogat, etc. Si adest damnum commune. In dubio an admonitio etc. 116. V. De absolutione 117. Quæ certitudo ad absolutionem etc. 118. Si pœnitens pro se habeat opinionem probabilem 119. Si pœnitens negat aut tacet peccatum 120. VI. De corrigendis erroribus. De errore circâ Sacramenti valorem 121. Circâ restitutionem à quâ pœnitens dissuasus est etc. 122. Aut ad quam non fuit obligatus 123. An possit admoneri pœnitens licentiâ ejus non petitiâ 124. VII. De obligatione administrandi hoc Sacramentum. An cum periculo mortis etc. 125. An Sacerdos simplex teneatur ad se habilem reddendum 126. et 127.

CAP. VII. *De casuum reservatione.* p. 226

Reservatio est jurisdictionis restrictio 128. Ignorantes non excusantur à casu, bene quidem à censura. Differentia inter casus Papales, et Episcopales 129. Qui reservare possit etc. De casibus Regularium 130. De reservatione injustâ, et an superior absolvendo possit ad alium remittere pro non reservatis, etc. 131. An peccata venialia, aut interna, aut non consummata, etc. 132. Quandò inferior potest absolvere, etc. Et an pœnitens debeat se præsentrare, etc. 133. Si injustè negatur facultas, etc. Si negatur à Prælato Regulari 134. De Peregrinis, quandò casus est reservatus tantùm extrâ, aut tantùm in patria 135. Quando intelligendum: *In fraudem reservationis* 236. An qui peccat in patriâ possit absolvi extrâ

illam ab habente facultatem 137. An possit absolvi in patriâ qui peccat extrâ. Et an peccans incurrat censuram ibi reservatam 138. Qui recipit in bonâ fide absolutionem à simplici Confessario 139. Qui obliviscitur de reservato apud superiorem etc. 140. An ex Confessione nulliter facta apud Superiorem etc. 141. An simplex Confessarius possit absolvere dubiè reservatum 142. Qui post Confessionem cognoscit pro certo reservatum 143. Qui peccat in confidentiam licentiæ 144. An licentia extendatur ad peccata post illam commissa 145. De facultatibus Episcoporum et Regularium remissivè, 146.

CAP. VIII. *De Sigillo Confessionis.*

p. 240

Obligatio Sigilli 147. De iis qui tenentur ad Sigillum 148. An teneatur qui est requisitus de consilio à Confessario ex pœnitentis licentiâ 149. An consultus ab ipso pœnitente 150. An qui legit folium Confessionis 151. Cadunt subsigillo I. peccata etiam levia. II. Peccata complicitis, sed ex licentia pœnitentis potest admoneri complex 152. III. Objectum peccati IV. Pœnitentia V. Circumstantiæ, sed non impertinentes VI. Revelationes, et virtutes, quandò etc. VII. Scrupuli 153. VIII. Defectus naturales 154. Casus de pœnitente surdo 155. Casus in quibus non adest obligatio sigilli. De licentiâ pœnitentis; et an liceat eum admonere intrâ Confessionem, quin ab eo petatur licentia 156. Casus in quibus læditur sigillum. I. Qui diceret in Monasterio etc. 157. Qui diceret in oppido etc. 158. II. Qui utitur notitiâ Confessionis ad gubernationem cum gravamine etc. 159. Si redit pœnitens malæ conscientiæ 160. An Confessarius possit sibi cavere de damnis etc. 161. An possit præberi schedula Confessionis 162. Si pœnitens minetur mortem, etc. 163. An liceat uti opinionibus probabilibus, etc. 164.

CAP. IX. *De Sollicitatione in Confessione.*

p. 259

Bulla Gregorii XV. 165. PUNCT. I. Clausula I. *In actu* etc. 166. Claus. II. *Sive antè* etc. 167. Claus. III. *Occasione Confessionis* 168. *Prætextu Confessionis* 169. Claus. IV. *Extrâ Confessionem*

- etc.* An requiratur simulatio *etc.* 170. PUNCT. II. Casus in quibus denunciandum est 171. Casus in quibus non 172. Si mulier sollicitat Confessarium 173. An confessarius divertens ad tactus *etc.* 174. Si emendatus *etc.* 175. PUNCT. III. An possit absolvi antequàm denunciaret. An pœnitens teneatur per epistolam *etc.* Et si cùm possit ex se repugnet *etc.* 176. De Excommunicatione quam incurrit 177. Si admonitio non est profutura 178. Debet fieri denunciatio, licèt non probatur, etiam ab aliis qui sciunt *etc.* et licèt sit occulta sollicitatio 179. PUNCT. IV. Quid si sollicitatio est dubia 280. Qui laudat pulchritudinem *etc.* 181. Casus particulares 182. De inhabilitate sollicitantium ad celebrandum 183.
- PUNCT. I. *Expenduntur Clausulæ appositæ in Bullâ Gregorii.* pag. 260
- PUNCT. II. *Qui denunciari debeat.* pag. 265
- PUNCT. III. *Quis teneatur ad denunciandum.* p. 268
- PUNCT. IV. *De Sollicitationibus dubiis.* p. 272

## TRACTATUS XVII.

*De Sacramentis Extremæ-Uctionis, et Ordinis.*

- CAP. I. *De Extremâ-Uctione.* pag. 275
- De essentiâ, et effectibus Extremæ-Uctionis 1. I. De *materiâ remotâ* 2. De *materiâ proximâ* 3. An necessaria sit Uctio omnium sensuum 4. II. De *Formâ* et quomodò aptanda est 5. III. De *Ministro* 6. IV. De *subjecto* cui ministranda est Extrema-Uctio 7. Quando replicari possit 8. De dispositione 9. An ministranda sit pueris. 10. An amen-  
tibus, ebriis, impœnitentibus, mutis *etc.* 11. An adsit gravis obligatio suscipiendi hoc Sacramentum 12. De administratione 13.
- CAP. II. *De Sacramento Ordinis.* pag. 289
- An quilibet ex septem ordinibus sit Sacramentum 14. An materiæ et formæ Sacramentorum sint specie à Christo Domino determinatæ 15. Quæ sit materia Ordinis, an manuum impositio, aut instru-

mentorū traditio 16. De ceteris ad Ordinem spectantibus sermo erit in *Examine Ordinandorum in Appendice III. à. n. 25.*

## TRACTATUS XVIII.

*De Sacramento Matrimonii.*

CAP. I. *De Sponsalibus.* pag. 295

PUNCT. I. *De naturâ Sponsalium.* ibid

Definitio Sponsalium. An pueri antè septennium etc.

Qui promittit sinè animo se obligandi, aut adimplendi. Qui dolo aut errore etc. 1. Si conditio dederit causam contractui 2. De Sponsalibus metu initis 3. An promissio debeat esse mutua 4. An externata signis. Quid si promittit pater pro filio præsente, et quid si pro absente 5. An in dubio favendum sit libertati. Qui promittit in futurum etc. Quid si mittatur anulus etc. An requiratur dispensatio etc. 6. De impuberibus etc. De tactibus inter Sponsos 7.

PUNCT. II. *De Sponsalium obligatione.* p. 302

Quomodo et quandò Sponsalia sint exequenda 8.

Quid si unus promittit duabus mulieribus 9. An filius possit insciis parentibus se obligare 10. Qui à Sponsalibus recedit etc. et de pœnâ appositâ recedenti 11. An debeatur legatum relictum sub conditione si nubat etc. aut si non nubat 12.

PUNCT. III. *De Sponsalium dissolutione.* p. 307

Solvuntur Sponsalia I. ob *nuptias* cum alio initas.

An deobligatus restet nocens 13. II. *Mutuo consensu*, licèt intercesserit iuramentum. Quid de impuberibus 14. III. Ob *impedimentum* superveniens. An teneatur petere dispensationem 15. An disparitas dirimat sponsalia 16. An parentum dissensus 17. IV. Ob *delictum atrox*. An ob fornicationem. Et an talis fornicatio malitiam contineat diversam 18. V. Ob *notabilem mutationem*, verb. gr. odii, æris alieni, morbi etc. An ob novam hæreditatem. An si melior occasio 19. VI. Ob *disces-*

*sum* in longinquam regionem 20. VII. Ob *terminum elapsum* 21. VIII. An ob *Religiosam Professionem*, aut ob *Ordines Sacros*. An ob *ingressum* etc. 22. An si antè *ingressum* etc. 23. An peccet qui *Sacris* initiatur 24. An *votum castitatis*, aut *Sacros* suscipiendi *Ordines* dirimat etc. 25. An requiratur *Judicis auctoritas* etc. 26. Quænam *probatio* requiratur etc. 27.

CAP. II. *de Matrimonio.* pag. 318

PUNCT. I. *De materia, forma, et Ministro Matrimonii.* ibid.

Quænam sit *materia*, *forma*, et *quinam* sit *Minister* 28. *Illationes*. An *sponsi* possint *simulare*. De *Matrimoniis clandestinis*. An cum *convalidantur* requiratur *præsentia Parochi* etc. 29. De *finibus Matrimonii* 30. An sufficiat *consensus* per *signa* 31. De *Matrimonio* per *procuratorem*, aut *epistolam* 32. De *consensu conditionato* 33. An *adimpletâ conditione* *novo opus* sit *consensu*. 34.

PUNCT. II. *De usu licito Matrimonii.* p. 326

*Usus conjugii* est *illicitus*, I. Si *Matrimonium* est *nullum*. II. Si est *dubium*. An liceat *contrahere* cum *dubio impedimenti* 35. An liceat *petere* aut *reddere urgente dubio* 36. Quid si *nuptiæ fuerint contractæ* cum *dubio* 37. III. Si *adsit periculum sanitatis* 38. IV. Si ob *solam voluptatem*, etc. V. Si *mente adultera* etc. VI. Si *modo indebito* 39. Si *conjux* se *retrahat à seminatione* 40. VII. Si *loco indebito*. VIII. Si *tempore indebito*, scilicet *prægnationis* 41. Si *conjux* sit *impeditus* ob *votum* aut *incestum* 41. An *tactus* et *delectationes morosæ conjugibus* *permittantur* 42.

PUNCT. III. *De usu præcepto Matrimonii.* p. 334.

Quandò *conjux* *tenetur petere* 43. Si *neget semel* aut *bis* 44. Si *plures nascantur filii* 45. Si *alter petat* cum *mortali* 46. Si *velit vir* *seminare extrâ vas* 47. Si *alter petat* cum *veniali* 48. Si *petat amens*, vel *ebrius*. De *impedimento petendi* ob *incestum*. Si *immineat damnum sanitatis*, aut *prolis*, 49. Si *conjux* *cohibeat seminationem*. Si *uxor surgit*, aut *mingit*. An *puella oppressa* possit *se-*

men expellere : Si senex sæpè effundit extrà 50.  
De cohabitatione , et alimentis uxori debitis 51.

PUNCT. IV. *De impedimentis impediētibz.* p. 340

Quænam sint impedimenta 52. I. Vetitum. II. Tempus feriarum. An tempore feriarum vetetur consummatio. De benedictione Sacerdotis. III. Catechismus. IV. Crimen. V. Sponsalia 33. VI. Votum. An Episcopus possit dispensare in voto castitatis 54. De clandestinitate et proclamationibus 55. De obligatione denunciandi impedimenta et quando denunciatio impedit 56. An sufficiat fama. Si sponsi interrogati etc. Si Parochus sciat impedimentum 57. Quandonam Episcopus possit et debeat dispensare proclamationibus 58. An possit Vicarius aut Parochus dispensare , aut declarare 59.

PUNCT. V. *De impedimentis dirimentibus.* p. 348

Innuuntur impedimenta dirimentia 60. I. De impedimento erroris circà personam , et circà qualitatem 61. II. De conditionis impedimento. III. De voti. IV. Cognationis 62. V. De criminis 63. VI. De disparitate cultûs. VII. De violentia et metu 64. VIII. De impedimento ordinis. IX. Ligamins. X. Publicæ honestatis 65. XI. Ætatis 66. XII. Affinitatis 67. De impedimento ad petendum 68. Quisnam dispensare potest in hoc impedimento 69. XIII. De clandestinitate , et assistentiâ testium. De Parochi assistentia 70. et 71. De vagis et exteris 72. Quænam assistentia Parochi requiratur 73. XIV. De impotentia 74. et 75. XV. De raptu 76.

PUNCT. VI. *De Matrimonii irriti revalidatione.* p. 368.

Quandonam impedimentum dicendum est occultum 77. Quid si Parochus et testes conscii erant impedimenti etc. 78. Qui fictè contraxit , an teneatur verum præstare consensum 79. An qui contraxit ex metu , an fictè , teneatur patefacere nullitatem 80. An ablato impedimento debeat patefieri nullitas ignoranti 81. Quomodo exigi debeat consensus ab ignorante 82.

PUNCT. VII. *De dispensatione super impedimentis Matrimonii.* p. 376.

In quibus impedimentis potest Papa dispensare 83. (Et in quibus Episcopus; remissivè ad Tom. III. Tract. XX. n. 54. et seq.) De causis justis ad dispensandum; an omnia impedimenta explicanda sint 84. An omnes circumstantiæ præcipuè incestus 85. An omnes gradus 86. De clausulis S. Pœnitentiariæ 87. De Formulis supplicationum 88. De formula exequendi dispensationem 89.

CAPUT. III. *De Divortio.* p. 383

De Divortio quoad *vinculum* 90. Quoad *torum*, et quot causis fieri potest Divortium. I. Causa delicti. II. Causa morbi. III. Consensûs 91. IV. Timoris damni. V. Adulterii 92. Sed 1. requiritur adulterium perfectum et certum. 2. An teneatur conjux se separare 93. Casus in quibus non potest separari ab adultero 94. De jure revocandi adulterum 95. An possit propria auctoritate 96. Facto Divortio quis conjugum potest Religionem ingredi etc. 97.

## TRACTATUS XIX.

### *De Censuris et Irregularitatibus.*

CAPUT. I. *De censuris in genere.* p. 392

PUNCT. I. *De censurarum emanatione.* *ibid.*

Quid et quotuplex sit censura 1. Quando dicitur latæ, et quando ferendæ sententiæ 2. Quis potest ferre censuras. De censurâ metu inflictâ 3. Quid requiritur ut subditus censurâ feriat etc. An Episcopi aut Reges etc. An Communitas etc. 4. An Prælatus possit extrâ Diœcesim existens censuras ferre in subditos. Quid si subditus fuerit extrâ Diœcesim 5. An possit censurare Peregrinos 8. Quale peccatum requiritur, ut imponatur censura. De mandante, consulente etc. 7. An excuset ignorantia et metus, et an censura possit im-



poni pro delictis præteritis 8. De solemnitate ad censurarum promulgationem requisitâ 9. Quid si causa est falsa aut dubia 10.

PUNCT. II. *De absolutione à censuris.* p. 401

Quis potest absolvere à censuris 11. De censuris per sententiam generalem. Episcopus existens extrâ etc. Alia notabilia 12. An requiratur formula, et an præsentia censurati, etc. De absolutione conditionatâ, et an extrâ Confessionem 13. De requisitis ad absolutionem 14.

CAPUT II. *De censuris in specie.* p. 405

PUNCT. I. *De excommunicatione majori.* ibid.

De communicatione cum toleratis, et vitandis 15. Cum percussoribus Clericorum 16. De effectibus.

I. Privat usu passivo Sacramentorum 17. II. Suffragiis, etc. et an possit orari etc. III. Usu activo Sacramentorum. IV. Usu Divinorum officiorum, Sacramentalibus, etc. 18. V. Beneficiis, dignitatibus, et pensionibus 19. VI. Communicatione forensi. VII. jurisdictione. VIII. Sepulturâ. IX. Communicatione civili (de quâ in Puncto sequenti.) 20.

PUNCT. II. *De excommunicatione minori, et ejus effectibus.* p. 414

Actus quibus incurritur excommunicatio minor sunt :

I. *Os. 11. Orare.* De expellendis vitandis. III. *Valde.* De resalutatione, et rescriptione IV. *Communio.* V. *Mensa* 21. Quale peccatum sit communicare cum vitando, et quando est grave 22. Pro quibus causis potest quis communicare cum vitando. I. Causa utilitatis. II. Matrimonii 23. III. Subjectionis 24. IV. Ignorantiæ 25. V. Causa necessitatis 26. De effectibus excommunicationis minoris : et an vetet Sacramenta ministrare, et beneficia recipere 27.

PUNCT. III. *De excommunicationibus non reservatis.* p. 422

I. De excommunicationibus non reservatis 28. Excommun. in cogentes Puellas ingredi Monasteria etc. 29. II. De excommunicationibus reservatis Papæ 30. De censuris circa quæstionem Conceptionis

B. Virginis 31. et 32. In frangentes clausuram Monialium. Ingredients ad malum finem prætextu facultatum 33. An licentia debeat esse in scriptis; et an specialis 34. A quo petenda est 35. Ob quam causam 36. De Confessario 37. De Medico, et aliis 38. Si statim non egreditur. Et qui ingreditur ad malum finem, sed cum licentiâ 39. De prohibitionem colloquendi cum Monialibus præsertim Regularibus 40. De casu reservato; de parvâ materiâ, de conjunctis, et impuberibus 41. An cum Abbatissâ etc. 42. An Regulares incurrant censuram ab Episcopo 43. An Peregrini, etc. 44. An Episcopi, etc. 45. De Monialibus frangentibus clausuram 46. De clausurâ Regularium 47. In percussores Clericorum 48. De mandantibus, ratihabentibus, aut non impredientibus percussionem 49. Qui venit nomine Clerici, aut Monachi 50. Ob quas actiones incurritur 51. Ob quas non incurritur 52. III. De excommunicationibus Bullæ Cœnæ. In Hæreticos 53. In fautores 54. In legentes, aut retinentes libros, etc. 55. Requisita ad incurrendam istam censuram librorum, etc. I. Ut scienter, etc. II. Ut Auctor sit hæreticus 56. III. Ut liber agat de Religione, et contineat hæresim 57. IV. Materia gravis 58. Qui audit legere, aut qui legit litteras, aut manuscriptum 59. De libris prohibitis in Indice 60. et 61. Qui retinet libros etc. 62. De cæteris casibus Bullæ 63.

I. *De excommunicationibus non reservatis.* p. 422

II. *De excommunicationibus Papæ reservatis, extra Bullam Cœnæ.* p. 425

III. *De excommunicationibus Papæ reservatis in Bulla Cœnæ.* p. 447

PUNCT. IV *De suspensione, degradatione, sive depositione, de interdicto, et cessatione à divinis.* p. 455

I. De suspensione 64. 65. et 66. II. De depositione, et degradatione 67. III. De interdicto 68. 69. et 70.

IV. De cessatione à divinis 71.

CAPUT, III. *De irregularitate.* p. 462

PUNCT. I. *Quid, et quotuplex sit irregularitas.* p. 462  
 Definitio 72. An irregularitas sit censura 73. Divisiones irregularitatis 74.

PUNCT. II. *Effectus irregularitatis.* p. 463

Effectus 75. An irregularis possit acceptare beneficia 76. An possit accepta retinere 77.

PUNCT. III. *Quomodo incurritur irregularitas.* p. 465

Irregularitas debet esse expressa in Jure 78. Qui dubitat an sit irregularis 79. Qui dubitat an sit homicida 80. Quid requiritur ad irregularitatem ex delicto 81. Si delictum est omnino occultum 82. An requiratur scientia legis 83. An scientia irregularitatis 84. Quomodo tollenda est irregularitas in genere 85. De dispensatione 86. Quomodo tollitur irregularitas ex defectu 87.

PUNCT. IV. *Quænam sint irregularitates ex delicto.* p. 471

I. Ob Sacramentum 88. II. Ob violationem censuræ 89. III. Ob exercitium solemne etc. 90. IV. Ob illicitam Ordinum susceptionem 91. V. Ob delicta enormia 92. VI. Ob homicidium 93. De homicidio voluntario 94. 95. et 96. De mandantibus, consilium dantibus, etc. 97. et 98. De cooperantibus 99. De ratihabentibus 100. De non impediens 101. De homicidio casuali 102. ad 105. Qui occidit ob defensionem 106. Qui occidit ad tuenda bona 107. De homicidio in rixa 108. De mutilatione 109. et 110. De dispensatione, remissivè 111.

PUNCT. V. *De irregularitate ex defectu.* p. 485

I. Ex defectu animæ 112. De lunaticis, et obsessis 113. De illiteratis 114. De neophytis 115. II. Ex defectu corporis, et I. De cæcis 116. II. De surdis 117. III. De mutis 118. IV. De claudis 119. V. De iis qui manu carent 120. VI. De febris laborantibus 121. De deformibus 122. De leprosis 123. De monstruosis 124. De eunuchis 125. III. Ex defectu natalium 126. ad 128. De Expositis

129. IV. Ex defectu ætatis 130. V. Sacramenti, nempe bigamiæ. De bigamia vera 131. De interpretativa 132. Qui ducit corruptam 133. Qui contrahit cum eâ invalidè 134. Si vir cognoscit uxorem adulteram 135. Qui contrahit duo Matrimonia 136. Si vir accusat uxorem, et reddit debitum, etc. 137. De similitudinaria 138. Quomodo tollatur irregularitas ex bigamiâ 139. VI. Ex infamiâ. VII. Ex defectu libertatis. De servis 140. De conjugatis 141. An conjux possit ingredi Religionem, alio relicto in sæculo 142. De curiæ addictis, militibus, etc. 143. VIII. Ex defectu lenitatis; circa Bellum 144. Circa Judicium 145. et 146. De dispensationibus 147.

*De Facultatibus S. Pœnitentiariæ.* 148. p. 501



TRACTATUS

# TRACTATUS XIV.

DE

SACRAMENTIS IN GENERE,

ET PRÆSERTIM

DE BAPTISMO, ET CONFIRMATIONE.

## CAPUT PRIMUM.

De Sacramentis in genere.

*De attentione et intentione 1. Quæ intentio requiritur in ministro 2. De administratione sub conditione 3. An denegandum sit Sacramentum peccatori 4. Quando Communio 5. Si sponsi sunt in peccato 6.*

1. — **D**E Sacramentis in genere sermo erit fusiùs in *Appendice III. de Examine Ordinandorum*. Hic tantùm adnotabimus nonnulla principaliora, quæ ibi breviter tacta sunt in quantùm ad ordinandi notitiam sufficiunt, sed respectu Confessarii animadversione majore indigent. Notandum 1. quòd *Croix* in ministro, præter intentionem, in conficiendo Sacramento etiam requirit attentionem, ut validè conficeat. Sed hæ opinio est singularis et validâ ratione minimè fulcitur, quia si hoc esset, sequeretur quòd à ministro voluntariè distracto, licèt adesset intentio virtualis, Sacramentum non conficeretur; sed in confesso est apud omnes ad Sacramenti validitatem nihil aliud requiri, nisi materiam, formam, et intentionem ministri; idèdque docent

*Tom. II.*

A

2 *Tract. 14. De Sacramentis in genere, etc.*

*Suar. Lugo*, etc. cum ipso *Croix*, quòd licèt minister distraheretur, quoties adest intentio ipsius, certè conficitur Sacramentum (a). An autem graviter peccet minister se voluntariè distrahens in Sacramentorum confectione, communis est sententia in ceteris Sacramentis venialiter peccare, modò errandi periculum absit; sed in Eucharistiæ consecratione dicunt *Conc. et Tambur.* (adversùs *Croix et Mazz.*) graviter peccare (b).

2. — Notandum 2. certum esse non sufficere intentionem habitualement ministri, et tantò minùs interpretativam, sed requiri actualement, aut saltem virtualement. (Quænam autem sit actualis, et quænam virtualis aut habitualis, aut interpretativa, vide in *Examine* n. 9.). Sufficit tamen intentio *Coacta*, nempe timore extorta, qui timor non tollit voluntarium. Non obstat autem ministri error circa personam, v. g. putans absolvere unum, et absolvit alium (c). Hæc certa sunt; quod dubitatur, est, an sit validum Sacramentum collatum cum materiâ et formâ, sed sinè intentione faciendi, quod facit Ecclesia? Lutherus universè affirmabat, etsi actio ex joco fiebat; sed hoc à Trid. *Sess. 7. Can. 11.* proscriptum fuit. Alii verò, ut *Gonet, Juvenin, Contens. Serry, Milante* etc. affirmant, cum actio seriò ponitur. Sed vera sententia docet necesse esse intentionem ritum sacramentalem exercendi, quem Ecclesia à Christo Domino edocta facere intendit; ità *Bellarmin. Suar. Vasq. Tourn. Petroc. Conc. Antoin. Salmant. Lugo, Bon.* et alii innumeri cum Bened. XIX (d). *Cardinalis Bellarminus* dicit contrariam opinionem nihil ab illâ Novatorum distare; *Card. de Lugo.* pariter dicit illam ab omnibus rejici, et non multum differre à Lutheri errore; et *P. Vasq.* vocat jam damnatam. Contrà nostra sententia primò probatur ex Trid. *sess. 14. c. 16.* ubi dicitur nulla esse absolutio sacramentalis, si *Sacerdoti animus seriò agendi, et verè (nota) absolvendi desit.* Igitur præ-

---

(a) *Lib. 6. n. 14. et lib. 4. n. 177. v. 3. Ratio; et Croix l. 6. num. 85.* — (b) *Ibid. v. Utrum.* — (c) *lib. 6. num. 18. v. Sufficit.* — (d) *De Synod. l. 7. c. 4. n. 9.*

ter actionem, etiam seriò positam, necesse est intentio absolvendi. Præterea probatur ex Propositione 28. ex damnatis ab Alexan. VII. quæ dicebat: *Valet Baptismus collatus à Ministro qui omnem ritum externum formamque baptizandi observat, intus verò in corde suo apud se resolvit, non intendo facere quod facit Ecclesia.* Nec valet dicere Propositionem loqui de ritu externo jocosò, quia talis Propositio non erat hæreticorum quæ jam damnata fuerat à Tridentino, sed erat Catholicorum, inter quos nemo unquam dixit sufficere ritum jocosum. Ratio autem principalis nostræ sententiæ est illa, quam adducit S. Thomas (a), nempe quòd actio cujuslibet Sacramenti ad plura referri potest, v. g. ablutio in Baptismo potest referri ad extergendas aut corporis maculas, aut illas animæ, idèque necessaria est ministri intentio, quæ actionis illius finem determinet, faciendi quod facit Ecclesia; alioquin, si quis puerum lavaret solo fine ne sordidum illum videret, et diceret *ego te baptizo, sive lavo in nomine Patris etc.* jam hìc verus esset baptismus in Adversariorum sententiâ, quod non video quomodò dici possit. Hinc Angelicus alibi (b): *si minister non intendat Sacramentum conferre, non perficitur Sacramentum*; saltem sapienter dicit Benedict. XIV. loco cit. Sacramentum juxta contrariam opinionem collatum illicitè esset collatum, et saltem certè sub conditione repetendum esset (c).

3. — Notandum 3. licere in casu necessitatis sub conditione Sacramenta conferre; et non solum Baptismum, ut expressum est in Cap. 2. de Bapt., sed cetera alia, ut dicunt communiter *Castr. Suar. Coninch. Habert, Ronc. Salm.* etc. contra *Juven.* et non tantum in casu necessitatis, sed quoties adest gravis utilitas, aut justa causa, ut etiam communiter AA. citati fatentur contra *Antoine.* Contra sinè justâ causâ esset culpa gravis; licet *Tourn. et Salm.* non damnent mortali Confessarium absolventem sub conditione, si poenitens est dispositus, pro

(a) 3. p. q. 94. c. 8. — (b) Op. 8. dixit. — (c) lib. 6. num. 20. ad 23.

#### 4 *Tract. 14. De Sacramentis in genere, etc.*

majori cautione suâ, licet dispositum illud judicaret (a). Necesse non est autem ut conditio exprimat, sufficit si mente ponatur, ut communiter *Castrop. Tourn. et Salm. (b)*.

4. — Notandum 4. non esse denegandum Sacramentum occulto peccatori publicè illud petenti, ut docet *S. Thomas (c)*, et ut exprimitur in *Cap. si Sacerdos de off. Jud. Ord.* Excipitur ordo, quem etiam pro occultis potest Episcopus denegare, ut *Tom. III. Append. III. de Exam. num. 20.* contra debet denegari peccatori publico, etiam publicè petenti (d). In dubio autem peccati et poenitentiae: si peccatum est certum et poenitentia dubia, etiam denegandum est; secus autem si delictum est dubium (e). Si peccatum non est simpliciter publicum, sed est notum majori parti praesentium, et tantum unus vel alter probus nescit, probabiliter etiam potest denegari Sacramentum, ut dicunt *Croix et Diana*; sed probabilius non debet denegari, ut tenent *Suar. et Bonac.* vide dicta *Tom. I. Tr. XI. n. 11. (f)*. Sed si peccator petat Sacramentum in loco ubi delictum est occultum, licet alibi esset publicum, dicimus cum *Cabass. Soto, Vasq.* etc. adversus alios non posse denegari, quia in eo casu eadem evenirent inconvenientia, ac si denegaretur Sacramentum peccatori, cujus delictum nullibi est publicum (g).

5. — Notandum 5. quod ut praescribit *Rit. Rom. (de Sacr. Euch.)* debet denegari Communio publicis peccatoribus, quoties non constat etiam publicè de eorum poenitentia, et non prius quam scandalo aliis praestito consuluerint. Cui tamen, dicunt *Possevinus, Sancius, Busemb. et Croix* sufficere Confessionem coram multis factam, ita ut brevè sit manifestanda aliis: modò non adsit occasio proxima auferenda, nam si talis occasio adest, publicè jam nota, non debet dari publico peccatori Communio, nisi remotâ occasione (h). An autem Sacerdos possit

---

(a) n. 27. et 28. — (b) n. 29. — (c) 3. p. q. 80. a. 6. ad 7. —  
 (d) lib. 6. n. 50. — (e) lib. 6. n. 48. — (f) n. 45. — (g) n. 46. —  
 (h) n. 47. et 48.



timore mortis præbere peccatori publico Communionem; admittunt *Bonac. Croix* etc. Sed nos cum *Ledesma, Conc.* et aliis negamus, quia debet evitari potius Sacramenti injuria, quam proprium damnum. Nec obstat dicere quod cum jam possit Minister (ut supra dictum est) Communionem præbere peccatori occulto, ad vitandam ejus infamiam, tanto magis ad vitandam mortem propriam. Respondetur quod in tantum potest præberi peccatori occulto Communio ut vitetur illius infamia, in quantum ejus infamia redundaret in damnum commune aliorum proborum, qui perspicientes peccatorem illum publice propter peccatum occultum esse diffamatum, possent facilius terreri à Communionem, timore, ne ab aliquo imprudenti Sacerdote expellerentur. Sed hæc ratio evitandi publicum damnum non procedit in casu nostro (a). Vide etiam *Tract. XV. num. 15.*

6. — Notandum 6. quod Parochus non potest licite assistere Matrimonio sponsorum qui sunt publici peccatores, ut recte dicit *Bened. XIV. (b)* contra *Laym. Lug. Croix* etc. qui dicunt quod Parochus tenetur ex sui officii munere assistere, et quod assistentia talis sit pure materialis. Nos verò dicimus sponso in tali statu non habere jus ad Parochi assistentiam exquirendam, ideòque cum ille licite suam assistentiam possit denegare, tenetur denegare, ne illorum sacrilegii particeps fiat. Et eadem ratio currit de testibus; sed amplius Parocho obstat quod ille tenetur ex justitiâ impedire peccato suorum ovium (c). Et hinc advertendum quod juxta Decretum Clementis XI. confirmatum à Benedicto XIV. Parochus non debet ad publicationes procedere nisi prius examinet sponso, et sufficienter eos in rebus fidei instructos reperiat (d). An verò licite possit sponsa nuptias contrahere et consequenter Sacramentum ministrare (ex verâ sententiâ quod sponsi sint Matrimonii ministri, ut probabimus *Tr. XVII. n. 28.*) sponso publico peccatori, admit-

(a) *Lib. 6. n. 49.* — (b) *De Syn. l. 8. c. 14. n. 5.* — (c) *n. 54.* — (d) *de Synod. l. 8. c. 14. n. 5.*

#### 4 *Tract. 14. De Sacramentis in genere, etc.*

majori cautione suâ, licèt dispositum illud judicaret (a). Necesse non est autem ut conditio exprimatur, sufficit si mente ponatur, ut communiter *Castrop. Tourn. et Salm. (b)*.

4. — Notandum 4. non esse denegandum Sacramentum occulto peccatori publicè illud petenti, ut docet *S. Thomas (c)*, et ut exprimitur in *Cap. si Sacerdos de off. Jud. Ord.* Excipitur ordo, quem etiam pro occultis potest Episcopus denegare, ut *Tom. III. Append. III. de Exam. num. 20.* contrà debet denegari peccatori publico, etiam publicè petenti (d). In dubio autem peccati et pœnitentiæ: si peccatum est certum et pœnitentia dubia, etiam denegandum est; secùs autem si delictum est dubium (e). Si peccatum non est simpliciter publicum, sed est notum majori parti præsentium, et tantum unus vel alter probus nescit, probabiliter etiam potest denegari Sacramentum, ut dicunt *Croix et Diana*; sed probabilius non debet denegari, ut tenent *Suar. et Bonac.* vide dicta *Tom. I. Tr. XI. n. 11. (f)*. Sed si peccator petat Sacramentum in loco ubi delictum est occultum, licèt alibi esset publicum, dicimus cum *Cabass. Soto, Vasq.* etc. adversus alios non posse denegari, quia in eo casu eadem evenirent inconvenientia, ac si denegaretur Sacramentum peccatori, cujus delictum nullibi est publicum (g).

5. — Notandum 5. quòd ut præscribit *Rit. Rom. (de Sac. Euch.)* debet denegari Communio publicis peccatoribus, quoties non constat etiam publicè de eorum pœnitentiâ, et non priùs quàm scandalo aliis præsedito consuluerint. Cui tamen, dicunt *Possevinus, Sancius, Busemb. et Croix* sufficere Confessionem coram multis factam, ità ut brevè sit manifestanda aliis: modò non adsit occasio proxima auferenda, nam si talis occasio adest, publicè jam nota, non debet dari publico peccatori Communio, nisi remotâ occasione (h). An autem Sacerdos possit

---

(a) *n. 27. et 28.* — (b) *n. 29.* — (c) *3. p. q. 80. a. 6. ad 7.* —  
 (d) *lib. 6. n. 50.* — (e) *lib. 6. n. 48.* — (f) *n. 45.* — (g) *n. 46.* —  
 (h) *n. 47. et 48.*

timore mortis præbere peccatori publico Communionem; admittunt *Bonac. Croix* etc. Sed nos cum *Ledesma, Conc.* et aliis negamus, quia debet evitari potius Sacramenti injuria, quam proprium damnum. Nec obstat dicere quod cum jam possit Minister (ut supra dictum est) Communionem præbere peccatori occulto, ad vitandam ejus infamiam, tantò magis ad vitandam mortem propriam. Respondetur quod in tantum potest præberi peccatori occulto Communio ut vitetur illius infamia, in quantum ejus infamia redundaret in damnum commune aliorum proborum, qui perspicientes peccatorem illum publicè propter peccatum occultum esse diffamatum, possent facilius terreri à Communionem, timore, ne ab aliquo imprudenti Sacerdote expellerentur. Sed hæc ratio evitandi publicum damnum non procedit in casu nostro (a). Vide etiam *Tract. XV. num. 15.*

6. — Notandum 6. quod Parochus non potest licitè assistere Matrimonio sponsorum qui sunt publici peccatores, ut rectè dicit *Bened. XIV. (b)* contra *Laym. Lug. Croix* etc. qui dicunt quod Parochus tenetur ex sui officii munere assistere, et quod assistentia talis sit purè materialis. Nos verò dicimus sponso in tali statu non habere jus ad Parochi assistentiam exquirendam, ideòque cum ille licitè suam assistentiam possit denegare, tenetur denegare, ne illorum sacrilegii particeps fiat. Et eadem ratio currit de testibus; sed ampliùs Parocho obstat quod ille tenetur ex justitià impedire peccato suorum ovium (c). Et hìc advertendum quod juxta Decretum Clementis XI. confirmatum à Benedicto XIV. Parochus non debet ad publicationes procedere nisi priùs examinet sponso, et sufficienter eos in rebus fidei instructos reperiat (d). An verò licitè possit sponsa nuptias contrahere et consequenter Sacramentum ministrare (ex verà sententià quod sponsi sint Matrimonii ministri, ut probabimus *Tr. XVII. n. 28.*) sponso publico peccatori, admit-

---

(a) *Lib. 6. n. 49.* — (b) *De Syn. l. 8. c. 14. n. 5.* — (c) *n. 54.*  
 — (d) *de Synod. l. 8. c. 14. n. 5.*

## 6 *Tract. 14. De Sacramentis in genere etc.*

tunt *Sanch. Lugo, et Croix*, dicentes sponso in hoc se haberi ut privati contrahentes; in Matrimonio enim directè initur contractus, indirectè Sacramentum fit; sed hæc ratio non suadet, cùm hujusmodi contractui annexa est etiam Sacramenti administratio. Undè puto tantùm dici posse quòd præfata administratio, ut à Ministris ad id non consecratis, non esset grave peccatum pro ipsis, ut probabiliter tenent *Gonet, Suar. Tourn. Habert, Juven. Natal. Alex. Conc. Salm.* etc. licèt opinio opposita, quòd sit grave, *Pontii, Lug. Navar. Vasquez, Contin. Tourn. Croix* etc. mihi videtur probabilior (a), ut dicetur *Tom. III. Appen. III. n. 17*. Notandum est autem Matrimonia cum Hæreticis esse ab Ecclesiâ vetita (b). Cetera ad Sacramentorum in genere notitiam spectantia notabuntur in præfatâ *Append. III. Cap. 1*.

## CAPUT II.

### *De Sacramento Baptismi.*

## PUNCTUM I.

### De Materiâ, Formâ, et Ministro Baptismi.

*Quotuplex est Baptismus 7. De materiâ remotâ 8. De proximâ : et an possit abscindi mater 9. An possit baptizari proles in utero etc. et in quo membro etc. 10. 11. et 12. An requiratur trina ablutio 13. De formâ 14. De Ministro 15. De ordine Ministrorum 16. De exteris qui baptizantur 17. De Baptismi dilatione : et de Baptismo domi etc. 18.*

7. — **B**APTISMUS communiter dividitur in *Fluminis, Flaminis, et Sanguinis*. Dicitur *Fluminis*, nempè aquæ, et de hoc est hîc sermo, et hîc propriè est Sacramentum; *Flaminis* nempè Spiritûs Sancti, qui vocatur *Flamen*, cùm alludatur ad ad-

---

(a) *Lib. 6. num. 32.* — (b) *num. 56. et 1044.*

**Cap. 2. Punct. 1. De Materia, Forma, etc. 7**

ventum Spiritus Sancti super Apostolos die Pentecostes in flaminis seu venti specie; et propriè intelligitur animæ conversio ad Deum, à Divino spiritu afflata desiderio expresso aut tacito veri Baptismi; et hoc desiderium etiam ad salutem satis est, cum non possit Baptismus in re haberi: *Sanguinis* deniquè intelligitur mors pro Fide tolerata; aut etiam pro aliâ virtute christianâ, ut docet *S. Thomas* (a), et reverà Ecclesia in Martyrolog. die 28. Febr. ut Martyres veneratur, aliquos Sanctos in servitio peste infectorum defunctos. Et hoc martyrium æquiparatur Baptismo; quia etiam remittit culpam et pœnam; quoties tamen cum peccatorum contritione sociatur, aut amore puro ergà Deum prædominante; nam ad martyrium non sufficeret sola attritio sinè amore prædominante, ut tenendum est cum *S. Thomâ, S. Bonav. Scoto, Laym. Petrocor.* etc. contrà *Wigandt, Viva* et alios (b). Notandum hìc obiter non licere se offerre Martyrio sinè speciali Spiritus Sancti instinctu, excepto si aliter in aliquo casu se non offerre gravi esset scandalo, ut dicunt communiter DD. Undè dicit *Laym.* peccare qui inter hæreticos versans vellet in quadragesimâ abstinere à carnibus cum periculo se prodendi esse Catholicum et occidi (c).

8. ¶ Sed descendamus nunc ad loquendum I. de Materiâ Baptismi. Materia *remota* licita est aqua consecrata; secus graviter peccaret si aliam aquam extrà necessitatem adhibere vellet, ut dicunt communiter DD. ex *Clem. un. de Bapt.* Ceterum in Baptismo privato probabile est licere uti aquâ non consecratâ; *Croix, Gobat. Pasqual. et Quintan.* (d). Materia *remota* valida est quælibet aqua naturalis, licet sit mineralis, aut marina, aut ex glacie soluta, aut cum aliâ materiâ, sed minoris quantitatis, permixta, quæ retineat tamen usum communem aquæ. Contrà non est materia valida vinum, lac, succus ex fructibus; aut herbis extractus, nec aqua dum est congelata (e). Est autem materia dubia jus, lixivium, aut cerevisia (f); item aqua distillata, intellige arte alchy-

(a) 2. 2. q. 124. a. 5. — (b) l. 6. num. 95. ad 100. — (c) n. 101. — (d) l. 6. n. 102. — (e) n. 102. et 103. — (f) n. 103.

## 8 Tract. 14. De Sacramentis in genere , etc.

micâ ex floribus aut herbis etc. educta , quia aqua naturalis simpliciter distillata , rosis aut aliis floribus in aquâ infusis , est vera aqua (a) ; item saliva , aqua congelata , et humor ex arboribus manans (b). Est etiam materia dubia una , vel altera gutta aquæ (c). Materiâ dubiâ non licet uti , nisi in casu necessitatis , et appositâ conditione ; sed advertendum , quod in necessitate tenetur Minister uti materiâ dubiâ , licet opinio pro Sacramenti valore esset minùs , imo tenuiter probabilis , ut communiter docent *Suar. Caj. Antoine , Holzm. Viva* , et alii (d). Vide Tract. XVI. n. 36. ad 38. quid dicetur de absolutione impetendâ peccatoribus moribundis sensibus destitutis.

9. — Materia proxima Baptismi est eadem ablutio , quæ trifariâ fieri potest per immersionem , aspersionem , et infusionem , qui modus hodiè est in praxi. Si puer in flumen projiciatur cum prolatione Formæ , probabiliter est validum Baptismum : sed hoc nunquàm licet , quia non licet aliquem occidere , ut illum baptizet , et licet deindè ille sinè Baptismo moriturus esset : et sic nec licet , ut docet *S. Thomas* (e) , ut baptizetur proles , occidere matrem ; aut eam incidere cum proximo , aut probabili periculo mortis illius , licet esset moribunda , et consentiret. Dumtaxat licitum est incidere matrem postquàm certè animam efflavit. Et hic *Croix* advertit hoc circâ praxim , nempe , ut statim post matris mortem aperiatur os ejus , ut si proles vivit , non suffocetur (f). ait *Cangiamila* (g) cum *Possev. Gob.* etc. peccare graviter parentes qui negligunt efficere ut fiat incisio , et etiam Chirurgos qui illam negligunt , aut differunt. Et addit Parocho totis viribus efficiendum esse quin mater sepeliatur antequàm fiat incisio ; secùs dicit quod ipse nescit illum ab irregularitate excusare , cum ex officio teneatur impedire mortem infantis. Sed huic opinioni nescio acquiescere , cum enim in

---

(a) n. 104. — (b) *Ibid.* d. 2. 3. 4. — (c) *Ibid.* d. 5. et n. 107. Q. V. — (d) n. 103. ad III. in fine — (e) 3. p. q. 68. a. 11. ad 3. — (f) l. 6. num. 105. et 106. — (g) *Cangiam. Embriologia* l. 2. cap. 15. num. 1.

*Cap. 2. Punct. 1. De Materia, Forma, etc. 9*

tali casu non sit certa infantis vita, ne certa quidem est mors ejus. Præterea inquit ( *cap. 10.* ) quòd si alter reperiatur, etsi non Chirurgus, qui vires habeat faciendi incisionem, tenetur illam operari. Quin etiam dicit *Cangiam.* ( *lib. 4. c. 6. n. 2.* ) cum infans non adhuc integrè prodiit ex utero, Baptismum dandum esse non à Parocho, sed ab obstetrice. Præterea idem ( *loc. cit.* ) cum *Gob.* et *Quintanad.* notat signa proximæ mortis, nempe 1. Si infans nascitur absquè eo quòd vagiat, et ploret. 2. Si parùm respirat, et livet, præsertim facies. 3. Si nascitur multo labore, et auxilio obstetricis. 4. Si nascitur nondùm menses septem conceptus ( et idem dicitur de omni foetu abortivo ). 5. Si cranium habet nimis tenerum et compages nimis apertas, aut alias partes disjunctas. Et idem dicendum de infantibus illegitimis, quibus timetur, ne occidantur à parentibus, aut saltem exponantur in locis, ubi deest rota. Sed si mater esset morti damnata à justitiâ, vide in *Opere* (a).

10. — Quæritur 1. An liceat in necessitate baptizare prolem in matris utero, medio aliquo instrumento, quo possit aqua attingere puerum? Negant hoc *Gotti*, *Conc. Juvenin*, etc. citantes *S. Thomam* (b), qui dicit: *Non debet aliquis baptizari priusquàm ex utero nascatur*: Ratio istorum est, quia nemo potest renasci per Baptismum juxtà Evangelium, *Nisi quis renatus fuerit etc. Jo. 5.* nisi priùs fuerit natus. Sed valdè probabiliter affirmant *Suar. Pignatol. Tourn. Elb. Holzm. Coninc. Croix*, et alii, quibus valdè adhæret *Benedict. XIV.* (c), quia hujusmodi infans cùm jam sit viator est capax Baptismi, et qui vivit in utero matris etiam potest dici natus, ut de Verbo Incarnato dictum fuit: *Quod in eâ natum est, de Spiritu Sancto est, Matth. 1.* Nam, ut dicit *S. Thom.* (d), duplex est carnalis nativitas, prima in utero, secunda extrà uterum. Et hoc clariùs apparet ex *cap. 4. de Bapt.* ubi dicitur; *In carnali, generatione, quâ proles ex viro, et fœminâ nascitur*, etc. Notandum

---

(a) num. 106. v. *Omnino*. — (b) 3. p. q. 68. a. 11. — (c) *De Syn. l. 7. num. 2.* — (d) 4. d. 12. q. 1. ad 2.

quòd non dicitur dumtaxat *ex fœminâ*, sed *ex viro*, *et fœminâ nascitur*. Igitur rectè dicitur solâ generatione nasci, et ità intelligi potest quòd proles nascatur etiam à patre: nec à nostrâ sententiâ Angelicus aliud sentit, dùm loco priùs citato (a) dicit quòd in tantum non potest baptizari in utero, in quantum supponit Sanctus quod *antequàm nascatur, non potest aliquo modo ablui aquâ*; igitur si potest ablui, potest baptizari. Sed quòd possit aquâ attingi infans in utero, dicit Benedictus, hodiè ex medicorum et obstetricum iudicio constare. Et præterea citat *Silvestrum, et Vasq.* qui dicunt (et hoc putat probabile etiam *Laym. cum Ang. Armil. et Præpos* etc.) posse baptizari infantem etiam adhuc involutum secundinâ, quæ putatur tanquàm infantis pars, cùm illius umbilico annexa sit. Undè concluditur in casibus prædictis, cum imminet mortis periculum, semper prolem sub conditione esse baptizandam (b). Advertendum autem hìc cum *S. Thomâ* (c) in necessitate, si infans non adhuc ex utero egressus sit, et baptizetur in capite, non esse ampliùs rebaptizandum, quicquid dicat *Sambovius*, dùm idem dicit *Ritual. Rom.*, sed si in aliâ parte est baptizatus, tunc repetendus est Baptismus sub conditione (d).

11. — Quæritur 2. An possit dari Baptismus infundendo aquam super solis capillis infantis? Negant *Bonac. Concin.* etc. Sed communiùs id admittunt *Lugo, Tol. Valent. Conc. Ledesm. Graff.* etc., quia licèt capilli non sint animati, non sunt tamen pura excrementa, sed veræ corporis partes; ut est etiam cutis exterior, quæ nec est animata, et tamen super ipsâ infunditur aqua Baptismi. Quare in casu necessitatis benè potest, et debet dari Baptismus super capillis, sub conditione: et tantò magis debet dari super pedibus, aut digitis, et aliis partibus minimis corporis. Baptismus verò super vestibus est certè nullus (e).

---

(a) 3. p. q. 68. a. 11. — (b) *Lib. 6. n. 107.* — (c) *cit a. 11. ad 4.* — (d) *cit. num. 107. v. Hic autem. Ibid. Qu. III.* — (e) *lib. 6. Ibid. Qu. III*



Cap. 2. Punct. 1. De Materia, Forma, etc. 11

12. — Quæritur 3. An sit certè validus Baptismus collatus non jam in capite, sed in pectore, in scapulis aut aliis corporis partibus principalioribus? communior sententia affirmat; sed dubitant *Anacl. Conc. et Platel.* et dubitat etiam *S. Thomas (a)*. Undè meritò dicunt *Tourn. Viva, Salm. Trull. Ledesm.* licitè posse rebaptizari sub conditione, *Si non es baptizatus*, etc. (b).

13. — Quæritur 4. An in baptismo certè requiratur trina ablutio? Quoad validitatem, certum est unam sufficere, ut ex *Can. de Trina, D. 4. de consecr.* ubi *S. Gregorius* dicit, *ter vel semel immergere*. Cæterùm præcipit Rituale, ut ablutio sit trina; et hoc præceptum dicimus cum *S. Thomà (c)*, et aliis (contrà *Holzm.*) esse grave, cùm materia sit gravis; in illâ enim exprimitur mysterium SS. Trinitatis. Et hîc advertendum cum *Laym. Reg. Busemb.* non esse terminandam formam antè tertiam ablu-tionem (d).

14. — H. CIRCÀ formam Baptismi in Ecclesia Latina: *Ego te baptizo in nomine Patris, et Filii, et Spiritûs Sancti*; In Græcâ autem est: *Baptizetür servus Christi in nomine Patris, etc.* Damnata fuit ab Alexandro VIII. Propos. 27. quòd dudùm sufficiebant sola verba *in nomine Patris, etc.* Advertendum quòd mutatio, cùm est substantialis (nempe cùm corrompitur sensus formæ), tunc redditur invalidus Baptismus; non autem cùm est accidentalîs, nempe cùm servatur sensus. Quapropter est mutatio accidentalîs, et per consequens est validus Baptismus, 1. si mutatur idioma aut pronunciatur forma cum verbis diversis idiomatis, nam in Sacramentis non requiritur, ut minister aut suscipiens intelligat verba, sed sufficit, ut illa sint per se significativa. Et in conferendo Baptismo melius est (ut dicunt multi DD.) ut in necessitate mulieres, et rudes adhibeant linguam maternam, ne errent. 2. Si pro *Ego te baptizo*, diceret *ego te lavo, te purgo, etc.*, talis mutatio non excederet veniale, ut dicunt

---

(a) 3. p. q. 68. a. 11. ad 4. — (b) n. 107. Qu. V. — (c) q. 66. a. 8. — (d) n. 107. q. 5.

12. *Tract.* 14. *De Sacramentis in genere etc.*

*Laym. Bonac. et Busemb.* Sed si diceret *in nomine Genitoris, et Geniti*, etc. aut pro *Fili* diceret *Jesu Christi*, tunc saltem esset dubius Baptismus (a). 3. Si diceret *Battizo* pro *Baptizo*, aut *Fili* pro *Filii*, aut *Patria, et Filia, et Spiritus Sancta*, pro *Patris*, etc.; nam talis Baptismus validus fuit declaratus à Zacharia Papa, *C. Retulerunt, de Consecr. d. 4. 4.* Si verba transponuntur, dicendo, *Te ego baptizo, in nomine Filii, et Patris, etc.* (b) 5. Si dicitur *in nomine Patris omnipotentis, et Filii unigeniti, etc.* aut si quis ex importuna devotione adderet, et *in nomine Mariæ Virginis*. Contrà esset invalidus si diceretur, *Ego te baptizo in nominibus Patris*, aut *in nomine SS. Trinitatis*; aut *in nomine trium Divinarum Personarum*. Si autem diceretur, *in nomine Patris, in nomine Filii, etc.* Baptismus esse dubium tenent *Bonac. Tournel. Busemb. Salm. etc.* (c). 6. Si omitteretur verbum *Ego* aut *Amen*; sed si omitteretur *Te*, juxta communem sententiam esset invalidus. Si autem omitteretur particula *Et*, dicendo *in nomine Patris, Filii, Spiritus Sancti*, alii dicunt esse validum, alii invalidum, propterea sub conditione esset repetendum; sed si particula *Et* poneretur antè *Spiritus Sancti*, non dubito cum *Croix*, quin esset validus Baptismus, quia juxta usum communem pro nominum distinctione sufficit, ut *Et* præponatur ultimo nomini. (d) Dubius est etiam Baptismus, si omittatur particula *In*, quam volunt esse essentialem *Sot. Navar. Conc. etc.*; nam aliquandò præfatâ particulâ sublatâ, sensus remanet æquivocus, si dicatur forma ex auctoritate SS. Trinitatis, aut invocando tres Divinas Personas. Sed huic se opponunt *Bonac. Coninc. Salmanticens. etc.* dicentes non esse de essentiâ, quia etiam adjectâ particulâ *In*, adhuc sensus remanet æquivocus (e). Est certè invalidus Baptismus tantum collatus *in nomine Christi*, ut docent omnes cum *S. Thomâ* (f) ex c. *Si reverà 30. de Consecr. Dist. 4.* Nec obstat textus (Act. 8.) *in nomine Jesu Christi baptizantur*

---

(a) n. 108. et 109. — (b) n. 110. — (c) n. 111. — (d) n. 112.  
— (e) *Ibid.* d. 2. — (f) 3. p. q. 66. a. 6.

*virī ac mulieres*, quia hoc intelligebatur in quantum ille Baptismus erat institutus à Jesu Christo, non autem à Baptistâ : contrà ex iisdem Actibus probatur, quod exprimebantur nomina Personarum ; dùm illis, qui dicebant ne audivisse quidem utrùm Spiritus Sanctus adesset, responsum fuit : *in quo ergò baptizati estis ? c. 19. 3.* nec obstat textus *c. A quodam, de Consecratione, dist. 4.* ubi Nicolaus Papa dixit : *Si in nomine Sanctæ Trinitatis, vel Christi baptizati sunt, rebaptizari non debent.* Nam, ut explicat Glossa verbum Trinitatis, Papa dicendo *in nomine SS. Trinitatis*, non intendebat expressionem illius Personarum explicitam excludere (a).

15. — III. Circa Ministrum, notandum 1. quod validus est Baptismus à quocunque viatore, etiam hæretico, aut infideli collatus (b). Sed extrà necessitatem non potest Baptismus licitè conferri nisi à solis Sacerdotibus. Imò Minister ordinarius Baptismi est proprius Pastor, nempe Episcopus, aut Parochus, qui cæteroquin possunt aliis Sacerdotibus, et in horum defectu, etiam Diaconis administrationem committere ; sed Diaconi sinè commissione in necessitate non possunt solemniter baptizare ; et hoc faciendo (juxtà sententiam probabiliorum *Layman, Bonac. Tournely, Habert, etc.*) incurrunt irregularitatem ; quandoquidem Diaconi non ordinantur ad baptizandum, nisi ex Sacerdotis commissione. Non dubitatur autem, quin Clerici non Diaconi solemniter baptizando incurrant irregularitatem ; ex *c. Si quis 1. de Cler. non ordin.* etc. Contrà probabilius dicunt *Lugo, Castropal. Bonac. Laym. etc.* (contrà *Sotum, Suarez, Conc. etc.*) Laicos solemniter baptizando non fieri irregulares ; nam licet textus sic *generaliter loquatur*, dicendo, *Si quis, etc.*, ea verba tamen debent referri ad titulum qui tantum de Clericis tractat (c). Ceterum certum est extrà necessitatem baptizantem, sinè proprii Pastoris commissione graviter peccare. Sufficit nihilominus in hoc licentia

---

(a) num. 112. Dub. 3. — (b) l. 6. num. 113. — (c) num. 116.

14 *Tract. 14. De Sacramentis in genere, etc.*

præsumpta, ut dicunt *Salmanticens. cum Mirand. et Henrig. (1)*.

16. — Notandum 2. Circà Ministrorum ordinem in baptizando (ex Ritual. Roman.) Sacerdotem esse præferendum Diacono : Diaconum Subdiacono : Clericum Laico : virum deniquè mulieri ; ratione honestatis tamen aliquandò debet viro præferri mulier (ideòque Parochi debent benè examinare Obstetrices, ut dictum est *Tom. I. Tract. VII. n. 45.*), aut quia mulier esset meliùs viro instructa ; et cùm vir esset pater baptizandi, tunc omninò debet mulier baptizare, dùm parentibus hoc est prohibitum extrà necessitatem extremam (b). Certum est autem graviter peccare laicos qui baptizant coram Sacerdote ; c. 21. *de Cons-cr. dist. 4.*, excepto si Sacerdos esset excommunicatus, ut rectè dicunt *Suar. Castropal. Navarr. Silvest. et Salmanticens. (contrà Sot. et Sayr.)* quia excommunicato concessum est baptizare in solo casu necessitatis, quæ non adest quoties potest alius haberi (c). Sed si baptizaret coram Clerico etiamsi Diacono, probabiliter non peccaret, nisi venialiter (d). Proculdubio autem graviter peccant parentes qui extrà necessitatem extremam permittunt filios à Prædicantibus baptizari, licèt hoc efficerent timore Edicti Principis (e).

17. — Notandum 3. Nec Episcopos, nec Parochos posse baptizare extrà Diœcesim, aut Parochiam existentes, sinè proprii Pastoris commissione. Quare certè graviter peccant parentes, qui filios sinè illorum licentiâ ad alios afferunt baptizandos (f). Peregrini et vagi qui non habent proprium domicilium possunt in quâcunque Ecclesiâ baptizari ; ita *Barbosa, Salmant. et Croix, ex cap. Nec numerus . . . qu. 3.* Sed hîc quæritur, an exteri debeant baptizari, et alia Sacramenta suscipere à Parocho proprio domicilii, si parùm distat, aut possint ea suscipere à Parocho loci, ubi incolunt et quasi domicilium contraxerunt ? Notandum hîc contrahi

---

(a) *Ibid. ad 11.* — (b) *n. 119.* — (c) *Ibid. dub. 1. et 2.* — (d) *Ibid. dub. 3. et 4.* — (e) *n. 117.* — (f) *num. 114.*

domicilium ab eo qui in aliquo oppido habitat, non per modum transitus, sed per maiorem anni partem, aut animo ibi manendi maiorem, aut notabilem anni partem alicujus negotii, aut officii causâ, v. g. Medici, Mercatoris, hospitis, famuli etc. ita *Laym. Nav. et Lambert.* (a) cum communi ut asserit. Nunc veniamus ad quæsitum. Respondetur duas adesse probabiles sententias. Prima est *Ledes. Ang. Rodr. et Henriq.* etc. tenens Sacramenta suscipienda esse à Parocho proprii domicili, quia aliàs (ut dicunt) exterius haberet duas Parochias habitationis. Sed hæc ratio nihil convincit; undè probabilior, et communior est secunda sententia *Barb. Sanch. Silvest. Castrop. Pontii, Croix, Bonac. Salmant.* etc. cum pluribus Decisionibus Rotæ, quæ dicit posse suscipi Sacramenta à Parocho domicili, cum pro quasi domicilio jam quilibet sit subditus loci ubi habitat, ut habetur ex *capit. fin. de Paroch.* (b).

18. — Notandum 4. graviter peccare eos qui differunt diù Baptismum infantibus. Putant *Laym. et Castropal.* gravem esse dilationem ad mensem sine causâ, et cum causâ ad duos menses. Sed communior et probabilior sententia putat esse grave plerunque dilationem ultra 10. aut 11. dies (c). Notandum 5. esse vetitum sub gravi domi baptizare infantes solemniter, exceptis filiis Regum, vel Principum, ut dicitur in *Clementinâ unicâ, de Baptismo.* Et hujusmodi infantibus rectè dicunt *Sot. Castropal. Tol. Covar. Croix* etc. Baptismum debere solemniter conferri; cæremoniæ enim non sunt omittendæ nisi in solâ necessitate. Nomine *Principum* nonnulli DD. intelligunt omnes Barones; sed probabilius *Suar. Tournel. Roncag. Tambur. Elb.* etc. intelligunt illos tantum, qui dominio absoluto gaudent; idem tenet *Glossa* in cit. *Clementinâ* (ad verbum *Aliquos*), adducens *cap. Fundamenta*, 17. §. Proinde, de *Elect.* ubi dicitur: *Rex, Princeps, Marchio, Dux*, igitur Principes

---

(a) *Notif. 32. num. 9.* — (b) *Lib. 6. num. 115. edit. Ven.* — (c) *num. 118. v. Not. II.*

distinguuntur à Baronibus; ubi tamen introductum jam est domi baptizare filios Baronum, saltem Magnatum, benè ait *Croix* non facili damnandum; vide *numer. 30.* Notandum 6. nullum esse Baptismum, si alter applicat materiam, alter verò formam; DD. communiter cum *S. Thomà (a)*; et licèt adhibeatur forma Græcorum *baptizetur servus Christi* etc., quia semper subauditur verbum *Per me (b)*. Notandum 7. quòd si eodem tempore plures Ministri Baptismum conferrent infanti proculdubio graviter peccarent: sed quoad valorem Sacramenti, oporteret distinguere cum *S. Thomà (c)*: Si quilibet baptizare intendit ut concausa, nempe dependenter ab alio, Baptismus esset nullus; secùs autem, si quilibet intenderet baptizare ex se, ut pateriter accidit in consecratione Eucharistiæ, cum Neopresbyteri celebrant cum Episcopo *(d)*.

## PUNCTUM II.

### De iis qui baptizare possunt.

*Pœna rebaptizantium 19. De foetibus abortivis, et de filiis infidelium 20. Si parentes repugnant 21. An liceat vendere filios infidelibus 22. De Baptismo sub conditione 23. De infantibus expositis 24. De Baptizatis à laicis 25. Ab Hæreticis 26. Si Baptismus est dubius 27. Dispositiones ad Baptismum 28. De cæremoniis, et I. de aquâ consecratâ 19. II. De Ecclesiâ 30.*

19. — **N**OTANDUM 1. validè Baptizari infantes et perpetuò amentes; illos tamen qui aliquandò habuerunt usum rationis non posse, si priùs Baptismum non requisiverunt *(e)*. Notandum 2. quòd cùm repetitur Baptismus sinè justâ causâ, tam rebaptizans quam rebaptizatus, si est rationis compos, incurrunt irregularitatem, *cap. 2. de Apost.*

(a) 3. p. q. 67. a. 6. — (b) *lib. 6. n. 119.* — (c) *Loco cit. ad 4.* — (d) *l. 6. n. 120.* — (e) *n. 121.*

An autem idem sit de rebaptizantibus sub conditione sinè justâ causâ : duæ adsunt sententiæ probabiles ; negant *Suar. Castropal. Laym. Bonac. Anac. Pont. Tourn. Holzm. Salmantic. et Croix*, quia qui sub conditione rebaptizat, reverà non rebaptizat. Affirmant autem *Sot. Filliuc. Conc. Ren. Barbos. Sayr. et Lambert.* cum Catechismo Romano ; quia, ut dicunt isti, talis conditio apponitur in legis fraudem, ideòque habetur pro non appositâ (a).

20. — Notandum 3. Fœtus abortivos, semper ac non constet esse animâ destitutos (ut judicari debent illi qui non habent aliquam organorum dispositionem) semper baptizandos esse, sub conditione tamen ; potissimum cum inter peritos modernos hodiè cum plausu recepta sit opinio, quòd fœtus animetur aut in ipsâ conceptione, aut saltem post paucos dies (b). Notandum 4. ut præcipit Ritual. Rom. in solo casu necessitatis posse baptizari plures sub unâ formâ, dicendo, *ego vos baptizo etc.* (c). Notandum 5. quòd circà filios infidelium, Baptismus collatus est validus, licèt eis ministretur invitis parentibus, ut docet Benedictus XIV. in suâ *Instruct. ad Vicesgerentem*, et alii communiter cum auctoritate *S. Augustin.* quicquid dicant *Durand. et Catarin.* (d). Sed Notandum item circà hoc, quòd si parentes deficiunt à fide ad infidelitatem, licèt possunt eis auferri filii ; et sufficit quòd unus solus eorum prius fidelis fuerit, ut communiter dicunt *Suar. Layman. Roncag. Antonin. Salmanticens. et Croix* ; ceterum sicut est licitum baptizare filios hæreticorum his invitis, et etiamsi illi apud genitores remanendi fuissent, juxtâ sententiam probabiliorem *Layman. Croix, Aver. Gob. etc.* ; ita contrà non licebit baptizare filios infidelium invitis parentibus, præterquàm in casibus sequentibus ; 1. Si filius est jam rationis capax et Baptismum efflagitat, ut docet *S. Thomas* (e). Et advertendum

---

(a) num. 122. — (b) lib. 6. n. 124. — (c) *Ibid. ad. 6.* — (d) n. 126. v. *Quer.* — (e) 3. p. q. 68. a. 10.

quòd Ecclesia benè possit et debeat separare baptizatum à suis parentibus, ut dicunt *Castropal. Laym. Salmanticens. et Benedictus XIV.* facto declaravit loco cit. num. 29. ex cap. de *Judæis*, dist. 45. et in casu quo dubitatur an filius qui petit Baptismum sit vel ne rationis compos; post septennium debet baptizari, sed antè septennium expectandum est, ut ibidem dicit *Benedict.* et interim à parentibus debet segregari, et loco tuto custodiri (a). 2. Debet baptizari filius infidelium quoties in periculo est mortis. 3. Si filius est extrà curam parentem, nec timetur ne ad ipsos regrediat. Et idem currit pro filiis perpetuò amentibus; aut à parentibus derelictis aut expositis. 4. Si parentes in Christianorum captivitatem redacti sunt, aut filii eorum sunt capti in bello. 5. Si unus parentum consentit, ut infans baptizetur, licèt alter positivè repugnet (b).

21. — Sed hìc quæritur 1. An repugnante utroque parente infideli, liceat baptizari infans? Respondetur non licere, si filius relinquendus erit in illorum potestate, ut decrevit S. C. ex eo, quia adest certum periculum illius perversionis. Sed contrà casu quo infans abstrahatur à parentibus, est satis probabilis sententia *Scoli, Flas. Tournel. Est. Pichel. Mastr. Holzm.* et aliorum contrà *Gonet, Conc. Salm.* etc. quòd possit licitè baptizari, dùm parentes non possunt super filiis habere jus in eorum salutis æternæ detrimentum: et sicut potest auferri filius à parentibus, ut liberetur à morte corporali, tantò fortius, ut liberetur à morte animæ. Advertendum tamen quoad Hebræos, Julium II. justis rationibus prohibuisse, quominùs iis invitis sui filii baptizentur, antequàm ad usum rationis hi pervenerint (c).

22. — Quæritur 2. An liceat vendere parentibus infidelibus filios suos jam baptizatos. Negant *Hurt.*; sed communiter affirmant *Suar. Laym. Castropal. Vasq. Bonac. Conin. Filliuc.* etc. quia hoc expedit ad conservandam pacem communiter, aliter infideles difficulter restituerent christianos captivos, et

---

(a) *Lib. 6. n. 129.* — (b) *n. 126. ad 131.* — (c) *lib. 6. num. 132.*



Ecclesiæ magis incumbit, ut fideles fidem servant sartam tectam, quàm ut infideles eam amplectantur (a).

23. — Notandum 6. Quòd juxtà regulam generalem ut conferatur Baptismus sub conditione jam baptizato, requiritur rationale et prudens dubium de valore prioris Baptismi, dubium sive negativum sit, sive positivum (b), sicut explicatum est *Tom. I. Tract. I. n. 12.* Advertendum tamen quòd cum saltem unus testis ocularis de Baptismo collato testatur, non potest repeti, nisi cum adsunt testes contrarii qui positivè oppositum deponunt; ità communiter *Suar. Laym. Castrop. Bonac. Holzm. Salm.* etc. cum *Lambertini.* Advertendum item non esse baptizandos (ne sub conditione quidem) adultos à parentibus christianis natos, et inter fideles educatos, licèt nullus adsit qui de illorum baptismo testetur, ut exprimitur in *cap. Veniens 3. de Presbyt. non bapt.* ubi dicitur: *Et certè de illo qui natus est de christianis parentibus, et inter christianos est fideliter conversatus, tam violenter præsumitur quod fuerit baptizatus, ut præsumptio pro certitudine sit habenda, donec evidentissimis forsitan argumentis contrarium probetur.* Rectè tamen dicunt *Laym. et Busemb.* baptismum sub conditione esse conferendum adultis, etiam inter fideles nutritos, cùm eæ adsint conjecturæ, ut præsumere faciant verisimiliter eos non fuisse baptizatos. Imò S. C. ut refert *Zachar. (c)* pluries decrevit esse baptizandos sub conditione eos pro quibus nullum baptismi recepti signum haberi potest, nec parentum Matrimonii (d).

24. — Notandum 7. Circà infantes (si sint expositi, et scriptum sive habent, sive non, baptismi recepti) debent Baptizari sub conditione, quòties non constat de baptismo eorum, quia prudenter semper potest dubitari, ità *Nat. ab Alexandro, Petrocor. Conc. Roncagl. Holzm. Tourn. Henno,* et alii cum *Lambert.* qui ad hujus confirmationem producit *Conc. Mediolanen.* et declarationes S. C. et etiam *Rit. Rom.*

---

(a) n. 133. — (b) n. 134. — (c) l. 4. apud *Croix*, l. 6. p. 1. n. 310. — (d) lib. 6. n. 34. v. *Hic tamen.*

20 *Tract. 14. De Sacramentis in genere, etc.*

ubi dicitur : *Infantes expositi, si de eorum baptismo non constat, sub conditione baptizentur* (a).

25. — Notandum 8. Quòd infantes ab obstetricibus baptizati, aut à laicis, tunc solùm rebaptizandi sunt, cùm probabilis de errore habetur suspicio, ut communiter *Suar. Laym. Bonac. Conc. Holzm. Salmant. Croix*, etc. quicquid alii dicant : et ità declaravit S. C. (b). Secùs verò cum Parochus explorato laico, reperit illum sufficienter instructum, ut dicitur in Catechis. Rom. in eo casu tamen in Ecclesià suppleri debent cæremoniæ, ut præcipitur in Rit. Rom. In casu autem quo repetendus erit baptismus in adultis, non erit præmittenda confessio, sed tantùm contritio (c).

26. — Notandum 9. Baptizatos ab hæreticis non esse rebaptizandos, nisi cùm certum est, aut saltem prudenter dubitari potest, in aliquâ parte non servari requisita ab Ecclesià Catholicâ ad valorem Sacramenti, ut declaravit S. C. (d). Quod præcipuè accidit in baptizatis à Prædicantibus Lutheranis, et Calvinistis, ut advertunt *Tournely, Gobat, Dicast.* etc. quoniam aliqui ex illis utuntur aquis distillatis, alii solent in baptizando hunc morem servare, ut unus proferat formam, et alius applicet materiam; nonnulli infundunt aquam super vestes tantùm; aliique communiùs deficiunt in intentione (e).

27. — Notandum 10. Peccare Ministrum, si cùm rationabile dubium de baptismi collatione habetur, non baptizat (intellige sub conditione). Contrà cùm testis unicus oculatus habetur de baptismi collatione non potest repeti (f). Sat est conditionem mente apponere, modò non adsit scandalum in eâ occultandâ; sed semper tutius est eam exprimere : *Si non es baptizatus* etc. Et cùm baptizatur sub conditione non requiritur patrinus (g).

28. — Quoad dispositionem ad baptismum recipiendum requiritur 1. intentio saltem habitualis in adultis (quìà in amentibus, et pueris, ut dictum est, sup-

---

(a) n. 135. — (b) *Apud Zach. Adnot. ad Croix l. 6. p. 1. n. 323.*  
— (c) n. 136. — (d) *Apud Zach. ad Croix l. 6. p. 1. n. 323.* —  
(e) n. 137. — (f) *Ibid.* — (g) *Ibid. in fin. Res. 2.*

plet Ecclesia). Quare validè confertur baptismus illi, qui eum recipit, non ex mera vi, sed ex metu gravi, sicut etiam amentibus, et dormientibus qui priùs dùm apud se erant, illum petierunt. 2. Requiritur, ut rebus fidei calleant, juxtà id quod dictum est *Tom. I. Tract. IV. num. 3.* Requiritur 3. dolor de peccatis; et sufficit attritio sinè caritate prædominante, ut communissimè *Gonet. Can. Sot. Suar. Valent. Salm. et alii cum S. Thomà (a)*, qui dicit: *Ad hoc ut homo se præparet ad gratiam in baptismo, præexigitur fides, sed non caritas, quia sufficit attritio præcedens, etsi non contritio (b).*

29. — Cæremoniæ tandem, quæ debent adhiberi in baptismo, sunt 1. aqua consecrata, cùm baptismus est sollemnis, ut *num. 8.* Peccaret autem graviter qui sinè necessitate baptizaret omissis unctionibus Chrismatis, et Olei Catechumenorum, aut ungeret Baptizandum Oleis veteribus, ut communiter DD. ex *Car. Si quis de alio, dist. 4. et Rit. Rom.* ubi item præcipitur, ut si Oleum benedictum jamjam defecurum esset, et aliud haberi non posset, infundatur in benedictum aliud simplex olivarum, sed in minore quantitate. Propterea si, ut haberetur Oleum novum, expectandum esset per notabile tempus, v. g. pro 10. aut 11. dies, tunc potest conferri baptismus, et postea suppleri unctiones; et hoc etiam licèt præcisa necessitas non adesset: *Cum propter ætatis imbecillitatem (dicit Rituale loquendo de infantibus) infinita penè pericula illis impendant. Sed si abest necessitas, aut alia gravis causa, et infrà dictum tempus de facili possit haberi novum Oleum, differendus est Baptismus (c).*

30. — II. Baptismus conferendus est in Ecclesià; quare grave est conferri domi. Excipe 1. Si infans fuerit filius Regis, aut Principis, ut *n. 18.* 2. Si infans non potest ad Ecclesiam deferri sinè parentum infamià, aut alterius gravis damni periculo; et eo casu *Croix, Gob. et Jord.* dicunt Baptismum posse tunc domi conferri etiam solemniter. 3. Si imminet periculum mortis infanti, v. gr. si mater cum

---

(a) in 4. d. 6. q. 2. a. 3. ad 5. — (b) l. 6. n. 139. — (c) n. 141.

22 *Tract. 14. De Sacramentis in genere , etc.*

magna difficultate enixa est ; aut si infans oritur quin ploret , aut 7. vel 8. mense (a). In hoc tertio tamen casu , si infans vivit , cæremoniæ debent in Ecclesiâ suppleri , ut dicunt *S. Thomas* (b) , ex c. 1. de *Sacramentis non iter*. Et hoc sub gravi , ut tenent *Pignatel. Croix* , et *Aver. contra Passer.* (c). An autem , putà si Baptismus invalidè collatus sit , debeant repeti cæremoniæ ; alii communiùs negant , ut *Suar. Bonac. Busemb.* etc. Sed alii affirmant , ut *S. Antoninus* , *Castr.* et *Salm.* Utraque sententia est probabilis , ideòque secunda uti tutior consulenda (d). Rituale admonet Parochos , ut curent , quantum possibile est , ne imponantur infantibus nomina risum moventia , aut Idolorum , Idololatrarum , sed Sanctorum. Notandum hìc denique librum baptizatorum plenam facere fidem in omni Tribunali ; ideò Rituale præcipit prætereà Parochis , ut adnotent diem , et horam nativitatis , parentes infantis , et patrilinos ; insuper ùt notent si Baptismus fuerit sub conditione , aut sinè cæremoniis collatus ; et item si infans fuerit expositus , et ubi fuerit inventus (e). III. Requiritur patrini , sed de his in Puncto sequenti.

### PUNCTUM III.

#### De Patrinis et eorum munere.

*Munus patrinorum* 31. *Qualitas* 32. *Quandò et à quibus contrahitur cognatio etc.* 33. *An parentes etc.* 34. *An patrini debeant designari* 35. *Cujus sexùs* 36. *Quibus sit vetitum esse patrilinos* 37. *Quandò in hoc peccat Parochus* 38.

31. — **P**ATRINI sunt illi qui de sacro fonte suscipiunt baptizatum , et in suam curam eum accipiunt ; undè debent eum instruere de rebus fidei , et morum , si alii negligunt. Cæterum dicit *S. Thom.*

---

(a) num. 132. — (b) 3. p. q. 71. a. 3. ad 3. — (c) num. 144. — (d) *Ibid.* v. *Si Baptisma.* — (e) n. 145.

(a), quòd potissimùm præsumere possunt patрини, infantes sufficienter instrui à suis parentibus (b).

32. — Ad hoc, ut quis possit esse patrinus, dicunt *Salm. cum Laym. Sanch. Nav. etc.* nullam requiri certam ætatem; sed probabiliter tenet *Croix*, requiri saltem ætatem 7. annorum, omninò autem requiritur 1. rationis usus, 2. ut sit baptizatus, 3. ut patrinus talem habeat intentionem, 4. ut ipse per se, aut medio procuratore suscipiat infantem qui baptizatur, aut è manibus baptizantis, et in hoc non sufficit tactus moralis, sed requiritur physicus, juxtà communissimam sententiam *Sanch. Castropal. Bonac. Salm. etc.* cum declaratione S. C. (c), 5. ut patrinus sit designatus à parentibus, vel saltem à Parocho: sed Parochus (saltem licitè) non potest mutare patrinum designatum à parentibus (d).

33. — Quæritur 1. An in Baptismo privato contrahatur tam à baptizante, quàm à patrino spiritualis cognatio? Quoad baptizantem, non dubitatur quin contrahatur. Sed quoad patrinum, negant communius, et probabilius *Sot. Sanch. Castropal. Bonac. Tourn. Salm. etc.* (contrà *Suar. Laym. etc.*), quia juxtà Trident. sess. 24. c. 3. de Ref. impedimentum dumtaxat contrahitur ab illis qui de sacro fonte puerum suscipiunt; et hic fons tantùm pro solemni, non autem privato Baptismo institutus est (e). Quæritur 2. An cognationem contrahat, qui pro patrino adhibetur in Baptismo sub conditione collato? Respondetur quòd si de priori Baptismo tantùm habetur dubium negativum, tunc certum est contrahi; nam cum nulla habeatur ratio pro illius valore, præsumptio stat pro valore posterioris. Secus autem, si de priori dubium habeatur positivum, nempe probabilis ratio de illius validitate; ità *Sanch. Dian. et Ren. (f)*. Quæritur 3. An contrahat, qui ex errore suscipit unum puerum pro alio quem intendebat? Negant *Sanch. Tourn. etc. ex cap. 2. de Cognatione spirit.* ubi dicitur mulier, quæ ex ignorantia filium mariti suscipit in Baptismo, non pri-

---

(a) 3. p. q. 67. a. 8. — (b) lib. 6. n. 147. — (c) n. 148. — (d) n. 146. — (e) lib. 6. n. 149. — (f) n. 151.

24 *Tract. 14. De Sacramentis in genere, etc.*

vari jure petendi debitum. Sed probabilius affirmant *Pontius Castr.* et alii; modò patrinus non habeat expressam intentionem non levandi alium infantem, quàm eum quem intendit. Et respondet ad textum oppositum, quòd ibi lex aufert impedimentum petendi debitum, quia æquum non erat privare sinè suâ culpâ conjugem suo jure : sed hæc ratio non currit in nostro casu (a). Quæritur 4. cum aliquis levat puerum alterius nomine, quis eorum contrahit cognationem? Aliqui dicunt solum procuratorem contrahere; ità *Sot. Conc. et Tolet.* Alii dicunt neutrum; ità *Filliuc. Sa, etc.*; sed communissima sententia et verior *Sanch. Castr. Fagn. Navar. Tourn. Croix*, et aliorum cum *Poncio*, qui affert Decisionem S. C., est, solum principalem contrahere; quia juxtà Trident. ille cognationem contrahit, qui à parentibus ad puerum suscipiendum designatus fuit. Nec refert quòd principalis absit, quia juxtà regulam legis, *qui per alium facit, per se facere videtur* (b).

34. — Quæritur 5. An parentes baptizantes, aut filios de Baptismo suscipientes, contrahant impedimentum petendi debitum? Certum est 1. non contrahere, si baptizant in necessitate, ut docent communiter DD. cum *S. Thomà* (c). Certum est 2. peccare graviter parentes, qui sinè necessitate baptizant filios (d). Certum est 3. non contrahere parentes, qui baptizant ex ignorantia filium, ex *cap. 2. de Cognat. spir.* Quæstio igitur restat, an parentes filium sinè necessitate baptizantes contrahant impedimentum etc.? Affirmant *Sanch. Petroc. Conc.* cum *S. Thomà* (e), quia eadem lex quæ decernit contrahi cognationem inter baptizantem, et parentes baptizati, inducit etiam impedimentum inter parentes qui prolem baptizant. Sed satis probabiliter negant *Suar. Ronc. Viva Salm. Coninc.* cum *Glossà* in præfato c. 2. v. *Debitum*, quia in nullâ lege id invenitur expressum, et nulla pœna incurritur nisi sit expressa in

(a) num. 152. — (b) n. 153. — (c) *Suppl. q. 55. a. 1. ex c. Ad limina* 30. q. 1. — (d) *Ex c. De his*, 6. q. 1. — (e) *Suppl. q. 56. art. 1.*

in jure , ut concordant omnes ; imò in eodem textu dicitur quòd hujusmodi conjuges *non sunt separandi* , et additur , *nec uller alteri debitum debet subtrahere*. Nec valet dicere textum loqui de redditione , non autem de petitione ; dùm si alter non posset petere , alter non teneretur reddere ; dùm ille amisit jus petendi (a).

35. — Quæritur 6. An patrini , ut contrahant cognitionem , debeant esse designati , et à quo ? Circa hoc Trident. Sess. 24. c. 2. statuit : *Si alii ultrà designatos baptizatum tetigerint , cognitionem spirituales nullo pacto contrahent*. Hic dubitatur 1. cùm multi tangunt puerum , sed nullus est designatus , an omnes contrahant ? Alii dicunt tunc nullum eorum contrahere ; ità *Croix* , *Gob. Dian.* etc. Sed ego adhæreo sententiæ contrariæ quæ est communissima *Nav. Lrym. Castrop. Bonac. Salm. Viva* etc. cum declaratione S. C. quâ dictum fuit , omnes contrahere , quia licet Concilium requirat ut Parochus baptizet adhibitis patrinis designatis à parentibus pueri , attamen non irritat jus antiquum *cap. fin. de Cogn. spir. in 6.* quo omnes qui tangunt , cognitionem contrahunt ; ibi sic dicitur : *Si tamen plures accesserint , spiritualis cognatio inde contrahitur* ; et hoc currit , ut dicunt *Castrop. Cornej. Salm.* etc. adversus *Croix* , etiamsi præsentés sint patrini designati. Sed si quis ex patrinis designatis puerum tangeret , ceteri non designati certè non contrahunt , ut habetur ex Concilio. Sed si parentes designarent plures quàm duos patrinos , et omnes tangerent ( in quo graviter peccaret Parochus , eos admittendo contra Concilii præceptum ) , tunc rectè dicunt *Suar. Sanch. et Croix* , quòd si successivè tangerent , illos duos priores contrahere ; sed si omnes unà simul , *Suar.* tenet neminem contrahere ; sed probabilius dicunt *Sanch. Ronc. Castrop. Salm. Croix* , etc. omnes designatos contrahere : quia Concilium non irritat jus antiquum , nisi cùm tangunt alii non designati , præter duos designatos ; sed secùs si tangunt alii designati ultrà duos. Et hoc tantò magis currit , ut declaravit

(a) n. 150.  
Tom. II.

S. C. si de multis designatis nescitur quis eorum priùs tetigerit (a).

36. — Notandum 1. Concilium præscribere, ut duorum patrinorum alter sit mas, et alter fœmina; undè non vacaret culpâ designare duos mares, aut duas fœminas; et ego puto lethalem cum *Bonac.* et aliis (contrà *Sanch. et Croix*) si uterque patrinus esset diversi sexûs quàm infans; quia ita multiplicarentur cognationes contrà finem Concilii, et in hoc materia est gravis. Si autem designaretur unus tantum patrinus, nihil refert an sit diversi sexûs, ut dicunt probabilius *Suar. Filliuc. Gobat. et Aversa* (contrà *Laym.*), dùm Concilium dicit sive vir, sive mulier (b).

37. — Notandum 2. Non licere esse patrinos I. Monachis, et Monialibus, et Regularibus cujuscunque ordinis, et declarat Rit. Rom. (tit. de *Patr. in Bapt.*) cùm dicatur ibi: *Admitti non debent Monachi et Sanctimoniales, neque alii cujusvis ordinis regulares à sæculo segregati.* Intelligitur hoc de suscipiendo non autem de baptizando. II. Vetitum est hæreticis, apostatis et infamibus. Quare peccant, qui advocant hæreticos pro patrinis suorum filiorum. Contrà licitè possunt Catholici in Baptismo suscipere pueros hæreticorum, modò hâc re non probetur eorum ritus; *Laym. Croix, Gob.* (c). III. Prohibitum est Conjugi esse patrinum alterius conjugis: et parentibus respectu filiorum præterquàm in necessitate. IV. prohibitum est esse patrinos plures duobus, cùm dicat Trident. *Sess. 24. c. 2. de Ref. Sive vir sive mulier, vel ad summum unus et una.* Non est vetitum quin duo conjuges unam prolem alterius suscipiant, ut communiter DD. cum *S. Thomâ* (d), qui dicit: *Nihil prohibet quin vir et uxor aliquem de sacro fonte levarent* (e).

38. — Notandum 3. peccare Parochum 1. Si respuuit patrinos à parentibus designatos, aut admittit ab illis non electos. 2. Si admittit plures quàm duos.

---

(a) n. 154. — (b) lib. 6. n. 155. — (c) n. 156. — (d) in 4. d. 42. q. 1. ar. 3. q. 2. ad 4. — (e) lib. 6. n. 157.



3. Si baptizat sinè patrino (a). In Baptismo privato tamen non adest obligatio adhibendi patrilinos, juxtà communem sententiam; ceterùm probabile est etiam in privato licitè posse adhiberi patrilinos (b).

### CAPUT III.

#### De Confirmatione.

*De materiâ remotâ* 39. *An Chrisma debeat esse benedictum, et an à simplici Sacerdote possit etc.* 40. *De materiâ proximâ, et an sit materia extensio manuum quam adhibet Episcopus etc.* 41. *An manu dexterâ, aut instrumento etc.* 42. *De formâ* 43. *De ministro. An possit esse simplex Sacerdos* 44. *Quid si exterus sit Chrismandus* 45. *De obligatione ministrandi Confirmationem* 46. *De obligatione eam suscipiendi* 47. *An qui suscipit Ordines etc.* 48. *An amentibus et infantibus, etc.* 49. *De cæremoniis* 50. *De patrinis* 51. *De aliis cæremoniis* 52. *De effectibus Confirmationis* 53.

39. — **F**IDE tenemus Confirmationem verum esse Sacramentum, ut habetur ex Decreto Eugenii IV. in Instructione ad Armenos, et in Trident. sess. 7. c. 1. Et hoc probatur ex traditione Patrum. Dicimus nunc hoc quod refert scire circâ materiam, formam, ministrum, necessitatem, et cæremonias hujus Sacramenti. Et I. de *Materiâ*. *Materia remota* Confirmationis est Chrisma ex Balsamo et Oleo confectum per Episcopi benedictionem, ad differentiam Olei Baptismi, et infirmorum, ut distinxit Innoc. III. in cap. *Cùm venisset, de Sacr. Unct.* An autem unum Oleum istorum sit materia valida pro alio Sacramento, negant *Suar. Laym. et Henrig.* Sed probabilius affirmant *Bell. Castr. Bonac. et Barb.(c)*. Non dubitatur autem quin de Sacramenti necessitate Oleum necessarium sit. Balsamum certum est requiri de necessitate præcepti: sed an sit necessarium pro Sacra-

---

(a) n. 154. v. sed not. — (b) n. 157. — (c) n. 700. d. 2.

menti valore, probabiliter negant *Sot. Navar. Juven. Cont. Tourn. ex c. Pastoralis, de Sacramentis non iter.* ubi Innoc. III. interrogatus an valeret Chrisma cum solo Oleo collata, respondit, *Nihil esse iterandum, sed cautè supplendum quod incautè fuerit prætermisum.* Probabilius tamen et communiùs affirmant *Bellarmin. Gonet., Petrocor. Conc.* et alii cum *S. Thomà (a)*, et cum *Catechism. Rom. n. 7.* Et probatur 1. cit. *cap. unic. de Sacr. Unct.*, ubi Pontifex appellat hoc Sacramentum *Chrismationem*, non certè alià ratione quàm propter Chrisma, quod ex Oleo et Balsamo conficitur. Probatur præterea ex Decreto Eugenii IV. in Concilio Florentino, ubi dictum fuit materiam Confirmationis esse *Chrisma* confectum *ex Oleo et Balsamo.* Opponit *Habert* hoc Decretum non fuisse Concilii, dùm emanatum fuit, soluto Concilio, propter Græcorum discessum. Sed respondet *Petrocorens.* 1. Ipsos Græcos consensisse, ut Concilium continuaretur, ut ad Ecclesiam etiam Armeni unirentur; 2. tale Decretum fuisse receptum ab omnibus Ecclesiis Catholicis. Sed nos meliùs respondemus, dicendo, Papà Dogmata docente et uti Ecclesiæ Doctore loquente, omnes ejus definitiones ex se esse infallibiles, ut fusiùs in Opere L. 1. ex n. 110. Respondetur autem ad textum oppositum quòd intantum Papa dixit *nihil iterandum*, quia ut dicit Glossa: *Non dicitur iteratum, quod priùs actum non fuit.* Cæterùm prima opinio probabilis est, ut videre est in *Decr. S. C. Conc.* apud *P. Ferraris*, (b) cùm sit certum confirmationem sinè Balsamo saltem esse dubiam, adeòque sub conditione saltem repetendam. Sufficit autem Balsamum cujuscunque Religionis (c).

40. — Chrisma debet esse ab Episcopo benedictum necessitate præcepti; sed dubitatur an etiam ex necessitate Sacramenti? Affirmant *Conc. Petrocor. Salm.* cum *S. Thomà (d)* ex citato Decreto Eugenii, ubi dicitur quòd materia Confirmationis est *Chrisma ab Episcopo benedictum.* Sed speculativè loquendo, est probabilis sententia negativa *Cajet. Barbos. Got. Ju-*

---

(a) 3. p. q. 72. a. 2. — (b) *Ferrar. Bibliot. v. Confirmatio n. 10.* — (c) *lib. 6. n. 162.* — (d) 3. part. quæst. 73. a. 3.

*ven. Tournel.* etc. quia, sicut Papa confirmandi facultatem simplici Sacerdoti committere potest (ut dicimus n. 44.) ita potest etiam facultatem Chris-  
matis benedicendi impertiri, Decretum autem Eugenii nihil præter præcepti necessitatem probat. Dicitur est *speculativè loquendo*, quia in praxi, cum de Sacramenti valore agatur, prima tenenda est (a). Præceptum autem grave est ex *Can. Literis, de Consecr. distinct.* 3. non esse utendum Chrismate anno elapso benedicto. Sed in hoc Ecclesiæ præcepto potest Papa dispensare, ut de facto Papa Benedictus XIV. in *Const.* 10. dispensavit (b). Quare non dubitatur, quin Confirmatio veteri Chrismate collata sit valida (c).

41. — *Materia proxima* Confirmationis requirit, 1. unctionem in fronte, 2. in formâ Crucis, 3. manu Ministri, et hæc tria sunt omnia de Sacramenti essentia, ut communiter doceant DD. (d). Sed cum in Pontificali dicatur ut Episcopus antequam ungat, dicere debeat Orationem, *extensis manibus versùs Confirmandos*, volunt multi Auctores moderni, *Merbes. Tourn. Gonet. Juvenin. Conc. Got.* etc. talem extensionem esse de Sacramenti valore, ex eo quod legitur Actorum c. 8. Tunc imponebant manus super illos, et accipiebant Spiritum Sanctum. Sed communius hoc negant *Suur. Laym. Petrocor. Frassen. Antoine, Holzm. Viva, Croix* et alii cum P. Berti, qui fuserit hanc nostram tuetur sententiam (-). Et dicimus sufficere extensionem manuum quam adhibet Episcopus in ungendo Chrismando. Et hoc probatur ex Decreto Eugenii, ubi dicitur: *Loco illius manûs impositionis dari in Ecclesiâ Confirmationem*; et clariùs in *cap. unic. §. Per frontis, de Sacr. Unct.* ubi Pontifex dixit: *Per frontis chrismationem manûs impositio designatur, quæ alio nomine Confirmatio dicitur*. Igitur Papa pro certo habet in eadem chrismatione haberi jam manuum impositionem. Pontificale enim non dicit, *super Confirmandos*, ut dicturus fuisset, si per hoc

---

(a) n. 163. — (b) *Bullar. tom. 2. pag. 28.* — (c) num. 163. — (d) *lib. 6. num. 164.* — (e) *Berti de Theol. disc. lib. 32. c. 4. Resp. ad 1.*

intellexisset loqui de impositione : pront dicit loquendo de Ordinatione , *tàm Pontifex* , quàm Sacerdotes tenent manus dextras extensas super illos ; sed dicendo *versùs Confirmandos* , nihil aliud denotat quàm consuetam cæremoniam , quam præcipit Ecclesia suis Ministris in dicendis orationibus , nam manus extendere idem est ac eas aperire , et sursùm elevare. Undè dignoscitur sententia opposita valido carere fundamento ; ideòque dico dumtaxat tanquàm tutam esse consulendam. Episcopus qui vellet eam in praxim producere , potest ( ut advertit *Habert* ) in diversas classes confirmandos distribuere , et inde super singulas classes præfatam Orationem præmittere (a).

42. — Episcopus ungere debet pollice manûs dextræ ; quare peccaret , si ungeret illo sinistræ ; et ex communiore graviter ; sed *Escob. Trullench. Nugnez. Dic. Aver. Diana , et Tamb.* ut probabile habent , hoc non excedere veniale , et reverà non constat hanc cæremoniam esse gravem. Quare probabiliter dicunt præfati AA. quòd licitè confirmaret Episcopus sinistrâ , si dextrâ confirmare non posset (b). Opinio autem nonnullorum posse dari Confirmationem (sicut potest Extrema-Unctio) medio aliquo instrumento , meritò communi sententiâ repudiata est. Quia tunc deesset manûs impositio quæ cæteroquin non est necessaria in Extremâ-Unctione. Quoad quantitatem autem Chrismatis sufficit illa , quæ satis est ad ungendam frontem in formâ Crucis ; ita *Suares. Castr. Bonac. et Salm.* (c).

43. — II. Circà *Formam* , quæ sit , quatuor adsunt sententiæ. 1. Illi qui volunt solam manuum extensionem Episcopi quæ unctionem præcedit , esse unicam Confirmationis materiam , dicunt solam Orationem ab Episcopo tunc recitatam esse formam. 2. Alii autem , qui volunt tàm primam manuum impositionem quàm ipsam Unctionem esse materias partiales , dicunt formam constare tàm ex præfatâ Oratione , quàm ex verbis quæ dicit Episcopus in ipsâ Unctione : *Signo te signo Crucis , et confirmo te*

---

(a) *Lib. 6. n. 164. ex v. Quæritur.* — (b) *n. 163.* — (c) *n. 166.*

*chrismate salutis ; In nomine Patris* etc. 3. Alii volunt materias esse partiales ( ut dictum est ), formam verò esse unam, nempe illam quæ dicitur in *Uctione*. 4. Alii denique, qui cum verâ sententiâ teneant materiam totalem esse *Uctionem*, quæ manuum impositionem ( ut diximus ) secum involvit, dicunt rectè totalem formam esse verba, *Signo te* etc. quæ illam concomitantur ; ità communiter DD. cum S. *Thomâ* (a), et cum Catech. Rom. de *Confirmatione* n. 12. ubi dicitur quòd Catholicæ Ecclesiæ auctoritas non patitur de eâ re quicquam dubitare. Et ità reverà declaravit *Eugenius IV.* qui in præfato Decreto dixit : *Forma autem est ; Signo te signo Crucis* etc. (b). Explicat autem Angelicus (c) quod per *Tò Signo te*, significatur Confirmatus notari in Christi militiam. Per *Tò confirmo* denotari illam virtutem ad præliandum recipere. Per *Tò* denique in nomine *Patris*, denotare à quo hanc accipiant virtutem ; itaque sunt de essentiâ verba *Signo te*, *confirmo te*, et in nomine *Patris* etc. (d). Alia verò est forma Græcorum, *Signaculum doni Spiritûs Sancti* : quæ etiam est valida, ut declaravit *Urbanus VIII.* (e).

44. — III. Circà Ministrum Confirmationis, certum est solum Episcopum esse hujus Sacramenti Ministrum Ordinarium, ut declaravit Trident. ( *Sess. 7. Can. 3.* ) : *Si quis dixerit Sanctæ Confirmationis Ordinarium Ministrum non esse solum Episcopum, sed quemvis simplicem Sacerdotem, anathema sit ;* Sed ex Pontificis concessione, certum quoque est, posse esse Confirmationis Ministrum simplicem Sacerdotem, ut declaravit *Benedictus XIV.* in suâ Constit. *Eo quâvis* 4. Maji 1745. Et antea *Eugenius IV.* et *S. Gregorius Magnus* hâc fuerunt potestate usi (f). An autem etiam Episcopi simplici Sacerdoti, ut Confirmationem ministret, delegare possint, dicit idem *Benedictus* in celebri Opere de *Synod.* (g). magnam hanc esse quæstionem, pro quâ validæ militant rationes ad utriusque partis probationem ; sed rectè

---

(a) *In 4. d. 7. q. 1. a. 3. q. 2.* — (b) *Lib. 6. n. 167.* — (c) *3. p. q. 72. a. 4.* — (d) *Lib. 6. n. 166. v. Hic Notandum.* — (e) *n. 168.* — (f) *n. 170.* — (g) *lib. 7. c. 8. n. 3.*

### 32 *Tract. 14. De Sacramentis in genere , etc.*

indè concludit, hodiè talem facultatem Summo Pontifici solo, tam consuetudine, quàm Nicolai I. reservatione expressè factâ (*Epist. 70.*) esse reservatam. Et licèt confirmare sit actus Episcopalis Ordinis, cujus valor à Pontificis arbitrio non dependet, nihilominus hujus actûs exercitium delegare non ad ordinem spectare, sed ad Jurisdictionem, quæ benè potest à Papâ limitari, sicut reverà limitatur Episcopis facultas dispensandi in quinque votis Sedi Apostolicæ reservatis.

45. — Notandum hîc 1. Episcopum confirmantem in alterius Diœcesi subditos non suos graviter peccare, et suspensionem à Pontificalibus incurrere, etiamsi ille confirmaret subditos suos, ut declaravit S. C., et Trident. *Sess. 5. c. 5.* Sed si in suâ Diœcesi confirmaret subditos alterius, per se esset illicitum; sed in hoc præsumitur (juxtâ usum communiter receptum) consensus interpretativus aliorum Episcoporum, modò non constaret de contrariâ voluntate alicujus; ità *Castrop. Laym. Salm. Sà, Croix*, etc. tantò magis hoc currit si Episcopus confirmare deberet Ordinandum, qui cum dimissoriis ipsius ordinarii ad se venit; quia tunc præsumitur ejus consensus etiam de præsentî, ut communiter præfati Auctores cum aliis (a).

46. — Notandum 2. graviter peccare Episcopum (juxtâ communem sententiam), qui negligit Confirmationem suis subditis diù conferre, v. gr. ad octo aut decem annos, ut dicunt *La-Croix et Dicast.*; quapropter tenetur Episcopus Diœcesim circumire, saltem per Oppida Diœcesis principaliora; modò non sit moraliter ad hoc impossibilitatus; et suis expensis, nisi adsit justa consuetudo in contrarium; *Castropal. et Salmant.* Dicit *Bonac.* Episcopum teneri confirmare etiam moribundos qui eum de hoc efflagitant; sed probabiliter ab hâc obligatione eum excusant *Lugo, Escob. Croix, Salm.* etc. tam propter grave incommodum quod adesset, quàm propter usum qui contrarius inolevit (b).

---

(a) *Lib. 6. n. 172.* — (b) *lib. 6. n. 175.*

47. — IV. Circà necessitatem hujus Sacramenti, alii dicunt quòd quilibet, ut confirmetur, sub gravi curare tenetur, quia secus sibi magni damni causa esset, se privando robore ad tentationibus resistendum, quod hoc Sacramentum confert; ità *S. Bonaventura*, *Merbes: Tourn. Conc. Habert*, etc. Sed hoc grave onus negant multò communiùs *Sot. Navar. Suar. Laym. Fras. Wig., Castr. Bonac. Anacl. Salm. Croix* etc., quia de hoc gravi præcepto sive naturali sive positivo non constat. Idem sentit *scotus* (a) qui loquendo de Extremâ-Uctione et Confirmatione dicit: *Neutrum est simpliciter necessarium, nec est præceptum de isto vel illo recipiendo*. Idem sentit *S. Thomas* (b), qui dicit Confirmationem esse necessariam, non jam ad salutem, sed ad salutis perfectionem; alibi postea (c) expressè affirmat sinè hoc Sacramento ex vitâ discedere periculum esse, *non quia damnaretur* (nisi fortè propter contemptum), *sed quia detrimentum salutis pateretur*. Et idem denique sentire videtur *Catech. Rom. §. 17.* dicendo ibi quòd Ecclesia optat, ut omnes baptizati hoc muniantur Sacramento: desiderium Ecclesiæ utique non est præceptum. Sed prima sententia omninò est tenenda, utpote decisa à *Benedicto XIV. in Bullâ Etsi Pastoralis, de Ritibus et Dogmatibus Græcorum*, 1742. ubi (§. III. nu. IV.) hæc habentur: *Monendi sunt* (qui non sunt confirmati) *ab Ordinariis Locorum eos gravis peccati reatu teneri, si cùm possunt ad Confirmationem accedere, illam renuunt, ac negligunt*.

48. — Dicunt autem *Bonac. Tolet. Renzi*, etc., graviter peccare qui primâ Tonsurâ non confirmati initiantur, quia *Trident. Sess. 23. c. 4.* sic dicit: *Primâ Tonsurâ non initientur, qui Sacramentum Confirmationis non susceperunt*. Et *Renzi* affert quandam declarationem *S. C.* ubi dictum fuit Tonsuratum non susceptâ Confirmatione, ut malè promptum non posse ad alios Ordines ascendere, nec Beneficia recipere sinè Pontificis dispensatione. Sed communissimè negant *Sot. Cast. Azor. Escob. Valen. Sul-*

(a) *In 4. d. 17. q. 1. n. 11.* — (b) *In 4. d. 7. q. 1. a. 1. q. 2.* — (c) *3. p. q. 72. a. 8. ad 4.*

54 *Tract. 14. De Sacramentis in genere, etc.*

*mant. et Cabass. cum Nav. Suar. Coninc. Victor.* etc. qui dicunt idem de aliis Ordinibus, et ad Concilium respondent, præcepta simpliciter modo imperativo emanata non importare gravem obligationem, nisi aliæ adsint circumstantiæ, ut dicunt *Cajet. Navar. Sa, Sayr.* etc. et juxta dicta *Tom. I. Tr. II. num. 15. (a)*. Ceterum sufficit quòd quis sit probabiliter confirmatus, ut à tali obligatione eximatur, prout Benedictus XIV. (b) assert, declarasse Synodum Maronitarum de mandato Gregorii XIII. congregatam.

49. — Dicunt multi Auctores, ut *Bonac. Escobar, Holzm. Salmant.* etc. omni culpâ vacare conferre Confirmationem infantibus antè septennium, dùm jam hic erat mos antiquus, et ità etiam hodiè à Græcis practicatur; et ut ait *Vivaldus* in Hispaniâ confirmari solent biennes, et triennes (c). At hoc nunc dici nequit, dùm Benedictus XIV. in Constit. 129. *Eo quamvis* §. 6. edita an. 1745. (vide in *Bullar. ejusdem tom. 1.*) declarat nunc temporis non licere aliquem Confirmationis Sacramento munire, nisi usum rationis attigerit, his verbis: *Nihilominus abrogato prorsus à Romanâ Ecclesiâ hujusmodi more, consultissimis Pontificum Decretis cautum est ut renatis fonte Baptismatis conferretur Sacramentum Confirmationis in eâ solum ætate in qua Fideles intelligent tantum inter se differre Baptismum, et Confirmationem, quantum distat Generatio ab Incremento.* Nihilominus idem Benedictus multis post annis, cùm esset Pontifex in suo Opere de Synodo (d) dicit, quòd etsi Catechismus afferat non expedire ut conferatur ante septennium; non tamen vetat quin in aliquo casu conferatur pueris non natis septem annos. Et subjungit Auctor quòd hoc perpendentes *Sylvius, Suar. Sylv. Ronc. Juvenin, Gotti* et alii affirmant licitè posse etiam juxta præsentem Disciplinam Confirmationem conferre pueris antè septennium ex aliquâ causâ, ut putà si Episcopo per multum temporis manendum esset extrâ Diœcesim, aut si puer esset in periculo mortis, aut aliâ de causâ. Et de perpetuo

(a) *Vide n. 183.* — (b) *De Synod. lib. 7. c. 9. n. 5.* — (c) *lib. 6. n. 178.* — (d) *Bened. XIV. de Synod. lib. VII. c. 10. n. 15.*



amentibus sermonem habens, ait absolutè posse illos Confirmationis Sacramento muniri (a).

50. — V. Deniquè circa Cæremonias 1. requiruntur *vestes* Sacræ, nempè (ut præscribit Pontificale) Amictus super Rochetto, aut suprà cottam, si Episcopus est Regularis: ità Stola et Pluviale album. Et peccaret graviter Episcopus, si confirmaret sinè ullâ dictarum vestium; sed secùs si omitteret aliquam, ut dicunt *Spor. Ren. Tambur. et Diana*; item requiritur Baculus, et Mitra, sed Baculus sufficit ut in aliquo loco exponatur, aut ab aliquo Clerico teneatur sicut videtur designatus in figurâ oppositâ in Pontificali; et quoad Mitram, ut declaravit S. C. sufficit ut Episcopus utatur stolâ: quare necesse non est, ut adhibeat Mitram (b). 2. Requiritur *Cereus*, et ut Episcopus alapam post formæ prolationem det Confirmato; sed harum rerum omissio non excederet veniale (c). 3. Requiritur, ut ministretur in Ecclesiâ; sed hoc non sub gravi, ut communiter DD. (contrà *Nugnez*). Imò *Suar. Bonacin. Barb. Sa, Henriq.* etc. (d) excusant ab omni culpâ Episcopum qui in aliquo decenti loco confirmaret. Hoc non obstante, ego nescirem eum excusare à veniali, nisi aliqua interveniret causa, tùm ob consuetudinem quæ viget hoc Sacramentum in Ecclesiâ ministrandi, ut concedunt etiam *Bonac. et Barb.* cùm propter id quod legitur in Pontificali: *Hoc Sacramentum potest conferri minùs solemniter quocunque die, horâ, et loco, ex causâ ad arbitrium Episcopi*. Nota quòd licèt dicatur *ad arbitrium*, requiritur *ex causâ*. Semper tamèn potest licèt Episcopus in domestico Sacello confirmare, ut rectè dicit *Castrop.* (e). 4. Requiritur jejuniùm tàm Confirmantis, quàm Confirmandi, ex *Can. Jejuni, de Consecr. dist.* 5. et etiam ex Pontificali, ubi dicitur: *Confirmandi deberent esse jejuni*. Sed communiter dicunt DD. hoc tanquàm consilium, non ut præceptum esse; undè invaluit usus ut hoc Sacramentum etiam post prandium conferatur; ità

---

(a) *Lib. 6. op. nostri n. 180.* — (b) *n. 184.* — (c) *Ibid. v. not. II.*  
 — (d) *Barbos. de Pot. Episc. 2. p. All. 3. n. 13. et Salm. Tract. 3. c. 4. n. 32.* — (e) *lib. 6. n. 184. v. Not. III.*

36 *Tract. 14. De Sacramentis in genere, etc.*

*Laym. Castropal. Cons. Salmant. Cubass. Croix*, etc. et ità pariter juxtà consuetudinem licitum est hodiè hoc administrare quolibet die, sive festivo, sive feriali; *Suar. Granad. Busemb. Salm. etc. (a).*

51. — Requiritur 5. Patrinus à parentibus pueri, aut in eorum defectu ab Episcopo designandus; et hoc proculdubio sub gravi, quoties haberi potest; sed si unquàm haberi non posset, dicunt *Holz. Gobat. et Illung.* licitè posse conferri Confirmationem sinè patrino. Hinc patrinus 1. debet esse unicuſ, ut communiter sentiunt *Castrop. Bonac. Rebell. Salm. et Busemb.* (contrà *Toletum* qui admittit duos) dùm ità decretum est in *cap. fin. de Cogn. Spir.* Verum est ibi hoc statutum fuisse tàm pro Confirmatione, quàm pro Baptismo, sed Tridentinum quoad Baptismum permisit duos, non autem quoad Confirmationem, hinc firmum restat quoad hoc jus antiquum. 2. Hinc Patrinus debet esse priùs confirmatus, ut præscribitur in *C. In Baptismate 102. d. 4.* cùm ibi dicatur: *In baptismate, vel chrismate non potest alium suscipere in filidum, qui non est baptizatus, vel confirmatus.* Et in Pontificali dicitur: *Nullus qui non est confirmatus potest esse in Confirmatione patrinus (b).* Et hoc etiam sub gravi præcepto cùm gravis sit materia, ut rectè dicit *Conc.* cum communi (c). Si autem susciperet in Confirmatione patrinus non confirmatus, dicunt *Sot. Navar. Sà,* et alii etiam eum cognationem contrahere, afferentes verba cit. *non potest* textûs relati non denotare actûs validitatem; sed solum prohibitionem; et hæc opinio rectè probabilis nuncupatur à *Salm. et Croix.* Sed probabiliùs negat *Glossa* in præfatum textum *Suar. Tol. Sanch. Bonac. Ren.* et alii multi; et *Renzi* adducit etiam declarationem S. C. Conc.; nam, ut probat *Sanch.* verbum *non potest*, in eo casu reddit omninò actum irritum (d). 3. Patrinus in Confirmatione debet esse alius à baptismo juxtà communem sententiam; excipit *La-Croix* cum *Silvestro* et *Synod. Colon.*

---

(a) *Lib. 6. n. 184. Not. IV.* — (b) *lib. 6. n. 185.* — (c) *n. 186.* — (d) *num. 186. dub. 2.*

nisi adsit causa in contrariū. 4. In Confirmatione juxtā Pontificale debet esse ejusdem sexūs confirmandi. 5. Patrinus non debet esse Religiosus, ut dicunt *Sanch. Bonac. Salmant.* et alii communiter, *Can. Monachi* 104. *de consecrat. dist. 4.* ubi dicitur: *Monachi sibi compadres commatresque non faciant.* Excipiunt *Castrop. Barb. Gobat. Spor.* etc. si confirmandus esset etiam Religiosus; excipiunt etiam *Suar. Dicast.* etc. si patrinus esset de Ordine Mendicantium; sed meritō contradicit *P. Concina*, dūm, ut relatum est n. 37, jam hoc vetitum est in Ritual. cuilibet Regulari esse patrinum, verum est quòd ibi loquitur de Baptismo, sed eadem ratio currit pro Confirmatione, et ut diximus *Tom. I. Tract. II. n. 78.* in æquivocis lex utique extenditur de casu ad casum, in quo itā lex eadem currit, ut si lex non extenderetur, legislator aut pro injusto, aut imprudenti culparetur. Quoad modum suscipiendi in Confirmatione, juxtā Pontificale deberet confirmandus mittere pedem super pedem dexterum patrini; sed rectē dicit *P. Concina* quòd hodiē ex consuetudine receptā et approbatā à S. C. Rituum 20. Septemb. 1749. sufficit ut patrinus imponat manum dexteram super humerum dexterum confirmandi<sup>(a)</sup>.

52. — Requiritur 6. ex Ponticali, ut post unctionem frons confirmati vittā aliquā lineā cingatur; sed hodiē hæc cæremonia in nostris Regionibus obsolevit, dūm factā unctione statim confirmati frons abstergitur et dimittitur ipse. 7. Parochus confirmatorum, et patrinorum in libro adnotare debet nomina, ut cognatio contracta sciri possit, tum ob ordinum susceptionem. Dicunt *Barb.* et alii quòd in Confirmatione possit mutari nomen. Episcopus terminatā functione benedicit confirmatis, idēque eos, dūm confirmat, admonet ne antē benedictionem discedant: sed probabiliter ait *Tambur.* hanc admonitionem non obligare; et reverā (ut dicit *Croix*) hæc est praxis ut confirmati, suscepto Sacramento, discedant, nec Episcopi eos obligant ad expectandum<sup>(b)</sup>.

---

(a) *Lib. 6. n. 187.* — (b) *Lib. 6. n. 188.*

53. — Effectus autem hujus Sacramenti sunt tres :  
 1. Character ; 2. Gratia, nempè robur spirituale  
 quod recipitur ad debellandos inimicos ; 3. Cognatio  
 spiritualis, quæ contrahitur inter confirmatum et  
 patrinum qui eum suscipit, ac inter eum et pa-  
 rentes confirmati (a).

## TRACTATUS XV.

### DE SACRAMENTO EUCHARISTIÆ.

#### CAPUT I.

##### De essentiâ Eucharistiæ.

*In quo consistat essentia Eucharistiæ, et in quo ra-  
 tio specifica : et undè desumatur unitas 1. An sit  
 necessaria necessitate medii 2. An consecratio in  
 unâ specie sit illicita et invalida. Non licet con-  
 secrare in unâ specie tantùm 3. Casus excepti 4.  
 Effectus Eucharistiæ 5. An quandiù durant spe-  
 cies etc. 6. Qui communicat cum veniali 7. De  
 ceteris agetur in Appendice III. de Examine ex n. 96.*

1. — **D**EFINITUR Eucharistia : *Est Sacramentum  
 Corporis et Sanguinis Christi sub speciebus panis  
 et vini ad spiritualem animæ refectionem divinitus  
 institutum.* A Scholasticis circa Eucharistiæ Sacra-  
 mentum multæ agitantur quæstiones. De istis fusiùs  
 in Opere disseruimus ; hîc tantùm eas annuimus.  
 Quæritur 1. in quo consistat Eucharistiæ essentia ?  
 Alii dicunt in recto consistere in panis et vini spe-

(a) num. 269.

ciebus, et Jesu Christi Personam tantum in *obliquo* ad Sacramentum spectare, tanquàm quid extrinsecè connotatum. Alii dicunt in *recto* sive essentialiter consistere tam in speciebus quàm in Christi Corpore. Utraque sententia est probabilis, observationes (a). Quæritur 2. An tota *Ratio specifica* hujus Sacramenti in alterutrâ specie salvari possit? Alii affirmant; sed probabiliùs est illam non salvari nisi in utroque, dùm in alterutrâ (per se loquendo) non potest significari completa refectio cibi et potûs (b). Quæritur 3. Undè desumatur unitas numerica Sacramenti Eucharistiæ? Alii dicunt ex unitate Corporis Christi: sed alii probabiliter tenent desumi ex morali conjunctione, quam species consecratæ habent inter se, cùm per modum unius proponuntur aut sumuntur (c); sed cùm proponuntur in diversis Altaribus, aut recipiuntur à diversis personis, sunt diversa Sacramenta (d).

2. — Quæritur 4. An Eucharistia sit necessaria necessitate medii, an præcepti ad salutem? Non dubitatur quin necessaria sit necessitate præcepti cùm Ecclesiastici, tùm Divini, ut habetur apud S. Lucam (c. 22.): *Hoc facite in meam commemorationem*. Contrà etiam pro comperto est apud omnes, Eucharistiam non esse necessariam necessitate medii quoad realem perceptionem. Dubium itaque restat in hoc, an necessaria sit necessitate medii, saltem *in voto*, nimirùm desiderio? Negant S. Bonaventura, Suar. Cajet. etc. asserentes hoc Sacramentum non esse institutum ad primam gratiam producendam. Sed probabiliùs affirmant S. Thomas (e), Sotus, Conc. Salm. etc. tùm ex textu S. Joannis; *Nisi manducaveritis carnem Filii hominis... non habebitis vitam in vobis*, c. 6, tùm quia Eucharistia est finis omnium Sacramentorum; undè ait Angelicus neminem gratiam habere antè susceptionem hujus Sacramenti, nisi ex voto proprio, ut sicut adulti habent dùm baptizantur, vel Pœnitentiæ Sacramentum suscipiunt: vel voto Ecclesiæ, sicut par-

---

(a) *Lib. 6. n. 889.* — (b) *n. 190. v. super.* — (c) *ibid. q. 2.* — (d) *n. 191.* — (e) *3. p. q. 79. a. 1. ad 1.*

vuli habent (\*). Non est dubitandum, quin Eucharistiæ perceptio sive in re, sive saltem in voto necessaria sit ad vitæ spiritualis conservationem; ita communiter docent *Sot. Gonzal. et Salm.*, cum eodem *S. Thomâ* (a), quia sicut corporis vita sine materiali cibo conservari nequit, ita nec vita animæ sine spirituali. Hinc dicunt *Lugo, P. Sotus, Val. Fill. Salm.* etc. licet præceptum imponat tantum, ut saltem semel in anno communicent, attamen aliquando hominem posse obligari ad sæpius in anno communicandum, cum nosceret hoc sibi fore necessarium, ut in divinâ gratiâ conservetur (b).

3. — Materia Eucharistiæ est tam panis, quam vinum, et nunquam fas est quâcumque ex causâ alterutram speciem consecrare, ut habetur ex *Can. Conferimus, dist. 2. de Cons.* et ex Tridentino *Sess. 22. c. 1.* ubi dicitur Jesus Christus præcepisse Apostolis ne aliter se ipsum offerrent, quam sub utràque specie; ex quo infertur proculdubio, hoc præceptum non solum esse Ecclesiasticum, sed etiam divinum, ut docet communis sententia (c). Et dicimus in hujusmodi præcepto non posse Papam dispensare (d), dum valdè probabile est non fieri Sacramentum nisi in Sacrificio, in quo conficiendo (ex verâ sententiâ) necessaria est utriusque speciei consecratio, quia aliàs non exprimeretur sanguinis effusio, et consequenter non satis exprimeretur Crucis Sacrificium, in cujus memoriam Salvator noster Altaris Sacramentum reliquit, ut loquitur *Trid. Sess. 22. cap. 21. (e)*. Nec est improbabilis sententia *Card. de Lugo*, (contrâ opinionem aliorum DD., ceteroquin communiorem) qui dicit quod si Sacerdos intenderet unam tantum speciem consecrare, invalidè ageret; quia Sacramenti ratio secerni non potest à ratione Sacrificii, cum Sacerdos non recipiat potestatem hoc Sacramentum conficiendi, nisi sacrificando, ut satis constat ex formâ ordinationis, *accipe potestatem offerendi Sacrificium etc.* Itaque, sicut diximus, consecratio utriusque

(\*) n. 192. — (a) 3. p. q. 8. a. 11. ad 2. (b) n. 139. et 2295. — (c) n. 196. — (d) *Ibid. dub. 2.* — (e) n. 306.

speciei, non solum ad sacrificii essentiam pertinet, sed etiam Sacramenti; hinc qui sacrificium non offert, nec Sacramentum conficit (a).

4. — Ceterum potest dari casus, ut certè sit valida et etiam licita per accidens consecratio alterius speciei, quin consecratur altera, v. g. si Sacerdos tempore consecrationis adverteret consecrasset aquam pro vino, aut si aliud vinum haberi non possit, aut non possit haberi sinè gravi periculo vitæ aut gravis scandali: item si consecratâ Hostiâ, immineret incendium, aut inimicorum invasio: ita *Suar. Asor. Bonac. Salm. Busemb.* et alii communiter (b).

5. — Effectus Eucharistiæ sunt I. augmentum gratiæ (et hic effectus est principalis) ut habetur ex Trident. *Sess. 13. cap. 2.* et aliquandò per accidens etiam est primæ gratiæ acquisitio, nempe cum quis inscius peccati mortalis, aut putans se habere contritionem, accedit ad Communionem cum solâ attritione: ita *S. Thomas (c), Scotus, Suar. Tolet. Ronc. Salm.* et alii communiter (d). Ratio est; quia proprium est uniuscujusque Sacramenti gratiam conferre omnibus obicem non ponentibus; et habens attritionem jam obicem gratiæ non ponit, dum, quantum in se est, removet affectum tam actuale, quam habituale ad peccatum (e). II. Remissio venialium, ut docent omnes cum *S. Thomâ (f)*, juxta Tridentinum loco cit. ubi Eucharistia appellatur, *Antidotum quo liberamur à culpis venialibus, et à peccatis mortalibus præservamur.* Putant autem *Salm.* cum aliis communionem ex se delere venialia ex opere operato per gratiæ infusionem (ut dicunt) quâ anima reficitur. Sed melius ait *Tourn.* Sacramentum non immediatè ex se, sed mediante actu caritatis quem in animâ excitat, delere venialia; hoc sentit etiam Angelicus loco cit., dum dicit: *quantum ad actum qui excitatur in hoc*

---

(a) n. 169. *Dub. 3.* — (b) n. 197. — (c) 3. p. q. 72. a. 7. ad 2. et q. 79. n. 3. — (d) n. 269. — (e) *Vide etiam n. 6.* — (f) 3. p. q. 79. a. 4.

## 42 Tract. 15. De Sacramento Eucharistiæ.

*Sacramento, per quem peccata venialia solvuntur* (a).  
 III. Præservatio à peccatis mortalibus ob auxilium quod præbet Sacramentum ad compescendam concupiscentiam, ad resistendum tentationibus, ad incedendum per Domini semitas. IV. Remissio pœnæ temporalis debitæ pro peccatis commissis, non jam directè, sed indirectè, mediantibus caritatis actibus quos in animâ excitat hoc Sacramentum; ità *S. Thomas* (b), *Salm. Conc.* etc. V. Dulcedo spiritualis, nempe facilitas in exequendis iis quæ Deo placent. VI. Unio cum Jesu Christo; *Joan.* 6. 57. qui manducat meam carnem..... in me manet, et ego in illo. VII. Acquisitio gloriæ. *Ibid.* 7. 59. qui manducat hunc panem, vivet in æternum. (c).

6. — Notandum hic valdè probabile esse quandiu species Sacramentales in stomacho durant, semper amplius augeri gratiam, ut tenent *Gonet, Becan. Lugo, Tourn. Juvenin, Holzm. Regin. Mastrius*: et *Salm.* dicunt hoc Sacramentum, cùm institutum sit per modum cibi, ut loquitur *Conc. Florentinum*, idèdque sicut cibus corpus nutrit usquedum in stomacho persistit, ità Eucharistia nutrit animam quamdiu in corpore persistit (d). Notandum præterea ex Decreto S. C. approbato ab *Innoc. XI.* damnatum fuisse abusum dandi plures simul particulas communicantibus, aut particulas majores usualibus (e).

7. — Quæritur hic an peccet venialiter qui communicat cum veniali actuali? In hoc diversæ sententiæ adsunt, sed præ ceteris mihi arridet sententia quam tenent *Vasq. Fill. Hurtad. Ledesm. Sa, et Leandr.*, et probabilis appellata à *Dicast. et Tambur.* (f), quæ sic distinguit: si culpa directè est circa Communionem, v. g. si quis ex vanâ gloriâ, aut cum voluntariâ distractione communicat, tunc nemo dubitat quin venialiter peccet, quia talis culpa est positiva irreverentia in Sacramentum;

---

(a) *Lib.* 6. n. 269. v. *Effectus III.* — (b) *Ibid.* a. 5. — (c) n. 269. — (d) n. 228. — (e) *Ibid.* in fine. — (f) *Tamb.* in *Met. commun.* c. 1. §. 4. n. 9.



## Cap. 2. De administratione Eucharistiæ. 43

licèt, ut ait S. Thomas (a), talis culpa impediret, quominùs animæ spiritualis refectio reciperetur, non autem gratiæ aut caritatis augmentum. Si autem peccatum veniale non est circa Communionem, v. g. si quis communicaret cum affectu actuali ad aliquod veniale, tunc non peccat, quia tunc (ut dicunt communiter DD.) non impedit effectum principalem Sacramenti, nec auxilium quo præservetur à mortali: cùm ex unâ parte veniale non opponatur gratiæ, et ex alterâ cum tali culpâ communicare est potiùs perfecta reverentiæ carentia, quàm positiva irreverentia (b).

Cetera ad materiam et formam Eucharistiæ pertinentia, notantur in *Appendice III. de Examine Ordinand. ex n. 97. ad 100.*

## CAPUT II.

### De administratione Eucharistiæ.

*Quomodò tenentur Parochi servare Eucharistiam, et ad eam dispensandam. An Regularis, et quilibet Sacerdos possit Communionem ministrare 8. Et an Diaconi 9. An viaticum possit in necessitate administrari à Clericis, et etiam à Laicis, et an à se ipsis etc. 10. An Sacerdos ex devotione possit communicare ex se ipso 11. Quomodò debeat, et possit dari Viaticum 12. An possit dari digitis posterioribus Viaticum; et an Communio 13. An in utrâque specie; et an pars Hostiæ majoris. An pueris et amentibus 14. An peccatoribus publicis; et an condemnatis 15. An in Missâ Defunctorum 16. In quâ horâ potest dari Communio 17. Si remanent fragmenta 18.*

I. — **V**IDEAMUS cuinam licet Eucharistiam ministrare, et quid requiratur, ut licitè ministretur. Quoad primum punctum, sicut soli Sacerdotes possunt hoc Sacramentum consecrare, ut est de fide

---

(a) 3. p. q. 78. a. 8. — (b) n. 270. Q. I. et II.

44 *Tract. 15. De Sacramento Eucharistiæ.*

(juxtà Trident. *Sess. 22. Can. 1.*), ità solis Sacerdotibus illius dispensatio concessa est. Et in rigore loquendo, Communionem dispensare solius Pastoris est, qui ideò tenetur curare, ut Eucharistia perpetuò in suis Ecclesiis et cum debito decore conservetur, nempe in Tabernaculo decenti, et cum lumine semper die et nocte accenso, et quidem sub culpâ gravi; attamen si lumen deficeret unam tantum horam, putant *Diana* et *Quintanadvennas*, non esse grave. Tenentur autem iidem eam ministrare non solum moribundis, sed etiam sanis, quoties rationabiliter et opportunè requisiti sunt, ut dicunt communiter *Sot. Suar. Vasqu. Castropal. Filliuc. Azor. Dicast. Busemb. Salmanticens.* etc. (a). Ceterum cum Communio non fit nec ob Paschale præceptum, nec ob Viaticum, Religiosi vi suorum privilegiorum possunt in suis Ecclesiis Eucharistiam ministrare, et hodiè (ut rectè testantur *Castropal.* et *Roncagl.*) ex communi consuetudine quæ adest, præsumitur cuilibet Sacerdoti celebranti talis facultas concessa (b).

9. — Diaconi tamen non possunt dispensare Eucharistiam sinè speciali commissione Episcopi, aut Parochi, aliàs incurrunt irregularitatem, ut habetur ex *cap. 1. de Cler. non ordinato* (c). Antiquitus solebat universaliter committi Diaconis Eucharistiæ administratio, sed hodiè non est permissum, nisi in necessitatis casu, ex *Can. 9. Carthaginensis*, ubi dictum fuit, *necessitas cogat* etc., quæ autem debeat esse talis necessitas, *Habert*, et *Tournel.* requirunt extremam; sed communiter *Suar. Laym. Castrop. Lugo, Conc. Salm.* etc. dicunt sufficere quamcumque necessitatem notabilem, aut causam justam, ut loquitur *P. Concina*, v. g. si Parochus sit occupatus in aliquo magno festo, aut numerus communicantium sit magnus etc. Diaconus autem. Eucharistiam ministrans, debet esse indutus cottâ et stolâ transversâ (d).

---

(a) *Lib. 6. num. 257.* — (b) *n. 235* — (c) *num. 234.* — (d) *l. 6. num. 237.*

10. — Quandò autem urgeret ministrare Viaticum infirmo, et deesset Parochus, potest illud præbere quilibet Sacerdos, et etiam Diaconus, licèt repugnaret Parochus, si irrationabiliter repugnaret; ità *Tol. Sa, Dicast. Ronc. Salm. Laym. Sot.* etc. communiter (a). Imò in eâ necessitate volunt *Suar. Valent. Cajet. Filliuc. Escob.* (et probabile dicunt *Lug. et Conin.* contra *Gonet, Bonac. Salmant.* et alios, quorum sententia ceteroquin est communior) etiam à simplici Clerico posse ministrari, ac etiam Laicum posse suis manibus communicare; quia tunc ex unâ parte jam urget præceptum divinum communicandi; et ex aliâ parte nullum reperitur præceptum expressum id prohibens; et antiquitus si ob necessitatem, quæ aderat, fideles in domos suas Sacramentum afferebant, et ibi communicabant, cur ergò nunc majore urgente necessitate, prout est mortis, id permitti non potest (b)? Verum tamen est præfatos Auctores id permittere, cum sinè scandalo fieri potest; sed ego dico hoc scandalum, aut potiùs admirationem, de facili posse tolli, circumstantes admonendo quòd in tali necessitate id permittitur à Theologis. Et ità pariter præfati Auctores (contra alios) permittunt Laicis in Sacerdotum aut Diaconorum defectum, ministrare Viaticum moribundis. Nec obstat textus *c. Pervenit, 29. de Consecratione dist. 2.*, ubi Sacerdotibus interdicitur committere Laicis Eucharistiæ administrationem, quia ibi sermo sit de Sacerdote qui id agebat præter necessitatem. Nec debet quidem obstare (ut dicunt) consuetudo contraria, quia cum hic casus rarissimè accidit, non potest in probationem hujus rei consuetudo contraria adduci; et huic opinioni valdè adhæret *Laym.* Dicit *Habert* hoc permitti Laicis saltem cum licentiâ Episcopi (c). An autem tempore pestis teneatur Parochus Communionem administrare, vide dicta *Tom. I. Tract. VII. n. 28.*

---

(a) num. 234. — (b) n. 237. Qu. II. — (c) *Ibid.* Qu. III.

11. — Probabile est quòd extrà mortis periculum, si non adest scandalum, et deest alius Sacerdos, benè posse Sacerdotes ex seipsis communicare, etiam ob solam devotionem, ut fatentur *Silvius, Lug. Bonac. Croix, et Salm.*; nam in hoc nulla intervenit irreverentia, nec de aliquo contrario præcepto constat. Imò *Vasquez, Dicust. et Leand.* id concedunt etiam Diaconis, cùm hoc eis aliquandò fuerit concessum à Concil. Nicæno *Can. 14. (a)*. Quoad autem Regulares, quomodò et quandò possint Eucharistiam ministrare, vide quod dicitur *Tract. XX. de Privileg. num. 123*. Et ubi in Paschate communicare possint famuli Monasteriorum Regularium, peregrini, et vagi, vide *Tom. I. Tract. XII. n. 42*.

12. — Videamus nunc secundo loco quid requiratur ad licitam Eucharistiæ administrationem. Illa debet administrari debitâ reverentiâ, et juxtâ ritum Ecclesiæ consuetum: undè notandum 1. plerumque non esse deferendam infirmis Eucharistiam, nisi cum cottâ, et stolâ, et luminibus, quare communiter dicunt *Suar. Filliuc. et Roncagl.* communionem præbere sinè cottâ et stolâ, per se esse mortale; sinè luminibus tamen esse tantùm veniale. In casu autem necessitatis probabiliter dicunt *Filliuc. Granad. Aver. Elb. Gob. Croix, Ren. Maz-zot.* etc. licere sinè luminibus et sacris vestibus Viaticum ministrare; nam non præsumitur quandò prædictæ cæremoniæ adhiberi nequeunt, velle ut moribundi tanto defraudentur bono. Et probabiliter dicit *Pasqual.* posse pariter Episcopum dispensare, ut Viaticum deferatur cum pileo in capite, cùm longè et per villas progrediendum est *(b)*. Ità etiam probabiliter dicunt *Bonac. Salmant. Gobat. et Croix* (contrà *Busemb.*) licere in casu magnæ urgentiæ Sacerdoti currere, ut adveniat tempore opportuno ad dandum Viaticum *(c)*. Ità etiam licet illud deferre equitando, si locus distat, aut tempus est pluvium, aut instat necessitas illuc adveniendi, ut dicunt *Quintanad. Elbel, et Gob.*

---

(a) n. 238. — (b) *Lib. 6. num. 241. v. Ministrare.* — (c) n. 242.

(a), et legitur hoc fuisse concessum à S. Carolo Borromeo (b). Item probabile est tempore pestis Vaticum cochleari licitè posse ministrari, ut dicunt *Bonac. Busemb. Marc. Mancin. Gobat. Leand.* etc. et ità etiam admittunt *Escob. Præpos. et Diana* dare Hostiam cum aquâ in cochleari infirmo qui ob oris ariditatem deglutire non posset (c). Hic notandum obiter quòd S. C. Conc. declaravit vetitum fuisse per S. Pium V. deferre Eucharistiam ad infirmos adorandam tantummodò. Benedictus XIV. (d) in suâ Epistolâ ad Cardinalem Guadagni Urbis Vicarium Generalem, quæ incipit *Cùm, ut rectè nosti*, præter S. Pii V. prohibitionem affert etiam Rituale Romanum à Paulo V. vulgatum, ubi hæc leguntur: *Sed alicui ad adorandum solum, seu devotionis, seu cujusvis rei prætextu, ad ostendendum, (Divinum Sacramentum), non deferatur* (e).

13. — Probabiliter etiam licet in casu extremæ, aut gravissimæ necessitatis Communionem præbere posterioribus digitis, si Sacerdotis pollex aut index infirmus esset, ut dicunt communiter *Tournel. Conc. Ronc. Salm. Busemb. Diana*, et *Renzi* contra *Bonac.* Imò tenent *Gobat, Arriaga, Croix, Leand. et Mazz.* hoc licere etiam extrâ necessitatem, si chiragrâ Sacerdos laborat, dùm dicunt quòd tota Sacerdotis manus sit consecrata; sed probabilius id negant *Bonac. Possev. Diana*, et *Renzi*, quia licet tota manus sit consecrata, tamen juxta Ritum Ecclesiæ pollex, et index Sacerdotis sunt præcipuè ad hoc munus exercendum destinati. Communis autem est sententia cum *Suar. Mol. Castropal. Bonac. Laym.* etc. abstinendum esse à celebrando Sacerdoti pollicem, aut indicem infirmum habenti, ità ut Hostiam frangere nequeat, ut deducitur *ex cap. 11. de Corp. viliat.* ubi dicitur non posse ordinari Sacerdos ille, qui non habet pollicem aptum ad Hostiam frangendam, et pro regulâ generali habetur, quòd quicquid im-

---

(a) num. 243. — (b) *Act. Mediol. p. 4. num. 51.* — (c) num. 244. v. 6. *Non licet.* — (d) *Bullar. t. 4. p. 328. §. 12.* — (e) n. 243. v. 4. *Eucharistia.*

pedit ab Ordinis susceptione, impedit etiam ab il-  
lius exercitio (a).

14. — Notandum 2. Quòd juxtà præsentem dis-  
ciplinam nunquàm licitum est, sinè Pontificis dis-  
pensatione, etiam ad præbendum Viaticum, Eu-  
charistiam administrare sub utrâque specie, aut in  
solâ vini specie; ità communiter *Suar. Lug. Tam-  
bur. Dicastil. Dian. Croix*, etc.; nam præceptum  
Viatici non obligat, cùm sumi nequit juxtà Eccle-  
siæ Ritu(m) (b). Ità etiam sinè causâ (licèt hoc ve-  
niale non excedat) non permittitur partem Hostiæ  
majoris ad communicandum præbere. Sufficit au-  
tem pro causâ, si communicandus sit infirmus, aut  
nobilis, aut famulus, aut alijs cui expectare in-  
commodo esset, licèt ob solam devotionem com-  
municaret, ut communiter *S. Antonin. Silvest. Bo-  
nac. Tourn. Conc. Salm. Elbel*, etc. (c). Nec pa-  
riter licet Communionem pueris præbere antè an-  
nos discretionis, et perpetuò amentibus. Vide quod  
dictum est *Tom. 1. Tract. XII. n. 43. et 44.*

15. — Notandum 3. Denegandam esse Commu-  
nionem publicis peccatoribus, nisi constet de eo-  
rum publicâ poenitentiâ, ut dictum est *Tract. XIV.  
num. 5.* Hic tamen juvat adnotare quæ deliberavi-  
mus ex Epist. Benedicti XIV. ad Episcopos Galliæ,  
quæ incipit, *Ex omnibus*, edita 16. Octobris 1756.  
ubi præbet normam, quando denegandum sit Via-  
ticum Refractariis Constitutioni *Unigenitus*. Ibi enim  
deciditur, ut Communio deneganda sit peccatori-  
bus publicis, et notoriis; at ut tales habeantur,  
requiritur, (si crimen in solâ externâ actione con-  
sistit, cujusmodi est notorietas usurarii, aut con-  
cubinarij) ut vel per sententiam Judicis rei decla-  
rati sint; vel in Judicio crimen sint confessi; vel  
aliquod facinus evidenter commisisse noscantur,  
et in eo facto moraliter perseverent; et quod vulgò  
cognitum est, non adhuc cessavit. Ratio enim ho-  
rum est, quia hæc moralem faciunt certitudinem  
de illorum notorietate criminis. Quod si crimen ab  
internâ

---

(a) n. 244. — (b) n. 245. v. *Peccat I.* — (c) *Ibid.*

internâ animi dispositione pendet (prout esset hæresis, etc.) aliter procedendum; nam tunc tales non habendi sunt, si crimen innititur conjecturis, præsumptionibus, incertisque vocibus; statuit ut si hi in extremo fuerint vitæ constituti, non erit eis denegandum Viaticum, quoties in Paschate non fuerit eis denegata Communio; ubi verò ità validæ adversus ægrotos præsumptiones, et indicia gravia, et urgentia militant, vult ut ægrotus semotim cum lenitate admoneatur atque obsecratur ut resipiscat; demonstreturque ei quòd, quamvis detur ei Viaticum, hoc fiat solummodò, ut obtemperetur Ecclesiæ, quæ ad avertenda scandala publica, et ad ipsius ægroti præcavendam infamiam, eum à Sacra mensâ non repellit, licet peccatorem coram Deo eum reputet, non tamen in proprio Tribunali, ut publicum atque notorium peccatorem agnoscit. An autem graviter peccet, qui in mortali existens Eucharistiam dispensat; nos affirmavimus cum *Suar. Laym. Ronc. Gonet, Viva* etc. adversus alios; et adduximus Catechismum Rom. atque Rituale (a). Notandum insuper peccare qui negat Communionem capite damnatis, si ad eam per Confessionem dispositi sunt, ut rectè dicit *P. Concina*, quicquid dicat *Contensonius*, quamvis ut testatur *Juvenin*, in Galliis, et Hispaniis mos invaluit, ut eis Eucharistia denegetur; sed apud nos contrarium observatur: ideòque dicimus non esse denegandam, etsi reo una restaret vitæ hora (b).

16. — Notandum 4. Quòd in Missâ de *Requiem* proculdubio potest ministrari Communio; nam in Missæ Defunctorum Rubricâ dicitur: *Si sint communicandi, eos communicet, antequàm se purificet*. Et concordat Trident. sess. 21. cap. 6. ubi hæc leguntur: *Optaret (S. Synodus), ut singulis in Missis fideles communicarent*. Et licet *Gavant. et Croix* adducant quoddam Decretum S. C. 1701. in contrarium, nihilominus doctus *Merati* scribit se legisse in Directorio Ecclesiæ Genuensis, quòd eadem Congregatio vetavit ipsum Decretum publicari, et 1711. positivè illud sus-

(a) *Lib. 6. n. 247.* — (b) *Ibid.*  
*Tom. II.*

pendit (a). Et novissimè 2. Septembris 1741. decrevit expressè, posse ministrari Eucharistiam per modum Sacrificii, nempè cum Particulis intrà eandem Missam consecratis, in Missâ defunctorum quæ celebratur in paramentis nigris; secùs verò per modum Sacramenti, nempè cum Particulis præconsecratis extrahendo Pyxidem à Custodiâ, adversùs id quod priùs docuerat Benedictus XIV. (b) cum *P. Merati*, quòd in Missis Defunctorum poterat ministrari Eucharistia, etiam ex Particulis præconsecratis, in Missâ tantum, non autem antè, vel post illam; vide Decretum in Catalogo, qui inest in hoc *Tract. n. 88. Decr. X.* Advertendum hic, quòd si Missa Defunctorum celebratur in paramentis violaceis, (prout certò fieri potest ex Decreto S. R. C. 21. Junii 1670. apud *Merati in Indice tom. 1. n. 44.*) non prohibetur fieri Communio ex Particulis præconsecratis, nec antè, nec post Missam, et tantò minùs in Missâ, cùm in præfato Decreto tantum vetitum est ministrari Eucharistiam in *Missâ Defunctorum* (en verba Decreti) *quæ in paramentis nigris celebrantur.*

17. — Notandum 5. Quòd Communio potest, ex se loquendo, in quâlibet diei horâ ministrari, dùm nulla adest de hoc prohibitio; ità communiter *Azor. Silv. Castrop. Bonac. Sa, Coninch. Ronc.* et alii cum *Suar.* qui affert *S. Ambr.* auctoritatem, qui testatur quòd suis temporibus Communio sub diei finem dabatur. Non permittitur tamen dari Communio, cùm noctescere cœperit, aut in extremâ diei parte, nisi aliqua adesset peculiaris causa, ut dicunt *Suar. Castr. Coninch. Sa, Tambur.* etc. Sed nunquàm permittitur excepto Viatico intempestâ nocte, ut loquuntur *Bonac. et Salm.* nempè elapsis multis noctis horis, Eucharistiam dispensare. In Missâ Natalis Domini, quæ mediâ nocte celebratur, nec licet Communionem præbere, ex pluribus Decretis S. C. et ità pariter nec in Feriâ sextâ Parasceve. Attamen in Sabbato Sancto nulla adest de hoc prohibitio; invenio tantummodo quòd quidem Auctor (*Macrus in Vo-*

---

(a) n. 239. D. 2. — (b) *De Sacrif. Miss. sect. 2. cap. 6. §. 2. in fin.*



*cabul. Eccles.* ) dicit in Missâ Sabbati Sancti ideò omitti Antiphonam *post-communio*, quia olim non ministrabatur Eucharistia : sed *P. Merati*, cum *Grancolis*, *Moretto* et aliis probat oppositum ex quodam Ordine Romano, nempe quòd olim in Missâ Sabbati Sancti omnes adulti, et pueri communicabant, cum in dicto ordine legatur, *omnes communicent*; et addit *Gavantus*, et *Durandus*, quòd in tantum hodiè omittuntur communio et post-communio, in quantum in eorum loco Vesperæ suffectæ sunt. Undè concluditur nullo inniti fundamento ratio, cur prohibita putari debeat tali die Eucharistiæ ministratio; et quoad consuetudinem, certum est quòd in pluribus Ecclesiis, præsertim nostri Regni, et præcipuè in Cathedrali Neapolis solere post celebratam Missam solemnem ministrari populo Eucharistiam (a).

18. — Notandum 6. Quòd si sacerdos, sumptâ ablutione, advertat aliquas reliquias consecratas relictas esse, dicit Rubrica (tit. 6. n. 2.) *eas sumat, sive parvæ sint, sive magnæ, quia ad idem Sacrificium spectant*; et etiamsi Sacerdos pervenerit in Sacristiam, cum adhuc sacris Vestibus indutus est, potest præfatas Reliquias sumere, ut dicunt *Gobat*, *Granad. Diana*, quibus consentit *Benedict. XIV. (b)*, qui subjungit, quòd si Sacerdos exutus sit, tunc aut reponendæ sunt in Tabernaculo, si extat, aut servandæ sunt pro aliâ Missâ, si eodem manè celebranda erit; aliàs sumere debet. Et ità communiter dicunt *Suar. Lugo*, *Cajet. Navar. Vasq. Silv. Bonac. Croix* etc. (adversus *Tamburinum*) servandas esse, si possunt sinè irreverentiæ periculo, Reliquias quæ ex aliâ Missâ remansissent, dum illæ non ad idem Sacrificium spectant : nam Rubrica non permittit alias sumi particulas, quàm illas solas, quæ ad idem Sacrificium spectant (c). Si autem remansisset Particula integra, dicit *Rubrica n. 3.* deferendam eam esse in Tabernaculum, aut saltem servandam ut ipsa à sequenti Celebrante sumatur (intellige cum primus jam sumpsit ablutionem); et si alia Missa non habeatur in eodem

(a) num. 254. — (b) *De Sacrificio Missæ l. 3. c. 17. n. 5. et 6*

— (c) *lib. 6. n. 251.*

## 52 Tract. 15. De Sacramento Eucharistiæ.

Calice conservetur; et si denique non supetat modus, quo cum decentiâ servari possit, potest idem Sacerdos eam sumere. Præterea, Particulæ quæ extrâ corporale reperiuntur, in dubio an sint, vel ne consecratæ, dicunt *Bonac. Enrig. et Gobat.* sumendas esse post ablutionem; et melius (dico) esset cum eâdem ablutione. Insuper, si accideret unquàm quòd in deferendo Viatico remaneret in Patenâ, vel Pyxide aliqua Particula, dicunt *Castr. Tambur. et Burg-haber*, posse eam sumere Sacerdotem, si sacris indutus est Vestibus; aut (ut dicunt iidem Auctores, cum *Lugo, et Marchantio*) potest statim eidem infirmo sumenda præberi; et hanc asserit *Lugo*, esse praxim, nempè, ut post Communionem infundatur aqua in Pyxide, et ablutio detur infirmo (a). Quando autem possit, et debeat dari Viaticum, observetur quod dicetur *n. 19. et ex n. 46.*

### CAPUT III.

#### *De perceptione Eucharistiæ.*

#### PUNCTUM I.

##### De obligatione sumendi Eucharistiam.

*De Viatico, et quandò sumendum est* 19. *Si infirmus vexatur vomitu* 20. *Si tussi* 21. *De Præcepto Paschali*, vide Tom. I. Tract. XII. n. 39.

19. — **D**UOBUS temporibus præceptum Communionis obligat, in Paschate, et in morte. De Communione Paschali jam actum est, cùm de præceptis Ecclesiæ locuti fuimus *Tom. I. Tr. XII. ex n. 39.* quoad Viaticum, autem, dicimus hìc quòd quilibet fidelis tenetur illo muniri, semper ac infirmus in probabili mortis periculo est constitutus; prout est qui graviter decumbit cum mortalibus signis: qui

---

(a) *Ibid. v. Sic autem.*

aliquem periculosum conflictum, aut navigationem aggressurus est; mulieres quæ solitæ fuerunt eniti cum periculo: aut quæ primâ vice parturiuntur, et tenellâ ætate, aut corporis constructione imbecillâ constitutæ sunt; ita communiter DD. cum *S. Thomâ* (a).

20. — Hic advertendum quòd quandò infirmus jugi vomitu laboraret, non potest communicare, si saltem sex horas ab illo liber non sit, ut ait *Busemb.* et in dubio melius dicit *Croix*, adversùs alios, non esse præbendam Communionem; nam potius Sacramenti reverentiæ, quàm infirmi utilitati prospiciendum est. Quoad praxim autem, si vomitus provenit ex cibo, cùm infirmus illum sumit, debet experiri dando ei non consecratam particulam, et si eam retinet, tunc potest dari consecrata. Et idem faciendum, (ut dicunt *Salm.*) in casu delirii, ut observetur utrùm infirmus possit cum decentiâ suscipere Sacramentum (b).

21. — Si autem infirmus vexetur à jugi tussi, quâ cogatur sæpè flemmas è pectore expuere, hic bene potest communicare; quia hoc non inducit periculum projiciendi particulam, nam alius est vehiculus (nempè guttur) quo trajicitur cibus, alius est canalis (nempè aspera arteria) undè ejiciuntur flemmæ, et suspiria. Secùs autem, si tussis ne permetteret quidem Particulam trajicere (c). De Communione dandâ pueris, et amentibus in mortis articulo, etiam actum est eodem *Tract. XII. num. 43. et 44.* Igitur quoad communicandi obligationem, satis est quod dictum fuit. Restat nunc discutiendum quænam sint dispositiones necessariae ad licitè communicandum. Illæ duæ sunt, una animæ, altera corporis. Agemus priùs de animæ dispositione, et postea corporis.

---

(a) num. 291. et 669. — (b) num. 291. v. 2. *Si in ægro.* — (c) num. 292.

## PUNCTUM II.

## De animæ dispositione.

*De Confessione præmittendâ 22. Qui post Confessionem reminiscitur peccati 23. Quænam necessitas excusat à prius confitendo 24. Si Sacerdos celebrando recordetur peccati, aut censuræ 25. Si desit Confessarius 26. Si peccatum est reservatum 27. Si tunc dicendum sit reservatum 28. Si annexa est excommunicatio 29. Quomodò intelligendum est : Quàm primùm 30. An tale præceptum obliget post consecrationem 31. An obliget celebrantem sacrilegè 32. An obliget Laicos 33. An possit communicare, qui dubitat de peccato 34.*

22. — **V**OLENTI communicare, et de peccato mortali conscio, non sufficit contritio, sed necesse est ut confiteatur : potest tamen communicare, modò adsit celebrandi, aut communicandi necessitas, et Confessarii copia desit; sed si ille est Sacerdos ei restat obligatio quàm primùm post celebrationem confitendi. Ut constat ex Trid. sess. 13. cap. 7. ubi hæc leguntur : *Communicare volenti revocandum est in memoriam ejus* (Apostoli nimirum) *præceptum* : probet seipsum homo. *Ecclesiastica autem consuetudo declarat eam probationem necessariam esse, ut nullus, sibi conscius mortalis peccati, quantumvis sibi contritus videatur, absque præmissâ sacramentali confessione ad Sacram Eucharistiam accedere debeat.* Ex quibus verbis communis sententia et vera (a), Suarez, Castrop. Lugo, Conc. Salm. Tourn. etc. (contrà Navarrum, et alios pauciores) docet tale præceptum præmittendi Confessionem non esse Ecclesiasticum solummodò, sed etiam Divinum, dùm Apostolus testatur in suâ Epistolâ se hoc accepisse à Domino :

---

(a) *Lib. 6. num. 256.*

*Ego enim accepi à Domino quod et tradidi vobis. 1. Cor. 11. Deindè subjungit Concilium: Quod à Christianis omnibus, ab his etiam Sacerdotibus, quibus ex officio incubuerit celebrare, hæc S. Synodus perpetuò servandum esse decrevit, modò non desit illis copia Confessurii. Quòd si necessitate urgente Sacerdos absque præviâ Confessione celebraverit, quàm primum confiteatur.*

23. — Igitur dictum est 1. quòd conscius peccati mortalis non potest Communicare, nisi priùs confiteatur. Dicitur *mortalis*, quia peccata venialia, quotquot siut, sicut gratiâ Divinâ non privant, ita nec prohibent quominùs ad Sacram mensam quis accedat. An autem impediant à consecutione fructùs illius, vide quod dictum est n. 7. Hic quæritur, an qui recordatur alicujus culpæ gravis, postquàm cum universali peccatorum dolore confessus est, teneatur confiteri illam, et ad absolutionis beneficium recipiendum antè Communionem? Multi DD. id affirmant, (et hæc sententia ceteroquin est communior): ità *Suar. Bonac. Coninc. Tourn. Conc. Salm.* etc. excipiunt tantùm, si quis nequiret sinè scandali, aut infamiæ periculo Confessionem præmittere. Sed valdè probabiliter negant *Garzia, Præp. Ferrantinus, Honorius, Fabri, Cornejus, et Regin.*, et novissimè hanc sententiam ex proposito tuetur *Continuator, Tourn.* cum *Pontus, Gibert, et Arr.* et asserit primam sententiam nullo inniti valido fundamento; ego tantum asserere non audeo, sed dico hanc secundam sententiam reverà valdè esse rationi consonam, prout mihi affirmarunt doctus Episcopus *Torni*, et alius doctus Theologus examiner Synodalis Civitatis Neapolis, et alii Theologi quos antequàm hoc scriberem consului. Ratio nostra est, quia qui Confessionem præmisit, jam præcepto ante Communionem confitendi satisfecit, et jam confitendo probatus est, ut præcipit Apostolus; siquidem per Confessionem peccatum oblitum jam indirectè remissum est. Remanebit tamen poenitens obligatus ad postea subiacendum illud peccatum clavibus, ut Confessio reddatur integra etiam materialiter, sed interim non obligat præceptum ad confitendum antè Communionem.

nem. Dicunt adversarii quòd præceptum à Concilio indicatum de confitendo requirit Confessionem non tantum formaliter, sed etiam materialiter integram. Sed respondemus hoc gratis-asserì, dùm præceptum aliam non requirit Confessionem quàm illam, quam pœnitens tenetur facere, scilicet formaliter integram; nam per illam jam obtinetur finis, et effectus à præcepto intentus, nempe ut anima probata remaneat, et certa magis de Divinâ gratiâ, quæ faciliùs acquiritur per Sacramentalem absolutionem, quæ cum solâ attritione delet peccata. Nec obstat quam opponunt fidelium praxim, quia hæc non erit statuenda pro obligationis normâ, sed potius habenda est, tanquàm pius et laudabilis usus, qui cæteroquin omnibus suadendus est, quoties causa aliqua in oppositum aliud non suadeat (a). An autem cum dubius quis est commisisse aliquod mortale, de quo non sit confessus, teneatur illud confiteri antè Communionem, vide dicenda n. 34.

24. — Dictum est 2. necessariam esse Confessionem, modò non adsit necessitas celebrandi, aut communicandi. Videamus nunc quid nomine necessitatis intelligatur. Non hìc intelligitur magna devotio: et nec Sacerdotis paupertas, nisi esset paupertas valdè gravis, ut ait *Croix*, sed intelligitur necessitasurgens, ut esset 1. Si moribundo afferendum esset Viaticum, sicut admittunt omnes (b). 2. Si omitti non posset Communio sinè infamiâ, aut scandalo, v. g. si quis in communicantium scamno jam reperiretur, undè discedere non posset quin ab aliis notaretur, prout etiam communiter dicunt DD. (c). Idem etiam esset-si allato Viatico ad infirmum, tempus non suppeteret, ut Confessio compleretur sinè periculo mortis aut infamiæ, quia tunc, ut rectè dicunt *Ronc. Sporer, Busemb. Tambur.* etc. Sacerdos, audito aliquo peccato, debet moribundum absolvere, imponendo ei ut deinceps integram Confessionem faciat, et tunc debet ei Communionem præbere (d) 3. Si Parocho celebrandum esset ut po-

---

(a) *Lib. 6. n. 257.* — (b) *n. 260.* — (c) *n. 257. et 263.* — (d) *l. 6. n. 260. ad 2.*

pulus sacro intersit, et non esset alius qui celebraret, aut ille non posset celebrationem omittere sinè infamiæ notâ. Sed hoc aliis Sacerdotibus non licèt, ut benè advertunt *Lugo, Castrop. Aversa, Salmant. et Ronc.* contrà *Dianam*, licèt Populus in die festivo Missâ carere deberet. (a). Et ità etiam dicimus cum *Suar. Laym. Lugo, Bonacin. Tournely, Conc.* etc. (contrà *Sot. et Silvestr.*), Sacerdotem in die festo potiùs omittere debere Missam ex obligatione, quàm sinè Confessione celebrare: quia tale præceptum cùm sit Divinum, præferendum est Ecclesiastico de audiendâ Missâ (b). An autem possit quis communicare cum solâ contritione, cùm deest Confessarii copia, ut præcepto Paschali satisfaciat, affirmant cæteroquin communissimè *Sot. Palud. Coninc. Enriq. Castrop. Lugo*, etc. ex eo quia præceptum Paschale etiam Divinum est. Sed negant *Suar. Tourn. Salm.* etc. dicentes quòd tunc præceptum Communionis Paschalis non obligat. Hæ sententiæ sunt ambæ probabiles (c).

25. — Si contingeret quòd Sacerdos in celebrando peccati mortalis recordaretur, quicquid dicant alii, distinguendum est cum communi sententiâ *Suar. Vasq. Lug. Castrop. Bonac.* etc. quòd si recordetur illius post consecrationem, tunc non est Missa interrumpenda, ut confiteatur, sicuti docet etiam *S. Thomas* (d), et uti expressum est in Rubricâ (de *Defect. sit.* 8. n. 4.): Intelligitur quòd semper contritionis actus eliciendus est; et licèt *Lugo, Tamb.* et alii dicant, quòd si Sacerdos magnam haberet difficultatem in huiusmodi temporis angustiis ad se conterendum, posset citrà culpam Missam prosecui, modò conaretur ad contritionem eliciendam; attamen jure merito contradicit *P. Concina*, dùm in tali casu urget præceptum Divinum, et contrà nemo est qui nesciat Deum non jubere impossibilia, ut dicit Trident. sess. 6. c. 11, sed præstare sua auxilia ad operandum, aut saltem ad petendum id quod facere debemus: hinc si Sacerdos delinquit in se conterendo, sua

---

(a) n. 261. — (b) *Ibid.* v. 4. *Si urgeat.* — (c) *Ibid.* — (d) 3. p. q. 83. a. 6. ad 2.

negligentia delinquit, aut quia peccato adhæret. Si verò recordetur antè consecrationem, et præsertim antè Canonem, tunc confiteri debet, si Confessarius adest et si absque infamiæ notâ hoc efficere potest; et nihil refert si Missa interrumpatur, nam talis pars est extrinseca Sacrificio (a); et si Confessarius haberi nequit, et infamiæ periculum abest, probabilius est obligari ad missam omittendam, ut dicunt *Lugo, Sylvius, Tourn. Silvest.* et alii, quibus etiam adhæret *S. Thomas (b)*, dicendo hanc opinionem esse tutiorem (contrà *Castrop. Suar. Navar. S. Bonav. Victor.*) et hæc sententia videtur esse juxtâ Rubricam (3. p. tit. 8. n. 4. et 5.) ubi hæc leguntur: *Si antè consecrationem recordetur Sacerdos se esse in peccato mortali, aut se esse excommunicatum, vel suspensum, aut locum esse interdictum, si non timetur scandalum, debet Missam incæptam deserere.* Diximus probabilius, quia non est certum quòd Rubrica per verbum debet imponat grave præceptum. Cæterum benè advertunt *Vasq. Laym. et Tourn.* quòd in tali casu difficulter evenire potest, quòd Sacerdos deserat Missam sinè infamiæ notâ (c).

26. — Dictum est 3. *Si confessarii copia deest.* Intelligitur 1. si nullus Confessarius præstò adsit, et contrà Sacerdos celebraturus alium absentem sinè gravi incommodo adire nequit, ut dicunt *Castrop. Vasq. Salm.* et alii; *absens* autem intelligitur, si Confessarius in notabili distantia abesset, v. g. (ut dicunt) duas aut tres horas itineris, aut etiam minùs, (ut dicit *Canus*) si brevi celebraturus esset (d). Intelligitur 2. si præstò esset Confessarius idiomatis expers, aut jurisdictione privatus, aut talis cui Sacerdos sinè gravi damno confiteri non possit (e).

27. — Sed hic quæritur 2. an habens reservatum, et non adsit Confessarius hæc facultate præditus, teneatur confiteri simplici Confessario ut communice? Respondetur: si iste non habet aliud peccatum præter reservatum, communis est sententia quòd confiteri non teneatur, sed sufficit, urgente neces-

---

(a) num. 262. v. hic, dub. 1. — (b) 3. p. q. 83. a. 6. ad 2. — (c) n. 262. dub. 2. — (d) n. 264. ad 1. — (e) Ibid. ad 2.



sitate, ut cum contritione communicet; sed si solam haberet attritionem, tenetur confiteri de aliâ materiâ, ut saltem indirectè sit à reservato absolutus. Si autem haberet reservata, et non reservata, dicimus cum sententiâ communissimâ, et probabiliori *Suar. Castrop. Vivæ, Lug. Conc. Salm.* et aliorum (contrâ *Vasq. Tourn.* etc.) istum teneri ad Confessionem; quia stante præcepto de confitendo antè Communionem, si nequit materialiter integrè, saltem debet formaliter confiteri (a).

28. — Quæritur 2. Dato quòd iste simplici Confessario confiteatur; an debeat explicare tam reservata, quàm non reservata? Affirmant probabiliter *Sot. Filliuc. Bonac. Suar. Viva, Conc. Salm.* etc.; nam Confessarius necesse habet, ut totam poenitentis cognoscat Confessionem, ad hoc ut de ejus dispositione ad absolutionem obtinendam ferat judicium, v. g. si habitum aliquem contraxerit, si in proximâ versetur occasione etc. Sed non minùs, et fortè magis probabiliter negant *Castrop. Gerson. S. Antonin. P. Sot. Alen. Salas, Ledesm.* et *Lugo* etiam probabile hoc dicit; tùm quia non videtur adesse obligatio peccata exponendi non habenti super illis jurisdictionem, ac proindè Judicem esse impotentem; tùm quia aliàs poenitens haberet onus bis eadem peccata confitendi. Et licèt quis in casu quo esset habituatus, ut dictum est, et moralem suæ dispositionis certitudinem non haberet, teneretur totam conscientiam suam Confessario patefacere, ut ille judicaret an sit, vel ne absolutionis capax; nihilominùs hoc esset per accidens, sed non propter obligationem faciendi Confessionem materialiter integram, dùm ex se sufficit tunc formalis integritas (b).

29. — Si quis autem excommunicatione reservatâ innodatus existèret; et urgeret, communicandi necessitas, ac non esset à quo possit ab eâ absolvi, communis est sententia quòd iste posset communicare antequàm ab illâ absolveretur; quia Communionis præceptum quod interdicat excommunicatos à Sacramentis, non obligat, cùm alioquin non po-

---

(a) n. 265. — (b) lib. 6. n. 265. Qu. II.

test evitari scandalum, aut infamia. Sed fit dubium, an tunc possit ille confiteri facultate super excommunicatione illâ destituto? Negant probabiliter *Silvius, Canus, Sot. Vasq.* etc. dicentes quòd ille benè potest communicare, semper ac est contritus; sed nequit Sacramentum pœnitentiæ suscipere, cùm ab hoc per excommunicationem illi interdictum sit. Sed probabilius affirmant *Suar. Sarch. Lugo, Coninch. Salmant* etc., quia in eo necessitatis casu, sicut excommunicatio non privat Eucharistiæ Sacramento, ita nec privat pœnitentiæ Sacramento, quod à volente communicare semper ac potest, ex præcepto Divino sumi debet præmissâ Confessione. Et benè probant præfati AA. validè posse aliquem absolvi à peccato, quin absolvatur ab excommunicatione, cùm Ecclesia non potest, imponendo censuram, Sacramentorum valorem irritare, quæ ex Divinâ dependent institutione; et in tantum excommunicatus confitendo, invalidè absolveretur, quia esset indispositus, cùm ab Ecclesiâ ei interdicta sit Sacramentorum susceptio; sed cùm necessitas eum à tali prohibitionem eximit, tunc validè et licitè recipit absolutionem Sacramentalem (a).

30. — Dictum est postremo loco, quòd si Sacerdos cum peccati mortalis conscientia, non præmissâ Confessione, ob instantem necessitatem, et quia non habet cui confiteatur, celebrat, præcipit Concilium, ut post celebrationem *quàm primum confiteatur*. Hoc non est consilium, ut dicebat Propositio 38. damnata ab Alexandro VII, sed est verum præceptum, et quidem grave. Hoc supposito præcepto quæritur 1. Quomodo intelligendum illud *quàm primum*? Nonnulli intelligebant, cùm Sacerdos suo tempore confitebitur; sed hæc inanis explicatio etiam damnata fuit Prop. 30. ab eodem Pontifice Alii intelligebant, cùm Sacerdos vult iterum celebrare; sed hæc explicatio est etiam improbabilis, dùm Concilium præcepit Confessionem præcise post celebrationem, nimirum etiamsi Sacerdos vellet pro eo tempore à celebrando se abstinere. Alii verò nimis rigidi dicunt intelligi statim ac eà

---

(a) *Ibid. Qu. III.*

Cap. 5. Punct. 2. De animæ dispositione. 61

erit facultas confitendi, etiam eodem die, ita *Wigandt*, et *Concina*. Sed cum communi rectè dicunt *Milante*, *Coninch*. *Lugo*, *Escob.* et alii cum *La - Croix* (qui adducit quandam declarationem S. C.) sufficere, si Sacerdos intrà triduum confiteatur, similitudine acceptâ ab obligatione, quam habent, qui in mortis articulo absoluti sunt ab excommunicatione reservatâ, superiorem adeundi, quàm citò commodè possint, ut in *C. Eos qui, de Sent. Excom.* (sub poenâ reincidendi in eandem censuram) cui obligationi etiam intelligitur satisfieri intrà tres dies; *Lugo*, *Garcia*, et *Milante*. Et idem currit pro obligatione deferendi libros Hæreticorum ad Episcopos, *Sanch. Ugolin.* et *Sayr.* Advertunt tamen DD. suprâ citati, quòd in aliquo casu potest Sacerdos teneri ad confitendum eodem die, et fortè eâdem horâ, v. g. si Confessarius citò longè profecturus esset, aut si Sacerdos in eâdem esset celebrandi necessitate die sequenti, in quo etiam Confessarius defuturus esset (a).

31. — Quæritur 2. An hoc præceptum obliget Sacerdotem qui celebrat, reminiscens suum peccatum post consecrationem? Negant *Vasq. Pelliz, Lugo*, et *Diana*, quia Rubrica (tit. 18. numer. 3. et 4.) loquens de eo qui recordatur ante celebrationem, dicit, *tenetur confiteri quàm primùm*; sed loquens de eo qui recordatur post consecrationem, nihil aliud dicit quàm *conteratur cum proposito confitendi*. Hæc sententia non videtur improbabilis; sed est communior et fortè probabilior contraria *Suarez*, *Molfes. Megal. Bonuc. Reginald.* etc., quia jam tunc verificatur casus à Concilio suppositus, quòd jam celebrat in peccato, et sinè Confessione; tantò magis quòd in illo *confitendi* Rubricæ, facile subintelligitur verbum *quàm primùm*, paulò antè jam à Rubricâ expressum (b).

32. — Quæritur 3. An hoc præceptum obliget etiam Sacerdotes sacrilegè celebrantes, sive illos qui tenentur à possunt confiteri, et celebrant sinè Confessione. Aliqui etiam affirmant; sed sententia vera, et communissima negat cum *Suar. Vasqu.*

---

(a) *Lib. 6. n. 266. v. Posito.* — (b) *lib. 6. n. 267.*

*Lug. Filliuc. Syr. Moya* etc. quia præceptum Concilii tantum respicit eos qui bonâ fide celebraverunt, ne Confessionem differant sub colorato prætextu necessitatis celebrandi, non autem sacrilegos, quibus tale præceptum non est profuturum; qui spernit præceptum Divinum de non celebrando in peccato, facilius spernit etiam Ecclesiasticum de confitendo quàm primùm (a).

33. — Quæritur 4. An hoc præceptum confitendi quàm primùm obliget etiam Laïcos, qui communicant ob necessitatem antè Confessionem? Affirmant *Azor. Navar. Conc. et Tourn.* dicendo quòd pro Laïcis eadem militat ratio, ac pro Sacerdotibus; ex illâ regulâ generali, *ubi currit eadem ratio, ibi currit eadem legis dispositio.* Sed est communissima et probabilior sententia opposita *Wigandt, Coninch. Suar. Vasq. Laym. Bonac. Filliuc. et Lugo*, qui asserit primam communiter rejici. Ratio est, quia reverà non currit pro Laïcis ratio quæ exstat pro Sacerdotibus; dùm hi plerumque majorem habent necessitatem celebrandi ad evitandum scandalum, quàm non habent sæculares, ut communicent (b).

34. — Quæritur 5. An dubitans sit, vel ne in gratiâ, possit communicare? Huic dubio respondimus in Opere (c), quòd (ex solvendo) qui dubitat, an sit in peccato, non potest communicare. Nihilominus melius re perpensâ, mihi videtur respondendum cum majori distinctione. Undè sic dicamus: si quis dubitat, an graviter peccaverit nec ne, tunc licet non præmissâ Confessione potest ad communionem accedere, sive dubium sit negativum, sive positivum (sufficiendo sibi, ut tutius fructum Sacramenti percipiat, ut præmittat contritionem; ) quia præceptum Apostoli, *Probet autem seipsum homo*, ratione cujus intelligitur præcepta esse Confessio, ut declaravit Tridentinum, ligat tantum eos qui sunt conscii, nempe certè sciunt se mortale commisisse, de quo non sunt adhuc confessi, ut idem Tridentinum declaravit *sess.*

---

(a) n. 266. *Qu. V.* — (b) n. 268. — (c) n. 432. et 475.

13. c. 7. dicens : *Ut nullus sibi conscius peccati mortalis, ad Eucharistiam accedere debeat.* Itaque præceptum prohibitionis non incipit possidere, nisi postquam homo sit sui peccati conscius. Contrà si quis est certus de peccato commisso, tunc non potest communicare, nisi certus sit se per Confessionem probatum fuisse, quia tunc certè possidet in eo præceptum prohibitionis; undè ille cum dubio negativo, aut positivo, an recuperaverit nec ne amissam gratiam, (v. gr. cum dubitat, an Confessio fuerit nulla ex defectu dispositionis, aut jurisdictionis, aut si dubitat de contritione in casu necessitatis communicandi), non potest Communionem recipere; quia tunc agit contrà præceptum; quod requirit probationem non solum probabilem, sed etiam certam, sicut fuit certum peccatum. Sed objicere possent id quod dictum est *Tom. I. Tr. I. n. 17.* nempe sufficere satisfactionem probabilem ad adimplenda præcepta. Sed benè respondet *Ronc.* (a) præfatam sententiam locum habere, cum agitur de repetendo opere cui probabiliter satisfactum est; nam non præsumitur legislator velle obligare ad satisfaciendum suis legibus cum tanto rigore, ut repetenda sint opera, quibus probabiliter satisfactum est; non autem cum agitur quòd quis debeat, et possit sinè suo magno gravamine abstinere ab aliquo opere faciendo, antequàm certus fiat adimplevisse conditionem appositam à lege, quæ possidet; quia in hoc non præsumitur aliqua conniventia Legislatoris, et ità evenit in casu præsentis.

---

(a) *Ronc. de Eucharistid, pag. 3. qu. 6. Resp. 6.*

## PUNCTUM III.

## De dispositione corporis.

*De jejuniis naturalibus. In dubio jejunii. Si horologia sint discordantia. Frangit jejunium quod ab extrâ suscipitur 35. De reliquiis ciborum 36. De reliquiis aquæ, sacchari, etc. 37. De tabaco per nares sumpto 38. An fumus tabaci 39. De tabaci foliis, et aromatibus dentibus contritis 40. De aquâ, aut similibus per narices voluntariè haustis, aut casu 41. An capilli, lapilli, charta, etc. frangant jejunium 42. et 43. Qui non factâ digestionem, etc. 44. Expuere statim à Communionem 45. In quibus casibus non requiratur jejunium, et I. in Viatico. An possit replicari Viaticum 46. Et quoties 47. An qui ex devotione paucis antè diebus communicavit, etc. 48. An qui eodem mane 49. An possint omitti verba; accipe Viaticum 50. An possit celebrare non jejunus ad dandum Viaticum 51. II. Non requiritur jejunium, si timetur de injuriâ Sacramenti 52. III. Si timetur scandalum; si celebrans recordetur se non esse jejunum 53. IV. Si perficiendum sit Sacrificium. Quid agendum, si advertatur error vini? et quid in dubio, etc. 54. V. An ad evitandam mortem possit celebrare non jejunus 55. An pollutio impediat Communionem 56. An copula conjugalis 57. Qui externè est sordidus, aut leprosus, vel menstruata, aut accedit immodestè. Sacerdos qui Laïcorum more communicat 58.*

35. — **P**ER se loquendo, ut licitè suscipiatur Communio (juxtâ Ecclesiæ præceptum in *cap. Ex parte, de celebr. Miss.*) requiritur jejunium naturale, nempe, ut quis nihil sumpserit cibi, aut potûs ex puncto mediæ noctis. Dubium tamen, an deglutiverit aliquid à mediâ nocte, non impedit à Communionem, ut diximus *Tom. I. Tr. I. n. 19*, quia (ut ibi probavimus) hoc præceptum non est posi-

tivum, ut jejunus accedat ad Communionem, sed est negativum, ne communicet post jejunii fractionem; quare quoties non est certum de jejunii fractione, non possidet jam prohibitio, sed libertas communicari volentis. Et hâc ratione dicunt communissimè *Sanch. Lug. Merati, Holzm. Croix, Salmant. Quarti, Escob. Villalob. Trullench. Fagund.* licere inter multa horologia sequi ultimum quod signat mediam noctem; modò non constet de errore; et modò (benè subjungit *Croix*) hoc ultimum non sit tale, ut plerumque erret, quia tunc præsumptio est quòd semper erret (a). Sed hic adverte, quòd tempus mediæ noctis non terminatur, ut volunt *Salmanticens.* in ultimo horologii ictu, sed in primo, ut rectè dicunt *Lug. Sanch. Tourn.* etc., et de hoc ego certus sum factus à quodam horologiorum artifice peritissimo (b). Ob eandem rationem non admittitur parvitas materiæ, ut fatentur omnes tanquàm certum, quicquid dicant *Gibert, et Pasqual.*, quia præceptum de non accedendo ad Communionem post cibi, vel potùs sumpcionem, est negativum (c). Ad frangendum autem hoc jejunium, juxtà regulas communiter à DD. assignatas, tria requiruntur. 1. Ut quod deglutitur ab extrà sumatur. 2. Ut sumatur per modum comestionis, aut potationis. 3. Ut habeat rationem cibi, vel potùs. Itàque juxtà I, regulam ad frangendum jejunium, sumendum est aliquid ab extrinseco; ità *Suar. Croix, Elbel, Sporer, etc.* ex *S. Thomà* (d), qui dicit, quòd quicquid provenit ab intrinseco non potest dici, quòd comedatur, ideòque non lædit jejunium (e). Hoc posito, benè potest communicare qui sanguinem ex capite, vel gingivis manantem deglutit, licèt ex proposito id faceret; ità communiter *Suar. Laym. Bonac. Cabas. Habert, Antoine, Salmanticens.* quicquid dicat *Tournely*; quia ut dictum est cum *S. Thomà*, quicquid ab extrinseco non sumitur, non dicitur comedi (f).

---

(a) *Lib. 6. n. 282.* — (b) *Ibid. v. Nam autem.* — (c) *c. 278.* — (d) *In 4. d. 8. q. 2. a. 4. q. 2.* — (e) *lib. 6. n. 275. et 279.* — (f) *n. 379. v. Secus vero.*

36. — Sed hîc fit dubium, an frangat jejunium qui voluntariè deglutit reliquias cibi in ore relictas? *Suar. Quarti, Henriq. Castr. Ellb. Coninc.* et alii penitùs negant, dicendo tales reliquias reputari, ut partes comestionis diei præcedentis, et videtur Rubrica nimis adhærere huic sententiæ (*de Defect. n. 3.*) dùm dicit: *Si reliquiæ cibi remanentes in ore transglutiantur, non impediunt Communionem, cùm non transglutiantur per modum cibi, sed per modum salivæ.* Alii tamen communiùs, ut *Vasq. Laym. Bonac. Tourn. Ronc. Cabass.* affirmant, cùm hujusmodi reliquiæ transglutiantur ex proposito, quia tunc id habet rationem novæ comestionis; et hujus sententiæ est etiam *S. Thomas* (a) qui dicit: *Reliquiæ cibi remanentes in ore, si casualiter transglutiantur, non impediunt Communionem;* igitur (juxtà Angelicum) si voluntariè transglutiantur, impediunt à Communionem. Hæc sententia videtur probabilior, licet primam non puto improbabilem; sed quia non nimis scrupulosè in hoc incedendum est, ut benè advertit *Suar.* libenter amplector sententiam *Card. de Lug.* quam etiam sequitur *Benedict. XIV.* in suo celebri Opere de *Sacris. Miss.* (b) quòd reliquiæ à dentibus avulsæ, quæ super linguâ sentiuntur, hæ debent expui; sed cæteroquin non adest obligatio diligentiam adhibendi eas à dentibus scalpendi; dùm hæc obligatio nimis esset scrupulis obnoxia: et hoc videtur propriè requirere Rubrica superiùs relata, dùm dicit quòd eæ reliquiæ transglutiantur per modum salivæ (c).

37. — Et idem dicendum de reliquiis aquæ, quâ abluitur os, quæ etiam impediunt Communionem, si voluntariè absorbentur, non autem si præter voluntatem; ita communiter *Suar. Castrop. Tourn. Holzm. Salm.* etc. cum *S. Thomâ* loco cit. ubi dicit: *Et eadem ratio est de reliquiis aquæ, vel vini, quibus abluitur os, dummodò non trajiciantur in magnâ quantitate, sed permixtæ salivâ, quod vitari non potest.* Et idem docet Rubrica, dicens;

---

(a) 3. p. q. 80. a. 8. ad 4. --- (b) lib. 3. c. 17. --- (c) l. 6. n. 279.



*Idem dicendum* (nempè non frangere jejunium) si, lavando os, deglutitur stilla aquæ præter intentionem; igitur si aqua trajicitur præter intentionem, non frangitur jejunium (a). Non dubitatur autem quin frangat jejunium, qui in ore antè mediam noctem aliquid ex saccharo; vel melle confectum mittit, et pòst illam deglutit. Idem procedit de eo qui traiceret sanguinem ex digito imbitum, aut lacrymas ex oculis manatas; ità communiter DD. Et idem dicunt de eo, qui casu in flumen decidens, aut ab aliis vi sibi illatâ aquam, aut aliud potabile deglutiret (b).

38. — II. Regula est, ad frangendum jejunium requiri, ut accipiat aliquid per modum comestionis, aut potationis: quare communiter dicunt *Suar. Lug. Conc. Holzm. Ronc. Escob. Croix, Etb.* (quicquid dicunt aliqui pauci) non lædere jejunium tabacum per nares sumptum, licèt aliquid illius descenderet in stomachum, ratione suprâ allatâ; quia hujusmodi trajectory non est per modum comestionis, sed attractionis; saltem ait *Benedictus XIV. de Synod.* (c), hoc est permissum propter usum universalem inter fideles receptum. Et hic obiter notandum id quod idem Pontifex refert, nempè quòd *Innoc. X.* et *Innoc. XII.* excommunicationem inflixerunt in eos qui in Ecclesiâ Vaticanâ tabacum sumerent: et eandem imposuit *Urbanus VIII.* pro Ecclesiis Hispanicis; sed *Benedictus XIII.* omnes istas prohibitiones abstulit (d).

39. — Pariter tabaci fumus ore haustus non frangit jejunium, ut etiam communiter docent *Suar. Villalob. Trullenc. Salm. Aversa, Holzm. Viva, Croix, Spor.* etc. cum eodem *Benedicto XIV.* (e), qui similiter testatur hanc esse hodiernam consuetudinem confirmatam cum communi DD. consensu. Limitant tamen *Salmant.* et dicunt frangere jejunium, qui ex proposito transmitteret fumum in stomachum, dicendo quòd hæc esset vera comestio, dum talis fumus etiam aliquo modo nutriret; sed

(a) *Lib. 6. n. 279. d. 2.* — (b) *lib. 6. v. Idem.* — (c) *l. 7. c. 63.* — (d) *l. 6. n. 280.* — (e) *de Sacrif. Miss. l. 3. cap. 17.*

68 *Tract. 15. De Sacramento Eucharistiæ.*

hæc limitatio communiùs, et probabiliùs negatur ab *Escob. Præpos. Marc. Viva, Spor. Renzi, Tab. Diana*, etc. Et ratio est, quia fumus non sumitur nec per modum cibi, ut dicetur in tertiâ regulâ, nec reverà est cibus in se comestibilis, aut manducabilis quem voluerit Ecclesia prohibere, juxta communem DD. sensum (a).

40. — Nec pariter frangit jejunium tabacum, aut aromata dentibus attrita, semper ac foras expuitur succus. Ità etiam communiter *Lugo, Holzm. Bonac. Spor. Coninch. Præpos. Trullench. Salm. Viva, Renzi*, etc. adversùs *Henno*, qui sustinet quòd mandendo illas res, semper aliqua portio in stomachum transmittitur, quamobrem evenit quod (ut dicit) pituita ejiciatur. Sed respondit *Cardinalis de Lugo*, quòd ad pituitam ejiciendam non requiritur, ut succus in stomachum descendat, sed sufficit, ut tabacum ad os applicetur, nam ità immittitur in stomachum virtus pituitam ejiciendi nervis mediis, qui ad stomachum respondent. Et hoc etiam, ut dicunt *Tannerus, Lugo, Escob. Tamb. Viva*, etc. etiamsi deglutitur, sed præter intentionem aliquid succi, salivæ inseparabiliter admixti, quia tunc non trajicitur per modum cibi, sed salivæ. Imò *Lorichius* excusat, etiamsi casu granum integrum deglutiretur; sed hoc rectè non admittunt *Bonc. et Tamb.*; secùs verò esset si deglutiretur aliqua minima particula insensibiliter immixta salivæ, quia tunc reverà per modum salivæ trajiceretur. Cæterùm omnes conveniunt hujusmodi masticationem indecentem esse antè Communionem, 'undè non est immunis à veniali, nisi adsit aliqua causâ excusans (b).

41. — Volunt *Suar. Fagund. et Tambur.* etc. ne frangere quidem jejunium aquam per narices in stomachum transmissam, ut de tabaco dictum est. Sed ego hoc non admitto, si quis ex proposito id faceret; et quod de aquâ puto, idem mihi videtur de tabaco, et de quocunque digeribili: quia licèt hæc actio de se non sit potativa, nec manducativa, sed dumtaxat attractiva, nihilominùs quandò illa ex proposito intenditur, et

---

(a) *Lib. 6. cit. n. 280.* -- (b) *Ibid. dub. 3.*

ordinatur à personâ ad transmittendum in stomachum potum aut cibum, tunc per æquivalentiam illa actio induit moraliter rationem potationis, aut manducationis; nam jam intercedit tam materia potabilis aut manducabilis, quàm actio apta ad consequendum eundem finem quem habet potatio aut manducatio (a). Secùs verò, si casu in stomachum aliquid transmitteretur. Et idem dicunt communiter *Navar. Suar. Lugo, Habert, Concina, Ronc. Salmant.* etc. de eo quod per modum respirationis deglutiretur, v. g. parùm pulveris à vento sparsi, aut musca, aut gutta pluvie, et hujusmodi, si hoc casu trajicitur, non frangit jejunium, sed illud frangit si datâ operâ id fiat, quia tunc vera manducatio evadit (b).

42. — III. Règula: ad frangendum jejunium requiritur, ut habeat rationem cibi vel potus. Hinc quaeritur, an deglutire capillos, ungues, lapides, ligna, chartam, et similia impediat à Communionem? Alii universè negant, ut *Ledesm. Busemb. Diana, Renzi*, etc. ex regulæ mox allatæ applicatione, nempe quia hujusmodi non habent rationem cibi, saltem quia usu communi cibi non reputantur. Alii contrà universè affirmant, ut *Layman, Castrop. Wigandt, Ronc. et Salmant.*, dicendo quòd reverentia ergà Communionem exigit, ut antè illam nihil in stomachum transmittatur. Sed sententia communior, et quæ mihi magis arridet est illa *Concina, Lugo, Tourn. Escob. Holzm. Viva, Spor.* et aliorum, quæ distinguendo dicit jejunium non frangere ea quæ digestibilia non sunt, ut sunt, capilli, metallum, crystallus, ungues et serica aut lanea fila, quia hæc non nutriunt, nec cibi rationem habent. Citant Adversarii pro se *S. Thomam*; sed nos ostendimus in Opere *S. Thomæ* in hoc nostræ sententiæ non adversari, saltem non esse apertè adversum (c).

43. — Contrà frangunt jejunium omnia quæ digeri possunt, nempe illæ quæ in stomacho cùm alterari possint, in hominis substantiam convertuntur, ut sunt charta, paleæ, fila lineæ, pulveres medicinales, cera, quia hæc ordinariè aliquid mellis reti-

---

(a) *Ibid.* v. *Idem.* --- (b) *Ibid.* --- (c) l. 6. n. 281.

net, et idem dicunt *Lugo*, *Wigandt*, *Escob. Viva*, et *Mazzot*. de terra, seu argilla quam solent comedere mulieres, dùm in illâ semper (ut dicunt) invenitur aliquid in stomacho alterabile, adeoque nutritivum (a).

44. — Notandum 1. Celebrare statim à cœnâ in-somnum et indigestum non impediri à Communionem ratione præcepti jejunii, ut docent communiter *Suarez*, *Juvenin*, *Bonac. Sot. Nav.* etc.; ceterùm benè advertunt *Tournely et Concina*, cum *S. Thomâ* (b), quòd aliquandò convenit à Communionem abstinere ob mentis torporem, ratione cujus (ut loquitur Angelicus) *Homo fit ineptus ad sumptionem hujus Sacramenti*. Sed hoc non intelligendum cùm quis quantum potest nititur, ut à tali tempore liberetur, et ut devotè ad Sacramentum accedat, præsertim si vigilia aut indigestio provenierit ex justâ, aut naturali causâ, ut dicemus n. 56. in simili casu (c).

45. — Notandum 2. expuere statim à Communionem culpâ vacat, semper ac nulla suspicio subest quòd aliquod fragmentum sit relictum in ore, ità *Sanch. Azor. Bonac. Wigandt, Holzm. Croix*, ex *S. Thomâ*. Idem dicit *Holzm.* de comestione aut potatione statim post Communionem, nam licèt olim ex *C. Tribus, de Consecr. dist.* 3. jejunium protrahendum esset usquè ad sextam, attamen ut testatur *S. Thomas* (d) hoc præceptum jam diù abrogatum est. Ceterùm hoc facere sinè causâ, dùm etiam species sacræ perdurant in stomacho (ut per horæ quadrantem saltem pro Sacerdotibus), non excusatur à veniali; ità communiter *Suar. Aver. Quarti, et Dicast.* ex *S. Thomâ*, qui loco citato hæc subjungit: *Debet esse aliqua mora inter sumptionem hujus Sacramenti, et reliquos cibos*. Dictum est sinè causâ, quia quælibet justa causa excusat, v. g. si daretur signum mensæ pro Religioso, etc. (e).

46. — Videamus nunc in quibus casibus possit suscipi Eucharistia à non jejuno. I. Cùm Communio datur per Viaticum in periculo mortis. Dictum est

(a) *Lib. 6. n. 281. v. Secus.* --- (b) *3. p. q. 80. ad 5.* --- (c) *n. 289. v. Hic ult.* --- (d) *3. p. q. 80. a. 8. ad 6* --- (e) *l. 6. n. 283.*

periculo, quia ad recipiendum Viaticum non est necesse, nec laudabile est expectare tempus, quando nulla amplius spes vitæ subest, sed sufficit, ut adsit periculum probabile mortis. Et tunc non dubitatur à Doctoribus quin possit pluries accipi Viaticum, etiam durante eadem infirmitate, dum hoc Sacramentum non solum sumi debet ob præcepti satisfactionem, sed etiam ad robur adversus tentationes, quæ in morte sunt validiores et periculosiores. Et hoc non tantum si novum superveniat periculum, sed etiam si idem perdurat, ita communiter *Sot. Suar. Tolet. Laym. Sylvest. etc.* cum *Benedicto XIV.* qui Episcopos hortatur, ut Parochis insinuant, quod ipsi Viaticum in eodem morbo ministrare debent usque ad duas aut tres vices (a).

47. — Quod dubitatur est 1. quantum intercedere debeat temporis inter unam et aliam Communionem; Communiùs *Silvest. Concina, Tourn. Busemb. Salmant. etc.* dicunt octo dies. Alii sex, ut *Armil. Filiuc. Diana, Possev. etc.* et non improbabilius *Laym. Escob. Roncag. et Hurtadus* fidenter dicunt, Viaticum posse etiam sequenti die replicari cum infirmus solitus erat sæpè communicare, et cum imminet morale mortis periculum; imò *Castropal. Armil. Tambur. et Dicast.* admittunt universè posse replicari quolibet die (b).

48. — Quæritur 2. An qui paucis antè diebus ex devotione communicaverit, superveniente mortis periculo, teneatur sumere Viaticum? Alii cum sententiâ communiore id negant, etiamsi antè octo dies communicaverit; ita *Layman, Suar. Concina, Roncag. Bon. etc.*, quia, ut dicunt, jam ille per eam Communionem se ad mortem præparavit, quare jam satisfecit fini præcepti. Hæc sententia est satis probabilis, saltem ut dicunt *Suar. et Lugo*, si periculum mortis naturaliter accadat, quia tunc tempore Communionis sumptæ jam cœpit moraliter imminere periculum. Sed probabilius affirmant *Vasq. Castrop. Conc. Tourn. Habert, Diana, Salm. etc.* quia hoc

---

(a) *De Synod. l. 7. c. 12.* — (b) *lib. 6. n. 285.*

præceptum quod divinum est, præcisè obligat cùm actu urget mortis periculum; et sicut non potest debito satisfieri antequàm illud contrahatur, ità nec adimpleri præceptum, antequàm obligare cœperit. Nec valet dicere, quòd per illam Communionem jam præcepti fini satisfactum sit, quia si hoc sufficeret, sufficeret etiam ad adimplendum præceptum Paschale, ut quis communicaret die præcedente Dominicam Palmarum, sed hoc nequit dici (a).

49. — Quæritur 3. An qui manè communicavit ex devotione, debeat aut possit Viaticum sumere, superveniente mortis periculo? Tres adsunt sententiæ. Prima dicit teneri, ut satisfiat Præcepto. Secunda dicit non teneri, sed posse; ità *Roncagl. Gob. Anac.* etc. Tertia dicit non teneri nec posse, cùm praxis Ecclesiæ ea sit, ut nemo bis eodem die communicet. *Benedictus XIV. de Syn. l. 7. c. 11.* dicit, Parochum posse quam maluerit harum amplecti sententiam, undè omnes tres ut probabiles habet. Cæterum inter has probabilior mihi videtur sententia *Cardinalis de Lugo*, qui distinguit, et dicit quòd in morbo violento, verb. grat. si quis fuerit vulnere percussus, vel ex alto ceciderit, potest communicare; secus verò in morbo naturali, quia ille qui manè communicavit, et jam cœpit corripì morbo (qui diei progressu postea dignoscitur mortalis), moraliter communicavit in mortis periculo, quod jam manè aderat, licèt lateret. Et idem dicendum cum *Suar.* de apoplexiâ, dùm hic morbus judicatur, quòd jam prius in suis causis existeret (b). Advertendum cum *Viva et Salmant.* quòd si infirmus sinè difficultate potest recipere Viaticum jejunos die sequenti, tenetur expectare; modò interim absit periculum mortis; aut si non posset observari jejunium etiam postridiè, quin omitteretur medicina opportuna: aut si Sacramentum deberet afferri întempestâ nocte. Ceterum rectè dicunt *Sot. Nav. Filliuc. Salm.* et alii communiter quòd in hoc non est scrupulosè procedendum, dùm Concilium Constantiense *sess. 13.* absolutè eximit moribundòs à lege jejunii (c).

50.

(a) *L. 6. n. 285. dub. 2.* --- (b) *n. 285. dub. 3.* -- (c) *Ibid. v. Hic autem.*

50. — Quæritur 4. An Sacerdos ministrans Viaticum possit aliquandò ex justâ causâ omittere verba illa: *Accipe, frater, Viaticum etc.*? Negant *Clericatus, Tamb. Quarti etc.* quia Rituale Rom. hoc expressè præcipit: Et Paulus V. loquendo de Rubricis in Rit. præscriptis, dicit: *Inviolatè observent.* Hoc non obstante probabiliter permittunt *P. de Alexand.* (de Monialibus) *Tonellius, et Pasqual.* in casu quo infirmus magnâ animi tristitiâ Viaticum sit suscepturus; nam ad satisfaciendum præcepto non requiritur intentio satisfaciendi, sed sufficit ut ponatur opus præceptum, ut diximus *T. I. Tr. II. n. 29.* aut sufficit intentio interpretativa. In quantum ad Rituale, respondent quòd illud præceptum non respicit omnia ibi descripta, sed illa tantum, quæ *Ecclesia et probatus usus antiquitatis statuit*, ut loquitur Bulla. Saltem non potest dici quòd præceptum proferendi illa verba inducat gravem obligationem, sed tantum levem, à quâ benè excusare potest quælibet justa causa, qualis esset illa suprâ adducta (a).

51. — Quæritur 5. An Sacerdos non jejunus ad Viaticum ministrandum possit celebrare? Affirmant probabiliter *Concina, Major. Fernand. etc.* et hanc sententiam uti probabilem admittunt *Lugo, Filliuc. Escob. Viva, etc.*, quia in eo casu, ut dicunt, debet præferri præceptum divinum, quod obligat infirmos ad Viaticum, Ecclesiastico quod obligat Sacerdotem ad non celebrandum non jejunum. Sed communissimè et probabilius id negant *Sot. Silv. S. Antonin. Suar. Lugo, Nav. Busemb. Salm. Tourn. etc.*, quia præceptum non celebrandi post cibi sumptionem etiam est divinum in substantiâ, ratione reverentiæ Sacramento debitæ. Nec valet dicere quòd idem præceptum quod permittit infirmo communicare non jejuno, permittit etiam Sacerdoti non jejuno celebrare, ut infirmus communiet; quia respondetur quòd in tantum infirmus non jejunos potest communicare, quia in ipso concurrunt in eo casu tam præceptum Ecclesiasticum jejunii, quam

---

(a) *Ibid. dub. 4.*

*Tom, II.*

divinum sumendi Viaticum, ideoque hoc cùm sit Divinum, præferendum est; sed Sacerdos qui unico tenetur præcepto non celebrandi non jejunos, non potest ille hoc violare, ut infirmus suo satisfaciatur (a).

52. — Hactenùs de Viatico; nunc ad alios casus descendamus in quibus possit Eucharistia sumi à non jejuno. II. Potest sumi à non jejuno cùm subest periculum ne Eucharistia pereat, aut malè tractetur. Et tunc si desit Sacerdos, potest eam sumere etiam Laïcus; et potest licitè Sacerdos etiam eam præbere Laïcis non jejunis, ut dicunt *Suar. Vasq. Lugo, et Busemb. (b).*

53. — III. Cùm periculum scandali esset, si omitteretur celebratio, aut Communio. Undè fit quòd si Sacerdos in celebrando recordaretur non esse jejunos, si id post consecrationem accadat, tunc certum est quòd potest celebrationem proseguì, quia non potest Sacrificium imperfectum relinqui, ut dicemus numero sequenti; sed cùm recordatur antè consecrationem, debet ille à Missâ desistere, semper ac potest sinè scandalo, aut infamiæ notâ, ut dicunt omnes cum *S. Thomâ (c)*. Nihilominùs *P. Concina*, cum nonnullis aliis dicit hìc, quòd rarò potest hoc scandalum accidere, dùm illi facili negotio occurri potest, declarando se inconsideratè aliquid sumpsisse. Sed contrà *S. Bonav. Sot. Angel. Reginald. etc.* dicunt Sacerdotem nunquàm posse Missam inchoatam deserere, cùm celebrat in publico, quia quasi nunquàm tunc potest sinè scandalo desistere ab eâ; Et idem sentit *Continuat. Tourn.* (cui ego adhæreo), dicens quòd semper potest timeri scandalum, modò celebrans non esset vir notâ, aut saltem præsumptâ probitate (d).

54. — IV. Cùm perficiendum est Sacrificium. Quod multifariàm evenire potest. I. Si Sacerdos animadvertat pro vino sumpsisse aquam etc.; tunc potest aut novam hostiam simul cum vino consecrare, ut multi autumant fieri debere; aut potest consecrare solum vinum, ut admittunt alii; utramque senten-

---

(a) n. 28c. -- (b) n. 287. -- (c) 3. p. q. 83, a. 6. ad 2. -- (d) l. 6. n. 287. v. 3. *Si grave, et seq.*



tiam Rubrica (*de Defect. tit. 4. num. 5.*) dicit esse probabilem, si celebretur in loco publico, tunc enim benè potest consecrari tantum vinum ad vitandum scandalum. Advertunt *Tamb. Lugo*, et *Conc.* quòd si Sacerdos animadverteret errorem, dùm in ore adhuc retinet aquam, debet eam tunc deglutire, ne se periculo exponat projiciendi aliquod fragmentum hostiæ unà simul cum illâ. Insuper advertunt *Coninc. Laym. Salm. et Busemb.* quòd si Sacerdos id advertit, cùm jam est ad Sacristiam regressus, tunc omittere debet novam consecrationem facere. Quòd si antè Missæ absolutionem, sed post sumptionem, aut post consecrationem de vini materiâ dubitaret, dicunt *Tamb. Spor. Mazzot.* quòd præsumenda est materia apta, dicentes possessionem stare pro vini substantiâ. Sed dicunt melius *Pasq. Gob. Avers. et Croix* quòd semper ac adest prudens dubium, et potest aliud vinum haberi, debet illud expectari et consecrari, dùm non potest dici esse in possessione vinum illud de quo jam dubitatur, an sit vinum, sed potiùs possidet præceptum faciendi Sacrificium integrum. Cùm tamen adsit tale dubium, dicunt, quòd secundum vinum sub conditione consecrandum est, si prima materia consecrata non fuit; alioquin etiam incurritur periculum faciendi Sacrificium mutilatum (a). II. Debet sacrificium perfici à Sacerdote non jejuno, si contingeret, quòd celebrans post consecrationem deficiat, nam tunc tenetur alius Sacerdos (si adest) etiam non jejunus Sacrificium perficere (b). III. Si post consecrationem alterius speciei recordetur Sacerdos non esse jejunus, quia tunc tenetur perficere Sacrum. Dictum est *post*, nam antè, tenetur illud deserere, quoties sinè scandalo aut infamiâ potest, ut paulò antè diximus (c). IV. Si ablutione sumptâ, advertat Sacerdos aliquas reliquias ejusdem Sacrificii relictas fuisse, ut diximus n. 18. (d). Dicunt *Bonac. F'illiuc.* et alii quòd cùm post Sanguinis sumptionem, hostiæ particula Calici adhæsisset, aut palato, decentiùs

---

(a) n. 288. et etiam 206.v. *Quoad vinum.* --- (b) n. 288. ad II.  
 --- (c) n. 287.v. *Si Sacerdos* et 288. ad III. --- (d) num. 288.  
 ad IV.

est cum ablutione eam sumere, quàm digito ad Calicis labium eam attrahere, et sic eam sumere; sed Rubrica utrumque permittit. Certum est sumere hostiam simul cum ablutione: tam à Sacerdote quàm à laïcis, non lædere legem jejunii, quia licet vinum trajiceretur antequàm deglutiatur hostia, talis sumptio censetur moraliter una, ut docet *Benedictus XIV. (a)*, et communiter *Lugo, Suar. Vasq. Laym. Castr. Conc. Bonac. Holzm. Croix, Salm.* etc. *(b)*.

55. — V. Licitum est non jejuno celebrare ad mortis periculum vitandum: ita *Silvest. Viva, Diana, Salm.* etc. modò id non exigatur in Ecclesiæ contemptum. Admittunt etiam *Silvester*, et *Diana* posse celebrari mortis metu sinè vestibibus Sacris, extrà Altare, etc. dicentes præceptum Ecclesiæ non obligare cum tanto onere. Sed meritò has opiniones non admittunt *Suar. Tamb. Tourn. Merati, Ronc. Conc. Cajet. Sanchez, Castrop.* etc. Etiam si celebrandum esset ad dandum Viaticum, ut subjungunt *Lugo, Dicast. et Benedictus XIV. (c)*, quia (ut rectè advertit *La-Croix*) in praxi contrariæ sententiæ difficulter possunt esse licitæ, dùm difficulter, ita celebrando, potest vitari contemptus, ut iidem *Laym. et Escob.* fatentur, aut saltem scandalum et gravis irreverentia; itaque subintrat præceptum naturale, saltem reverentiæ debitæ Sacrificio, à quo præcepto non excusat metus mortis *(d)*.

56. — Pro complemento hujus materiæ, nempe dispositionis ad Communionem, quæritur 1. An pollutio habita eadem Communionis die, impediat ab illâ? Distinguendum: Si pollutio fuit voluntaria, absolute loquendo, per se non impedit (modò præcesserit, intellige, debita Confessio), ut omnes concedunt; communiter tamen DD. docent teneri poenitentem sub veniali abstinere eâ die à communicando, propter reverentiam Sacramento debitam; ita *Lugo, Salm. Conc. Viva* etc. ex *D. Thomâ*, (-) qui tamen excipit: *Nisi magna necessitas urget*,

---

(a) *de Sacrific. Missæ l. 22c. 22.* --- (b) *n. 288, ad V.* --- (c) *De Sacr. Miss. l. 3. c. 19. n. 6.* --- (d) *Vid. opus nost. l. 6. n. 289, --- (e) in 4. d. 9. q. 1. a. 1. q. 2. ad 2.*

Cap. 3. Punct. 5. De dispositione corporis. 77

quod intelligitur, ut rectè ajunt *Bonac. Led. Gran. Salm. Viva*, et alii passim, nisi scandalum vel alia justa causa Communionem exigat, prout prudenti Confessario videbitur, uti loquitur rubrica Missalis (de Defect. n. 9.) Si verò pollutio fuerit involuntaria, etiam communiter docent *S. Bon. Gerson, Navarr. Laym. Soto, Suar. Vasq. Salm.* et alii plures cum rubricà loco cit. nullam esse obligationem abstinendi à Communione; modò nulla fuerit relicta et adhuc perseveret perturbatio mentis, orta ex delectatione antè habità, vel ex turpi imaginatione pollutionem concomitante; cum hujusmodi enim perturbatione accedere, communiter non excusatur à veniali, nisi adsit aliqua justa causa necessitatis, aut devotionis, ut rectè limitant *Castr. Sanch. Geis. Laym. Holzm. Salm.* et alii cum *D. Thomà* loco cit. ubi ait: *Si necessitas immineat, vel devotio exposcat, talis non impeditur.* Vel nisi homo conetur, quantum potest, perturbationem illam repellere, et media adhibere, ut devotè accedat, prout rationabiliter docent omnes AA. mox suprà relati cum *P. Suarez*, qui pro hâc re affert Justinum dicentem: *Non est æquum propter hanc involuntariam passionem abstinere à Mysteriis*(a).

57. — Quæritur 2. An copula conjugalis à Communionem impediat? Quidquid aliqui dicant, Communiter DD. tradunt non excusari à veniali propter indecentiam, qui ad Eucharistiam accedit eâdem die quâ copulam habuit causâ voluptatis; ità *S. Thomàs* (b). ex *D. Gregorio* in c. *Vir. 7. caus. 3. q. 4.* qui ait: *Cùm verò non amor ob procreandas soboles, sed voluptas dominatur in opere, tunc prohiberi debet, ne accedat ad hoc Sacramentum.* Rectè verò dicunt *Sanch. Antoine, Salmant.* cum aliis, quòd à prædictâ culpâ excusat quævis causa honesta, putà solemnitas sive Indulgentia eâdem die occurrens, evitatio scandali aut notæ; specialis devotio, etc. Si autem copula fuerit absque culpâ, v. gr. ad prolem gignendam, tunc quamvis sit congruum ad aliam diem Communionem differre, nulla tamen est obligatio ab illâ abstinere; quia procreatio sobolis, cùm sit actus

---

(a) *Lib. 6. n. 272.* --- (b) *3. q. 8. a. 7. ad 2.*

omninò honestus, satis reparat indecentiam, ut communiter dicunt *S. Thomas loco cit. Lugo, Sanchez, Conc. Petrocor. Salm.* etc. ex *D. Gregorio* suprà relato Nec obstat textus in *c. Sciatis*, 33. q. 4. ubi *D. Hieronymus* docet abstinendum; nam respondet Angelicus (a). ibi sermonem fieri tantùm de Altaris Ministris conjugatis, quales sunt Græci (b). Item communiter docetur de conjuge reddente debitum, nempè quòd iste tantùm causâ consilii abstinere potest à Communione, sed non tenetur, ità *S. Thom. S. Bon. S. Anton. Albert. M. Dion. Carthus. Sotus, Palud. Suar.* etc. Et sic pariter docuit *S. Franciscus Salesius* (c) sic dicens: *Deo displicebat in veteri lege, ut creditores quod sibi debebatur, diebus festivis exigerent, sed nunquàm prohibuit quominus debitores debitum suum redderent. Indecens est debiti matrimonialis solutionem die Communionis adurgere; sed inconveniens non est, imò meritorium est reddere. Hinc est quòd ut reddat hoc debitum, non debet quis Communionem privari, si eam exposcit. Certum est quòd in primitivâ Ecclesiâ fideles quolibet die communicabant, licèt essent matrimonio ligati; et benedictione filiorum generationis donati essent. Idemque videtur clarè docuisse adhuc *D. Augustinus* (super Psalm. 149.) dicendo: *Si non exigis, redde; pro satisfactione perfectâ Deus tibi computabit, si reddis quòd debetur uxori.* Et reverà, si redditio debiti conjugalitatis est actus virtutis, cur à Communionem impediatur (d)? Hinc si Confessarius rogatur ab uxore, quid agere debeat, si in die Communionis vir debitum ab ipsâ petat? Sapienter docent *Suarez, Layman, et Sanchez*, respondendum, quòd si mulier frequenter Communionem suscipit, reddat, et communice; si autem rarò, ipsa virum precetur; ut pro illâ die abstineat; at si rogatio non proficit, adhuc communice, nisi eâ redditione magnam patiatur perturbationem, et ipsa non conetur repellere (e). Debitum autem red-*

---

(a) in 4. dist. 32 q. 1. a. 1. ad 1. --- (b) l. 6. n. 273. --- (c) *Intr. ad vitam devot.* p. 2. c. 20. --- (d) n. 274. --- (e) *Ibid. v. Quid autem.*

dere in die Communionis post ipsius acceptionem excusatur ab omni culpâ. Petere verò post Communionem, alii dicunt esse veniale, et quidem probabiliter, nisi justa subsit causa, sed communiùs *Sanch. Nav. Victor. et Tamb.* sentiunt id esse tantùm consilii (a).

58. — Ad corporis dispositionem etiam spectat ad Communionem non accedere cum aliquâ externâ immunditiâ notabili, et quæ facilitè auferri potest, quia si est occulta, aut perpetua et involuntaria, ut esset lepra, aut scabies; hæc non impedit, ut dicunt DD. communiter. Notandum tamen quòd Sacerdos leprâ fœdatus, aut alio morbo laborans qui horrorem affert, prohibitus est celebrare, ut dicitur in *C. Tua nos, de Cler. ægrot., pro scandalo, et abominatione populi* ut loquitur textus, quare hìc secretò benè potest celebrare (b). An mulieres tempore menstrui valeant communicare? Ait *Suar.*, has sub veniali teneri ad differendam Communionem, si commodè possunt. Sed communiter, et probabilìus hoc tantùm esse consilii putant *Palud. Alens. Castrop. Salm. et Laym.* ex S. Gregorio (apud *Laym.*), qui de hujusmodi muliere loquens sic dicit: *si ex veneratione magnâ percipere non præsumit, laudanda est; sed si percipiat, non judicanda.* Mulieribus quæ immodestè ad Communionem accedunt, v. g. denudato pectore, benè dicit *P. Concina* quòd Communio deneganda est. Insuper convenit, ut qui communicat, arma deponat (c). Item notandum quòd Sacerdos qui more laicorum communicat, aut ex infirmitate aut ex aliâ causâ, debet habere ad collum Stolum; et hoc præceptum fuit à Concilio Bracarense sub poenâ excommunicationis, ut in *Can. Ecclesiastica, 9. Dist. 23.* Sed dicunt *Azor. Turr. et Tamb.* tale decretum abiisse in desuetudinem. Nihilominùs communiùs, et rectiùs *Suar. Gavant. Bonac. et Barb.* non eum damnat de peccato mortali, sed de veniali; tantò magis quòd talis ritus expressè præscribitur à Rubricâ: *Sacerdotes verò cum Stola communicent.* (d).

---

(a) *Ib.* v. hìc autem --- (b) *l. 6. n. 275.* --- (c) *l. 6. n. 276. v. An verò* --- (d) *n. 275.*

## CAPUT IV.

## De Sacrificio Missæ.

Videnda quæ dicuntur in Examine Ordinandorum in Tomo III. in Append. III. *Licetum est recipere stipendium etiam divitibus* 59. *Qui pro una Missâ recipit duplex stipendium* 60. *Quodnam judicatur justum stipendium* 61. *Potest exigi majus taxâ, sed potest prohiberi minus; An qui accepit minus, possit diminuere Missas* 62. *Qui omittit celebrare Missam, quàm promisit pro parvo stipendio* 63. *Qui paciscitur de stipendio* 64. *Qui retinet sibi partem; aut celebrat per alium, collato ei minori stipendio; et cui restituenda est pars retenta* 65. *Si eleëmosynâ pinguis data est intuitu personæ* 66. *De Capellanis* 67. *De administratoribus Ecclesiarum* 68. *Si celebrans partem retentam remittit; et si executor testamenti, etc.* 69. *Qui colligit eleëmosynas etc.* 70. *Qui permutat Missas* 71. *Pro quo debeant applicare Missas Curati* 72. *Pro quo alii Beneficiati, et Capellani Monialium, etc. Et an aliquandò possint applicare pro aliis, aut abstinere. Si infirmantur. De Missâ Conventuali* 73. *An Missæ præscribantur* 74. *An Capellanus possit mutare Ecclesiam, Altare etc. Si non celebrat in Altari Privilegiato. Si celebrat per alium* 75. *De reductione* 76. *Deficientibus redditibus, an possit Episcopus diminuere Missas* 77. *An possit hoc facere Capellanus. De Missis Gregorianis* 78. *An Religiosus possit applicare contrà voluntatem Prælati* 79. *An sufficiat applicatio habitualis* 80. *De applicatione in confuso* 81. *De conditionatâ* 82. *Si in die Defunctorum etc. De Altari Privilegiato* 83. *Peccat graviter qui festinanter celebrat* 84. *ad 86. De resolutionibus Sacræ Congregationis Rituum* 87. *Catalogus Decretorum Sacræ Congregationis* 88.

59. — **D**E Eucharistiâ ut Sacrificio fusiùs in *Examine Ordinandorum Appendic. III. ex num. 95.*

Dumtaxat hîc adnotabimus nonnulla magis pecularia circa stipendium et circa Missæ applicationem. Et primò circa stipendium dicimus, quòd recipere stipendium pro celebrandâ Missâ sit licitum, nemo est qui dubitat, dùm *S. Thomas* dicit (a) : *Sacerdos non accipit pecuniam quasi pretium Consecrationis, sed quasi stipendium suæ sustentationis.* Et quia etiam divites mercede digni sunt, cùm aliquod opus ponunt pretio dignum, ideòque etiam Sacerdotes divites licitè exigunt stipendium, ut communiter (contrà *Cajet. et Silv.*) docent *Sotus, Gerson, Suar. Tommasin. Lugo, Tourn. Conc.* et alii (b). Quòd autem non sit simonia principaliter Missam celebrare ob stipendium, locuti fuimus, *Tom. I. Tr. IV. n. 45.* et negavimus ratione ex *S. Thomâ* superius allatâ, quia tale stipendium non recipitur, ut merces rei spiritualis, sed ut sustentatio personæ, quæ operam suam corporalem in Missæ celebratione impendit.

60. — Adnotandæ 1. duæ Propositiones ab *Alexandro VII.* proscriptæ, prima n. 8. dicebat : *duplicatum stipendium potest Sacerdos pro eadem Missâ licitè accipere, applicando petenti partem etiam specialissimam fructûs ipsimet celebranti correspondentem; idque post Decretum Urbani VIII.* Et ratio est hujus proscriptionis, quia applicatio fructûs specialissimi est nimis incerta, nam licet multi DD. id admittant, multi tamen negant, ut *Laym. Lugo, Suar. Vasq. Tambur. etc.* Secunda Propositio quæ est 10. dicebat : *Non est contra justitiam pro pluribus Sacrificiis stipendium accipere, et Sacrificium unum offerre; neque etiam est contra fidelitatem, etiamsi promittam, promissione etiam juramento firmatâ, danti stipendium, quòd pro nullo alio offeram.* Et ratio hujus proscriptionis est, quia licet probabilis sit sententia *Gonet, Habert, Petrocor. Pignatel. Tourn. Cani, Salm. etc.* et pro ipsis est etiam *S. Thomas* (c), quòd Missa sit valoris infiniti tam intensivè quàm extensivè, quia Sacrificium Altaris est idem ac illud Crucis, qui fuit valoris

---

(a) 2. 2. q. 10. a. 2. ad 2. — (b) n. 316. et 317. — (c) 3. p. q. 79. a. 5.

82 *Tract. 15. De Sacramento Eucharistiæ.*

infiniti ; et in tantum effectus est finitus , quia finita est hominis capacitas pro quo offertur , unde quisque pro sua capacitate percipit fructum ; hoc non obstante , etiam probabilis est sententia opposita *S. Bon. Scoti , Palud. Ronc. Soti* etc. qui dicunt Sacrificium esse valoris finiti tam intensivè , quàm extensivè , ita ut cum applicatur pluribus , minus pròdest unicuique , quàm cum applicatur pro uno solo (a).

61. — Notandum 2. quòd taxa justì stipendii Missæ non debet computari quantum est victus diei , ut dicunt *Cajet. et Sot.* , dum Sacerdos in celebrandâ Missâ non insumit nisi minimam diei partem ; sed est illa quæ determinatur aut à Synodo Diocesanâ , aut à consuetudine , aut ab Episcopo loci , ut dicunt communiter *Suar. Busemb. Conc. Tamburin.* etc. et sic declaravit Sacra Congregatio (b). Et huic taxæ tenentur stare etiam Regulares , ut etiam dicunt communiter *Vasq. Mol. Conc. et Viva* cum aliâ declaratione S. C. (c). Quapropter rectè dicit *Roncag.* quòd si testator reliquit Missas celebrandas , non taxatâ eleemosynâ , celebrandæ sunt ad taxam communem , aut taxandæ sunt juxtâ loci consuetudinem , prout etiam declaravit S. C. , habitâ ratione hæreditatis pinguis aut tenuis (d).

62. — Notandum 3. quòd quamvis Sacerdotes non possint exigere stipendium majus taxâ , nihilominus non prohibet consuetudo , nec prohibere potest Episcopus , quominus recipiatur majus solito , si spontaneè eis offertur , ut rectè dicunt *Less. Lugo , Suar. Bonac.* cum Decreto S. C. (e). Contrà benè potest Episcopus prohibere ne acceptetur stipendium minus justo pretio , saltem infimo , quod nostris regionibus est valor caroleni sive Julii , ut declaravit S. C. Conc. et docent *Suar. Bonac. Ronc. et Lambertini Notif. 56. num. 11.* , contrà *Sot. et Navar.* , qui pro se citant *S. Thomam* (f). Et in

---

(a) *Lib. 6. n. 312.* — (b) *n. 319.* — (c) *n. 320.* — (l) *Ibid. d. 5.*  
 -- (e) *n. 321. dub. 2.* — (f) *2. 2. q. 100. a. 3.*



casu quo Episcopus prohibet, tenentur subditi obedire, esto *Soti* opinio esset probabilis; nam in dubio an superior excedat nec ne suam potestatem, tenentur subditi obedire (a); vide dicta *Tom. I. Tr. XIII. n. 17.* In casu tamen quo Sacerdos acceptasset illud tenue stipendium inferius justo (quicquid dicant nonnulli Auctores), non potest ipse diminuere numerum Missarum; nec applicare unam Missam pro duobus, qui medietatem stipendii pro quâlibet Missâ obtulissent, ut decrevit Innoc. XII. in suâ Bullâ *Nuper*, confirmante Decretum S. C. editum jussu Urbani VIII. (vide Decretum n. 88. *Decret. II. in calce hujus Tractatûs*). Hoc tamen intelligitur, cum Sacerdos acceptat celebrare certum numerum Missarum pro tali stipendio; secus autem cum non advertit eleemosynæ tenuitatem, ut animadvertunt *Laym. Barbosa, Ronc. Tourn.* etc. Sacerdos autem qui promittit hæredi statim se celebraturum Missam pro testatore, habitâ ei fide de stipendio, tenetur celebrare antè solutionem; *Salm. Tapia, Villalob.* etc. (b).

63. — Sed restat dubium, an qui promittit unam missam pro tenui stipendio, peccat graviter si eam omittat? Negant *Castrop. Sporer, Salm.* etc. habitâ ratione stipendii quod non est materia gravis. Sed probabilius affirmant *Croix, Holzm. Ronc.* etc., quia in hoc non tantum attenditur stipendii valor, quantum damni gravitas quod proximo infertur, eum privando injustè (propter pactum conventum) fructu Sacrificii. Secus autem dicunt alii AA. cum *Suar. Sanch.* etc. si sacrum fuerit gratis promissum, ex sententiâ probabili, ut diximus *Tom. I. Tract. X. n. 127.* quod simplices promissiones non inducunt gravem obligationem (c).

Notandum 4. benè licere Sacerdoti pacisci de stipendio Missæ, cum illud est juxta taxam, aut consuetudinem; ita communiter *Less. Laym. Castrop. Sot. Ronc. Salm.* contra *P. Concinam*, quia licet stipendium non debeatur ex justitiâ, ut pretium Sa-

---

(a) n. 320. *dub. 3.* --- (b) n. 320. *Ibid. v. eo casu.* — (c) n. 317. q. III. et IV.

## 84 Tract. 15. De Sacramento Eucharistiæ.

crificii, debetur tamen ex justitiâ ut Sacerdotis sustentatio, ideòque benè potest deduci in pactum. Nec obstat *C. fin. de pactis* : ubi videntur prohiberi omnes pactiones circa spiritualia, quia hoc intelligitur ( ut benè respondet *Ronc.* ) de solis pactis illicitis, cum dicatur ibi : *Nam pactum turpe, vel rei turpis nullam obligationem inducit.* Et reverà hæc pacta. reprobantur à Tridentino ( *Sess. 22. Decr. de observ. in celebr. Miss.* ) circa eleemosynas Missarum, dum ibi præcipitur Episcopis, ut prohibeant *importunas atque illiberales eleemosynarum exactiones* : dicitur : *illiberales*, nempe illæ quæ sponte non sunt oblatae, sed importunè extortæ (a).

65. — Notandum 5. quòd si quis recipit eleemosynam pro Missâ, non potest eam dare aliis celebrandam, retentâ sibi stipendii parte. Hoc posito cum Decreto S. C. Concilii approbato ab Urbano VIII. et confirmato ab Innoc. XII. ( vide num. 88. *Decret.* III. ), deindè damnata fuit ab Alexand. VII. hæc Prop. 9. quæ dicebat : *Post Decretum Urbani potest Sacerdos, cui Missæ celebrandæ traduntur, per alium satisfacere, collato illi minori stipendio, alia parte stipendii sibi retenta.* Et hoc dicebant hi Auctores falsò supponentes Decretum Urbani non fuisse acceptatum. Novissimè autem Benedictus XIV. 30. Junii 1741. in suâ Bullâ *Quanta cura*, imposuit suspensionem ipso facto reservatam Pontifici in Clericos, et excommunicationem Papalem in Laicos qui hoc agerent. Dicebant autem nonnulli DD. quòd Sacerdos, qui hoc facit, licèt peccet, non tenetur ad restitutionem partis retentæ; ità *Suar. Navar. Vasq. Bonac.* etc. et *Viva* dicit eam opinionem non carere probabilitate, dum qui recipit stipendium, jam acquisivit dominium, et contra jam satisfacit celebratione per alium; sed hæc opinio post præfatam Propositionem damnatam, videtur non posse sustineri, ideòque post præfatam damnationem communiter dicunt *Vidal. Coregia, Croix, Sporer, Holzm. Conc. Tourn. et Mazzot.* quòd Sacerdos tenetur ad restitutionem; quia licèt acquirat eleemo-

---

(a) n. 320. d. 4.

synæ dominium, attamen illud acquirit juxtà voluntatem eorum, qui dant eleëmosynam; et qui eleëmosynam præbet, non solum petit Missam, sed etiam vult ut illa tali eleëmosynâ celebretur, nam majus stipendium facit, ut ipse uberiores fructus ex Sacrificio percipiat; itaque hæc intentio intrat in contractûs substantiam, ideò si Sacerdos partem stipendii retinet, injustè contrà dantis voluntatem retinet (a). Præterea advertendum quod dicunt *Croix, Pasqual. Conc. et Viva*, quòd si quis dat eleëmosynam pinguem Sacerdoti, quia eum singulari pietate virum habet, Sacerdos non potest alii Missam celebrandam dare, qui simili pietate non habetur, licèt integrum stipendium ei præbeat. Dicunt tamen *Croix*, et *Concina*, quòd hoc non est damnum sub gravi, nisi cùm judicaretur hoc graviter latum iri ab offerente (b). Cuinam autem facienda sit restitutio partis stipendii retenti; *Croix, Pasqual.* putant posse fieri tam ipsi offerenti, quàm celebranti. Sed probabilius dicunt *Sporer, Holzm. et Tourn.* quòd fieri debet ipsi celebranti, quia cùm transfertur ad ipsum onus celebrandi, transfertur etiam jus ad integrum stipendium juxtà voluntatem offerentis (c).

66. — Igitur cùm recipitur eleëmosyna pro Missâ, debet illa integrè exhiberi celebranti; sed excipitur primò si illud stipendium majus daretur alicui, non solum ratione Sacrificii, sed etiam intuitu personæ, conjunctionis, gratitudinis, aut paupertatis, et hujusmodi. Et non est necesse, ut offerens eleëmosynam hoc exprimat, sed sufficit ut ex circumstantiis hoc moraliter constet, ut communiter dicunt *Passer. Mendo, Ronc. Dicast. Viva*, et alii (d).

67. — Excipiuntur 2. Capellani, Beneficiati, qui possunt aliis celebrationem Missarum Beneficii committere, tradito eis consueto stipendio. Ità communiter DD. et patet ex approbatione ejusdem Innoc. XII. in cit. Bull. *Nuper, ibid. v. Excipi-*

---

(a) L. 6. n. 322. v. *Hic autem.* — (b) n. 321. — (c) n. 322. dub. 1. v. *Cui autem.* — (d) L. 6. n. 321. v. *Ab hac.*

tur III. Et hoc idem licet Capellano amovibili, ut dicunt *Lugo, Ronc. Holzm.* etc. et ita declaravit S. C. Conc. vide n. 88. *Decret.* IV. Idem dicunt *Viva, Croix, Gob.* etc. de Sacerdote cui commissa est celebratio Missæ perpetuæ. Idem quoque dicunt *Ronc. Passer. Tamb. Ric.* et alii de Sacerdote, qui celebraturus pro aliquo pingui legato, quod ei relictum est cum onere celebrandi Missas pro totâ vitâ ejus. Ratio est, quia omnia Decreta huic adversantia loquuntur tantum de Missis manualibus (a).

68. — Advertendum tamen quod præfata exceptio valet pro Capellanis, non autem pro administratoribus Ecclesiarum; nam isti nihil sibi poseunt retinere ex stipendio Missarum, et nec pro expensis in Missarum celebratione faciendis, nisi alios Ecclesiæ non haberent redditus (b). Vide Decretum S. C. confirmatum ab Innoc. XII. num. 88. *Decreto V.* Et hinc obiter advertendum, quod idem Innoc. XII. in præfatâ Bullâ *Nuper*, ann. 1697. præcepit omnibus Ecclesiarum administratoribus, ut expositam haberent tabellam Missarum, tam perpetuarum, quam ad tempus (c).

69. — Nonnulli DD. excipiunt etiam casum, in quo Sacerdos, cui committitur celebratio, sponte omninò remitteret stipendii partem; ita *Tournely, Ronc. Viva*, etc. Sed hæc opinio non est amplius sustinenda post præfatam Bullam Benedicti XIV. ubi idem declaravit: *Non posse* (sunt verba Pontificis) *alteri stipendium minoris pretii erogare, etsi eidem Sacerdoti celebranti se majoris pretii eleemosynam accepisse indicasset* (d). Et ita nec est probabilis opinio *Tamb.*, qui dicit quod executor testamenti, si Missas relictas à testatore celebrandas curaret alibi, ubi taxa est minor, posset sibi retinere superfluum, quia tunc ille est fructus suæ industriæ. Sed hoc communiter reprobatum à *Viva, Diana, Ren. Ronc. Conc.* quia executor nullum ha-

---

(a) *Ib. v. Idem.* — (b) num. 322. dub. 5. — (c) *Vid. Instr. Conf. Nov. part. 2. n. 406.* — (d) n. 321. v. *Excipiunt II.*

bet titulum quo superfluum sibi possit retinere , dùm ille nūquāmacquisivit dominium stipendii (a).

70. — Quæritur 1. An Sacerdos colligens eleēmosynas pro Missis , possit aliquid retinere ob laborem suum ? Negat *P. Concina* , ex eo quia Benedictus damnavit eum , qui stipendia majoris pretii colligens , Missas , retentā sibi parte , celebrari fecerit. Nihilominus non improbabiliter affirmat *P. Viva* , semper ac merces illa correspondeat labori , et Missæ non sint traditæ , ut celebrentur ab ipso met , dùm hæc merces est justa , et juxtā offerentium voluntatem. Nec obstat quod dicitur in eādem Bullā , quia hoc intelligitur prohibitum , cū quis consultō ad eleēmosynas colligendas circumferretur , ut sic turpem faceret quæstum ex Missarum majoris pretii collectione , ut celebrari faceret minori pretio ; secūs vero cū designatus ad id fuisset ratione officii (b).

71. — Quæritur 2. An Sacerdos qui hodiè accipit pinguem eleēmosynam , ut celebret , possit efficere ut alius celebret pro seipso , promittens die crastino se celebraturum pro illo , qui die crastino celebraturus esset pro eleēmosynā ordinariā ; at die crastino ille pro Missā quam istius nomine celebrare deberet , offerret stipendium ordinarium ipsi , ut celebret ipsemet ? Affirmant *Croix* et *Mazzol.* quia hic , ut dicunt , non retinet partem pretii , sed permutat Missas , et dies. Sed ego in hoc adhæreo *P. Concina* , qui id non admittit , dū videtur talis permutatio involvere turpem quæstum ; nihilominus rectè non adhæret , prout nec ego adhæreo ei , qui hoc de gravi damnet , præsertim si paupertas excusat (c).

72. — Notandum 6. loquendo de Beneficiatis , pro quo teneantur applicare Missas. Circā Parochos olim diversæ circumferebantur sententiæ ; sed hodiè per Bullam Benedicti XIV. Cū semper , 29. Augusti 1741. statutum est Parochum teneri applicare Missam pro populo in omnibus Dominicis , et Festis diebus ( comprehenduntur etiam dies festi , in qui-

---

(a) n. 322. dub. 2. — (b) lib. 6. n. 322. — (c) Ibid. dub. 4.

bus Papa dispensavit opera servilia), et licet congruam non haberent sustentationem. Declaravit contrà, quòd si Parochia redditus uberes haberet, non tenetur, (ut alii volebant) applicare sæpius Missam (a); vide dicta *Tom. I. Tr. VII. n. 29.*

73. — Loquendo de aliis Beneficiatis non Curatis, isti, quoties in Beneficii fundatione non exprimitur, quòd ipsi teneantur applicare pro fundatore, tenentur pro eo celebrare, ut declaravit S. C. Conc. (b). Et idem dicitur de Capellanis Confraternitatum, et Monialium, qui celebrant ad hoc, ut Confratres, aut Moniales Sacro intersint: isti etiam pro illis tenentur celebrare; vide n. 88. *Decret. VII. Nihilominus Lezana, Homob. Filib. Diana, Stephan. Salmantic. et alii communissimè concedunt Capellano posse quater, aut septies, in anno celebrare pro animâ suâ, aut alicujus sibi strictè conjuncti, aut amici carissimi, aut benefactoris; quia in hoc præsumitur consensus fundatoris; modò nullum accipiat stipendium, ut benè advertunt Bonac. Gobat. Holzm. Pasqual. Elbel, Diana, Salmanticens. et alii communiter; quia hoc esset contrà mentem fundatoris. Præterea dicunt Suar. Azor. Bonac. Silvest. Salm. Busemb. etc. posse Capellanum reverentiæ causâ abstinere à celebrando semel in hebdomadâ, ut deducitur ex cap. Significatum, de Præbendis, ubi dicitur quòd Capellani tenentur quotidie celebrare, salvâ honestate, et debitâ devotione. Hoc tamen dicunt Lugo, et Salm. cum aliis communiter, non intelligi, cum obligatio dirigitur ad celebrationem in aliquâ Ecclesiâ, v. g. si fundator dicat: *Volo, ut in tali Ecclesiâ quotidie celebretur Missa*; sed intelligi tantum, cum obligatio dirigitur ad ipsum Sacerdotem; et intelligi etiam, ut dicunt Gobat, Tambur. et Ronc. cum non constat de contrariâ fundatoris mente; quia si in fundatione exprimeretur, ut quotidie celebretur Missa à Capellano, aut ab aliis, tunc rectè dicit Ronc. quòd nullo die potest omitti*

---

(a) *Lib. 6. n. 322. dub. 4.* — (b) *n. 325. Qu. II.*

Missa, et affert declarationem Sac. Congregat. (a). Si verò Capellanus infirmaretur, cùm infirmitas est brevis, communiter dicunt *Lug. Lezan. Riccius, Diana, Busemb. et Salm.* quòd non tenetur celebrare per alium, modò fundator non expresserit, ut nunquàm alicubi Missa deesset, ut suprà dictum est. Quænam autem infirmitas dicatur brevis; alii nimis rigorosè dixerunt esse illam, quæ decem dies non durat. Alii communiùs extendunt ad 15, ut *Bonac. Anàcl. Diana, et Elbel*; pro hoc etiam adest Declar. S. C. Conc. apud *Pitton*. Alii extendunt ad mensem, ut *Laym. Hurtado, et Salm.*, et in hoc etiam convenit Concil. VII. Mediolanense, (*Tit. de Miss.*) ubi dictum fuit: *Si Capellanus saltem per annum celebravit in aliquo loco, si etiam per mensem ægrotet, adhuc integram eleëmosynam iudicio Episcopi accipere potest.* Et deniquè *Lugo, Nav. Filliuc. Dicast. Nald. Leand.* extendunt usque ad duos menses, et adhæret *P. Concina*, et probabilem vocat *Castrop. Dicast. et Busemb.* (b). Notandum hic obiter Missam Conventualem, quæ quotidie celebratur à Clero, debere applicari pro benefactoribus in genere uniuscujusque Ecclesiæ, ut præcepit Benedictus XIV. (c).

74. — Dicunt autem *Laym. Navar. Tambur. Pasqual. et Gobat.* qui affert Decisionem Rotæ Rom. posse præscribi, tam circà numerum Missarum, quàm circà circumstantias appositas in fundatione, et dicunt sufficere spatium 20. aut 30. aut ad summum 40. annorum. Sed juxtà veriore sententiam talis præscriptio non admittitur, dùm in Tridentino *sess. 23. c. 2. de Reform.* interdicatur posse derogari omnibus oneribus in iunctis, tam in fundatione, quàm in quâcumque aliâ piâ dispositione, sive collatione Beneficiorum; et Pius IV. in Bullâ quâ confirmavit Concilium, declaravit irritum quicquid posterum contrà illud factum fuerit, et ut dicit *Croix* cum aliis communissimè. Clausulam Decreti irritantem ligare etiam ignorantes, et in causis beneficalibus inficere titulum, et possessionem. Sal-

---

(a) *Lib. 6. n. 332.* — (b) *n. 333.* — (c) *n. 326.*

tem dicimus in praxi primam sententiam cum difficultate posse esse probabilem, dùm difficulter in Beneficiatis potest præsumi bona fides, cùm præsumatur potius quòd ipsi sciant leges Beneficii (a).

75. — Peccat igitur Capellanus, qui non celebrat omnes Missas præscriptas à fundatore, aut si non celebrat in Ecclesiâ, aut Altari, aut horâ destinatâ, ut communiter *Lugo. Azor. Navarr. Tour. Salmant.* etc. et peccat lethaliter, (ut dicunt) si in hoc sæpè, et sinè causâ, aut sinè dispensatione delinquit. Dictum est primo sæpè, quia non peccabit graviter, si hoc rarò fiet, v. g. semel, aut bis in mense, et tantò minus si permutabit tantum Altare. Dictum est 2. sinè causâ, quia potest adesse causa, quæ omninò excuset, ut si Ecclesia restauretur, aut si Altare sit execratum. Dictum est 3. sinè dispensatione, quia Episcopus benè potest dispensare, ut alibi celebretur causâ studii, infirmitatis, negotii, aut magnæ molestiæ ipsam Ecclesiam adeundi, aut causâ utilitatis ipsius Ecclesiæ, aut simili rationabili causâ, ut dicunt communiter *Castrop. Conc. Barbos. Ronc. Passer. Henric. Busemb. Croix, Salmant. Tamb. Mazzot.* etc. Ratio est quia tali dispensatione omittitur fundatoris voluntas tantum in accidentalibus, et compensatur cum majori bono, cujus causâ dispensatio intercedit; tantò magis quòd Tridentinum sess. 25. c. 4. concedit Episcopis in certis casibus particularibus ultimas voluntates commutare posse: vide *Tom. III. Tract. XX. num. 60.* Nihilominus rectè advertunt *Croix* et *Pasqual.* non posse Episcopum dispensare, si testator in designandâ Ecclesiâ, et horâ, rationem specialem habuisset ad populi commoditatem (b). Ceterum animadvertendum plura adesse Decreta S. C. Conc. apud *Ferrar.* (c), ubi dicitur semper pro hujusmodi dispensatione recurrendum Sedi Apostolicæ. Si autem Sacerdos celebraturus esset in Altari privilegiato, et alibi celebraret, dicit *Roncagl.* teneri ad restitutionem, si

---

(a) *Lib. 6. n. 325.* — (b) *n. 329.* — (c) *Ferr. Bibl. tom. 2. v. Capellania, n. 14.*



eleëmosyna esset pinguis, non autem si esset ordinaria; et nec si alibi lucraretur Indulgentiam plenariam applicabilem pro Defunctis, ut dicunt ipse *Roncaglia*, *Anacl. Sporer*, *Elbel*, etc. Advertunt hic tamen *Azor*, *Bonac*, *Navar*, *Diana*, *Salmant*, etc. quòd non satisfacit, qui in alio Altari non privilegiato celebrat, applicando Indulgentias calculorum, aut Imaginum benedictarum, quia hæ Indulgentiæ non sunt tam certæ, quàm sunt illæ Altarium (a). Peccat etiam Capellanus, si per seipsum non celebrat, cum ita in foundatione est expressum: aliàs semper potest per alium celebrare, ut rectè dicunt *Salmant*, *Dicast*, *Diana*, cum *Cumpanile*, et de hoc adest decisio Rotæ, et declarationes S. C. (b).

76. — Notandum 7. quòd reductio sive moderatio, aut commutatio onerum Missarum in foundatione impositarum, hodiè est interdicta Episcopis, ex Decreto S. C. Concil. jussu Urbani VIII. edito, et confirmato ab Innoc. XII. vide n. 88. *Decr. VIII*. Et facultas data à Tridentino *sess. 25. c. 4.* ut explicatur in præfato Decreto. (quicquid dicant *Salmanticens*.) fuit tantum concessum ad moderandas Missas in foundatione impositas antè Concilium; itaque hodiè reductio reservata est uni Sedi Apostolicæ, quæ eam admittere solet ex justis causis, v. g. ob Sacerdotum penuriam, ob stipendii tenuitatem, ob reddituum diminutionem, ob Ecclesiæ, aut Monasterii fabricam, aut ob alias necessitates (c).

77. — Sed hic quæritur 1. An possit Episcopus diminuire numerum Missarum, cum ob reddituum tenuitatem non reperitur, qui eas celebrandas assumat. Affirmant *Pasqual*, *Tambur*, *La-Croix*, sed negat *P. Concina* ex pluribus Decretis S. C. quibus vetatur Episcopis tam reducere, quàm moderare onera Missarum. Hoc non obstante, dicit *Fagnan*, cum *Felin*, hoc debere intelligi cum in foundationis limine jam poterat præfatis oneribus satisfieri ex redditibus tunc constitutis; sed in casu quo in prin-

---

(a) *Ibid. v. Not. II.* — (b) n. 330. — (c) n. 331.

cipio sufficiebant, sed deinceps reditus sunt ita diminuti, ut omnino non sufficiant, tunc dicitur videri non esse Episcopis ablatam talem potestatem moderandi, aut permutandi numerum Missarum, concessam ipsis de jure communi in *c. Nos quidem, de Testam. (a)*, et idem dicit *Pasqual.* de oneribus Officiorum, precum, aut eleemosynarum annversariis annexarum, dicens quod prohibitio loquitur de reductione tantum Missarum (b).

78. — Quæritur 2. An deficientibus redditibus, possit ex se ipse Capellanus diminuere numerum Missarum, cum redditus in totum, et sine sua culpa deficient? Certum est quod Capellanus non teneatur celebrare, juxta sententiam communem, et plura Decreta S. C. (c). Si autem redditus deficient in parte, *Escobar.* etiam pro certo habet posse Capellandum diminuere numerum Missarum, cum testator determinavit eleemosynam, v. g. binos julios in Missam, quia tunc sicut augeri deberet numerus Missarum, augescentibus redditibus, ita debet diminui, iis deficientibus. Majus dubium est an Capellanus posset diminuere numerum, cum testator Missarum designavit numerum, et postea redditus diminuti sunt usque ad deficientiam etiam stipendii ordinarii? Negant *Tamb. Diana, Castrop. Mazzot.* etc. tam ex Decreto Urbani superius relato, quam ex alio Decreto apud *Croix*, ubi dicitur quod etiam in tali casu recurrendum est ad Sedem Apostolicam, licet *legatum sit ita tenue* (sunt verba Decreti) *ut non sit qui velit onus illi injunctum subire.* Sed hoc non obstante, dicunt *Busemb. Franc. de Lugo, Escob. Bordon. Pasqu.* et alii apud *Roncagl.* qui id probabile putat, hoc esse juxta testatoris mentem, qui non præsumitur voluisse obligare Capellandum ad celebrandum pro stipendio minori justo. Sed ad vitandam omne hallucinationis periculum, advertit *Roncagl.* generaliter loquendo, ut recurratur ad Episcopi judicium (quod necessariò requirunt in hoc casu *Croix* et

---

(a) *Ibid. dub. 1.* — (b) *Ibid. dub. 3.* — (c) *num. 324. v. Hæc autem.*

*Tournel.*) aut saltem ad alium virum sapientem. Respondent autem *Ronc.* et *Pasqual.* ad Decreta opposita, quòd hæc non esset reductio, et moderatio stabilis reservata Sedi Apostolicæ, sed tantum cessatio obligationis juxta redituum deficientiam, nam Decreta loquuntur juxta mentem Tridentinæ *Sess. 25. cap. 4.* ubi non loquitur de reditibus diminutis, sed de solis eleëmosynis in principio pro Missis celebrandis designatis, quas pro stipendii tenuitate non reperiuntur facilè qui celebrent. Quicquid sit de hâc opinione, rectè advertit *Tamb.* quòd si Capellanus de præterito accepisset stipendium ordinario majus, tenetur in futurum compensare, eundem numerum Missarum celebrando; qui enim antea stetit commodo, deinde stare debet incommodo. Advertatur hic denique prohibitas esse Missas 30. Gregorianas à S. C. multis inconvenientibus refertas, utpote quia celebrandæ erant de Defunctis successivè etiam in festis duplicibus; prohibita verò non sunt, si illæ 30. Missæ celebrentur ut fert Ritus dierum (a).

79. — Loquamur secundo loco de Missæ applicatione. Applicare Sacrificii fructum solius est Sacerdotis; undè si Religiosus applicat Missam contra superioris voluntatem, illicitè quidem, sed validè applicat ut rectè docent *Suar. Vasq. Laym. Lugo* (qui aasserit oppositum esse communiter reprobatum) *Tournel. Anaclet. Salm.* etc. adversus *Scotum*, et *Gavantum*; quia subditus quoad Ordinis potestatem, quâ tunc utitur, non subjacet Prælato (b).

80. — Applicatio autem facienda est antè celebrationem, aut saltem antè consecrationem. Sed quaeritur 1. an sufficiat applicatio habitualis, nempè aliquandò facta, et non ampliùs retractata? Negant *Vasq. Abelly, et Isamb.* qui dicunt quòd sicut requiritur intentio actualis aut saltem virtualis pro Sacramenti confectione, ita requiritur pro Sacrificii fructûs applicatione. Sed communis et vera senten-

(a) *Benedict. XIV. de Sac. Mis. lib. 3. cap. 23. num. 2.* —  
 (b) *Lib. 6. num. 334.*

tia cum *Suar. Bonac. Lugo, Tournely, Mazzot. Sporer, Busemb.* etc. (et idem dicit *P. Concina* in substantiâ) docet sufficere applicationem habitualement, cum Sacrificii applicatio aliam non induat rationem quàm verbalis donationis, quæ semel facta prosequitur esse valida, usquedum non revocatur. Respondetur autem ad rationem oppositam, quod in tantum ad Sacramentorum confectionem requiritur actualis aut virtualis intentio, in quantum ministri intentio ponit Sacramentum, sed in applicatione Sacrificii non est quod intentio celebrantis constituat fructum, dum sinè illius intentione sacrificium de se fructum producit: idèdque sufficit applicatio aliquandò facta, quâ alicui fructus donatus sit (a).

81. — Quæritur 2. An cum Sacerdos à decem recipit stipendium pro decem Missis, satisfacit applicando in confuso pro iis primas decem Missas quas celebravit? Absolutè affirmant *Silv. et Conc.* Sed melius distinguunt *Bonac. Ronc. Aversa, Tambur. Henno*, et alii, et dicunt ità: si singulæ Missæ indeterminate applicantur pro singulis personis, non videtur satisfieri; quia ad satisfaciendum requiritur intentio applicandi fructum personæ determinatæ, ut prosit illi fructus. Secus autem, si Sacerdos applicat quamlibet Missam pro omnibus illis 10. applicando singulis eorum decimam cujuslibet Sacrificii partem, cum certum sit Sacrificii fructum esse divisibilem; undè tali applicatione jam redditur cui-libet id quod debetur; dum quisque percipiendo in quâlibet Missâ decimam partem, jam in 10. Missis percipit totum fructum, qui ei debetur (b).

82. — Quæritur 3. An valeat applicatio conditionata? Respondetur: Si conditio est de præterito, est valida; secus si de futuro, quod non est notum nisi Deo. Dicunt tamen *Castrop. et Lugo*, quod si quis applicaret pro eo qui prius dabit eleemosynam, talis applicatio esset certè illicita ex prohibitione Clementis VIII. promulgatâ à Paulo V., sed esset tamen valida. Nihilominus probabilius tenet *Croix*, quod esset etiam invalida, saltem quia sæpè accidere

---

(a) *Lib. 6. n. 335. q. I.* — (b) *Ibid. q. II.*

posset quòd Missa celebraretur pro causâ non adhuc existente, v. g. si ille vellet ut Missa celebraretur ad hoc ut ab infirmitate aut calumniâ liberaretur, tunc si Missa antecederet celebraretur, devotus non reciperet fructum optatum, dum causa non adhuc existeret, et contrâ Missæ fructus suspensus relinqui non posset. Si tamen Sacerdos prævideret quòd deinceps requirendæ essent Missæ pro Defuncto, benè potest anticipare celebrationem, ut rectè dicunt *Vasq. Tour. Avers. etc. (a)*.

83. — Juvat hìc advertere nonnulla alia circa applicationem Missæ. Notandum 1. quòd in die Defunctorum non adest obligatio applicandi Sacrificium pro Defunctis in genere, ut declaravit S. C. Vide *nu. 88. Decr. IX*. Et supposito quòd Sacerdos pro libitu potest applicare Missam, rationabiliter ait *Tournely* quòd potest justè eleemosynam accipere *(b)*. Notandum 2. quòd in Altari Privilegiato Indulgentias non lucratur, qui non celebrat de Requiem cùm Ritus permittit, licèt in Ecclesiâ aliquâ solemnitas celebraretur. In diebus verò quibus vetitæ sunt Missæ de Requiem, lucratur Indulgentias dicendo Missam currentem, ut declaratum est pluribus Decretis S. C. *(c)*. Notandum 3. quòd tempus privilegii cùm est ad tempus incipit currere, non à die publicationis, sed à die concessionis *(d)*. Notandum 4. quòd cum in privilegio adest clausula solita apponi: *modo in Ecclesiâ celebrentur* 5. aut 7. Missæ; si omittantur Missæ illæ, privilegium non suffragatur pro illis diebus, ut declaravit S. C. Conc. Decreto approbato ab Innoc. XI. Declaravit contrâ eadem S. C. quòd tempore illo quo Sacerdotes non celebrant præfinitas Missas, Indulgentiæ suspendantur; si verò desunt ob infirmitatem, vel si Religiosi alibi debeant celebrare jussu Prælati, si rarò id fiat. Indulgentiæ lucentur per illas Missas quæ celebrantur *(e)*.

84. — Circâ tempus, locum et Altare, vasa, vestes et alia requisita ad Missam, vide dicenda *Tom.*

---

(a) *Lib. 6. n. 337. v. Dicunt.* — (b) *n. 338.* — (c) *num. 339. Q. 1.* — (d) *ib. d. notandum 4.* — (e) *Lib. 6. num. 339. Qu. II.*

III. *Examin. Ordinand. App. III. ex n. 113. ad 122.* Dumtaxat hic juvat examinare paulò fusiùs punctum quod ibi vix innuitur, an peccet graviter Sacerdos, qui infrà horæ quadrantem Missam persolvit. Me non latet, super hâc re Sacerdotem D. Josephum Jorio editurum jamjam fore opusculum utilissimum, cui titulus, *La Messa Strapazzata*; dico utilissimum, dùm reverà horrendum visu et lacrymis quoque dignum est videre cæremoniarum conculcationem, quâ multi Sacerdotes (utinam, et saltem non esset major eorum pars) Jesu Christi in Altari Sanctissimum Sacrificium injuriosius tractant. In hoc opusculo forsan (ut audiivi) affirmabitur grave peccatum esse Missam persolvere quadrantis spatio; et hanc opinionem reprobendam non esse puto, si sermo est de Missis communibus quæ habent *Gloria et Credo*, aut alias extraordinarias preces. Sed ut me in certo ponam puncto, dico Sacerdotem minori spatio quadrantis Missam quacumque, etiam Defunctorum, aut BB. Virginis in Sabbato, difficulter, ne dicam impossibiliter, posse excusari à peccato gravi. Et sic probò. Rubricæ quæ respiciunt cæremonias servandas intrà Missam, sunt omnes præceptivæ, ut probavimus in Opere (a). Et hoc nescio quomodò negari potest, dùm in Bullâ S. Pii V. præcipitur celebranda Missa *juxtâ Ritum, modum et normam in Missali præscriptam*; et hoc injungitur *districtè* et in virtute *Sanctæ Obedientiæ*: quæ verba proculdubio grave præceptum important, quod peccatum mortale inducit, cùm in materiâ gravi delinquitur, juxtâ illud quod dictum est *Tom. I. Tr. II. n. 15*. Hoc posito, dicimus impossibile esse Missam terminare intrà spatium quadrante minus; quin graves irreverentiæ committantur, et quin populo grave afferatur scandalum. Duobus igitur capitibus peccat Sacerdos, qui ità festinanter celebrat, primo ob irreverentiam ergà tantum Sacrificium, secundo ob scandalum quod affert populo.

85. — Et loquendo priùs de irreverentiâ, declarat Tridentinum Sess. 22. Decr. de Observ. in celebr.

---

(a) n. 339.

lebr. Miss. ubi inter alia hæc habet : *Satis apparet omnem operam et diligentiam in eo ponendam esse, ut quantâ maximâ fieri potest.... exteriori devotionis speciei* (Missæ Sacrificium) *peragatur*. Ex quibus verbis satis liquet præceptum naturale Divinum esse, ut Missa celebretur omni diligentia in observandis exterioribus cæremoniis quæ devotionem et pietatem indicant. Item declarat maledictionem à Jeremiâ cap. 48. indictam in eos qui opus Dei, nempe functiones ad Dei cultum ordinatas, negligenter faciunt, præcipuè intelligi prolatam esse in eos Sacerdotes qui sinè debitâ reverentiâ et gravitate celebrant ; addendo etiam talem negligentiam tantam importare irreverentiam, ut evadat quædam impietas, quæ (irreverentia) *ab impietate vis sejuncta esse potest*. Si igitur cæremoniæ Missæ ad hoc præscribuntur (ut certum est) ut celebretur tantum Sacrificium cum debitâ reverentiâ, quomodò excusari potest à culpâ gravi qui celebrando intrâ spatium tam breve, non potest non delinquere notabiliter in hac reverentiâ, verba mutilando, benedictiones, genuflexiones perturbando, se movendo et vertendo indecenter, et verba cum cæremoniis complicando, aut anticipando aut postponendo contrâ Rubricæ præscriptum. Dixi *sinè debitâ reverentiâ et gravitate* : sic dixi quamvis reperiretur aliquis itâ lingua et motu expeditus, ut posset tempore tam brevi Missam persolvere, quin delinquat in verbis et actionibus ; saltem non est possibile, ut in tantâ brevitate possit celebrare quin delinquat in gravitatem convenientem, quæ etiam intrinsecè pertinet ad reverentiam debitam tam Sacrosanctis Mysteriis.

86. — Loquendo autem de scandalo quod populo affertur, dicit idem Tridentinum Sess. 22. Cap. 5. *de Ref.* quòd ad id institutæ sunt cæremoniæ, ut his signis fideles Sacrificii majestatem apprehendant, et mysteriorum sublimitatem quæ in ipso continentur : *Ecclesia Cæremonias adhibuit* (dicit Concilium), *ut majestas tanti Sacrificii commendaretur, et mentes Fidelium per hæc visibilia Religionis signa ad rerum altissimarum, quæ in hoc Sacrificio latent, contemplationem excitarent*. Sed si hæc cæremoniæ ni-

Tom. II;

E

mis festinanter peraguntur, uti necesse est eas ità fieri tempore tàm brevi, tunc non tantùm devotio- nem illæ non ingerunt ergà Missam, sed imò sunt causa ut populus sinè veneratione assistat; itàque etiam hoc capite peccat graviter Sacerdos qui tantà festinatione celebrat, ratione scandali, quod non est leve, dùm pro inducendo populum ad magnam ergà Sacrificium venerationem habendam, potius eum movet ut illud despectui habeat, cùm ostendit tantà irreverentiã se illud tractare. Propterea Concilium Turonense 1583. præcepit, ut Sacerdotes benè calleant cæremoniis Missæ, *ne populum sibi commissum à devotione potius revocent, quàm ad Sacrorum Mysteriorum venerationem invitent* (a).

87. — Quæritur hìc denique, an Resolutiones S. C. Rituum inducant obligationem? Respondet *P. Merati* (b) et distinguit: cùm præfatæ Resolutiones sunt verè Decreta rigorosè sumta, ut cùm in ipsis exprimitur, *ab omnibus servetur, servari ab omnibus mandavit*, etc. tunc obligant et debent servari tanquàm Regulæ proximæ; dùm Sixtus V. in Constitut. 74. dedit huic S. C. facultatem declarandi omnia dubia, quæ insurgunt circà Ritus. Cùm autem sunt simplicia responsa ad particulares, tunc dicit ex opinione aliquorum judicari declarationes tantùm directivas, non præceptivas; et idem dicit *Escobar*, apud *La-Croix* (c).

### Catalogus aliquorum notabilium Decretorum circà Celebrationem.

88. — I. *E*LEEMOSYNAS manuales, et quotidiana- nas, ità demùm Sacerdotes accipere possint, si oneribus antea impositis ità satisfecerint, ut nova quoque onera suscipere valeant; alioquin omninò abstineant. Decr. S. C. Conc. 21. Jun. 1625. ex auctoritate Urbani VIII. Deindè declaravit eadem S. C. quòd

---

(a) *Lib. 6. n. 400. Et fusiùs in Edit. Venet.* — (b) *Ad Gav. par. 3. tit. 11. n. I. ad III.* — (c) *Croix lib. 6. n. 118.*



præfatum Decretum non erat intelligendum absolutè, sed quòd Sacerdotes possunt nova onera suscipere, dummodò infrà modicum tempus possint omnibus satisfacere. Et postea explicando illud modicum tempus, die 17. declaravit: *Modicum tempus non reputandum spatium duorum vel trium mensium, sed intelligi infrà mensem (a)*. Vide circa temporis parvitatem quod dicunt DD. in *Append. II. n. 154. II. Pro pluribus Missis celebrandis stipendia quantumcumque exigua, sive ab uno, sive à pluribus personis collata fuerint, aut conferentur in futurum sacerdotibus, et clericis, S. C. sub obtestatione Divini iudicii mandat, ut absolutè tot Missæ celebrentur, quot ad rationem attributæ eleemosynæ præscriptæ fuerint*. Decr. S. C. Conc. editum jussu Urbani VIII. et confirmatum ab Innocentio XII. in Bullâ *Nuper (b)*. III. *Omne damnabile lucrum ab Ecclesiâ remove volens, prohibet sacerdoti, qui Missam suscipit celebrandam cum certâ eleemosynâ, ne eandem Missam alteri, parte ejusdem eleemosynæ sibi retentâ, celebrandam committat*. Decr. S. C. Concilii ab Urbano VIII. IV. In Decreto S. C. approbato ab Innoc. XII. in Bull. *Nuper*, pro Beneficiatis dictum fuit: *Non habere locum (Decretum Urbani), sed satis esse, ut Rector Beneficii, qui potest Missam per alium celebrare, tribuat sacerdoti celebranti eleemosynam congruam secundùm morem Civitatis, vel Provinciæ, nisi in fundatione Beneficii aliud cautum fuerit (c)*. Cùm autem requisitum fuerit à S. C. Conc. an esset licitum Capellano amovibili dare Missas celebrandas pro ordinario stipendio, reliquo sibi retento, responsum fuit: *Id licere, modò pro Capellaniâ certi redditus sint annuatim constituti, et perpetuo Capellano assignati; secus verò, si hujusmodi Capellano pro quâlibet Missâ celebrandâ certa detur eleemosyna*. Ità Decisum fuit 15. Martii 1745. et Decretum fuit à meipso observatum. V. *Permittendum non esse, ut loca pia, seu illorum Administratores ex eleemosynis Missarum*

---

(a) *Lamber. notif. 56.* — (b) *Vide apud Croix l. 6. p. 4. n. 64.*  
 — (c) *Croix l. 6. p. 2. n. 64.*

*celebrandarum ullam minimam portionem retineant ratione expensarum in Missarum celebratione, nisi alios non habeant reditus; et tunc nullatenus debere excedere valorem expensarum quæ pro ipsomet tantum Missæ Sacrificio necessario sunt subeundæ.* Decr. S. C. Conc. confirmatum ab Innoc. XII. (a). VI. *Archipresbyterum non teneri ad ministranda utensilia iis qui celebrant in suâ Ecclesiâ ex obligatione Beneficii sive Capellani. Quoad Missas verò adventitias teneri ad dictam subministrationem, quatenus permittat eas in suâ Ecclesiâ celebrari, nec teneri ad has Missas adventitias admittendas, nisi solutis utensilibus per celebrantes.* Decr. S. C. Conc. die 6. Julii 1726. (b). VII. *Quando in fundatione Beneficii, seu Capellæ expressè cautum est, non teneri Celebrantem ad applicationem Sacrificii, eo casu poterit celebrans accipere novum stipendium, et unicâ Missâ satisfacere obligationi Beneficii seu Capellæ, et item danti novum stipendium.* Decr. S. C. Conc. sub die 13. Jul. 1630. (c). *Cum autem à S. C. expostulatum fuisset 18. Martii 1668. an deberent applicari pro testatore Missæ, cum in testamento nihil de applicatione declaratum fuerit, respondit S. C. applicanda esse pro testatore* (d). *Et idem declaratum fuit 6. Februarii 1627. de Capellanis, qui celebrant, ut Confratres aut Moniales intersint Sacro, cum dicatur non posse stipendium recipere.* VIII. *Districtè prohibet, ne Episcopi in Diocesanâ Synodo, aut Generales in Capitulis generalibus, vel aliàs quoquo modo reducant ulla onera Missarum celebrandarum, aut post idem Concilium imposita, aut in limine foundationis, sed pro his omnibus reducendis, aut moderandis, vel commutandis ad Apostolicam Sedem recurratur etc. Alioquin reductiones, moderationes, et commutationes hujusmodi, si quas contrâ hujus formam fieri contigerit, omnino nullas et inanes decernit.* IX. *In die Commemorationis omnium Fidelium Defunctorum Sacrificia possunt à Sacerdotibus applicari ad libitum, scilicet vel pro omnibus Fidelibus Defunctis, vel pro aliqui-*

---

(a) *Vide apud Croix l. 6. p. 2. num. 95. — (b) Lambert, Not. 56. n. 13. — (c) Ibid. n. 8. — (d) Ibid. n. 9.*

*bus tantum.* Decr. S. C. sub die 4. August. 1663. (a).  
 X. *In Missis Defunctorum, quæ in paramentis nigris celebrantur, non ministretur Eucharistia per modum Sacramenti, scilicet cum particulis præconsecratis, extrahendo pyxidem è Custodiâ; potest tamen ministrari per modum Sacrificii, prout est quando Fidelibus præbetur Communio cum particulis intrâ eandem Missam consecratis.* Decr. S. C. Rit. in Aquensi sub die 2. Septembris 1741. Et antea adfuit hoc Decretum: *Missæ Defunctorum non possunt celebrari, nisi cum colore nigro, vel saltem violaceo.* 21. Jun. 1676. in Oritanâ. XI. *Non est licitum Missas celebrare in die Sabbati Sancti in quibuscumque Ecclesiis, et Oratoriis, non obstante quâcunque contrariâ consuetudine, prout Papâ approbante, suo Decreto Generali statuit eadem S. C.* Decr. S. C. Rit. sub die 11. Mart. 1690. (b). Aliud simile Decr. reperitur ap. Pitton. (c) quod prohibet celebrare in feriâ V. Cœnæ Domini; et, quod magis refert, hæc Decreta fuerunt expressè confirmata à Clemente XI. ut legitur apud Lambertini postea Bened. XIV. et Pitton. (d) Decreto edito ab eodem Pontifice die 15. Martii 1712. quo dictum fuit: *Dichiaro per ultimo, che colla suddetta proibizione per lo Venerdì Santo, non intende la Santità Sua di permettere che ne' giorni die Giovedì e Sabato Santo si celebrino Messe private, ma solo la Conventuale, secondo il Rito della Santa Chiesa, e replicati Decreti della S. C. de' Riti.* Et hoc Decretum ut refert Merati confirmatum fuit ab Innoc. XII. et ab eodem Clemente XI. (e). XII. *Habens indultum à Sede Apostolicâ erigendi Oratorium privatum in propria domo, si quis voluerit ibi ædificare Altare ligneum, non indiget facultate Apostolicâ, dummodò Altare ligneum cum sacro lapide parieti colligatum amovibile non sit, et Altaris portatilis imaginem non præseferat.* Decr. S. C. Rit. sub die 3. Decemb. 1661. (f). Merati autem explicando illud verbum *colligatum* dicit largè esse intelligendum, cùm sufficiat Altare si adhæreat

---

(a) ap. Merat. in Indic. n. 411. — (b) ap. Monac. tit. 15. Form. 3. in fin. — (c) Pitt. de Rit. n. 1703. — (d) Pitt. l. cit. — (e) Merat. in Indice n. 501. et 522. — (f) Ibid. n. 393.

parieti, aded ut nullum mediet spatium, quia hoc sufficit ut verificetur quod Altare portatile non videatur esse; saltem dicit usu sic fuisse interpretatum. XIII. Leguntur hæc alia sequentia Decreta S. C. Rit. apud *La-Croix* (a). *Missæ Conventualis canenda est quotidie in Collegiatis, quarum Clerus est numerosus, et redditus non tenues.* XIV. *Missæ ad satisfaciendum eleemosynis alicui Ecclesiæ traditis non sunt celebrandæ per externos, ubi commodè potest iis satisfieri per Sacerdotes ejusdem Ecclesiæ.* XV. *Inferiores Episcopo non debent sumere de Altari Paramenta pro Missâ.* 7. Julii 1712. Sed hoc intelligendum, ut advertit *Gav.* quod non ponantur paramenta in medio Altaris more Episcoporum; nam si ponantur in angulo, hoc permittit Rubrica (p. 2. tit. 12. n. 3.) ubi dicit: *Si verò (Sacerdos) dimissurus sit paramenta apud Altare, in quo celebravit, finito Evangelio, ibidem illis se exuit.* Saltem, dicit *La-Croix*, id permissum est ubi commodum non adest alibi deponere vestes. XVI. *Altare portatile ligneum cum Ara lapidea permitti debet, non obstante Constitutione Synodali, dummodò habeat solitum Reliquiarum Repositorium,* die 19. Jan. 1614. XVII. *Solus Episcopus potest habere fenestras in Ecclesia, per quas in eam prospectus haberi possit.* 19. Jan. 1614. XVIII. *Non permittitur ad Altare Majus celebratio Missæ, dum dicuntur in Choro Matutinum, et Horæ.* 15. Sept. 1664. XIX. *Potest fieri Commemoratio de Ss. Sacramento, si expositum sit, etiam in Missa de Festo Duplici, quod non sit 1. vel 2. Classis.* 2. Decemb. 1688. XX. *Non potest prohiberi Celebratio Missæ in Oratorio ruri ædificato per Laicum, antequàm celebretur Missa Parochialis.* Decr. S. C. sub die 31. Mart. 1629. (b). XXI. *De rigore juris non posse prohiberi (scil. à Parocho) ut Missæ non celebrentur antè Missam à Parocho non celebratam.* Decr. S. C. 27. Jun. 1641. (c). Sed in alio Decreto dictum fuit: *Sæpiùs S. C. censuit Constitutiones Synodales disponentes ut diebus festis Missæ celebrari non debeant in aliis Ecclesiis, nisi celebratæ*

---

(a) *Croix* l. 6. p. 2. n. 2055. — (b) *Ap. Merat. Ind. n. 242.*  
— (c) *Ap. Card. Lambert. Notif. 40. n. 12.*

*Missâ in Ecclesiâ Parochiali, esse observandas; itâ tamen ut Missa in Ecclesiâ Parochiali horâ opportundâ celebretur.* 25. Maji 1652. (a). XXII. S. C. censuit non licere Regularibus, etiam in eorum propriis Ecclesiis SS. Eucharistiæ Sacramentum publicè adorandum exponere, nisi ex causâ publicâ, quæ probata sit ab Ordinario, ex causâ autem privatâ posse, dummodò Ss. Sacramentum è Tabernaculo non extrahatur, et sit velatum, itâ ut ipsa sacra Hostia videri non possit. Sub die 17. Aug. 1630. (b). Idque confirmatum à Bened. XIV. alio Decreto, ubi fuit decisum: *Non licere exponi publicè Divinam Eucharistiam, nisi causa publica, et Episcopi facultas intervenerit* (c). Super hoc dico, quòd si aliquis privatus optaret expositionem Venerabilis ad publicam devotionem promovendam, licitè potest illa fieri, non verò si eam cuperet tantùm ob suam privatam devotionem (d). Hic insuper notandum, quòd etiam respectu Ecclesiarum Secularium adest Decretum S. C. Episc. et Regul. prohibens extrahi Pyxidem à tabernaculo, cùm illa ob causam privatam exponitur: *Si quandocunque privatâ ex causâ sacrosancta Eucharistia exponenda videbitur, à tabernaculo nunquam extrahatur, sed Pyxide velatâ in aperto ejusdem tabernaculi ostiolo cum assistentiâ alicujus Sacerdotis Stola et Superpelliceo induti; et cum sex saltem luminibus cereis collocetur. Quod idem in Ecclesiis Secularium servari mandamus.* Die 9. Decemb. 1620. (e). Benedictus autem XIV. in Bullâ *Cùm, ut rectè nosti etc.* (in Bullar. t. 4. pag. 317. §. 13.) mentionem faciens de præfatis Decretis, ait pro causâ privatâ numquàm extrahi posse Pyxidem, nec etiam ad Populum benedicendum, his verbis: *Si autem Sacramentum non debet à tabernaculo educi, facile intelligitur in designatis casibus (scilicet pro causis privatis) non esse illud afferendum ad Ecclesiæ januam, nec cum eodem Benedictionem impertiendam.* Hic autem præterea obiter advertendum id quod in

---

(a) Ibid. — (b) *Ap. Lamb. Not.* 30. n. 11. — (c) *Itâ in Bullar. Tom. 2.* (d) *Vide l. 6. n. 424. v. Refert.* — (e) *Ap. Card. Lambert. Notif.* 30. n. 27.

prædictâ Bullâ (§. 12.) idem Pontifex subdit circa administrationem Sacramentorum, nempe: *Neque enim fas cuique esse debet, privatâ auctoritate novum ritum inducere.* Et ad hoc profert ibi Canonem XIII. Tridentini in *Sess. 7.* ubi vetitum fuit immutari consuetos ritus circa Sacramentorum administrationem; eundemque Canonem declarat procedere etiam quoad cultum Ss. Eucharistiæ. Loquens autem de Ritibus alicubi jam introductis, sic inquit: *Et quoties aliquem ritum ejusmodi induci contigit, nisi nihil continentem pietati oppositum, Apostolica Sedes eundem interdiceret non dubitavit, ex quibusdam extrinsecis circumstantiis nullatenus prævisis, vel neglectis ab eo qui ritum innoxius.* XXIII. Notandum, quod juxta Decretum Innocentii XI. 1. Sept. 1730. vetatur apponi Statuas, Reliquias Sanctorum, ac Imagines Animarum Purgatorii in Altari ubi fit expositio Ss. Sacramenti (a). XXIV. Regulariter Missa respondet Officio, sed excipe, ut dicitur in Decreto S. C. Rituum: *Sacerdotes etiam Regulares diebus, quibus propria Officia recitant sub Ritu duplici, celebrantes in alienis Ecclesiis, quandò peragitur festum cum solemnitate et concursu populi, debent celebrare Missas, conformando se Ritui, et colori earundem Ecclesiarum. In aliis verò diebus possunt; sed quando prohibentur Missæ Votivæ, vel Defunctorum, debent se uniformare saltem quoad colorem.* 2. Jun. 1701. apud *Merat. in Ind. Decr. n. 558.*

XXV. Notandum, quod Ss. Eucharistiæ Sacramentum nequit in aliis Ecclesiis servari, quàm in Parochialibus, sinè dispensatione S. Sedis, cùm non possint eam largiri Ordinarii, ut docent *Barbosa, Pignatellus*, et alii apud *Card. Petra* (b), qui de hoc plures refert Decisiones S. C. tam respectu Hospitalium, quàm Conservatoriorum, ac etiam Ecclesiarum quæ sunt intrâ fines Parochiæ, aut in Ruribus, ad quas accedunt Parochi ad Missas celebrandas; licentiam enim (ait *Petra*) servandi Eu-

---

(a) *Ap. Merat. pag. 681.* — (b) *Barbosa in Trid. sess. 23. c. 6. de refor. n. 3. Pignatell. Cons. 86. v. 16. Petra tom. 3. in Const. I Urb. VII. pag. 166. ex n. 30.*

charistiam in hujusmodi Ecclesiis, sive Capellis S. C. tum solum concedit, cum in ipsis est populi concursus, et præsertim si illæ à Parochiâ distant. Deinceps Benedictus XIV. in Constitut. *Quamvis justo*, editâ sub die 30. April. 1749. (vide *Bullar. tom. 3.*) expressè declaravit largitionem præfatæ licentiæ privativè spectare ad Sedem Apostolicam, his verbis: *Quoniam verò hujusmodi gratiæ concedendæ (hoc est servandi Venerabile Sacramentum) jus ad nos et Apostolicam Sedem privativè pertinet, quod innuit Decretum superiùs relatum, et Canonica docet Disciplina, juxtâ quam sacrosancta Eucharistia in Ecclesiis, quæ Parochiales non sunt, retineri non potest absque præsidio. Apostolici Indulti, vel immemorabilis consuetudinis, quæ hujusmodi indulti præsumptionem inducit.* Dixit tamen S. C. satis esse possessionem 40. annorum cum titulo putativo, quia hoc temporis spatium sufficit ad licentiam Apostolicam præsumendam; sed addit, quod si constat S. Eucharistiam retineri ex solâ Ordinarii licentiâ, tunc nec etiam centenaria, aut immemorabilis possessio prodesse. Hæ Decisiones ab eodem *Petra* afferuntur. XXVI. Notandum ultimò cum *Merato* (a), *Corset. Tonell. et Bisso*, quod Sacerdos postquàm Moniales sunt communicatæ, non debet Pyxide eas benedicere, sed tantum manu, positâ Pyxide super Pallâ, stans adhuc antè fenestrellam, eo modo quo alii fideles post Communionem benedicuntur; nam tantum infirmi benedicuntur cum Sacramento, qui pro Viatico communicantur, ut præscribitur in Rituali Romano. Item advertendum ex Decreto dato 15. Sept. 1737. apud *Meratum* n. 696. præscribi: *In Communione Monialium habentium fenestrellam in parte Evangelii, Sacerdos debet descendere et reverti per gradus anteriores, et non laterales Altaris.*

---

(a) *Merat. part. 2. tit. 10. pag. 251. n. 23. in fin.*

# TRACTATUS XVI.

## DE POENITENTIÆ SACRAMENTO.

### CAPUT I.

#### De materiâ et formâ.

*De materiâ remotâ et proximâ 1. An Religiosi debeant confiteri semel in mense 2. An peccata confessa sint materia apta 3. An distinguenda sint peccata jam confessa à non confessis 4. An necessarium verbum te. An verba à peccatis tuis. An cetera verba. An per verbum absolvo possint absolvi censuræ. Requiritur præsentia pœnitentis 5. De absolutione sub conditione. 6.*

I. — **P**ŒNITENTIA accipitur uti virtus, et uti Sacramentum; uti virtus definitur: *Virtus tendens in destructionem peccati, quantum est offensa Dei, medio dolore, et satisfactione.* Ut Sacramentum: *Est Sacramentum consistens in actibus pœnitentis, et in absolutione Sacerdotis.* Pœnitentia uti virtus semper fuit necessaria *necessitate medii* ad salutem, sed tamquam Sacramentum in novâ lege adhuc est necessaria *necessitate medii* lapsis in mortale post Baptismum, saltem in voto, sive desiderio, si non potest realiter suscipi. Materia remota hujus Sacramenti juxtâ *S. Th. (a)*, et communem sententiam, sunt peccata post Baptismum commissa; sed peccata mortalia sunt materia necessaria; venialia, et mortalia aliàs confessa sunt materia *sufficiens*; nam hæc sufficiunt ut

---

(a) 3. p. q. 84. a. 1. ad 1. et 2.



recipiatur absolutio, sed nemo tenetur ea confiteri. Materia proxima, juxtà eundem S. Thomam (a) sunt actus pœnitentis, à Tridentino nuncupati quasi materia, quia non sunt materia physica, prout est illa ceterorum Sacramentorum; ii actus sunt (ut declaravit Concilium) Contritio, Confessio, et Satisfactio. Satisfactio tamen non est pars essentialis, ut sunt duæ primæ, sed tantum integralis; nam sinè illâ in aliquo casu benè potest esse validum Sacramentum. Hoc est contrà Scotum, qui vult totam essentiam consistere in solâ Absolutione.

2. — Loquendo de materiâ remotâ, dictum est venialia, et mortalia aliàs confessa esse tantum materiam sufficientem. Sed in hoc quæritur 1. An Religiosi et Moniales teneantur ad confitendum saltem semel in mense, quamvis mortalibus non sint gravati? Dubium oritur ex Clement. *Ne in agro*, §. *Sanè, de statu Monach.* ubi (cùm sermo fiat de Monach. Benedictinis) sic dicitur: *Sanè singulis mensibus tam in Monasteriis quàm extrà (sublata occasione quâcunque) ad Confessionem saltem semel accedant omnes et singuli Monachi. Et in prima Dominica mensis cujuslibet in Monasteriis semper communicent.* His positis, alii DD. Azor. Vasq. Hurtadus, etc. (b). dicunt hoc esse præceptum obligans sub culpâ gravi; undè dicunt teneri Religiosos quolibet mense confiteri, licèt gravibus peccatis obnoxii non sint. Sed communiùs Solus, Can. Cajetan. Navar. Molfes. et Megal. (c) tenent præfatam Clementinam præceptum grave non inducere. Imò P. Suar. (d) dicit præfatum Decretum non importare præceptum, sed tantum consilium; et deducit ex Tridentino Sess. 25. Cap. 10. de Ref. ubi cùm sermo fiat de Monialibus, sic dicitur: *Attendunt diligenter Episcopi, et ceteri superiores Sanctimonialium, ut in Constitutionibus earum admoneantur Sanctimoniales, ut saltèm singulis mensibus Confessionem peccatorum faciant, et Eucharistiam suscipiant.* Ex quibus verbis concludit P. Suar. quòd nisi constet quòd

---

(a) ibid. a. 2. — (b) Apud Dianam p. 8. Tract. 1. R. 16. — (c) Apud Dian. p. 3. Tract. 3. R. 1. — (d) in 3. p. sess. 2.

Constitutiones Religionis obligent sub gravi, nullâ rigorosa obligatio de hoc habetur. Et idem sentiunt *Castrop. Can. Præpos. Vivald. Leand. etc.* apud *Salm. (a)*. Et hoc quod dicunt AA. citati de Confessione, dicunt etiam de Communione.

3. — Quæritur 2. An peccata aliàs confessa sint materia apta ad recipiendam absolutionem? Dubium oritur ex eo quòd peccatum remissum non est ampliùs capax remissionis; undè videtur non esse materia apta Confessionis. Sed est communis sententia, et usus fidelium, qui id admittit cum *S. Thomâ (b)*, *Suar. Castrop. Salm. etc.* et est certum ex Extravaganti 1. de *Privil. §. Verum, in fine* ubi dicitur: *Ut eorundem peccatorum iteretur confessio, reputamus salubre*. Nec obstat dicere quòd peccatum remissum non est ampliùs peccatum, quia peccatum licèt remissum semper est peccatum commissum; undè benè potest esse materia Sacramenti non semel, sed iterùm atque iterùm et ampliùs, ut ipsa aqua benè potest esse materia multorum Baptismorum (c).

4. — Quæritur 3. An in Confessione sint necessariò distinguenda peccata confessa à non confessis. Respondetur negativè cum *Bonac. Lug. Conc. et Sanch.* modò hoc non sit necessarium ob occasionem proximam, quæ removenda foret, aut ob casum reservatum, aut ob aliam circumstantiam (d).

5. — Forma Sacramenti Pœnitentiæ sunt verba Sacerdotis, *Ego te absolvo à peccatis tuis*. Autumant nonnulli Auctores primævis temporibus formam fuisse deprecatoriam, prout est nunc (ut testatur *Martene, et Tourn.*) forma Græcorum; sed quoad Latinos, hoc negant *Baronius, Gonet, et alii (e)*. Sed hìc quæritur 1. An sit de essentiâ verbum *Te*? Negant *Lugo, et Wigandt*, sentientes satis exprimi verbum *Te* per alia in formâ contenta, id est à *peccatis tuis*. Sed communissimè affirmant *Bonac. Castrop. Conc. et Holzm.* Et quia hæc sententia est etiam

---

(a) *Castr. tr. 23. d. undè Pœn. p. 20. §. n. 6. Can. relect. de Pœn. c. 5. At verò Salm. eod. tit. c. 7. n. 33.* — (b) *in 4. d. 17. q. 3. a. 3. q. 5. ad 4.* — (c) *lib. 6. n. 417. d. 2.* — (d) *n. 425. ad 2.* — (e) *num. 430*

probabilis, hæc in praxi tenenda est, cùm proscripta sit ab Innoc. XI. Propos. 1. quæ dicebat licitum esse in conficiendo Sacramento uti opinione probabili. Quæritur 2. An sint necessaria verba à peccatis tuis? Negant *Milante*, *Cone. Lugo*, *Holzm.* etc.; nam (dicunt) ex circumstantiis sufficienter determinantur alia verba ad peccata pœnitentis. Et in Catechism. Rom. (p. 2. n. 14.) alia verba non exprimuntur de formæ essentiâ, quàm, *Ego te absolvo*. Sed multi alii DD. ut *Paludan. Major*, *Croix*, *Mazz.* etc. volunt esse necessaria, quia si valeret ea ratio adversariorum, dicunt etiam verbum *Te* posse reticeri. Et quia hæc sententia est etiam probabilis, hæc sequenda est, ut confitentur iidem adversarii *Holzm. Ronc.* etc. Et omnes conveniunt esse grave, si omitantur (a). Est sententia communis contrà *Durandum* (Doctorem ceteroquin doctum, sed extravagantem in suis opinionibus) verba in nomine *Patris* etc. non esse de essentiâ; et communissimè dicunt *Bonac. Castrop. Salm. Croix*, etc. quòd ea omittere non excedat veniale (b). Cetera verba, *Misereatur etc. Indulgentiam etc.* commune est quòd possint omitti citrà peccatum. Et idem dicunt DD. de verbis, *Dominus noster Jesus Christus* etc. dùm *Trident. sess. 14. c. 3.* dicit tantum quòd exceptâ formâ, aliæ preces laudabiliter adjunguntur. Sed *P. Concina* contendit omittere præfata verba esse veniale, et non sinè ratione, dùm *Rit. Rom. (de Form. Absol.)* dicit: *In Confessionibus frequentioribus omitti potest, misereatur etc., et satis erit dicere: Dominus noster Jesus Christus usque ad illud, passio etc. Urgente verò aliquâ gravi necessitate in articulo mortis, breviter dicere poterit: ego te absolvo ab omnibus censuris, et à peccatis tuis. In nomine Patris etc. (c).* Commune est Sacerdotem per illa verba *Te absolvo* posse absolvere tam à peccatis, quàm à censuris. Nihilominus dicunt rectè *Concina, Sotus, Salm. etc.* facere hoc sinè causâ esse veniale, quia est contrà

---

(a) *Lib. 6. ibid. dub. 2.* — (b) *Ibid. Dubitat. 1.* — (c) n. 430. d. 3. v. *Verb.*

Ecclesiæ morem; nisi esset (ut probabiliter dicunt *Holz. Viva* etc.), quia nulla esset suspicio quod pœnitens aliquam incurrisset censuram (a). Certum est autem formam proferendam esse præsente pœnitente: et fuit damnata à Clemente VIII. 1602. die 20. Junii Propositio quæ dicebat: *Licere per litteras, seu internuncium Confessario absenti Sacramentaliter confiteri, et ab eo absente absolutionem obtineri*. Et declarando Pontifex absolutionem illicitam, ut benè advertunt *Salm.*, declaravit etiam esse invalidam; quia Papa in casibus necessitatis non potuisset eam prohibere. Et Paulus V. anno 1604. die 14. Julii id prohibuit, licet præcessisset Confessio in præsentiâ factâ (b). Talis præsentiâ sufficit ut sit moralis, nempe in eâ distantia in quâ solent homines voce usuali, licet altâ, alloqui. Hanc distantiam *Sporer*, et alii extendunt ad 20. passus; dicunt tamen quod si pœnitens à Confessionali discessit, Confessarius eum arcessere debet, ut absolvat, cum id commodè fieri potest. Ceterum ait ipse *Sporer*, cum *Bonac. et Gubat*, quod sinè scrupulo potest Confessarius absolutionem impertiri pœnitenti cum certò scit parùm distare. Tenet rationabiliter *Tamb.* quod si absolutio daretur ei qui ex tecto præcipitat, debet dari sub conditione, cum dubium sit an in tantâ distantia adsit præsentiâ moralis. Advertunt tamen communiter DD., non referre quod pœnitens absolutionem non audiat. Imò prudenter admonet *Croix* ut absolutio submissâ voce proferatur, ut si fortè aliquis dimittitur non absolutus, alii id non animadvertant (c).

6. — Quæritur hîc ultimò, quandònam sit valida et licita absolutio, quæ datur sub conditione? Si conditio est de futuro, communiter dicunt invalidam esse. Admittit tamen *P. Viva*, posse ità conferri absolutionem: *Absolvo te, si Deus cognoscit quod restitues id quod debes*; sed rectè id negant *Conino. Dicast. Concin. Tournel.* etc. quia cum Deus in hominum manus Sacramentorum administrationem

---

(a) *Ibid. dub. 4.* — (b) n. 428. — (c) n. 429.

commiserit, non possunt apponi conditiones quæ hominibus innotescere nequeunt (a) Si contrà conditio est de præterito, aut de præsentì, omnes conveniunt eam esse validam, et etiam licitam, cùm justa adest causa, juxtà sententiam communem (contrà pauciores) ut dictum est *Tract. XIV. n. 3.* Causæ autem justæ sunt 1. si Confessarius prudenter dubitat de absolutione collatâ : *Suar. Lugo, Ronc. Bonac. Salm. Croix*, etc. 2. Si dubitatur de pœnitentis dispositione, et contrà adesset necessitas eum absolvendi, ut dicitur *Tom. III. Tr. ult.*, loquendo de pueris, et moribundis. Ceterùm plerùmque Confessarius debet esse certus de pœnitentis dispositione, ut eum licitè absolvere possit; quare recidivi, non solum in peccata mortalia, sed etiam in venialia, non possunt absolvi, nisi certa dent signa suæ dispositionis, ut dicitur *Punct. II. præfati Tract. ultimi.* 3. Ut dicit *Bonac.* rectè absolvi possunt sub conditione illæ personæ piæ quæ confitentur de solis imperfectionibus, circà quæ dubitatur, an ob advertentiæ defectum pertingant ad venialia; et hoc non videtur improbable, cùm justa causa videatur eas ità absolvendi, ne hujusmodi animæ hujus Sacramenti fructu careant per multum tempus. Dico *per multum tempus*, quia hoc non admitterem, nisi semel in mense. Dicit præterea *Sporer* quòd Confessarius potest absolutionem impertiri, si dubitat de jurisdictione; sed hoc puto non esse admittendum, nisi cùm pœnitens existeret in mortali, et aliàs multum temporis absolutione privari deberet. Hoc ceteroquin debet intelligi in solo dubio facti: quia si jurisdictio est positivè dubia de jure, idest si probabilis est ob DD. auctoritatem, benè potest absolutè conferri: nam tunc supplet Ecclesia, semper ac gravis adest causa, ut diximus *Tom. I. Tr. I. n. 27.* Præterea dicunt *Spor. et Mazz.* quòd potest absolvi sub conditione pœnitens qui est in necessitate communicandi, et est dubiè dispositus. Sed in hoc distinguendum est, ut diximus *Tract. XV. n. 34.* et videndum an dubium sit de peccati actione, aut de

---

(d) n. 431. et etiam n. 26.

Confessione peccati jam commissi : quia si pœnitens est certus quod grave peccatum patravit, et ejus dispositio est dubia, ille communicare nequit, licet absolutus fuisset sub conditione; et si non potest Communicare, nec etiam potest absolvi; nam tunc deest causa necessitatis communicandi, ut sub conditione absolveretur (a). Vide *num. 34. Tract. XV.*

## CAPUT II.

### *De Contritione, et Proposito.*

7. — **S**ICUT superius vidimus, et sicut declaravit Trid. *sess. 14. Cap. 3.* tres sunt partes necessariæ Pœnitentiæ, Contritio nempe, Confessio, et Satisfactio. Sigillatim erit sermo de singulis eorum in punctis distinctis. Et primò de Contritione.

## PUNCTUM I.

### De Contritione.

*In quo consistat contritio 8. Ex quo motivo produ-  
citur 9. Quandonam tenemur ad contritionem 10.  
An in articulo mortis, etc. 11. An sufficiat dolor  
generalis 12. An actus Fidei, Spei, etc. 13. An suf-  
ficit attritio sine amore prædominante 14. 15. et 16.  
An sufficiat attritio ex timore pœnarum tempora-  
lium 17. An detur Sacramentum validum, et in-  
forme 18. An dolor debeat præcedere Confessionem  
19. Quantum temporis perduret dolor 20. An dolor  
debeat elici in ordine ad Confessionem 21. Qui mox  
se reconciliat, an novum dolorem elicere debeat 22.  
De dolore peccatorum venialium 23.*

8. — **Q**UOAD contritionem, Tridentinum *Cap. 4. Sess. 14.* distinguit, et dicit aliam esse contritionem

---

(a) *Lib. 6. n. 432.*

*perfectam*, quæ oritur ex motivo caritatis, aliam *imperfectam*, quæ attritio nuncupatur, quæ concipitur aut ex turpitudinis peccati consideratione, aut gehennarum timore, excludens peccati voluntatem, et veniæ spem includens. Loquamur nunc de contritione *perfecta*, quomodo illa esse debeat, et quando sit necessaria; deinde loquemur de attritione. Contritio definitur à Concilio: *Animi dolor ac detestatio de peccato commisso, cum proposito non peccandi de cetero*: hinc quæritur hîc 1. An contritio consistat in dolore, an verò in detestatione peccatorum. Alii, ut *Gonet*, volunt consistere in dolore, qui præsupponit detestationem. Alii in detestatione, quam subsequitur dolor; et hæc 2. sententia est verior, et quasi communis cum *Suar. Navar. Cajet. Holzm. Sporer*, et aliis cum *S. Thom. (a)* qui dicit: *Exigitur ad remissionem, ut homo peccatum detestetur*. Ratio est, quia non jam dolor est causa detestationis; sed detestatio est causa doloris. Ceterum ut rectè dicunt *Frassen, Vega, Coninch. Holzm. Sporer*, et *Croix*, non est dubitandum quin in uno explicite contineatur aliud: dum qui peccatum detestatur, necessariò de illo dolet; et qui de illo dolet, necessariò illud detestatur (b).

9. — Quæritur 2. Ex quo motivo producit contritio perfecta? Alii dicunt ex offensione irrogatâ cuicunque attributo Divino, misericordiæ, justitiæ etc., et rectè hanc sententiam dicunt *Lugo*, et *Suar.* esse satis probabilem, dum qui diligit Divinam misericordiam, aut justitiam, respectu ad Deum, jam diligit Deum ipsum, cum misericordia et justitia Divina sint ipse Deus; et ita contrà, quem pœnitet offensæ illatæ in Divinam misericordiam respectu ad Deum, jam pœnitet sui peccati, non jam ob motivum dilectionis ergà seipsum, sed ergà Deum. Sententia tamen communior vult contritionem procedere debere ex offensâ factâ in Divinam bonitatem, cum contritio, ut docet Trid., oriatur ex caritate, et caritas juxtâ sententiam communiorem,

---

(a) 3. p. 9. 87. a. 1. — (b) n. 435.

114 *Tract. 16. De Pœnitentiæ Sacramento.*

habet pro objecto Dei bonitatem, in quantum illa comprehendit omnes Divinas perfectiones, ut diximus *Tom. I. Tract. IV. n. 9. (a)*.

10. — Quæritur 3. Quandò obliget Præceptum contritionis? Certum est obligare, 1. in periculo mortis. 2. Quandò homo tenetur ad eliciendum actum amoris, quem, ut diximus (*Tom. I. Tract. IV. num. 13.*), quilibet tenetur elicere semel in mense. 3. Licet sit probabile quòd extrà periculum mortis non adsit præceptum speciale contritionis, undè dixit *S. Thomas (b)* impœnitentiam finalem non esse peccatum grave speciale; nihilominus præscindendo ab obligatione annualis Confessionis, dicimus peccare graviter contrà caritatem ergà seipsum, qui diutiùs perseverat in peccato, ut dicit *S. Thomas*, dùm qui caret gratiâ, non potest diutiùs in grave aliud peccatum non labi: *Sinè gratiâ justificante*, ait *S. Doctor (c)*, *quòd diù maneat absque peccato mortali, esse non potest*. Quantum autem sit hoc longum tempus, *Concina* et *Ronc.* putant esse hebdomadam circiter; alii tamen communiùs, ut *Castrop. Laym. Lugo, Salm. Henno, Elbel*, etc. dicunt esse spatium anni; prima opinio mihi videtur nimis rigida, sed nec acquiescere possum secundæ, saltem ob obligationem quæ adest (ut diximus) eliciendi actum caritatis semel in mense; verum tamen est quòd rudes difficulter eam obligationem advertant (*d*). Volunt autem nonnulli esse obligationem contritionis peccatoribus quolibet die festo, ut adimpleatur finis sanctificandi Festa; sed hoc communiter negatur, quia (ut dictum est cum *S. Thomâ Tom. I. Tract. II. n. 28.*) finis præcepti non cadit sub præcepto.

11. — Quæritur 4. An in mortis articulo, qui cum solâ attritione confitetur, teneatur etiam ad eliciendam contritionem? Affirmat prima sententia cum *Suar. Bonac. Conc.* etc. Sed secunda sententia multò communior cum *Lugo, Laym. Conc. Castrop. Ronc. Holzm. Salm. Becan. Sporer*, etc. negat, et *Suar.* appellat eam valdè probabilem, quia dato quòd certa

---

(a) *n. 436.* — (b) *2. 2. q. 14. a. 2.* — (c) *2. 2. q. 109. a. 8.*  
— (d) *Lib. 6. n. 437. dub. 1.*



sit sententia (ut ostendemus n. 14.) sufficere ad Confessionem solam attritionem, qui cum illâ confessus est, jam est moraliter certus de Divinâ gratiâ. Hæc secunda sententia est valdè probabilis; sed non potest negari, quin prima omninò moribundis suadenda sit; tanto magis, quòd in extremo vitæ tenemur ad actum amoris, cui satisfieri non potest, nisi peccatum detestemur, cùm memoriæ occurrit, ut communiter DD. (a).

12. — Quæritur 5. An ad obtinendam justificationem sufficiat dolor generalis de peccatis commissis? In hoc quicquid dicant aliqui, qui perperam volunt actum doloris particularis pro quolibet peccato in particulari, aut saltem (dicunt alii) actualem memoriam cujuslibet peccati, certa est sententia quòd sufficiat dolor omnium peccatorum quibus Deum offendit; ità Scotus, Suar. Juvenin. Conc. Laym. Cajet. Holzm. Sporer, Croix, et alii multi; imò Cajetanus ridiculam appellat sententiam oppositam, et nostram expressè docet S. Thomas (b), qui dicit: *Ad justificationem non requiritur, quòd aliquis de singulis peccatis cogitet, sed sufficit quòd cogitet de hoc, quòd per culpam suam est aversus à Deo. Recogitatio autem singulorum peccatorum debet vel præcedere, vel saltem sequi justificationem, nempe (ut explicant Suar. et alii illud sequi) in ordine ad Confessionem, quæ doloris actum sequitur. Idem docet Catechis. Rom. (§. 3.) ubi dicit quòd Deus parcat peccatori, simul atque ille se collegerit et universa peccata sua detestatus, quæ deindè alio tempore, si facultas erit, singula in memoriam reducere, ac detestari in animo habeat, (nempe ut confiteatur) ad Dominum se converterit. Et ratio est clara: primò quia ex Scripturis constat quòd peccator remissionem obtinet statim ac ad Deum se convertit: *Impietas impij non nocebit ei, in quamcumque die conversus fuerit. Ezech. 33.* Itaque si in detestatione primi peccati homini non omnia remissa fuissent, ille reciperet remissionem illius tantum, quin remitterentur alia; sed hoc est impossibile,*

(a) Lib. 6. n. 437. d. 2. — (b) De veritate, q. 29. art. 5. ad 4.

quâ in peccatis mortalibus non potest unum peccatum sinè alio remitti. Secundo, quâ (et hæc est ratio intrinseca) quem pœnitet suorum peccatorum ob motivum generale, quatenus sunt offensa Dei, necessariò dolet de quolibet peccato, quod habet in animâ, ut docet idem *Sanctus Thomas* (a), qui dicit quòd sicut qui diligit communitatem, diligit quemlibet illius, ità quem pœnitet omnium peccatorum suorum, pœnitet etiam singulorum (b). Hactenus de contritione; nunc de attritione quæ est necessaria ad obtinendam Sacramentalem absolutio-nem. Sed prius videamus circà actus Fidei etc.

13. — Quæritur 6. An ad obtinendam gratiam in Confessione requirantur actus expliciti Fidei, et Spei? Alii affirmant: sed alii communius negant; cæterum rectè dicunt *Lugo*, et *Escob.* quòd pœnitens semper ac habet actum doloris, etiam explicitè (non jam reflexè, sed exercitè) actus Fidei, et Spei habet, quâ tunc sinè dubio exercitè credit, et sperat sibi per Sacramentum Pœnitentiæ in virtute meritorum Christi peccata remitti (c).

14. — Quæritur 7. An ad recipiendum Sacramentum Pœnitentiæ sufficiat attritio, et an ad illam requiratur amor inchoatus? Conveniunt Theologi in affirmando utrumque; sed quæstio magna est, an hic amor inchoatus debeat esse caritas prædominans, quâ diligitur Deus super omnia? Ità volunt *Merbes. Molin. Habert, Juven. Conc. Antoine.* et alii pauci, qui dicunt talem amorem ideò dici inchoatum, sivè initiatum, quantum est in gradu remisso; nam, ut dicunt, cùm dolor oritur ex amore intenso, tunc est contritio perfecta, quæ remittit peccata etiam extrà Confessionem. Sed sententia satis communis, quam nos sequimur, tenet sufficere attritionem sinè caritate prædominante, quæ oritur ex timore Inferni, aut gloriæ amissione, aut ex horrore ergà peccati turpitudinem, lumine fidei cognitam; ità tenent *Genet, Canus, Petrocor. Tournel. Cabass. Wig., Abelly, Nav. Suar. Tol. Lug. Laym.*

---

(a) in 4. d. 17. q. 2. art. 3. ad 2. — (b) lib. 6. num. 438. — (c) num. 439.

*Salm.* et alii multi cum Benedicto XIV (a), qui asserit quòd post Trident. cum plausu hanc sententiam omnes Scholæ sibi adoptarunt; undè rectè dicunt *Suar. Less. Castr. Filliuc. Garden. Rainaud. Lug. Prado, Tanner. Viva, et Croix*, hanc sententiam hodiè post Concilium esse moraliter certam, et oppositam non esse ampliùs probabilem. Et quòd Scholæ, (saltem communiùs) tanquàm moraliter certam habeant, constat ex Decreto Alexandri VII. 1667. die 5. Maji, ubi sub excommunicatione prohibuit: *Ne quis audeat alicujus Theologicæ censuræ, alteriusque injuriæ, aut contumeliæ notâ taxare alterutram sententiam, sive negantem necessitatem aliqualis dilectionis Dei in attritione ex metu gehennæ conceptâ, quæ hodiè inter Scholasticos communis videtur; sive asserentem dilectionis necessitatem.* Attestando igitur Pontifex sententiam negantem esse communiorem inter Scholasticos, consequenter testatur in Scholis haberi communiter certam, dùm quisque scit, quòd circà Sacramentorum valorem alias sententias, quàm moraliter certas, non posse DD. amplecti. Nec præfato Decreto vetuit Pontifex sententiam oppositam posse nuncupari improbabilem; nam improbabilitas non est nota censuræ, aut contumeliæ per Decretum vetita. Tantò magis quòd (sicut infrà dicemus) nos non negamus requiri in attritione initium amoris, sed dicimus tantùm non requiri caritatem prædominantem. Sed ad probationes descendamus.

15. — Probatur nostra sententia 1. ex Trident. sess. 14. c. 4. ubi loquendo de attritione ex metu gehennæ conceptâ, etc. sic dicit: *Et quamvis sinè Sacramento Pœnitentiæ per se ad justificationem perducere peccatorem nequeat, tamen eum ad Dei gratiam in Sacramento Pœnitentiæ impetrandam disponit.* Opponunt adversarii quod Concilium non dixit *sufficit*, sed *disponit*; ergò, dicunt; attritio sinè caritate disponit, sed non sufficit; tantò magis, quòd, referente Card. Pallavicino, Concilium post gravem Theologorum dissensionem, abstulit verbum *sufficit*,

---

(a) *De Synod.* l. 7. c. 13. ex n. 6,

quòd jam exaratum erat , et in ejus locum suffecit verbum *disponit*. Sed rectè respondet *Gonet*, quòd Concilium idèò suffecit *disponit*, in quantum importabat necessariò idem ac *sufficit*, quia attritio ex Inferni metu concepta cùm etiam sit donum Dei , ut declaravit Concilium, etiam extrà Sacramentum remotè semper disponit ad gratiam ; in Sacramento igitur disponit proximè ad illam. Hoc clarè patet ex iisdem verbis , et *quamvis* etc. si Concilium loqui intellexisset de solâ dispositione remotâ , quin eam gratia subsequeretur , inconcludenter et perperàm dixisset : *Et quamvis sinè Sacramento Pœnitentiæ attritio gratiam producere non posset, tamen in Sacramento disponit ad eam impetrandam* ; sed dicere debuisset, et quamvis attritio extrà Sacramentum non disponat ad gratiam , disponit tamen ad eam impetrandam in Sacramento. Cùm igitur dixit : *quamvis sine Sacramento non possit attritio perducere peccatorem ad justificationem, tamen eum in Sacramento disponit ad impetrandam gratiam*, necessariò intellexit de dispositione proximâ. Hoc confirmatur clariùs ex verbis quæ subjunguntur : *Quamobrem falsò quidam calumniantur catholicos scriptores, quasi tradiderint Sacramentum Pœnitentiæ absquè bono motu suscipientium, gratiam conferre*. Hæretici cum *Luthero* numquàm Catholicos calumniati sunt , qui dicebant dari gratiam contritis, sed tantùm eos qui dicebant dari attritis, ex eo quia isti bonorum motuum expertes non sunt, et sufficientem habent dispositionem ad obtinendam gratiam in Sacramento, *Tristitia* ( dicebat *Lutherus* ) *ob fœditatem peccatorum, amissionem Beatitudinis, etc. fecit magis peccatores, et tales indignè absolvuntur*, idèòque damnabat eos, qui *vocant attritionem hanc proximè disponentem ad contritionem*. Hi sunt igitur illi quos Concilium dicit falsò ab hæreticis calumniari.

16. — Probatur 2. ratione, quia Sacramenta actualiter operantur quod significant ; undè verificari debet ( ex se loquendo ) quòd cum Sacerdos dat absolutionem , eo momento peccata remittuntur ; proptereà Pœnitentia nuncupatur Sacramentum mortuorum , quia confert vitam gratiæ illi qui eâ pri-

vatus est. Si ergò in dolore necessariò exigeretur caritas prædominans, Sacramentum nunquàm causaret gratiam, quia omnes accederent jam iustificati, nam quilibet dolor qui ex caritate prædominante procedit, est vera contritio, ut docet S. Thomas (a); et hoc accidit (ut explicat Sanctus) quoties homini displicet potius gratiæ, quàm alterius boni amissio; et cùm illa sit vera contritio, quamvis exiguus sit dolor, delet peccata; *Quantuscumque parvus sit dolor (verba Angelici), dummodò ad contritionis rationem sufficiat, omnem culpam delet.* Et hìc certè Sanctus loquitur de dolore extrà Sacramentum, sicut alibi id exprimit (b): *Per solam contritionem dimittitur peccatum... Sed si antequàm absolvatur, habeat hoc Sacramentum in voto, jam virtus clavium operatur in ipso.* Quid clarius? Sed quòd quælibet contritio quæ oritur ex caritate prædominante delet peccata, legitur in eodem Trident. sess. 14. c. 4. in illis verbis: *Etsi contritionem hanc aliquandò caritate perfectam esse contingat, hominemque Deo reconciliare, priusquàm hoc Sacramentum actu accipiat, etc.* Hìc certè non loquitur de caritate perfectâ ratione intensionis, sed de caritate perfectâ ratione motivi caritatis prædominantis; nam Concilium hìc distinguit eam à contritione imperfectâ, quæ originem non habet ex caritate, subjungendo immediatè ibi: *Illam verò contritionem imperfectam, quæ attritio dicitur, quoniam vel ex turpitudinis peccati consideratione, vel ex gehennæ metu, et pœnarum concipitur.* Et ratio est clara, quia quælibet contritio est actus formalis caritatis, et caritas non potest cum peccato conjungi, ut probatur ex sexcentis Scripturis: *Ego diligentes me diligo.* Prov. 8. *Qui autem diligit me, diligitur à Patre meo.* Joan. 14. *Omnis qui diligit, ex Deo natus est.* Epist. I. Joan. 4. Et id communiter docent SS. Patres, et Theologi cùm S. Thomà (c) qui dicit: *Caritas non potest esse cum peccato mortali,* et pro caritate uti-

---

(a) Suppl. q. 5. a. 3. — (b) Quodlib. 4. a. 1. — (c) 2. 2. qu. 45. art. 4.

que S. Doctor non intelligit hîc intensam, sed prædominantem, dùm alibi (a) declarat caritatem consistere in amando Deum super omnia, dicens : *Actus peccati mortalis contrariatur caritati, quæ consistit in hoc, quòd Deus diligatur super omnia.* Certius hoc fit ex Prop. 32. Baji damnatâ à Gregorio XIII. quæ dicebat : *Caritas illa, quæ est plenitudo legis, non semper est conjuncta cum remissione peccatorum.* En sic quæro; quisnam est amor, qui est plenitudo legis, nempè qui satis est ad adimplendum præceptum caritatis? Certè est ille quo diligitur Deus super omnia, ut fatentur omnes cum S. Thomâ (b), qui explicans illud præceptum, *Diliges Dominum Deum tuum ex toto corde tuo*, dicit : *Cùm mandatur quòd Deum ex toto corde diligamus, datur intelligi quòd Deum super omnia debemus diligere.* Itaque cum certum sit caritatem prædominantem, quamvis remissam non posse cum peccato conjungi, certum est etiam quamlibet contritionem, quæ formaliter est actus caritatis, delere peccata. Igitur hoc posito, si velint ut amor inchoatus, requisitus in attritione, sit amor prædominans, hoc non rectè prætenditur, quia (ut ostendimus) si hoc esset, quilibet peccator accedere deberet jam justificatus ad recipiendam absolute Sacramentalem, adeoque numquàm accideret, quòd Sacramentum causaret actualem justificationem, quæ est proprius illius effectus. Si autem in attritione, pro dispositione ad gratiam obtinendam, desideraretur amor inchoatus qui sit principium amoris, sicut loquitur Trident. sess. 6. c. 6. dùm agit de dispositione eorum, qui ad obtinendam justificationem *Deum tamquàm justitiæ fontem diligere incipiunt*; hoc non negatur, et dicimus hoc initium jam in quâlibet attritione reperiri, tùm metu pœnarum à Deo infligendarum, ex eo quod dicit Ecclesiastici 25. 16. *Timor Dei, initium dilectionis ejus*; tùm spe remissionis, et beatitudinis, ex eo quod dicit S. Thomas (c) : *Ex hoc quòd*

---

(a) 2. 2. qu. 10. art. 12. — (b) 2. 2. qu. 44. art. 8. ad 2. —  
 (c) 1. 2. qu. 40. art. 7.

quòd per aliquem speramus bona, incipimus ipsum diligere. Sed non jam si optatur verus caritatis prædominantis actus; hic certè non est necessarius, ut in Sacramento obtineatur gratia. Adeò id verum est, ut referente eodem Pallavicino (a), ad illa verba diligere incipiunt, nonnulli Patres Concilii contendebant addendum esse, per actum caritatis; sed obstitit Concilium, et non adjecta fuerunt.

Quidam Auctor modernus libri, cui titulus *Esposizione sulla Dottrina Cristiana*, loquens de Sacramento Pœnitentiæ, inducit super hoc puncto aliam inauditam opinionem, et dicit, quòd si peccator, qui habet caritatem prædominantem remissam, decessurus sit antè susceptionem Sacramenti, hunc non sinet Deus damnari, quia (ut ait) horrendum videtur, quòd Deus in æternum perdat, qui eum super omnia diligit. Undè censes, eo casu Deum per quandam providentiam extraordinariam illum salvare. Si Auctor iste diceret, quòd Deus huiusmodi peccatori decessuro antè mortem dispositionem augeret, præfata opinio videretur minùs incongrua. Sed quis unquàm credere poterit, quòd peccator ille, eandem dispositionem habens, nunc in odio, nunc in dilectione sit Deo? Quomodò eadem in substantiâ dilectio ergà Deum nunc reddet eum dignum Divino amore, nunc odio dignum relinquet? Demùm peto, ubi fundat Auctor hanc extraordinariam Dei providentiam? super quâ Scripturâ, quo Ecclesiæ Canone, quâ Patrum doctrinâ? Gratis igitur id asserit. Potiùs ex eo concludendum videtur, quòd si durum et horrendum est putare, quòd Deus damnet eum, à quo super omnia diligitur, horrendum etiam dici debet, quòd Deus hominem super omnia eum diligentem odio habeat. Vide in Opere (b), ubi allatæ Doctrinæ, hìc strictiùs comprehensæ, fusiùs expositæ inveniuntur unà cum aliis. Sed veniamus ad dubia.

17. — Quæritur 8. An sufficiat attritio metu temporalium pœnarum concepta, in quantum illæ sunt.

---

(a) *Pallav. l. 8. c. 13.* — (b) *l. 6. ex num. 440.*

à Deo inflictæ? Alii negant, dicendo dolorem debere oriri ex timore pœnarum æternarum, quia cùm æterna sit pœna peccati mortalis, pœnitens debet dolorem peccatorum concipere ex timore æterni mali; ita *Canus*, *Conc. Pasqual.* etc. Sed alii communiùs, ut *Lugo*, *Suarez*, *Anaclet. Viva*, *Elbal*, *Gobat. Croix*, etc. probabiliùs affirmant ex verbis Tridentini *sess. 14. c. 4.* ubi dicitur: *Attritio ex gehennæ, et pœnarum metu concipitur.* Concilium itaque distinguit alias pœnas ab illis Inferni, ubi certè omnes aliæ pœnæ includuntur. Sed quia prima sententia non potest dici improbabilis, in praxi non possumus amplecti secundam (a).

18. — Quæritur 9. An possit dari Sacramentum validum et informe? Casus accidere posset, si quis habens duo peccata, unum sacrilegii, alterum furti, et cùm recordaretur solius sacrilegii, tantùm illius se pœniteret ob supernaturalem turpitudinem illius vitii: hinc quæritur, an iste validè reciperet Sacramentum, adeò ut detestando postea furtum, reciperet gratiam, et postea tantum teneretur confiteri furtum? Multi id negant, et præcipuè *Scotistæ*; sed ipsi discrepant inter se; alii enim dicunt huiusmodi Sacramentum non solùm esse validum, sed etiam formatum, nempe gratiæ infusione; quia pœnitens se dolendo de offensâ in Deum ob sacrilegium, et cupiendo reconciliari Deo, hic dolor et hoc desiderium efficiunt, ut ille virtualiter etiam detestetur furtum. Sed huic rationi responsio clara se offert; istum enim in tantùm pœnitet offensæ in Deum ob sacrilegium, et cupit se reconciliari cum Deo, in quantum movetur ob turpitudinem sacrilegii; sed hæc non comprehendit turpitudinem furti; adeò ut posset dari casus quo pœnitens si recordaretur solius furti, turpitudine furti forsân non moveret eum ad pœnitendum; quare motivum turpitudinis sacrilegii non comprehendit virtualiter detestationem furti. Alii autem dicunt Sacramentum non solùm esse informe, nempe sinè gratiâ, sed etiam invalidum, dicentes non posse esse materiam

---

(a) num. 443.



aptam pœnitentiæ illam, quæ non potest causare gratiam. Sed huic etiam subest responsio, quòd cum concurrant partes essentielles, quæ sunt dolor, confessio, et absolutio, non potest invalidum dici Sacramentum; undè libenter adhæremus sententiæ affirmativæ, et communissimæ Thomistarum cum *Suar. Lug.* et *S. Thomá (a)*, et dicimus talem Confessionem semper esse validam, sed gratiæ expertem (b).

19. — Quæritur 10. An dolor præcedere debeat Confessionem? Affirmant *Lrym. Castrop. Coninch.* et alii; tùm quia dolor debet esse sensibilis, et nequit talis fieri nisi Confessione; tùm quia Confessio, ut sit materia apta debet esse dolorosa, aliàs esset simplex peccatorum narratio. Alii autem communius negant, ut *Lugo, Suar. Bonac Holzm.* etc. et ipsis valdè favet Rituale dicens; *Auditâ Confessione (Confessarius) ad dolorem adducet.* Et rectè respondent ad primam rationem, dicendo dolorem non tantùm per Confessionem fieri sensibilem, sed etiam aliis signis, et verbis Sed ad secundam rationem nullam convincentem afferunt responsionem; undè propter illam dico esse probabilem primam sententiam, proptereaquæ in praxi sequendam. Conveniunt autem communiter *Conc. Viv. Salm. Holzm.* etc. sufficere si pœnitens post actum doloris dicat: *Iterùm me accuso de omnibus peccatis confessis (c).*

20. — Quæritur 11. Quamdiù moraliter perseveret dolor? Alii dicunt diutiùs, et sufficere quòd non sit retractatus; sed hoc rejicitur. Alii per diem, imò *Croix* dicit quòd in praxi semper renovandus est, cùm pœnitens notabiliter ad alia distractus est. Ego verò cum *Ronc.* non dubito asserere, quoties Confessio derivat ex peccatorum dolore, semper virtualiter perseverare dolorem saltem per unum, aut alterum diem, dùm illa Confessio est doloris effectus. Secùs autem, si quis ex merâ devotione, aut ad votum, aut pœnitentiam implendam, confiteretur (d).

(a) *In 4. dist. 7. quæst. 3. art. 4. q. 1.* — (b) *l. 6. num. 444.* — (c) *n. 445.* — (d) *l. 6. n. 446.*

21. — Quæritur 12. An actus doloris debeat elici in ordine ad Confessionem? Affirmant *Bon. Busemb.* et *Conc.* dùm (ut dicunt) tam minister, quàm suscipiens debent ordinare materiam ad Sacramentum, v. g. ablutionem ad Baptismum, tactum ad Ordinationem, et ità dolorem ad pœnitentiam; undè volunt isti, quòd si quis actum doloris, quin ad Confessionem cogitet, elicit, debet illum renovare, dùm confitetur. Alii tamen probabiliùs, ut *Lugo*, *Sporer*, *Moja*, *Gobat.* etc. negant, tùm quia ex Trident. sufficit attritio habita, tùm quia dolor saltem ordinatur ad absolutionem, cùm per Confessionem manifestatur. Sed quia prima sententia etiam est probabilis, ideò in praxi sequenda (a).

22. — Quæritur 13. Cùm quis statim post absolutionem confitetur peccatum oblitum, an teneatur iterùm dolorem elicere? Negant communiùs *Lugo*, *Anacl. Ronc. Viva*, *Spor.* etc. dicendo quòd prior contritio, cùm fuerit generalis, jam extenditur ad oblita, et eo casu sinè dubio moraliter perseverat, et licèt illa sint plura Sacramenta, benè tamen una et eadem materia plura Sacramenta constituere potest, sicut aqua potest esse materia plurimorum baptismorum. Sed affirmant *Vasq. Bonac.* et *Filliuc.* dicendo per absolutionem impertitam jam prius iudicium completum esse, ac completum fuisse Sacramentum; undè pro posteriori Sacramento requiritur nova materia; et licèt dolor perseveret, non tamen perseverat in ordine ad posteriorem absolutionem, juxtà quod dictum est præcedenti numero; ille enim dolor elicitus est tantùm in ordine ad primam. Et quia hæc secunda sententia est etiam probabilis, ideòque rectè dicunt *Croix*, et *Concina* hanc in praxi tenendam. Intelligitur tamen hoc antè Sacramenti susceptionem, quia postquàm illud susceptum est, probabiles jam sunt omnes sententiæ oppositæ trium quæditorum antecedentium; unde post factum rectè eas amplecti possumus (b).

---

(a) n. 467. — (b) num. 448.

23. — Quæritur 14. Quomodò eliciendus est dolor de venialibus? Extrà Confessionem docet *S. Thomas* (a): *Sufficit aliquis motus caritatis ad eorum remissionem*. Sed ad Pœnitentiæ Sacramenti susceptionem certum est apud omnes formalem dolorem requiri. Sed hìc dubitatur 1. An mortaliter peccet qui venialia sinè dolore confitetur? Negant *Gonet*, *Juven.* et *Natalis Alexand.*; dicunt hi, quòd quoties abest animus profanandi Sacramentum, illud frustrare in materiâ levi non excedere levem irreverentiam. Sed communiter et rectè affirmant alii DD. et de *Lugo* priorem sententiam appellat omninò falsam, dicens injuriæ gravitatem non consistere in materiâ, sed in Sacramenti frustratione, in non apponendo materiam aptam, et essentialem, ut est dolor; undè sive frustretur ob gravem materiam, sive ob levem, irreverentia semper est gravis (b). Dubitatur 2. An in Confessione venialium sufficiat pœnitere unius tantum, quin aliorum pœniteat? Nonnulli id negant, sed etiam communiter et rectè affirmant *Suar. Lug. Conc. Antoine*, etc. Et ratio luculenta est, quia venialia non sunt materia necessaria, sed sufficiens. Dicunt autem *Castrop. Spor. Lugo, Tamb.* etc. sufficere pœnitere multitudinis venialium, quia alicujus in particulari pœniteat; sed contradicunt *Arriaga*, et *Dicast.* dicentes saltem necessarium esse dolorem ergà aliquod illorum, ut diximus. Sed hæ sententiæ facilè conciliantur, quia impossibile est quòd ille, quem multitudinis pœnitet, non doleat de ultimis quæ multitudinem constituunt; et sicut quoad speciem sufficit (ut dictum est) dolere de unâ peccatorum venialium specie, et non de aliâ, ità quoad numerum sufficit posteriorum, non autem priorum pœnitere; adeò ut tunc pœnitens in recto doleat de multitudine, et in obliquo de ultimis peccatis (c).

---

(a) 3. p. q. 87. a. 2. — (b) l. 6. n. 448. — (c) *Ibid.* d. 2.

## PUNCTUM II.

## De Proposito.

*Propositum I. debet esse firmum. An qui credit se lapsurum etc.* 24. II. *Debet esse universale* 25. III. *Debet esse efficax. An relapsus sit signum semper Confessionum invaliditatis? Et an propositum debeat esse explicitum* 26.

24. — **T**RES sunt conditiones veri propositi ad Confessionem requisiti : ut sit Firmum, Universale, et Efficax. Et primò debet esse *Firmum*, ità ut pœnitens habeat firmum animum in quocumque casu non peccandi. Hic fit dubium, an valeat propositum alicujus qui non habet animum peccandi, sed credit certò quòd imposterum relapsurus sit? *Sanch.*, *Laym.*, *Nav.*, *Sporer*, etc. dicunt valere, quia propositum voluntatis benè stare potest cum judicio intellectus, quod prœvidet certum relapsum ex eo, quia de suâ fragilitate experimentum habet. Contrà *P. Conc.* reprobât ut infirmum etiam propositum illius, qui timet probabiliter se relapsurum. Hæc secunda opinio est nimis rigida, et parùm rationalis, quia timor relabendi potest simul stare cum proposito quàm firmissimo. Sed nec mihi placet prima, saltem practicè loquendo; nam, sicut rectè dicit *Croix*, et non distat ab eo *Busembaum*, in praxi qui certò credit se esse relapsurum, demonstrat suum propositum non esse satis firmum; dùm non est possibile, quòd qui scit Deum auxilium in eum speranti, et ab eo petenti præstaturum esse, et non permissurum aliquem ultrà vires tentari, proponat firmiter cuicumque malo potiùs se subiecturum quàm Deum offendere, et postea credat se certò in eadem peccata recasurum; undè si iste hoc credit, signum est, quòd ejus propositum non sit firmum (a).

---

(a) *Lib. 6. num. 451.*

25. — II. *Propositum debet esse Universale* (intellige de mortalibus), ut docent omnes cum *S. Thomā (a)*; nec audiendi sunt nonnulli AA. qui autumant, sicut valet dolor particularis, ita valere etiam propositum particulare; nam respondetur quòd dolor particularis admittitur, quia dolor respicit sola peccata commissa; sed non potest admitti propositum particulare, dum quilibet debet esse paratus ad evitanda omnia peccata mortalia, quæ committere potest; idèdque Trident. loquendo de dolore ait: *Dolor est detestatio de peccato commisso*; sed loquendo de proposito, dicit, *cum proposito non peccandi de cætero*. Dictum est *de peccatis mortalibus*, quia quoad venialia, certum est cum *S. Thomā (b)* sufficere, si proponat se abstinere ab aliquo, quin proponat abstinere à cæteris (c). Cæterum (ut dicunt *Suæ. Croix*, etc.) potest homo proponere evitare omnia peccata venialia deliberata, et in quantum ad indeliberata sufficit proponere evitare ea quantum fert humana fragilitas, ut dicit idem Angelicus loc. cit.

26. — III. *Debet esse Efficax*, nempe, ut homo proponat non solum non committere peccata, sed etiam omnia media ad illa evitanda conducentia eligere, et præcipuè omnes occasiones proximas remove. Sed hic advertendum (quicquid dicat *P. Concina*) relapsus non semper esse signa infirmi propositi, adeò ut semper repetendæ sint Confessiones præteritæ, ut invalidæ; quia relapsus non est signum certum quòd defuit voluntas, sed sæpè est signum mutatæ voluntatis, dum sæpè solent homines firmiter proponere, et postea iterum cadere; idèdque ait Rit. Rom. *In peccata faciliè recidentibus utilissimum fuerit consulere. ut sæpè confiteantur; et si expediât, communicent*, Non dicit, ut faciliè recidentibus absolutio danda non sit, propter dubium quod subest de eorum proposito, sed ut consulendum sit potiùs eis, ut sæpè confiteantur, et communicent: intelligitur, semper ac dignoscitur

---

(\*) p. 3. q. 87. a. 1. ad 1. — (l.) *Ibid.* — (c) lib. 6. n. 451. v. II. *Requir.*

128 *Tract. 16. De Pœnitentiæ Sacramento.*

adesse debita dispositio, ut dicemus *Tom. III. Tr. ult. Punct. II.* Et quoad repetendas Confessiones præteritas, rectè dicit *P. Segneri*, talem obligationem non adesse, nisi habeatur moralis certitudo de invaliditate Confessionum præteritarum, ut esset, cum observatur quòd aliquis post Confessiones semper reincidit in eadem peccata statim post bidduum, aut triduum, sinè ulla resistantiâ, et quin aliquod medium adhibuerit, et quin occasionem removerit. Hic occurreret loqui de illis qui sunt in occasione proximâ, et de Habituatis, et Recidivis, sed de his peculiaribus *Punct. I. et II. Tract. ult.* loquemur. Restat tantum hîc ut videamus, an pro Confessione sufficiat propositum virtuale in dolore inclusum? Hîc tres adsunt sententiæ. Sententia 1. negat cum *Scoto*, *Cano*, *Cajet. Tol. Conc.* etc. qui id inferunt ex *Trid. sess. 14. c. 4.* ubi videtur requiri propositum formale, cum dicatur quòd pars essentialis Pœnitentiæ sit dolor *cum proposito non peccandi de cætero*. Sententia 2. quam tenent *Laym. Nav. Card.*, quam moraliter certam appellat *Lugo*, etc. affirmat, quoties dolor sit ex motivo universalî; et etiam hæc fundatur in Concil. ubi dicitur quòd attritio, si excludat voluntatem peccandi, jam disponit ad gratiam. Et huic sententiæ adhæsit in Concil. Rom. Bened. XIII. in quo approbavit Instructionem ad populum, in quâ (*pag. 440.*) dicitur, quòd qui saltem non habet attritionem cum firmo proposito, saltem implicito, amplius non peccandi, remissionem non obtinet. Sententia 3. cum *Suar. Bellarmino*, *Bon. et Holzm.* qui eam vocat communem, distinguit, et dicit, quòd si pœnitens nihil cogitat de futuro, ut contingere solet infirmis proximis morti, tunc sufficit propositum implicitum. Secus autem dicendum de eo qui cogitat de futuro, quia (ut dicit idem Concilium) contritio continet tam cessationem à peccando, quam incœptionem novæ vitæ, juxta illud Ezechielis: *Projicite à vobis iniquitates... et facite vobis cor novum. Ezech. 18.* Cæterum, quia prima sententia est satis probabilis, antè factum illa sequenda est, sed post factum, si quis bonâ fide confessus est cum proposito

implicito, non tenetur repetere Confessiones, ut dicunt *Bellarmin. Suar. Vasq. Bonac.* et alii communiter; dùm qui probabiliter recepit Sacramentum validum, non est obligatus ad illud repetendum; nam tunc cessat periculum injuriæ Sacramenti, illud frustrandi (a).

## CAPUT III.

### De Confessione.

#### PUNCTUM I.

##### De conditionibus Confessionis.

*Confessio I. debet esse Vocalis. II. debet esse Secreta 27. III. Debet esse Vera. Qui mentitur in Confessione 28. IV. Debet esse Integra. De circumstantiis aggravantibus 29. De peccatis dubiis 30. 31. et 32. De peccatis dubiè confessis 33. Qui confessus est peccatum dubium, cùm novit esse certum etc. 34. Quando excuset impotentia physica mutos, surdos, ignorantes linguam, et moribundos 35. De moribundo qui dedit signa per testes 36. De iis qui nullum dant signum 37. De iis qui in actuali peccato corripuntur 38. Quando excuset impotentia moralis 39. Qui debet complicem aperire etc. 40. Non potest Confessarius inquirere nomen complicitis 41.*

27. — **Q**UATUOR sunt Confessionis conditiones: Nempe, ut sit Vocalis, Secreta, Vera, et Integra. Et primò debet esse *Vocalis*, nempe voce, dùm hic est usus communis Ecclesiæ, non jam facta per signa aut scripto; habetur ex *Extrav. Inter cunctos de Privil.* ubi dicitur: *Nisi articulus necessitatis occurrat, sanctificanda est oris confessio*: modò

---

(a) *Lib. 6. n. 450.*

130 *Tract. 16. De Pœnitentiæ Sacramento.*

nulla adsit gravis causa, v. g. nimix et extraordinariæ verecundiæ, aut linguæ impedimenti, et hujusmodi; quia in tali casu sufficit, postquam Confessarius Confessionem legerit, quod dicat pœnitens: *Me accuso de omnibus istis peccatis*; ita communiter *Castr. Cano, Conc. Tamb. Salm.* etc. (a). Qui autem non posset voce confiteri, tenetur saltem per signa aut scripto, cum sinè periculo, et sinè magno incommodo id efficere potest, prout dicemus loquendo de Muto n. 35. (b). II. Debet esse *Secreta*, quia nemo tenetur publicè, nec per interpretem confiteri, nisi esset in mortis periculo constitutus, aut existens in mortali dubitaret de contritione suâ, ut dicemus cit. num. 35.

28. — III. Debet esse *Vera*, undè graviter peccat sacrilegii qui mentitur in materiâ gravi negando aut tacendo sinè justâ causâ aliquod peccatum grave patratum, aut non adhuc confessum; et aliquandò pœnitens tenetur aperire peccata confessa ad manifestandum habitum contractum (contrà id quod dicebat Prop. 58. ex proscriptis ab Innoc. XI.), ut Confessarius posset se dirigere ad impertiendam, aut differendam absolutionem. Ità etiam peccat qui ex malitiâ se accusat de aliquo peccato gravi, quod non commisit; imò iste duo committit peccata, unum contrà virtutem Religionis, propter injuriam quæ in Sacramentum infertur, alterum contrà virtutem veracitatis, cum tale mendacium sit graviter ipsimet nocivum. Dictum est *in materiâ gravi*, quia negare in Confessione aliquod veniale commissum, aut mortale jam confessum, aut dicere aliud mendacium leve, communis est sententia cum *Suar. Lugo, Bon. Ron. Anacl. Holzm.* etc. (contrà *Cajet. et Armilla*) non esse grave. Nec obstat id quod dicit *S. Thomas* (c), peccare mortaliter qui negat veritatem quam confiteri debet; quia ibi loquitur Sanctus de Confessione, quæ fieri debet in foro externo, non autem de Sacramentali, ubi certum est non teneri nos ad confitendas nec culpas

---

(a) *Lib. 6. n. 429.* — (b) *num. 479.* — (c) *2. 2. q. 69. a. 1.*



veniales, nec graves jam confessas, nisi cùm hoc expediret ad recipiendam absolutionem (a).

29. — IV. Confessio debet esse *Integra*. Et hìc distinguenda est integritas materialis à formali. Per se loquendo Confessio debet esse materialiter integra, nam pœnitens tenetur ad explicandas tàm species peccatorum, quàm eorum numerum. Jam *Tom. I. Tr. III. Punct. III.* locuti fuimus de distinctione specificâ, et numericâ peccatorum, et ex quibus radicibus desumenda sit. Sed hìc quæritur, an teneamur confiteri non solùm circumstantias speciem mutant, an etiam notabiliter aggravantes? Tres adsunt sententiæ probabiles. Prima affirmat cum *Soto, Suar. Gonet, Sanchez, Concina*, etc. dicentes eandem rationem, quæ obligat ad explicandas circumstantias mutant speciem, obligare etiam ad aggravantes, dùm utræque mutant notabiliter Confessarii iudicium. Secunda sententia, quam tenent *Layman, Sporer, Busemb.* etc. etiam affirmat, sed tantùm de illis circumstantiis quæ respiciunt integritatem substantialem peccati, ut est quantitas furti, et gradus conjunctionis in incestu; secùs (ut dicunt) Confessarius debitum iudicium substantiæ peccati formare non potest. Tertia sententia communior et probabilior, quàm tenent *S. Antoninus, S. Bonaventura, S. Bernard. Sotus, Cabass. Lugo, Castrop. Bonac. Ronc. Holz. Salm.* et alii, absolutè id negant; et hanc sententiam tenet *S. Thomas (b)*, qui dicit: *Alii verò dicunt quòd non sint de necessitate confitendæ, nisi circumstantiæ quæ ad aliud genus peccati trahunt, et hoc probabilius est*: et in responso ad 2. subiungit: *Undè sufficit quòd (Sacerdos) cognoscat quantitatem quæ ex specie peccati consurgit.* Ratio est 1. quia Tridentinum *sess. 14. cap. 5.* non imponit, ut confiteantur nisi solas circumstantias, quæ mutant speciem, dicens quòd sinè earum notitiâ non potest Confessarius rectè iudicare; ergo

---

(a) *L. 6. num. 413. ad 497.* — (b) *In 4. dist. 16. q. 3. a. 2. q. 5.*

è converso, juxtà Concil. cùm explicantur illæ, Confessarius jam rectè iudicium ferre potest. 2. Quia obligatio confitendi circumstantias aggravantes esset pœnitentibus nimix angustix, cùm possint ipsi dubitare, an circumstantiæ omissæ, essent leves, aut notabiliter aggravantes, et an sint sufficienter expressæ. 3. Quia (et hæc est ratio potissima aliarum) talis lex confitendi circumstantias aggravantes, uti dicunt *Cabassut. Lugo, Roncagl. et Salmantic.* cum *Lambert. (a)*, est dubia, et nemo tenetur ad leges dubias, uti ostensum est in *Tom. I. Tr. I. n. 33.* cum *S. Thomâ (b)*, qui dicit: *Nullus ligatur per præceptum, nisi mediante scientiâ illius præcepti.* Nec obstat hîc dicere, quòd in Sacramentorum materiâ non possimus sequi opinionones solùm probabiles, quia hoc procedit cùm agitur de valore Sacramenti, secùs de integritate: Et in quantum ad valorem, certum est sufficere integritatem formalem. Nihilominùs rectè advertunt *Lugo, Castropal. Salmantic.* etc., quòd in quantum ad furtum, licèt pœnitens per se non teneatur ad explicandam quantitatem, plerumque tamen tenetur Confessarius ad eam investigandam, ut se dirigat ad absolutionem impertiendam, et circà quantitatem, et modum restitutionis (c).

30. — Præterea quæritur, an adsit obligatio confitendi mortalia dubia? Sed hîc quæsitâ distinguenda sunt; hinc quæritur 1. An confitenda sint peccata positivè dubia, nempè cùm probabile est ea commissâ fuisse, et probabile non fuisse? In eo casu affirmant *Merbes. Habert, et Con.*, quia, ut hi Auctores dicunt, *in dubiis via tutior est eligenda.* Sed communiter id negant *Sylvester, Sylvius, Gerson, Sanch. Suar. Bonac. Anacl. Ronc. Salmant. Holzm.* et alii plurimi, propter generalem rationem, quòd licèt sequi possumus opinionones verè probabiles, ut ostensum est *Tom. I. Tract. I. ex n. 33.* Et ad regulam oppositam respondetur cum *S. Antonino*, ut ibidem *num. 36.* Rectè tamen advertunt

(a) *Notif. 80. n. 19.* — (b) *De veritate Quodlib. 14. q. 17. a. 5.*

— (c) *Vide lib. 6. n. 468.*

*Sanch. Viva, Holzm.* etc. quòd in mortis articulo in tali dubio quilibet aut debet contritionem elicere, aut recipere absolutionem confitendo saltem aliam materiam certam (1).

31. — Quæritur 2. An confitenda sint peccata negativè dubia, nempè quorum nulla apparet ratio affirmandi, vel negandi? Affirmant cum communiori *Busemb. Dian. Tambur.* etc. dicendo Trident *sess. 14. cap. 5.* præcipere poenitentibus Confessionem omnium mortalium, *quorum conscientiam habent*: ergò (dicunt) utique confitenda sunt peccata dubia, quæ dubia sunt in conscientia. Sed negant probabilius *Merbes. Habert, Coninch. March. Holzm. Croix, Mazzot.* etc., et hanc sententiam probabilem vocant *Layman*, et *Viva* cum *S. Antonino, Ledesm. Paludano*, etc. Ratio 1. est quia Concilium non jam imponit, ut supponunt adversarii, Confessionem peccatorum, ut sunt in conscientia, sed peccatorum, *quorum* (poenitentes) *conscientiam habent*, dicere intendit eorum quorum poenitentes certam habent scientiam, cum *conscientiam* (sicut explicat *S. Bernard.*) significat cordis scientiam; unde perperam dicitur quis habere conscientiam illius peccati, cujus nullam habet rationem illud commisisse. Tantò magis, quòd Trident. loco cit. subjungit: *Nihil aliud in Ecclesia à Poenitentibus exigi, quàm ut... quisque... ea peccata confiteatur, quibus se Dominum Deum suum moraliter offendisse meminerit*; qui negativè dubitat, non potest dici quòd recordetur commisisse peccatum. Ratio 2. est quia (sicut superius diximus) non debet onus certum pro lege dubia imponi; contrà nulla adest lex certa confitendi peccata dubia (b). Et hoc currit, etiamsi quis vellet communicare, ut diximus *Tract. XV. n. 34.* quicquid dictum sit in Opere (c).

32. — Ceterum regulariter loquendo, consultius est poenitentibus suadere, ut peccata dubia confiteantur, ad majorem suæ conscientiae quietem, modò

---

(a) *Lib. 6. n. 437.* — (b) *n. 474. dub. 2.* — (c) *n. 475.*

non sint scrupulosi, ut diximus *Tom. I. Tract. I. n. 11*. Insuper sapienter dicunt *Salm. Scholastici*, *Habert*, *Bonac.*, *Suar. Croix*, et alii, quòd personæ probatæ pietatis, quæ diutius nunquàm, aut valdè rarius mortali alicui assentitæ sunt, istæ cùm dubitant de consensu, præcipuè si recordantur in principio restitisse, aut dubitant, si fuerint in perfectâ vigiliâ, possunt certò sibi statuere mortaliter non peccasse; cùm (sicut dicunt *Salm. et Habert*) moraliter impossibile est, quòd voluntas in bono proposito ità obfirmata, mutetur, quin clarè hoc percipiat. Dicit *P. Alvariz*, quòd peccatum mortale est monstrum ità horribile, ut in animam, quæ ab eo per multum temporis abhorruit, se introducendo, non potest se in eam introducere, quin anima dilucide illud cognoscat; sicut contrà, loquendo de iis qui ex habitu mortalibus consentiunt, in dubio præsumuntur illi consensisse, quia si restitissent, utique de conatu in tentatione repellendâ adhibito recordarentur: undè rectè concludit *Croix*, quòd in tali materiâ difficulter datur dubium negativum, dùm præsumptio bonæ aut malæ vitæ rectè fundat credulitatem dissensûs, aut consensûs præstiti (a).

33. — Quæritur 3. An pœnitens teneatur confiteri peccatum certè commissum; sed in dubio, an de illo nec ne confessus sit? Si dubium est negativum, certum est apud omnes eum teneri. Contrà si dubium est positivum, adeò ut probabiliter credat de eo confessum esse, adest sententia non teneri ad illud confitendum; et hanc tuentur *Suar. Navar. Sylvest. Bonac. Lugo, Salm. Croix* etc. Verùm sicut mihi probabilis minimè visa fuit opinio relata *Tom. I. Tract. I. n. 17. in fin.* eorum Auctorum, qui dicebant non esse obligationem implendi vota, quæ probabiliter impleta sunt, ità nec valeo hanc approbare sententiam quoad peccatum probabiliter confessum, cùm obligatio Confessionis sit certa, et satisfactio dubia. Non autem reprobò id quod iidem citati Auctores tradunt,

---

(a) num. 460. et 476. v. *Item*.

nempè quòd ille qui diligens fuit in suis peccatis confitendis, si postea dubitat, an aliquod peccatum omiserit, postquam multum elapsus sit tempus à quo illud patravit, non tenetur ad confitendum, cum possit credere eo casu moraliter certè jam de illo confessum fuisse. Et subjungit *P. Concina*, quòd illi qui diutius vitam rectam duxerunt, licèt antea in vitiis habituati fuerint, si postea ipsi dubitant aliquod peccatum aut circumstantiam omisisse in Confessione generali, aut particulari; debità diligentia præcedente, Confessarius debet imponere, ut amplius de illis non confiteantur, et ut nunquam ad illa animum addicant. Et loquendo de scrupulosis (ut dicunt communiter DD.), hi non tenentur aliquod peccatum confiteri, nisi certi ita sint, ut juramento possint affirmare illud peccatum fuisse mortale, et quod nunquam confessi sunt (a); vide dicta *Tom. I. Tract. I. n. 10*

34. — Quæritur 4. An qui confessus est peccatum uti dubium, teneatur iterum confiteri, cum advertit illud certum? Negant *Holz. Spor. Tamb. Elbel* etc., quia illud peccatum (ut dicunt) est jam directè absolutum. Sed vera, et communissima sententia *Sanch. Card. Ronc. Busemb. Viva, Diana*, etc. affirmat, quia licèt peccatum fuerit directè absolutum, non tamen fuit sicut erat in conscientia explicatum, cum commissum fuit, et sicut est in præsentì juxta suam cognitam gravitatem, et juxta Confessionem à Trident. præceptam. Opponunt: Ergò si quis confitetur commisisse decem peccata circiter, et postea recordatur certò fuisse undecim, hic teneretur ad repetendam Confessionem. Sed respondetur, quòd in illo circiter jam includitur numerus undecimus: contra in dubià accusatione non includitur certa: Nec dubia potest unquam pro certà sumi. Ceterum probabiliter dicunt *Coninch. Suar. Sanch. Salmant.* etc. quòd si quis confitetur peccatum quod ille, nec Confessarius ut grave cognoscit, non tenebitur postea illud repetere, cum cognoscet certo illud esse grave in suo

---

(a) Num. 4-8.

genere , quia in tali casu pœnitens exponit peccatum ut est in conscientia (a).

35. — Hactenus de integritate materiali; sed aliquando in Confessione sufficit integritas formalis, nempe quod pœnitens confiteatur juxta quod nunc moraliter potest, remanente ceteroquin sibi obligatione faciendi postea Confessionem materialiter integram; cum impedimentum fuerit remotum, et urgeat præceptum iterum confitendi. Itaque excusat ab integritate materiali impotentia tam physica quam moralis. Et primò ob impotentiam physicam excusantur 1. Muti, quibus tam in morte, quam in Præcepto Paschali sufficit signis, modo quo possunt, explicare unum peccatum dumtaxat (b). An autem muti scribere scientes teneantur confiteri sua peccata scribendo; negant *Castrop. Cajet. Nav. Valent.* et alii, dicendo quod talis modus est periculo manifestationis obnoxius. Sed communiter, et probabiliter affirmant *Lugo, Bonac. Anaclel. Croix, Salm.* etc. cum *S. Thomâ* (c); dum qui tenetur ad finem, tenetur etiam ad media. Intellegitur modò hæc media non sint notabiliter difficilia; quapropter non tenetur mutus ad scribendam Confessionem, cum extraordinario incommodo, aut periculo esset illi, ut peccata sua ab aliis cognoscantur (d). 2. Surdi, qui confessarii interrogationibus respondere nequeunt, nec uti deberent, peccata sua explicare sciunt: Intellegitur hoc de omninò surdis, quia surdastri debent adduci in aliquem remotum locum, ut eorum Confessiones audiantur. 3. Illi qui linguam patriam ignorant. Isti tempore Præcepti, aut alterius necessitatis possunt absolvi manifestando tantum signis peccatorum suorum dolorem; nec tenentur per interpretem confiteri, ut dicunt *Suar. Vasquez, Lugo*, etc. An autem teneantur confiteri sic in morte. Alii affirmant, sed alii, ut *Sot. Cajet. Castr. Salm. Viva*, etc. probabiliter negant, nisi esset quoddam dubitent de contritione sua; quia tunc tenentur ad

---

(a) *Lib. 6. num. 478.* — (b) *num. 479.* — (c) *in 4. dist. 17. q. 3. art. 4. q. 3. ad 2.* — (d) *lib. 6. n. 479. v. Quar.*

confitendum cum solâ attritione quam haberent, ut per Sacramentum gratiam perciperent; sed tunc sufficiet ipsis, ut Confessario per interpretem aliquod veniale manifestent (a): 4. Moribundi; sed hîc multa secernenda sunt. Si moribundus suî compos est, sed nequit loqui, quoties ipse pœnitentiæ dat signa, aut ostendit velle absolutionem, benè potest absolvi, et quoties repetit signa, quia tunc jam adest Confessio in illâ expostulatione quam facit de absolutione, aut in illo signo quod dat doloris sui, quo jam confitetur se esse peccatorem; undè tunc directè absolutionem recipit super peccatis omnibus sub genericâ peccati ratione, licèt ipse teneatur, cùm poterit, ad ea in particulari explicanda, ut Confessionem materialiter integram faciat (b).

36. — Sed hîc quæritur 1. An possit absolvi moribundus sensibus destitutus, cùm adstantes testificantur illum confessionem petivisse, aut pœnitentiæ signa dedisse? Negant *Cano*, *Ledesm. Alvar.* etc. Sed est communis sententia opposita, quæ tenenda est, quia tunc per testes satis sensibilibiter Confessario fit nota infirmi Confessio; ita docent *Bellarmin. Sotus, Suar. Lugo, Conc. Salm.* etc. cum *S. Thomâ* (c), qui dicit: *Si infirmus qui petit Unctionem, amisit notitiam, vel loquelam, ungat eum Sacerdos; quia in tali casu debet etiam baptizari, et à peccatis absolvi.* Et hoc currit, ut dicit *S. Antoninus*, relatus in Sacerdotali Romano apud *Lugo*, etiamsi infirmus diutius fuerit habituatus in peccatis, et confessus non sit. Hoc probatur ex Concil. Arausicano in *Can. Qui recedunt*, 26. q. 6. et ex Concil. III. IV. Carthaginensibus, et à *S. Leone Papâ* in *Can. 15. Qui 26. qu. 6.* et deniquè ex *Ritual. Rom. (de Sacrament. Pœnitent. §. Ordin. min.)* ubi dicitur: *Etiamsi confitendi desiderium sive per se, sive per alios ostenderit, absolvendus est.* Et hæc sententia habet locum, ut probabili-

---

(a) *Ibid. ad II. et III.* — (b) *num. 480.* — (c) *Opusc. 6. de Sacrd Unct.*

ter dicunt *Lugo*, *Dicast.* et *Croix*, licèt unus tantum testis adsit, et etiamsi sit mediatum, qui testetur signa à moribundo data. Nec obstat Decretum Clementis VIII. quo proscripta fuit Confessio facta in absentia Confessarii, dum (ut testantur *Bellarmin.* *Suar.* et *Petrus Lombardo*) idem Pontifex declaravit non intellexisse comprehendere moribundos, imò expressè dixit hos in nostro casu debere omninò absolvi (a). An autem talis absolutio debeat absolutè dari; sententia communior affirmat, dicendo, quòd in tali necessitate Sacramenta debent absolutè conferri, quoties de materiæ valore probabilitas habetur: sub conditione autem quoties prudens tantum dubium habetur: Sed *Suar.* *S.* *Anton.* *Bon.* *Wigandt.* et *Croix* tenent dandam esse in nostro casu sub conditione; et hæc opinio mihi videtur tuta, præcipuè cum dubitatur (prout facillè dubitari potest in rudibus) an pœnitens nec ne ritè actum doloris elicerit (b).

37. — Quæritur 2. An possit absolvi sub conditione moribundus sensibus destitutus, qui nulla dat, nec dedit, pœnitentiæ signa. Multi negant, ut *Lugo*, *Busemb.* *Petrocor.* *Abel.* *Laym.* *Roncag.* etc. quia tunc, ut dicunt, deest materia sensibilis Sacramenti, sed communius et probabilius affirmant *Merbesius*, *Molin.* *Carden.* *Poncius*, *Salmeron.* *Juvenin.* *Conc.* et *Croix*, et clarè id docet etiam *S. Augustinus* (c), qui dicit: *Quæ autem Baptismatis, eadem reconciliationis est causa, si fortè pœnitentes finiendæ vitæ periculum præoccupaverit; nec ipsos enim ex hac vitâ sinè arrhâ suæ pacis exire velle debet Mater Ecclesia* (d). Opponitur: Sed in tali casu ubinam est materia sensibilis Sacramenti? Respondent *Gonet.* et *Juvenin*; sed eorum responsiones parùm satisfaciunt, ut videre est in Opere. Melius respondent *Molfes.* *Aver.* *Salm.* *Viva*, et alii, quòd in tali casu jam prudens dubium habetur, quòd moribundus antequàm sensibus destitueretur, aut in aliquâ intervalli luce, suæ damnationis periculum agnoscens, velit, ac etiam petat

---

(a) *Lib. 6. num. 481.* — (b) *Lib. 6. n. 581. v. Utrum.* — (c) *l. 1. de Adult. c. 2.* — (d) *l. 6. n. 482.*



absolutionem signis sensibilibus, v. g. suspiriis, oculorum, aut oris motibus, aut saltem respiratione anxîâ quam ostendit, licèt hujusmodi signa non possint perspicuè percipi, sed ipsa aut eorum dubium jam sufficiunt ad dandam absolutionem sub conditione; in casu enim necessitatis urgentis benè licet uti materiâ etiam dubiâ : quod utique principium certum est apud Theologos, ut testatur *Juven.* Imò possumus uti tunc opinionibus etiam tenuiter probabilibus, sicut communiter docent *Sot. Navar. Carden. Sanch. Viva, Gobat. Croix*, etc. quîa necessitas efficit, ut in quocumque dubio licèt ministretur Sacramentum sub conditione, dùm per conditionem jam reparatur Sacramenti injuria, et eodem tempore prospicitur proximi saluti. Et hic præterea advertendum est cum *Suar. Vasq. Viva, Mazzot.* et aliis communiter, quòd Sacerdotes (cùm possunt) tenentur sub gravi absolvere infirmos, ut deducitur ex *Can. Si Presbyter*, 26. q. 6. ubi Julius Papa dicit : *Si Presbyter Pœnitentiam morientibus abnegaverit, reus erit animarum.* Contrà etiam advertit *Ronc.*, loquendo generaliter de moribundis, quòd non debet intrà breve temporis spatium sæpiùs replicari absolutio, nisi novum, et certum doloris signum habeatur, quàm bis aut ter intrà aliquam proportionatam distantiam, quîa reverà tunc cessat necessitas. Non negatur tamen quòd si sensuum destitutio diutiùs perseverat, cùm actuale mortis periculum adsit, potest pluries repeti absolutio, verb. grat. ter aut quater in die (a).

28. — Quæritur 3. An possit dari absolutio conditionata peccatori, qui sensibus destituitur in actu peccatî, v. g. in adulterio, vel duello? Negant *Habert, Gonet, Juvenin, et Conc.*; sed affirmant *Pontius, Carden. Holzm. Stoz. Gormaz.* et alii. Dicunt hi quòd semper ac constet hujusmodi peccatorem fuisse Catholicum, debere absolvi sub conditione in mortis momento; et rectè dicunt *Merbes. et Dupasquier*, quòd possumus hâc uti opinione, potissimùm ob S. Augustini auctoritatem (b). dicentis :

---

(a) *Lib. 6. n. 482. v. sed dices.* — (b) *de Adult. c. 28.*

*Qui... retinent adulterina consortia si desperati, et intra se pœnites jacuerint, nec pro se respondere poterint, baptizandos puto. Quis enim novit, utrum fortassis adulterinæ carnis illecebris usque ad Baptismum statuerint retineri? Quæ autem Baptismatis, eadem Reconciliationis est causa, si forlè pœnitentem finiendæ vitæ periculum præoccupaverit. Et dicendo Sanctus, Quis enim novit utrum etc. supponit certò tales peccatores nullum certum suæ conversionis signum præstitisse. Hanc sententiam puto sufficienter probabilem ratione eadem superiori quæsito adductâ, quia de quolibet catholico prudens potest esse præsumptio, quòd si unquam ille aliquo usûs rationis intervallo donetur, optet modo meliori quo potest, damnationem suam aufugere. Dictum est *catholico*, dùm (ut benè notat *Holzm.*) hæreticus moribundus, licet det signa pœnitentiæ, non potest absolvi, nisi expressè absolutionem petat; nam aliàs non potest prudenter præsumi ea signa dare in ordinem ad Confessionem, à quâ Hæretici vehementer abhorrent (1).*

39. — Secundo loco ob impotentiam *moralem* excusatur pœnitens ab integritate materiali, et ei sufficiet formalis in pluribus casibus: 1. Si est scrupulosus et jugiter præteritarum Confessionum timore vexatur, ut docent communiter *Laym. Illung, Elbel, et Holzm.* 2. Si infirmus confesso uno, vel altero peccato deficeret, aut in periculo deficiendi esset. 3. Si dùm affertur Viaticum Confessarius adverteret Confessiones præteritas fuisse nullas, et infirmus non posset tunc integrè confiteri, nisi cum periculo sinè absolutione decedendi, aut scandali, ut superiori *Tract. XV. n. 24.* dictum est. Et idem dicit probabiliter *Ronc.* cùm urgens esset necessitas celebrandi, aut communicandi, et tempus finiendæ Confessionis non suppeteret. Idem currit pro Sacerdote habente reservatum, et in celebrandi necessitate constituto, si non adesset Confessarius facultate præditus, ut in antecedenti *Tract. n. 27.* diximus. 4. Si Sacerdos esset in mortis periculo antequàm absolutionem im-

---

(a) *Lib. 6. n. 483.*

pertiatur. 5. Cùm grave adest periculum infectionis, quia tunc Confessarius potest absolvere poenitentem infectum, audito uno tantùm peccato; *Conc. Wiggandt, Bonac. Elbel, et alii.* Sed si Confessarius vellet audire totam Confessionem, tenetur infirmus integrè confiteri (a). 6. Si imminet naufragium, aut prælium: quia sufficit cuique tantùm veniale confiteri, aut se peccatorem esse in generali; et potest tunc Sacerdos absolvere omnes in generali, dicendo *Ego vos absolvo* etc. præcisus poenitentium concursus, alià non interveniente causâ, non est ratio sufficiens ad dimidiandam Confessionem, ut ex Prop. 59. damn. ab Innoc. XI. (b). 7. Si ex Confessione alicujus peccati prudenter poenitens posset timere grave damnum spirituale, aut temporale, proprium aut alienum, v. g. revelationis, scandali sui, aut Confessarii, mortis, aut infamiæ. Sed intelligitur cùm urget necessitas confitendi ob mortis periculum, aut satisfaciendi Communioni Paschali. Aut (dicunt *Lugo, Henriq. etc.*) si poenitens esset in mortali, et cæteroquin ei expectandum esset biduum, aut triduum, ut confiteretur; imò etiamsi unum diem, sicut dicunt *Suar. et Escob.* (licet in alià re) ut dicetur in *Append. III. Exam. Ordinan.* 8. Deniquè si non posset peccatum confiteri quin sigillum Sacramentale revelet (c).

40. — Tenent autem nonnulli DD. ut *Navar. Innoc. Hostiensis* etc. quòd poenitens debeat peccatum suum reticere, si non potest illud confiteri quin complicem manifestet Confessario; nam (ut dicunt) præceptum naturale proximi famam servandi præferendum est præcepto positivo integritatis Confessionis. Sed hoc negatur cum communi sententiâ *S. Bonaventuræ, S. Antonin. Gonet, Conc. Suar. etc.* cum *S. Thomâ* (d) qui dicit: *Si speciem peccati exprimere non possit, nisi exprimendo personam cum quâ peccavit, necesse est, ut exprimat.* Et idem dicit *S. Bernard.* (*de Formâ bon. vitæ*). Ratio est, quia

---

(a) *Lib. 6. n. 484. et 485.* — (b) *n. 486.* — (c) *n. 487. et 488.* — (d) *Opusc. 12, q. 7.*

ex unâ parte integritas Confessionis, quoties potest, servanda est : contrâ ( ut dicit *S. Thomas* ) manifestare alterius peccatum vacat culpâ, cûm justa intercedit causa : ultrâ quam quoddam complex peccatum amisit jus ad famam, in quantum ad Confessionem, quam illius peccati facere debet. Hoc tamen intelligendum, cûm confitendum est mortale ; nam ut confiteatur veniale, aut mortale jam confessum, non licet alterius grave peccatum patefacere, ut dicunt *Lug. Ronc. Viva, et Tamb.* contrâ *Renzi* (a). Et etiam in primo casu quo mortale non adhuc est confessum, tenetur pœnitens alium inquirere Confessarium, cui complex est ignotus ; modò (excipiunt DD.) ad hoc faciendum ei incommodum spirituale, aut temporale patiendum non sit, ut esset 1. Si jam suum declarasset peccatum Confessario, cui notus esset complex, ac propterea obligaretur bis ad confitendam culpam suam. 2. Si esset in celebrandi, aut communicandi necessitate. Si ad perquirendum alium Confessarium longè ei proficiscendum esset, aut ne Indulgentias amitteret ; aut si ei gravi esset incommodo conscientiam suam alii quàm Confessario ordinario manifestare ; aut si omittenda esset consuetudo Communio ; et tantò magis, si ceteroquin ei biduum ( ut dicunt *Lugo Viva, et Renzi* ) in mortali perseverandum esset. *Henriq.* putat diuturnam esse bidui dilationem. Imò *Antoine* absolutè dicit excusare ab obligatione perquirendi alium Confessarium unius diei dilationem. Præterea sæpè excusantur matres, et uxores in referendis apud Confessarium filiorum et virorum peccatis ; dùm hoc ei confert ad sedandum dolorem, aut ad consilium melius capiendum de modo quo se gerere debeant. Insuper Auctores excusant pœnitentem, si judicaret illum Confessarium doctiorem, aut saltem suæ conscientiæ magis conscium, adeò ut melius posset illum dirigere, et animæ suæ paci consulere ; tantò magis, quod multi DD. graves, ut dictum est *Tom. I. Tr. XI. n. 11.* tenent, non esse culpam gravem etiam sinè causa uni vel alteri viro prudenti Proximi delictum

---

(a) *Lib. 6. n. 1489.*

manifestare (a); sed hæc esset causa cur etiam à veniali excusaretur.

41. — Advertendum hic deniquè, quòd licèt pœnitens posset in casibus præfatis licitè complicem detegere Confessario, nihilominùs non licet Confessario à pœnitente complicitis nomen exquirere, licèt hoc bono fine efficeret, ut eum corrigit, aut damnum impediât; dùm Benedict. XIV. in Bullâ *Ubi primum* hoc appellat detestabile: et detestabilius, si Confessarium absolutionem negaret ei\* qui complicem manifestare recusaret. Hinc Pontifex declarat, hoc esse peccatum mortale, et imponit hujusmodi Confessario suspensionem (sed ferendæ sententiæ) ab audientis Confessionibus; et excommunicationem Papalem ipso facto in præsumentes docere oppositum; et insuper aliis (non autem pœnitentibus), qui scirent aliquem Confessarium propter hoc absolutionem denegasse imponit denunciationis obligationem, modò ille ex simplicitate hoc non effecerit. Rectè tamen dicit *P. Concina*, non intelligi per hoc vetitum fuisse Confessario circumstantias ad Confessionis integritatem necessarias exquirere, prout sunt illæ quæ mutant speciem, aut expediât eas scire ad pœnitentis directionem; quare benè potest Confessarius interrogare de conjunctionis gradu, si complex sit in peccato turpi, an sit ligatus voto castitatis, an sit famula, si in eâdem domo commoretur. (b) Prætereà dicit *P. Mazzotta*, quòd si à complice gravia timerentur damna, quæ solus Confessarius avertere posset, tunc complex manifestandus est. Addit Auctor Commentarii in *Antoine*, non potest absolvi pœnitens, qui nollet complicem patefacere, cùm hoc est necessarium ad publicum damnum reparandum. Ego tamen dico, quòd in tali casu nunquàm licet Confessario, stante præfatâ Pontificis prohibitionem, interrogare de complicitis nomine; tantum poterit ille tunc obligare pœnitentem in generali, ut revelet complicem alicui qui malum impedire potest; sed si pœnitens sponte suâ Confessarium rogaret, ut ipse sibi susciperet hæc partes, et ex se revelaret com-

---

(a) num. 490. — (b) *Lib. 6. n. 491.*

plicem, tunc Confessarius non peccat, et utique potest uti eâ notitiâ, ut remedium afferat; licet plerumque non expediat, ut Confessarii hoc onus corrigendi ex Confessionis notitiâ sibi assumant, quia hoc difficulter accidit sinè scandali periculo, aut sacri ministerii dedecore.

## PUNCTUM II.

Quandonam Confessio sit invalida, et quomodo revalidanda est.

*Quandonam Confessio sit nulla ex parte Confessarii 42. Quandonam ex parte Pœnitentis. De complice in peccato turpi 43. Quomodo convalidanda Confessio apud eundem Confessarium; et an sufficiat recordari pœnitentiæ impositæ 44. De rudibus qui non explicarunt nec species, nec numerum 45. Quando repetenda est Confessio 46.*

42. — **C**ONFESSIO potest esse invalida, aut ex parte Confessarii, aut ex parte pœnitentis. Ex parte Confessarii 1. Si ille caret jurisdictione. 2. Si deficit in dandâ, aut in proferendâ absolutione. 3. Si nullum pœnitentis peccatum intellexit: dico *nullum*, quia si aliquod intellexit, valida est absolutio, si pœnitens bonâ fide eam recipit; tantum huic restat obligatio confitendi peccata, quæ Confessarius non audivit. Secus autem si eam recipit in malâ fide, cum jam advertit Confessarium, aut non audire, aut dormire, aut esse ignarum, aut peccati gravitatem non concipere, aut facilem esse in absolvendis, etiam indispositis, quia tunc cum pœnitens peccet in eâdem Confessione, quam facit, illa certè nulla est. Si autem tu cum confiteris, peractâ Confessione, cognosceres Confessarium aliquod peccatum non audivisse, sed nescis quodnam sit, tunc dicunt communissimè *Sanch. Tamb. Salm. Lugo, Dicast.* etc. quod si Confessio est brevis, teneris eam repetere, secus autem si fuit longa, quia eo casu præsumitur Deus non obligare ad integritatem

integritatem Confessionis cum tanto incommodo (a). Dicunt autem *Suar. Sot. Castrop. Lugo, Salm.* etc. Confessionem bonâ fide factam Confessario nescienti distinguere nec species, nec numerum peccatorum, esse validam, nec repetendam. Ego dico hoc intelligendum in casu quo non constat de omissione; quia si constat quod defuit integritas, hæc semper supplenda est, ut dicunt ipse *Salm. et Lugo*; quandoquidem licet prior Confessio fuerit valida, saltem est invalida secunda, in quâ defectus animadvertitur (b).

43. — Ex parte autem pœnitentis est invalida Confessio, 1. Si ille est excommunicatus, nam excommunicatio privat cujuscumque Sacramenti perceptione. 2. Si ex malitiâ aut culpabili negligentia omittit aliquod grave peccatum confiteri. 3. Si debitum dolorem aut propositum non habet; præcipue si restituere non vult, ut debet, bona, honorem, aut famam ablatam: aut si occasionem proximam voluntariam nolit auferre. 4. Si confitetur aliquod peccatum turpe apud eundem complicem; nam ut declaravit Benedictus XIV. in suâ Bullâ *Sacramentum*, Confessarius omni privatus fuit jurisdictione erga complicem sui peccati turpis præterquam in casu mortis, et quando nullus alius Sacerdos etiam simplex adesset; alioquin ille absolvendo incurrit in Papalem excommunicationem, ut fusè dicitur loquendo de *Jurisdictione Confessarii* n. 95. (c).

44. — Hinc quæritur, quomodo repetenda est Confessio invalida, cum apud eundem Confessarium fiet? Oportet hic prius advertere, quod cum absolutio dilata est, non opus est, ut Confessarius distinctè reminiscatur peccatorum, quæ jam confessa fuerunt, nec ut Confessionem repetere faciat, sed sufficit ut in confuso recordetur status pœnitentis; ut communiter *Silvester, Suar. Navar. Conc. Laym. Croix*, etc. (d). Fit attamen dubium, an hoc sufficiat, cum Confessio fuerit nulla? Distinguunt *Suar. et Coninch.* et dicunt quod tunc tantum suf-

---

(a) num. 499. — (h) n. 500. v. *Eodem.* — (c) num. 501. — (d) Lib. 6. n. 501. v. *Quær.*

ficat, cùm Confessio invalida fuit solo Confessarii defectu circa suum officium, v. g. si absolutionem non dedit, aut sibi defuit animus absolvendi; secus autem cùm fuit nulla defectu alicujus partis essentialis, ut si defuit dispositio in pœnitente, aut jurisdictio in Confessario; quia tunc cùm Confessio fuerit sacrilega, aut facta apud non judicem, non est Sacramentalis. Hæc sententia est probabilis, nihilominus opposita est communis cum *Navar. S. Antonin. Silvest. Vasq. Medina, Lugo, Laym. Sa, Bonac. Valent. Tamb. Aversa, Croix, Salm.* etc. et est valde probabilis. Hi DD. dicunt, quâcunque ex parte veniat defectus, necesse non esse Confessionem repetere, sed sufficere quòd pœnitens in genere iterum se accuset de peccatis jam patefactis, et quòd Confessarius pœnitentis statûs recordetur; aut ad summum illius conscientia in confuso reassumat notitiam. Ratio est 1. Quia talis Confessio non fuit jam simplex narratio, sed cùm facta fuerit in ordine ad recipiendam absolutionem, benè potest illa verè dici Sacramentalis; dùm jam obligat ad sigillum Sacramentale. 2. Quia quamvis talis Confessio non fuisset Sacramentalis, saltem ejus ratificatio, iterum pœnitente se accusante de peccatis confessis, conjuncta cum cognitione quam Confessarius de illis priùs habuit, reputatur utique sufficiens ad efficiendam illam validam, et integram. Imò hoc admittit *Card. de Lugo*. etiamsi pœnitens antecederet peccata sua ob simplicem narrationem Confessario declarasset; sed huic acquiescere nequeo, quia tunc dico, quòd neutra Confessio potest dici Sacramentalis: Non quidem prior, quia illa non fuit facta in ordine ad absolutionem: Non secunda, quia non adest Confessio cujuslibet peccati in particulari, sicut requirit Trident.; tantùm hoc posse admitti, si Confessarius, dùm pœnitens se accusat de peccatis narratis, distinctam eorum haberet notitiam (a). Addunt multi graves DD. ut *Tol. Vasq. Laym. Sa, Busemb.*, quòd cùm adfuerit Confessio facta in ordine ad absolutionem, non solùm suffi-

---

(a) n. 502. D. 1.



cit memoria in confuso illius, sed etiam solius pœnitentiæ impositæ; quia ex solâ pœnitentiæ notitiâ potest Confessarius debitum formare iudicium pœnitentis statûs. Addunt *Castrop. S. Antonin. Silv. etc.* apud *Croix*, sufficere etiam solius pœnitentiæ adimpletæ reminisci, licet nec Confessarius, nec pœnitens recordentur quænam fuerit; sed hæc opinio mihi videtur nimis extensa, quia Sacerdos, ut diximus, debet iudicium formare saltem in confuso de statu pœnitentis, tam ad dandam absolutionem, quàm ad pœnitentiam injungendam, quæ in tali casu utique debet imponi ad faciendum Sacramentum integrum (a).

45. — Dicit *Tambur.* et adhæret *P. Segneri* (in suâ *Instructione ad Confessarios*) rudes et pueros qui semper in confuso confessi sunt sinè specierum et numeri peccatorum distinctione, sed in bonâ fide, hos non teneri ad repetendas Confessiones. Sed hæc opinio nescio quomodò possit admitti, dùm isti, ut dicunt *Lugo, Navar. Bonac. Salm. etc.*, semper tenentur ad explicandas species, et numerum omissum, cùm id animadvertunt, quia licet eorum Confessiones validæ fuerint; tamen semper remanet obligatio ad reintegrandam Confessionem materialiter (b). Admittunt tamen *Salm.* cum *Dicast. Fagund. Henriq.* opinionem *Tamb.* in casu quo rudis dudum semper conformem vitam duxisset, aded ut ex Confessione unius anni possit iudicari de præteritis. Sed hoc dico posse admitti quandò Confessarius à principio Confessionis comprehendisset hanc vitæ uniformitatem etiam pro annis præteritis; secus autem quandò in fine Confessionis cognosceret defectum præteritarum, et illius novissimæ Confessionis notitia distincta peccatorum in ejus mente non restaret; nam licet Confessario sufficiat ad dandam absolutionem notitia confusa statûs pœnitentis, nihilominus semper opus est, ut iudicium peccatorum in particulari semel formaverit (c).

46. — Cæterum rectè dicunt *Filliuc. Gobat. Holzm. Elbel, Croix, Mazzot.* cum *P. Segneri* in

---

(a) n. 502. *Dub. I. et 3.* — (b) n. 504. — (c) *Ibid. v. Dicunt. III.*

dubio non teneri pœnites ad repetendas Confessiones, quoties præsumptio et per consequens possessio stat pro illarum valore, nisi de nullitate constet. Nec obstat dicere, quòd cum adest præceptum, et dubitatur de ejus satisfactione, possessio est pro obligatione; nam respondetur, hoc habere locum cum dubitatur de actu satisfactionis; sed non cum est certum opus fuisse adimpletum, quia tunc in dubio possessio stat pro valore actus, juxta principium communiter receptum à DD.; ita *Laym. Croix, Spor. et Mazzot. cum Navar.* quid dicit: *Præsumptio pro actus valore præponderat aliis (a).* Et circa obligationem repetendæ Confessionis, optimam regulam exhibet *Habert*, et sic dicit: si observetur quòd pœnitens post Confessionem occasiones vitavit, et pro aliquo tempore tentationibus obstitit, benè possunt judicari validæ Confessiones; secus autem, si observatur quòd paulò post oblata sibi primâ occasione faciliè, ut prius, lapsus est; dum illi, quem verè pœnitet, et qui firmiter vitam in meliùs mutare statuit, impossibile est quòd ita faciliter recadat, quin saltem per aliquod tempus perseveret, aut quin prius saltem multam præstiterit resistentiam; undè fit quòd si quis post Confessionem statim sinè ullo conatu labitur, signum moraliter certum exhibet, ejus Confessiones præteritas nullas fuisse, quia deerat dolor et propositum (b).

---

(a) n. 505. — (b) lib. 6. n. 505. v. *Et quid.*



## CAPUT IV.

### *De satisfactione, sive de Pœnitentiâ.*

**Q**UONIAM si peccatori remittitur culpa, non semper tota pœna remittitur, sed plerumque ei remanet satisfacienda; ideòque tertia pars Sacramenti Pœnitentiæ est satisfactio Sacramentalis, quæ dicitur pars non essentialis, (quæ sine hac etiam potest esse validum Sacramentum), sed integralis, nam inservit ut Sacramentum fiat integrum.

## PUNCTUM I.

### De impositione pœnitentiæ.

*De obligatione imponendi pœnitentiam. An post absolutionem etc.* 47. *Pœnitentia debet imponi ex obligatione* 48. *Quando possit diminui. De infirmis corpore* 49. *De infirmis spiritu* 50. et 51. *Quæ species pœnitentiarum debeant imponi* 52. 53. et 54.

47. — **C**IRCA hoc multa adnotanda sunt. Notandum 1. Confessarium in dandâ absolutione teneri imponere pœnitentiam, ut declarat Trident. *sess. 14. c. 8.* Undè peccat, si eam non imponit; et quidem graviter, cùm Confessio est de mortalibus; si est de venialibus, aut de mortalibus jam confessis, probabile est (ut dicunt *Lugo, Dicast. Salm. Mazzot. etc.*) non peccare graviter (a). Et licèt pœnitens statim post absolutionem alterius peccati confiteatur, Confessarius pariter debet imponere novam pœnitentiam, saltem levem. Dicunt *Bonac. Croix, et Mazzot.* sufficere tunc ei imponere denuò priorem pœnitentiam; sed rectè hoc negant *Castrop. Ronc. etc.*, quia licèt possit imponi opus debitum ex alio præcepto, sicut infra dicetur, ni-

---

(a) num. 506.

150 *Tract. 16. De Pœnitentiæ Sacramento.*

hilominus non posset imponi opus debitum eodem titulo pœnitentiæ (a). Pœnitentia plerumque imponenda est antè absolutionem, ut videat quomodò eam pœnitens acceptet; sed potest aliquandò imponi immediatè post absolutionem; tunc enim moraliter cum illâ unitur: ità communissimè *Busemb. Salm. Viva, Diana, Sporer, etc. (b).*

48. — Notandum 2. Pœnitentiam semper debere imponi sub aliquâ obligatione. Sed fit dubium, an Confessarius possit imponere pœnitentiam gravem sub levi obligatione? Negant *Bonac. Coninch. etc.* dicentes materiam gravem sub levi obligatione imponere solius Legislatoris esse, non autem simplicis Ministri, qualis est Confessarius. Sed communius et probabilius affirmant *Suar. Filliuc. Henriq. Fag. Busemb. Segneri, Tamb. Dicast. etc.*, quia in pœnitentiæ Sacramento Sacerdos non simplicis Ministri Jesu Christi fungitur officio, sicut in ceteris Sacramentis, sed est verus Judex à Salvatore constitutus cum facultate solvendi à peccatis, et ligandi per pœnitentiam, adeò ut obligatio hujus totaliter dependeat ex Confessarii præcepto (c).

49. — Notandum 3. Circà quantitatem pœnitentiæ, illam debere esse proportionatam culpis; sed in hoc attendenda sunt verba Tridentini *Sess. 14. Cap. 8.* ubi sic dicitur: *Debent ergò Sacerdotes Domini, quantum spiritus et prudentia suggesserit, pro qualitate criminum, et pœnitentium facultate, salutares et convenientes satisfactiones injungere, ne, si fortè peccatis conniveant, et indulgentius cum pœnitentibus agant, levissima quædam opera pro gravissimis delictis injungendo, alienorum peccatorum participes efficiantur.* Itaque quantitas pœnitentiæ à Concilio remittitur Confessarii arbitrio, quantum spiritus et prudentia suggesserit. Hinc fit quòd pœnitentia multis de causis potest minui. 1. Si pœnitens accessit valdè contritus; aut si ille prius multas pœnales patravit actiones (d). 2. Tempore Jubilæi aut Indulgentiarum Plenariarum; sed semper

---

(a) n. 513. *Dub. 2.* — (b) n. 514. *in fin.* — (c) n. 518. — (d) n. 507.

tunc debet imponi aliqua pœnitentia, ut declaravit Benedictus XIV, tùm quia nemo potest securus esse plenariam Indulgentiam lucrari, tùm quia semper integrandum est Sacramentum (a). Et cùm pœnitens indiget pœnitentiâ medicinali, hæc omninò imponenda est, ut benè advertit *Mazzot*. 3. Si pœnitens sit infirmus corpore, cùm advertat Rituale, infirmis tunc non esse imponendam gravem pœnitentiam; sed tantùm pro tempore cùm convaluerint. Quòd si infirmus sit constitutus in mortis periculo aut sensibus destitutus, tunc potest absolvi sinè ullâ pœnitentiâ: Licèt semper expediat aliquam levem ei imponere, ut osculari Crucifixum, aut invocare nomina Jesu et Mariæ, saltem in corde, etc. Non expedit infirmo pro pœnitentiâ imponere ut patienter infirmitatis incommoda sufferat, hoc enim potest esse illi multorum scrupulorum occasio. Contrà rectè advèrtunt *Salm.* quòd si infirmus possit satisfacere per elemosynas, istas utique, istas esse à Confessario injungendas, dùm quilibet tenetur eam facere quam potest, pœnitentiam (b).

50. — Potest 4. minui pœnitentia, si pœnitens est infirmus spiritu; adeò ut prudenter timeatur, ne ille non adimpleat pœnitentiam proportionatam; ità docent communiter *Suar. Scot. Navar. Laym. Abelly, Castr. Habert, Gonet, Gerson, Cajet. Natalis ab Alex. Antoine, Anacl.*; ità etiam *S. Carolus Borrom. in Instruction. ad Confessarios*, qui monet Confessarios, ut minuant pœnitentiam juxtà dispositiones pœnitentium, eos admonendo: *Hoc factum esse* (sunt sua verba) *ne eam, quæ pro culparum ratione injungenda erat, deserant* (nota) *cum periculo salutis suæ*. Idem docet *S. Thomas*, cujus verba mox infrà referemus. Verum est quòd in Trid. dicatur, quòd pœnitentia debeat delictorum qualitati correspondere; sed mox subjungit, quod debeant esse *pro pœnitentium facultate salutares et convenientes. Salutares*, nempè utiles pœnitentis saluti: *Et convenientes*, nempè proportionatæ non solùm peccatis, sed etiam pœnitentis viribus. Hinc non solùm non essent

---

(a) n. 519. — (b) ? 6. n. 507.

salutares, nec convenientes illæ pœnitentiæ, quibus pœnitentis vires ob spiritûs imbecillitatem pares non sunt; sed potius essent ei pernicipi, quàm saluti. In hoc Sacramento potius attenditur emendatio, quàm satisfactio; propterea, ait Rit. Romanum (*de Sacramento Pœnitentiæ*) quod Confessarius in dandâ pœnitentiâ debet rationem habere pœnitentis dispositionis. Et *S. Thomas* (a) dicit: *Sicut Medicus non dat medicinam ita efficacem... ne propter debilitatem naturæ majus periculum oriatur, ita Sacerdos Divino instinctu motus non semper totam pœnam, quæ uni peccato debetur, jungit, ne infirmus desperet, et à pœnitentiâ totaliter recedat.* Et alibi (b) dicit quod sicut parvus extinguitur ignis, si multa ligna superimponantur; ita accidere potest, quod parvus pœnitentis effectus contritionis extinguatur pondere pœnitentiæ: et subjungit: *Melius est quod Sacerdos Pœnitenti indicet quanta pœnitentia esset sibi injungenda; injungat nihilominus quod pœnitens tollerabiliter ferat.* Et alibi (c) addit: *Tutius est imponere minorem debito quàm majorem, quia melius excusamur apud Deum propter multam misericordiam, quàm propter nimiam severitatem, quia talis defectus in Purgatorio supplebitur.* Id prius tradidit Chrysostomus in c. *Alligant*, 12. *Caus. 26. Q. 7.* dicens: *sicut enim si fascem super humeros adolescentis, quem non potest bajulare, posueris, necesse habet, ut aut fascem rejiciat, aut sub pondere confringatur; sic et homini, cui grave pondus pœnitentiæ imponis, necesse est ut aut pœnitentiam tuam rejiciat, aut suscipiens, dum sufferre non potest, scandalizatus amplius peccet.* Idem etiam dicunt *Gerson*, *Cajet.* et præcipuè *S. Antonin.* (d) qui dicit quod debet imponi illa pœnitentia quam judicatur pœnitens executurus, et quam ille tunc libenter acceptat. Et si pœnitens se protestatur sibi non esse vires sufficientes ad pœnitentiam convenientem, concludit tandem *S. Anton.*: *Tunc quantumcumque de-*

---

(a) *Suppl. quæst. 18. art. 4.* — (b) *Quodl. 3. art. 28.* —  
 (c) *Opusc. 65. §.* — (d) *3. part. Tit. 16. cap. 20. apud Opus  
 nost. l. 6. n. 510.*

*liquerit; non debet sinè absolutione dimitti.* Sufficiens tunc erit, ait Sanctus, ut ei imponatur in generali quicquid boni egerit sub iisdem verbis Ritualis: *Quicquid boni feceris etc.*, quæ opera cum Sacramento Pœnitentiæ conjuncta, ut docet Angelicus (a), ob Sacramenti virtutem, majorem acquirunt valorem ad satisfaciendum pro peccatis commissis. Item probabiliter addunt multi DD. *Lugo, Petrocor. Croix, et Salm.* cum eodem *S. Antonin.* (b) esse justam causam ad minuendam pœnitentiam judicare pœnitentem ita melius erga pœnitentiam affici studio. O quàm pulchrum est consilium *Sancti Thomæ à Villanovâ*, (c) *Facilem unam injunxeris, acriorem consulueris!* Expediit, ut pœnitenti comprehendere facias pœnitentiam quam mereretur; cui potest conducere etiam indicare pœnitentiâs antiquas Canonum Pœnitentialium (hæ inveniuntur in opere (d) adnotatæ). Juvabit pariter, ut dicit *S. Thomas de Villanovâ*, suadere pœnitenti graviolem pœnitentiam, sed postea imponere ei oportet eam tantum, quam prudenter judicabit confessarius ab eo adimpletam iri. Insinuat *S. Franciscus Sales.* (e), et idem dicit Rit. Parisien. (f) expedire; ideoque à pœnitente expetere, an valeat ipse eam pœnitentiam exequi; secus commutetur. Idem admonuit *S. Carolus Borromæus*, dicendo: *Talem imponat pœnitentiam qualem à Pœnitente præstari posse judicet. Proinde aliquandò, si ita expedire viderit, illum interroget, an possit, anve dubitet pœnitentiam sibi impositam peragere; alioquin eam mutabit, aut minuet.* Confert etiam plerumque inter opera injuncta aliquam gravem Pœnitentiam imponere, sed non sub gravi (ut *num. præcedenti* dictum est) aut aliquod opus aliundè præceptum, aut debitum, ut infra dicemus.

51. — Ex quo deducitur quàm imprudenter se gerunt Confessarii, qui pœnitentiam viribus pœnitentium imparem injungunt. Quot istorum multoties non dubitant faciliter recidivôs indispositos ab-

---

(a) Quodlib. 3. art. 38. — (b) Vide Ibidem. — (c) *Serm. Feriæ 6. post Domin. Lætare.* — (d) n. 530. — (e) *Instruct. ad Confess. cap. 8.* — (f) *Append. l. 6. nost. n. 509.*

solvere, et etiam eos qui in proximâ peccandi occasione versantur, et insipienter postea putant iis mederi imponendo gravissimas pœnitentias, licet videant quod illi eas adimplere non possint; imponunt v. gr. ut octavo quoque die per annum confiteantur: ut quindecim decades Rosarii quolibet die recitet ille, qui ne solitus quidem fuit quinque in hebdomadâ recitare: imponunt jejunia, disciplinas, orationem mentalem illi, qui nec nomen unquam audit. Et quid hinc eveniet? Eveniet quod licet inviti acceptent quod imponitur, ut absolutionem aucupentur, nihilominus postea nihil horum executioni demandant; et credendo in novum peccatum esse delapsos, imò putando (præcipuè rudes) nullius fuisse momenti Confessionem factam, quia pœnitentiæ impositæ non satisfecerunt, propterea ad pristinum perditum vivendi modum redeunt: Et ob pœnitentiæ impositæ pondus perterriti à Confessione horrent, et ita in peccatis tabescere perunt. Et hic est fructus qui in perniciem tot miserorum colligitur ex hujusmodi satisfactionibus, quas convenientes vocant, sed meliùs dicendæ essent inconvenientissimæ. Ceterum extrâ casum gravissimæ infirmitatis, aut compunctionis extraordinariæ, non benè ageret Confessarius, si pro culpis gravibus adjungeret levem satisfactionem, levem inducentem obligationem; etenim, licet (cùm expedit) possit adjungi opus, quod, habitâ peccatorum ratione, sit leve, attamen semper debet imponi gravis satisfactio, quæ obliget sub gravi (a).

52. — Notandum 3. Circâ qualitatem pœnitentiæ, non imponendas pœnitentias perpetuas, aut valdè onerosas, ut ingredi Religionem, et tantò minùs matrimonio ligari, quod omnimodam requirit libertatem; item non imponantur vota perpetua; imò licet pœnitens vellet vovèrè, v. g. de non relabendo, ei non permittatur nisi ad tempus; ut videat quomodò illud observet. Loquendo autem de pœnitentiâ conditionatâ, v. g. aut de jejunando, aut de eleemosynam elargiendo quoties cadet, potest utique

---

(a) *Lib. C. n. 518. in fin.*



illa imponi, et cùm imponitur, tenetur pœnitens eam acceptare et exequi, ut rectè dicunt *Suar. Laym. Bonac. Salin. et Aversa* (contrà *Dianam*, etc.): sed non expedit eam ad longum tempus imponere, quia postea faciliter negligitur et peccata multiplicantur; potest igitur imponi tantùm ad breve tempus, ut ad mensem, aut ad aliam Confessionem (a). Item advertendum, non esse imponendas pœnitentias publicas pro peccatis occultis; tenetur autem Confessarius has imponere, si aliâ viâ occurri non possit scandalo dato, vel honori alicujus palàm detracto; sed non est adstringendus pœnitens ad publicam pœnitentiam, si ipse renuit, et alio modo possit scandalum reparare, nimirùm Sacramenta frequentando, Ecclesias visitando, ad aliquam Congregationem se aggregando etc. (b).

53. — Notandum 6. Opera satisfactoria debere esse pœnalia, nam (ut advertit Trident. *Sess.* 14. *Cap.* 8.) satisfactio non solùm debet esse medicinalis in novæ vitæ custodiam, sed etiam ultrix in peccatorum commissorum satisfactionem. Hæc pœnalia opera reducuntur ad jejunium, eleëmosynam, et orationem. Sub jejunii nomine veniunt omnia sensuum mortificationum genera. Sub orationis nomine etiam veniunt Confessiones, Communiones, Ecclesiarum visitationes, et etiam actus interni caritatis, contritionis, aut meditationis, qui actus utique possunt imponi in pœnitentiam, juxtà communem DD. (c). Advertunt tamen tam orationem, quàm eleëmosynam, et quodcunque opus bonum valere pro opere pœnali, ut communiter docent Theologi; nam respectu nostrî filiorum Adam post statum naturæ lapsæ quæcumque actio virtuosa habet rationem pœnæ, quia propter justitiam originalem amissam, omnes proni sumus in malum, et proprias commoditates. Ità *Valent. Castrop. Laym. Pitig. Salm.* cum multis

---

(a) n. 524. — (b) n. 512. — (c) n. 514. *dub.* 1.

156 *Tract. 16. De Pœnitentiæ Sacramento.*

aliis (a). Idem novissimè scripsit doctus Auctor *Instruct. pro novis Confessariis* (b) qui ait : *Hic advertendum nos haud dicere, nec inutilem reputare pœnitentiam illam, quæcumque illa sit, quæ injungitur in Sacramento, cum certum sit, quòd etiam signum Crucis cum Sacramento conjunctum est efficax ad satisfaciendum ; tantò magis, quia in statu præsentis naturæ lapsæ omne opus bonum est quodammodo affligens, et pœnale.* Hoc etiam confirmatur ex S. Francisco de Sales (c), qui sic ait : *Alius patitur in jejunando, alius infirmis inserviando, audiendo confessiones, concionando, orando, et similibus actibus. Hæc pœna (orandi) præstat alteripœnæ (jejunandi), etenim oratio, præterquamquòd domat corpus, affert fructus desiderabiliores: Præsertim confirmatur à S. Thomâ, qui dicit : Quælibet oratio habet rationem satisfactionis, quia quamvis habeat suavitatem spiritûs, habet tamen afflictionem carnis, ut dicit Gregorius (super Ezech. homil. 17.): Dùm crescit in nobis fortitudo amoris intimi, infirmatur fortitudo carnis (d).* Potest etiam imponi in pœnitentiam aliquod opus ad quod pœnitens tenetur, ut interesse Sacro die festivo, jejunare in vigiliis, sicut etiam communiter dicunt *Sot. Suar. Laym. Sanch. Valen.* etc., quia cum tale opus sit satisfactorium, tunc per Sacramentum elevatur ad meritum satisfactionis Sacramentalis. Hoc potest fieri, cum dignoscitur pœnitens valdè debilis spiritûs; ceterum regulariter loquendo debet imponi aliquod opus liberum; ideòque quoties Confessarius non se manifestat, intelligitur impositum opus distinctum. Attamen si Confessarius imponit adesse sacro per mensem, non tenetur die festivo duobus adesse; ità communiter *Castrop. Bonacin. Coninc. Laym. Sanch. Croix Salmant.* etc. Potest etiam imponi opus aliis applicandum, ut animabus

---

(a) *Valent. tom. 4. dist. 7. quæst. 14. part. 3. Castrop. dist. un. p. 21. §. 3. n. 1. Laym. tr. 6. de Sacram. Pœnit. cap. 15. n. 9. Pitig. 2. p. dist. 14. quæst. 1. art. 3. concl. 1. Salmant. tract. 6. de Pœnit. cap. 9. n. 26. — (b) Instr. pro nov. Conf. p. 1. cap. 16. n. 373. — (c) Introd. ad vitam devotam cap. 23. — (d) S. Thom. Suppl. q. 15. art. 3.*

Purgatorii, ut probabilius dicunt *Lugo*, *Tournel*, *Busemb.* etc. (a). Potest etiam imponi abstineri ab aliquo opere bono, v. gr. à Communione, et jejunio, sicut probabiliter tenent *Suar.* *Mol.* *Lugo*, *Sporer*, et *Salmant.*, quia talis cessatio utique potest esse actus virtutis, saltem ut experiatur obedientia erga seipsum Confessarium. Sed hoc non est practicandum, nisi cum animabus devotis, et nec cum ipsis quidem, cum possit aliis ingeri suspicio talem cessationem esse pœnitentiam à Confessario impositam (b). Non potest autem pœnitens satisfacere per alios, sicut dicebat *Propos.* 15. damn. ab *Alexandro VII.* Potest verò Confessarius hoc concedere pœnitenti, ut dicunt *Sot.* *Suar.* etc. cum *S. Thomâ*; nam tunc non opus jam, sed hujus procuratio esset satisfactio Sacramentalis, sicut notant *Laym.* *Vasq.* *Bon.* etc. cum *Marzotta* (c).

54. — Circà praxim, regula hujus requirit, ut imponantur opera carnem coërcentia pro peccatis sensualibus, eleëmosynæ pro peccatis avaritiæ, oratio pro blasphemiiis, etc. Sed considerandum quid magis expediat, aut magis utile sit pœnitenti. Quamvis autem maximè utile sit imponere Sacramentorum frequentationem, orationem mentalem, et eleëmosynas; nihilominus praxis habet has reddi damnosas iis, qui aut nihil, aut parùm habuerunt horum usum. Satisfactiones utiles generatim pro omnibus hæ solent esse, nimirum aggregari ad aliquam Congregationem: Quodlibet vesperi (saltem ad tempus) actum doloris elicere, et quodlibet manè propositum renovare, dicendo cum *S. Philippo Nerio*: *Domine, ne auferas hodiè manus tuas à me, ne tuus proditor efficiar*: Visitare quotidie Sanctissimum Sacramentum, et imaginem quoque Mariæ Sanctissimæ, ab eis perseverantiæ gratiam postulando: Rosarii saltem tertiam partem, et ter Salutationem Angelicam manè meridiè et vesperi, dicendo: *Mater mea, adjuva me hodiè, ne in Deum peccem.* (Hanc tamen pœnitentiam, ter recitandi

(a) *Num.* 514. — (b) *Ibid.* v. 7. *Potest.* — (c) *de Pœnit. qu.* 5. *in fin.*

Salutationem Angelicam cum prædictâ supplicatione, ego plerùmque solitus fui injungere, aut saltem consulere iis, qui eam non solebant frequentare): Cùm cubitum iverint, dicere in lecto; *Si nunc mihi morandum fuisset in Inferni igne; aut dicere, veniet dies quo mihi in hoc lecto moriendum erit*: qui legere sciunt, et potissimùm Ecclesiastici, quotidie legere aliquem librum de rebus spiritualibus agentem. Monet autem S. Franciscus Salesius (a) non esse gravandum pœnitentem multis rebus, ne confundatur, et terrefiat.

## PUNCTUM II.

De acceptatione, et satisfactione pœnitentiæ.

*Obligatio acceptandi pœnitentiam 55. Obligatio adimplendi eam 56. Qui differt Pœnitentiam 57. An requiratur intentio satisfaciendi 58. Si pœnitens obliviscatur pœnitentiæ 59. Quid si adimpleat in mortali 60. qui possit mutare pœnitentiam 61.*

55. — **Q**UOD pœnitentiæ acceptationem, communiter docent DD. teneri sub gravi pœnitentem eam acceptare cùm illa est rationabilis, quia in hoc Confessarius est verus ejus judex, cui ille parere debet. Undè *Suar.* et *Bonac.* post *Trid.* vocant temerariam opinionem *Navar.* et *Cajet.* etc. qui dicebant pœnitentem posse pœnitentiam recusare, ut eam in Purgatorio satisficiat (b). Dicit *Busemb.* cum *Soto*, et *Reginal.* quòd si pœnitens nollet aliam acceptare pœnitentiam quàm levem, licèt mereatur gravem, posset utique Confessarius eum absolvere. Sed ego nec huic acquiesco, juxtà quod diximus n. 51. *in fine*, et juxtà id quod docet *Lugo*; quia sicut peccaret Confessarius, qui sinè justâ causâ (ut infirmitatis) vellet levem pœniten-

---

(a) *Instruct. Conf. ff. c. 8.* — (b) *l. 6. a. 516.*

tiam pro culpis gravibus imponere, ità etiam peccat pœnitens, qui graves culpas afferendo, non vult acceptare nisi levem pœnitentiam. Cæterum probabiliter dicunt *Suar. Layman, Concina, Busemb. Elbel, Holzm. et Sporer*, quòd si pœnitens putaret illam pœnitentiam nimis gravem respectu sui peccati, aut saltem suarum virium, et Confessarius nollet eam moderari, benè potest ille, recusatâ absolutione, alium quærere Confessarium (a).

56. — Quoad autem pœnitentiæ satisfactionem, notandum 1. jam peccare graviter qui pœnitentiam gravem sibi impositam pro peccatis gravibus non adimplet; sed contrà peccat tantum venialiter, qui levem omittit pœnitentiam pro culpis levibus impositam, aut pro peccatis jam aliàs confessis juxta communem. Nec obstat dicere quòd Sacramentum restaret incompletum; quia cum sit essentialiter hoc completum, obligatio illud integrandi non est nisi levis, cum materia non est nisi levis; sed Rosarium B. V. licet quinque decadum non potest esse tale. Dubium majus fit, si imponatur pro pœnitentiâ materia gravis pro culpis levibus aut jam confessis? Volunt tunc *Bonac. Conc. et Roncagl.* debere sub gravi eam adimpleri; sed probabiliter hoc negant *Sotus, Navar. Laym. Lugo, Sporer, Croix*, etc. Ratio est, quia in tali casu, sicut Confessarius non potest imponere sub obligatione gravem pœnitentiam, ità nec pœnitens tenetur sub gravi eam satisfacere. Non nego tamen cum *Roncagl.* quòd si casu illa peccata, licet venialia, valdè disponderent ad mortale, benè potest Confessarius imponere pœnitentiam gravem, ut liberet pœnitentem à periculo mortis; et tunc pœnitens tenetur, si cupit absolvi, ad eam acceptandam, et satisfaciendam sub gravi obligatione (b). An autem circumstantiæ pœnitentiæ, verb. grat. flexis genibus. nudis pedibus, etc. importent obligationem gravem, aut levem, hoc dependet ex gravi molestiâ, quam secum affert circumstantia, ut communiter dicunt DD. (c).

---

(a) n. 516. — (b) n. 517. — (c) *Ibid. v. An autem.*

57. — Notandum 2. Quòd licèt non adsit obligatio adimplendi pœnitentiam antè Communionem, ut requirebat Propositio 22. damnata ab Alexandro VIII, nihilominus peccat qui diutius eam differt, v. g. per annum, et etiam per sex menses, ut rectè dicit *Mazzotta*; sed neutiquàm qui per mensem eam differt, modò pœnitentia non sit medicinalis, ut advertunt idem *Mazzotta*, et *Croix*; et modo in posterum posset eam adimplere. Ceterum non peccat graviter qui jejunium feriæ sextæ in sabbatum transferret, aut qui Communionem singulorum mensium ad 6. aut 8. dies alios transferret, ut probabiliter dicunt (contrà *Salmant.* et *Lugo*) *Suarez*, *Castrop.* *Spor.* *Holz.* *Mazzot.* cum *Ronc.* (qui tamen rectè excipit, si pœnitentia esset medicinalis). Imò *Croix* cum *Gob.* *Steph.* etc. putat non esse mortale si ex 10. Communionibus unam omitteret (a). Cæterum qui omittit die statuto pœnitentiam adimplere, non ideò deobligatus ab illâ restat; nam quandò à Confessario assignatur dies, semper ille intelligitur accessorie destinatus, nempe ad sollicitandam, non autem ad finiendam obligationem (b). Dicunt tamen *Bonac.* *Coninch.* *Gobat.* etc. apud *Mazzotta* (c), quòd si Confessarius imponit Communionem singulis B. Virginis Festis, aut jejunium quolibet sabbato in ejus honorem, elapso illo die, terminatur obligatio, quia tunc videtur Confessarius velle obligare jejunium tantum ad diem illum. Non dubitatur autem, quin possit pœnitentiæ satisfieri eodem tempore quo alteri satisfit præcepto, prout Rosarium recitare dum in Festo auditur Sacrum, etc. sicut dictum fuit *Tom. 1. Tract. 11. n. 30.* Sed cum Confessarius imponit duas audire Missas eodem die, intelligitur successive, non autem eodem tempore, ut rectè dicit *Mazzot.* cum *Croix* (d).

58. — Quæritur 1. An pœnitentia debeat satisfieri cum intentione ei satisfaciendi? Alii affirmant, ut *Vasq.* cum *Mazzotta* (e), dicendo quòd in cæteris

---

(a) *Lib. 6. n. 521.* — (b) *num. 525.* — (c) *de Pœnit. Qu. V. v. dico 4.* — (d) *loc. cit.* — (e) *Ibid.*

Cap. 4. Punct. 2. De acceptatione, etc. 161

præceptis sufficit ponere opus præceptum, sed in hoc requiritur ampliùs intentio integrum efficiendi Sacramentum. Sed probabiliter negant *Sanch.* et *Lug.* (a) cum *Suar.* et cum communi, ut asserit. Utitur *Lugo* aliâ ratione; sed illa quæ apud me majorem vim facit, est quòd pœnitens in acceptando pœnitentiam utique animum eam adimplendi habet, undè quoties ille ponit opus injunctum, saltem ponit id ex intentione habituali habitâ, et non retractatâ pœnitentiæ satisfaciendi; et in hoc cur non sufficit intentio habitualis, cùm habitualis sufficit ad suscipiendum quodlibet Sacramentum? Propterea quisque in quolibet satisfactorio opere, quod ponit, semper intendit voluntate generali satisfacere priùs operi debito, quàm aliis subrogationis.

59. — Quæritur 2. Ad quid teneatur pœnitens, qui oblitus est Pœnitentiæ? Alii, ut *Busemb. S. Anton.* etc. volunt teneri ad repetendam Confessionem, ut Sacramentum faciat integrum. Sed communiter, et valdè et fortè magis probabiliter negant *Suar. Vasq. Laym. Castrop.* et alii, et hoc etiamsi culpabiliter oblitus fuisset, ut dicunt *Sot. Navar. Lugo, Salm. Croix*, et *Holzm.* quia in tali casu pœnitentia reddita est impossibilis, et ex alterâ est valdè dubia lex, an repetenda sint peccata jam semel directè remissa, ut integretur Sacramentum. Attamen si pœnitens putaret Confessarium reminisci posse pœnitentiæ impostæ, teneretur certè eundem adire, ut eum de illâ interroget (b).

60. — Quæritur 3. An pœnitens in mortali existens possit pœnitentiæ satisfacere? Alii negant, sed communissimè affirmant *Suar. Nav. Lugo, Conc. Ronc. Salm.* etc., quia ex regulâ generali *S. Thomæ* pluries repetitâ finis præcepti non cadit sub præcepto. Opponunt hìc quemdam textum ejusdem Angelici: sed *S. Doctor* ibi aliud non dicit quàm illud opus in peccato factum merito carere, sed non dicit non satisfacere (c). Communis autem est sententia apud omnes, quòd pœnitens, satisfaciendo pœnitentiæ in peccato mortali, non peccet mortaliter. Ceterum judico esse

(a) de Pœnit. D. 24 n. 43. — (b) n. 520. — (c) n. 222.

probabile cum *Suar. Laym. Bonacin. etc.* (contrà alios) istum saltem peccare venialiter, dùm satisfaciendo in mortali impedimentum ponit effectui partiali Sacramenti (a).

61. — Quæritur 4. Quinam possit pœnitentiam mutare? Certum est, et commune apud DD. (quicquid dicat *Diana* cum paucioribus) pœnitentem non posse ex se pœnitentiam mutare, etiam in opus evidenter melius; nam sicut non potest pœnitentia nisi à Confessario imponi; ità nec potest nisi ab eo solo mutari (b). Dubium fit an possit mutari ab alio Confessario, quin repetantur peccata? Negant probabiliter *Castrop. Lugo, Laym. Conc. Holzm. Spor.* etc. dicendo pœnitentem debere tunc iterùm Confessionem repetere apud illum Confessarium, saltem in confuso, ut ei det notitiam statûs suæ conscientiæ. Sed multi alii etiam probabiliter affirmant, ut *Tolet, Navar. Bonac. Sa,* et probabile dicunt idem *Lugo, Laym. Salm. Holzm. Sporer,* etc. Ratio est quia in hâc posteriori Confessione non agitur de peccatorum in priori Confessione adductorum iudicio faciendum, cùm illud jam absolutum sit; sed tantùm de imbecillitate pœnitentis priori pœnitentiæ satisfaciendi. Opponitur; sed pœnitentia debet esse medicinalis, et quomodò medicinam præscribet qui infirmi vulnus ignorat? Respondetur quòd Confessarius ex eâdem pœnitentiâ impositâ potest peccatorum, pro quibus illa imposita erat, materiam argumentari, et ità potest se dirigere in commutando aut diminuendo eam (c). Et probabiliter dicunt *Nav. Spor. et Tamb* Confessarium non requisitum à pœnitente posse ex se mutare ei pœnitentiam, cùm prævidet, quòd ille verisimiliter perget eam negligere (d). Nonnulli DD. ut *Castrop. Sanch. Bonac. etc.* permittunt etiam Confessario inferiori posse pœnitentiam à superiore ob casus reservatos impositam permutare. Sed hoc rectè negant *Gonet, Suar. Lug. Holz. Spor. Conc. Coninc. Valenz. Renzi,* etc., quia inferior non habet facultatem mutandi sententiam superioris in iudicio priùs

---

(a) n. 623. — (b) n. 529. *Resp. 3.* — (c) *lib. 6. num. 529. d. 1.*  
— (d) *Ibid. in fin.*



formato ; tantum hoc posset admitti cum *Suar. Bonac. Renzi, Med.* etc. cum poenitens difficulter posset ad superiorem redire, et contra gravis adesset causa ut mutetur poenitentia, quia tunc merito praesumitur superioris conniventia (a). Dubitatur autem an poenitentia possit mutari extra Confessionem? Respondetur: quod si Confessarius est alius, certum est non posse fieri. Si autem est idem: alii AA. admittunt posse id fieri etiam post 8. dies; sed merito hoc negat sententia communior *Bonac. Suar. Nav. Salm.* etc. qui vix id permittunt Confessario immediate post absolutionem, antequam à Confessario discedat poenitens (b). Attamen facta commutatione semper potest poenitens eligere primam poenitentiam; uti docent *Suar. Less. Bonac.* et alii cum *P. Mazzotta* (c).

### PUNCTUM III.

#### De satisfactione per Indulgentias.

*De Indulgentiis 62. An quis possit lucrari Plenariam ex parte 63. De Jubilæo, et de pluribus declaratis circa Jubilæum à Benedicto XIV. 64. An opera debeant omnia in unam hebdomadam adimpleri; et hic de oratione, et eleemosynâ, et etiam de commutatione 65. An ex invalidâ Confessione auferatur reservatio, et censura 66. An peccet absolutus postea non adimplendo opera 67. Qui reservati obliviscitur 68. Qui peccat in confidentiam Jubilæi 69. An antequam damno satisfiat etc. 70. In Jubilæo à quibus casibus, et censuris potest absolvi 71. Nonnulla circa annum Sanctum adnotantur 72.*

62. — **L**OQUENDO de Indulgentiis in generali, indulgentia definitur: *Gratia quâ remittitur poena temporalis, opere praescripto praestito; idque per ab-*

---

(a) *Ibid.* d. 2. — (b) n. 529. ad 3. — (c) de *Pœn. Qu.* 5. c. 2.

*solutionem in subditos, per suffragium in Defunctos.* Declaravit autem Trident. *Sess. 25. Decr. de Indulg.* Ecclesiam à Deo habere facultatem Indulgentias concedendi, et eam ab antiquis temporibus illis usam fuisse; undè Concilium excommunicatione damnat eum, qui inutiles esse indulgentias diceret, aut qui eam potestatem in Ecclesiâ esse negaret. Ad lucrandas Indulgentias tria requiruntur. 1. Ut adsit causa rationabilis, et proportionata. 2. Ut opera præscripta adimpleantur. 3. Ut persona sit in gratiâ, saltem cùm ultimum opus præscriptum ponit: alioquin non lucrabitur indulgentiam, neque pro se, neque pro Defunctis, quicquid dicant alii (a). Deindè notandum 5. Indulgentiam non spirare morte concedentis, nisi adsit clausula, *Ad beneplacitum nostrum.* Notandum 2. Indulgentias intelligi debere, ut Indulti verba sonant: quia error, licet communis esset, in hoc non supplet. Contrà largè interpretandæ sunt; undè fit, quòd si tempus non determinatur, perpetuè intelligendæ sunt. Notandum 3. Indulgentiam esse alteram *Plenariam*, sive *Totalem*, quæ ab omni pœnâ liberat: alteram *Partialem*, ut sunt *Septenæ*, et *Quadragenæ*, quibus intelligitur tolli illa pœna, quæ tolleretur per jejunium illorum annorum, aut dierum, qui in Indulto exprimuntur (b).

63. — Dicit autem *Busemb.* non lucrari Indulgentiam Plenariam eum, qui ab omni culpâ etiam veniali non est immunis. Sed multi alii AA. ut *Laym. Wigandt, Spor. Viva, Pellizar.* et *Renzi* tenent, quòd quamvis peccatum sit veniale, si non est remissum quoad culpam, neque remitti potest quoad pœnam, ut certum est cum *S. Thomâ* (c); nihilominus veniale non remissum non impedit, quominus remittatur pœna debita aliis peccatis jam remissis; quia sicut non repugnat, ut remittatur culpa unius venialis, quin remittatur culpa aliorum; ità etiam de pœnâ dici potest; et non sinè ratione talis esse præsumitur Pontificis intentio (d). In

---

(a) n. 534. v. 9. et 10. — (b) n. 534 et 535. — (c) *Suppl. q. 27. a. 1.* — (d) n. 534. v. *Certum.*

sequenti numero loquendo de Jubilæo dicemus alia quæ etiam ad hanc Indulgentiarum materiam pertinent.

64. — Procedendo igitur ad loquendum de Jubilæo, antequàm ad dubia, quæ super hâc re occurrunt, descendamus, multa hîc adnotare oportet, quæ declaravit Benedictus XIV. in suâ Constitutione, *Inter præteritos*, editâ die 3. Decemb. 1749. (a), in quâ (ut ipse alibi declarat) voluit de medio tollere multas quæstiones, quas super hâc re DD. agitabant. Ea, quæ declarata fuerunt, sunt sequentia: 1. Clausula *Verè Pœnitentibus, et Confessis*, in Jubilæo intelligenda est de verâ confessione, contrâ opinantes non opus esse confiteri eum, qui à culpis gravibus erat immunis; itâ in Jubilæo; sed prò aliis indulgentiis ait Pontifex hoc pendere ab Indulti verbis, an requirant Confessionem uti conditionem, an uti dispositionem (notâ quòd Clemens XIII. declaravit, semper requiri Confessionem ad lucrandas indulgentias). 2. Omnes visitationes Ecclesiarum præscriptæ debent uno die compleri, incipiendo à mediâ ad mediam noctem, aut à vespers ad vespers alterius diei. 3. Indulgentiæ concessæ, *Ad beneplacitum nostrum*, morte Pontificis spirant. 4. Indulgentiæ pro vivis non possunt applicari pro defunctis. 5. In Jubilæo non potest absolvi hæresis externa. 6. Clausula, *Commutatio votorum fiat dispensando*, intelligitur, ut commutatio non sit multò inferior opere promisso. 7. Facultas commutandi opera pia non intelligitur in Confessionem, aut Communionem (præterquàm cum pueris,) nec in orationem necessariam in visitatione; nec cetera opera præscripta possunt commutari in ea quæ aliâ causâ jam debentur. 8. In quolibet Jubilæo vetitum est Confessario absolvere proprium complicem in peccato turpi. 9. Jubilæi facultate non gaudent, qui parati non sunt ad illud lucrandum, et ad operibus præscriptis satisfaciendum. 10. Vota tantùm intrâ Confessionem commu-

---

(a) In Bull. tom. 3. p. 140.

tari possunt. 11. In Jubilæo à Confessario semper debet aliqua injungi pœnitentia in confessione. 12. Non possunt commutari vota in damnum tertii, et præcipuè votum perseverantiæ, quod in aliquibus Congregationibus emittitur, nam illud contractûs naturam assumit. 13. Qui in mortale post Confessionem labitur, iterum confiteri debet, si Indulgentias Jubilæi lucrari cupit, ut saltem ultimum opus injunctum in statu gratiæ ponatur; sed non adest obligatio replicandi visitationes. 14. Ad lucrandas Indulgentias sufficit oratio vocalis; et qui mentaliter orat, adjungat aliquam vocalem. 15. Facultate Jubilæi semel tantum quis gaudere potest; sed Indulgentias, qui opera præscripta repetit, utique pluries lucrari potest: hoc tamen non intelligitur de Indulgentiis concessis visitantibus præscriptis diebus aliquam Ecclesiam. 16. In concessione facultatis absolvendi à censuris *Bullæ Cœnæ* non includitur facultas absolvendi ab hæresi externâ. 17. Qui jam est absolutus à censuris, aut dispensatus à voto, non reincidit in eas, si Jubilæum non lucratur. 18. Facultas data Monialibus eligendi Confessarium intelligitur de approbato ad Moniales (a). Notandum hic deniquè quòd Regulares possunt confiteri apud quemcumque Sacerdotem ab Ordinario approbatum etiam secularem, ut declaratum fuit à Gregor. XIII. apud *Peyrinum* (b), et etiam ab Alexandro VII. in Constitutione *Urgenitus*.

65. — Quæritur 1. An ad lucrandum Jubilæum omninò in alterutrâ hebdomadâ omnia opera præscripta perfici debeant? Negant *Castrop. Bonac. etc.* consentit *Laym.* si aliqua adfuerit causa. Sed affirmant *Sanch. Lugo, Spor. Renzi, Viva etc.*, et his ego etiam adhæreo, tum quia talis est usus fidelium, tum quia videtur is esse Indulti sensus, cum ibi conceditur Jubilæum ei qui perficit opera diebus *alterius* (non autem dicitur *utriusque*) *ex duabus hebdomadis*. Probabilissimum tamen est

---

(a) *Fusiùs lib. 6. num. 536.* — (b) *Peyr. de Pœnit. Reg. 4. t. 3. c. 4. num. 8.*

Confessionem, et Communionem posse fieri tam in primâ; quam in Dominicâ immediatè sequenti (a). Dicunt *Sanch. Ugol. Busemb.* etc. quòd qui Jubilæum in patriâ lucrari neglexisset, benè posset illud postea lucrari alibi ubi etiam illud duraret. Dicunt insuper *Bonac.* et *Diana* posse lucrari etiam in patriâ, cum ille ex invincibili ignorantia ignoraverit Jubilæum publicatum fuisse (b). Loquendo hic de opere adjuncto ad lucrandum Jubilæum, quoad orationem vocalem in visitatione alii requirunt 7. *Pater*, et *Ave*, alii dicunt sufficere quinque. Circa autem eleemosynam, quanta esse debeat, duo considerata sunt: primò verba Indulti, si dicant *uniuscujusque facultate*, aut *prout devotio suggeret*: secundò causa, quia si eleemosyna imponitur in subsidium alicujus piæ operæ, tunc debet esse uniuscujusque viribus correspondens, si autem dumtaxat ad exercendam misericordiam, tunc sufficit quamcunque parvam summam præstare. Etiam pauperes debent eleemosynam largiri; sed pro Religiosis, filiisfamilias, et pro uxoribus sufficit, ut cum intelligentiâ eorum à superioribus pro ipsis præstetur. Denique quoad jejunia, si quis applicare vellet jejunia ad quæ ex voto, vel aliâ lege tenetur, hæc utique non sufficiunt (c). Advertendum quòd cum datur facultas opera præscripta commutandi, hoc potest efficere quilibet Confessarius (etiam extrâ Confessionem), ut declaratur in Bullâ Indulgentiarum Gregorii XIII. cum ibi dicatur, quòd nomine Confessarii venit quilibet approbatus, ita *Busemb.* cum *Henric.* et *Præpos.* (d).

66. — Quæritur 2. An ob Confessionem invalidam in Jubilæo auferatur reservatio peccatorum, et an à censuris absolvatur? Cum Confessio est nulla culpabiliter, nempe sacrilega; omninò negandum est cum *Lugo*, et *Viva*, etc. quicquid dicant alii, tum ex regulâ illâ quòd *fraus nulli patrocinari debet*: tum magis quia Pontifex in cit. Bullâ declaravit non posse facultatibus gaudere,

(a) n. 53. (b) n. 535. v. 4. Qui. — (c) l. 6. n. 538. Q. XI. et XII. — (d) n. 534. v. Quando.

nisi eum, qui ad consequendum Jubilæum præparatus sit. Si verò Confessio sit nulla defectu doloris, sed culpâ haud cognitâ, tunc volunt *Lugo*, *Coninc. Viva*, etc. reservationem auferri, quia tunc pœnitenti verus est animus Jubilæum lucrandi. Sed hoc non obstante negant *Bonac. Rodriq. Reginald.* etc., et huic sententiæ ego adhæreo, dùm *Benedict. XIV.* in constitut. *Inter præteritos* §. 62. (Bullar. t. 3. p. 140.) declaravit, quod facultates conceduntur *velut præparatio ad consecutionem Jubilæi*: igitur non præsumitur Pontificis voluntas esse, ut facultatibus gaudeant ii, quos facultates non præparant ad consequendum Jubilæum (a).

67. — Quæritur 3. An peccet graviter qui postquam à reservatis absolutus fuit, reliqua opera præscripta negligit? Affirmant *Suar. Vasq. Filliuc.* etc., sed communius negant *Sanch. Lug. Bonac. Castrop. Spor. Salm.* etc., quia in tali casu non apparet talem adesse obligationem, nec ex Jubilæi naturâ, nec ex Pontificis, aut Confessarii præcepto. Cæterum, ut declaravit idem Pontifex, iste in reservationem, aut censuras minimè reincideret (b).

68. — Quæritur 4. An qui confitetur in Jubilæo, et reservati obliviscitur, possit à quocumque Confessario absolvi? Certum est quòd possit, si Confessarius Jubilæi expressè eum à reservatis oblitis absolvere intellexit. Secus autem, si hoc non intellexit, ita *Bonac. Vasq. Sayr.* etc. Sed probabilius affirmant *Navar. Sanch. Suar. Viva, Croix*; etc. dùm præsumitur Confessarius omnia beneficia, quæ potest, pœnitenti suo conferre velle. Et idem probabiliter dicunt *Less. Castrop. Sanc. Spor. Viva*, etc. contrà alios, de votorum commutatione, quia vi Jubilæi pœnitens quoddam acquisivit jus ad talem commutationem. Omnes autem conveniunt, quòd si quis cœpit Confessionem intrâ Jubilæum, potest deindè absolvi ab eodem Confessario; et etiam à reservatis post Jubilæum commissis, ut probabiliter dicunt *Sanch. Viv. Bos.* et alii (c); idem probabiliter

---

(a) *Lib. 6. n. 537. Qu. II.* — (b) *Ibid. Qu. III.* — (c) *Ibid. Qu. IV. in fin.*

probabiliter dicunt *Suar. Sanch. et Emanuel.* (contrà *Conc.*) de eo, qui confitetur animo consequendi Jubilæum, et deindè non consequitur; dùm per absolutionem jam absolutè aufertur reservatio; quin ab eventu futuro pendeat (a). Si verò pœnitens confitetur Superiori extrà Jubilæum, et recordetur reservati, vide dicenda n. 140.

69. — Quæritur 5. An possit absolvi à reservatis peccans in Jubilæi confidentiam? Alii negant, et probabiliter; quia non præsumitur Pontifex velle fovere iniquitatem. Sed alii communiùs, et probabiliùs id affirmant, quia non limitanda est facultas sinè limitatione concessa. Nec dicere valet ità fovere iniquitatem ea remedia, quæ superiores peccantibus præparant (b).

70. — Quæritur 6. An virtute Jubilæi possit absolvi à censuris, qui aliquem damnificavit, antequàm satisfecerit, si adest clausula, *non absolvatur, nisi satisfactâ parte*? Affirmant aliqui DD. dicendo præfatam clausulam potiùs importare suasionem, quàm conditionem; sed negant *Suar. Vasq. Spor. Viva*, etc., et hodiè omninò hoc tenendum est, ut declaravit Benedictus in præfatâ Bullâ. Si tamen debitor omninò satisfaciendo non esset, potest utique absolvi. Modò satisfaciendi, cum poterit, juramentum præstet, ut in eâdem Bullâ cautum est. Quod si, cùm possit, non satisfaceret, aliqui volunt reincidere in censuras; sed probabilius est oppositum cum *Sà, Bos. Spor. Viva*, etc.; nam ex *Cap. Ad reprimendam, de Offic. Ord.* reincidentiâ non incurritur, nisi in lege exprimat. Cæterùm, debitor penitus ab omni satisfaciendi debito liberabitur, si pars remittet injuriam; sed hic benè advertit *Croix*, cum *Filliuc. et Bonac.* contrà *Vivam et Dianam*. 1. Non sufficere Monachi offensi remissionem, si injuria in totum Monasterium redundat. 2. Debitorem liberari, si offensus justam satisfactionem respuit. 3. Si debitor non possit tunc sinè gravissimo damno suo satisfacere

---

(a) *Ibid Qu. V.* — (b) *Ibid. Qu. VI.*  
Tom. II.

(a) ; sed hoc intelligendum juxta dicta *Tom. I. Tr. X. n. 65. et 117.*

71. — Quæritur 7. A quibus casibus, et censuris possint Confessarii absolvere tempore Jubilæi? Communis est sententia cum *Suar. Laym. Vasq. Spor. Viva*, etc. facultatem in Jubilæo concessam absolventi à Papalibus, intelligi etiam de Episcopalibus; et licet Hæretici non possint absolvi, possunt tamen absolvi eorum fautores, et ii qui legunt vel imprimunt libros de hæresi tractantes, et etiam blasphemii hæreticales; ita *Luigo, Sanch. Bos. Suar. Viva, Croix*, etc. quia talia peccata non sunt propriè hæresis formalis (b). Possunt etiam absolvi publici Clericorum percussores, et alii nominatim excommunicati, vel suspensi: sed circa censuras nominatim inflictas ab homine, declaravit Papa ab istis posse absolvi tantum ad effectum indulgentias consequendi (c). Et quoad irregularitates, dixit quod præscindendo à quæstione, an irregularitates ex delicto habeant rationem censuræ sive pœnæ, super illis dispensari possit tantum, quæ ob censuræ violationem incursæ sunt (d).

72. — Loquendo de Jubilæo Anni Sancti, præcipuè notandum est 1. quod eo tempore omnes Indulgentiæ pro vivis suspenduntur; non autem pro defunctis, et pro constitutis in mortis articulo, ut apparet ex Decreto Urbani VIII. apud *Busemb.* nec Indulgentiæ concessæ particularibus ab aliis quàm à Papâ. Notandum 2. quod in Anno Sancto suspenditur etiam facultas absolvendi à casibus Papalibus, et dispensandi à votis etc. concessa in ordine ad lucrandum Indulgentiam plenariam. Sed non suspenditur facultas data Episcopis à Trident. in *Cap. Licet, sess. 24.* nec facultas dispensandi super impedimentis matrimonii, aut petendi debitum etc., quæ facultates Episcopis competunt de jure communi; ita *Busemb. cum Zerul. et Quint. (e).* Addit *Busemb.* cum *Sanch.* et aliis, nec suspendi facultates Regularibus concessas vi suorum privilegiorum absolvendi à reservatis

(a) *Ibid. Qu. VII.* — (b) *Qu. VIII.* — (c) *Ibid. dub. 1.* — (d) *Ibid. dub. 2.* — (e) *Lib. 6. n. 535. Resp. 2.*



etc.; sed Benedictus XIV. in cit. constit. declaravit oppositum, dicens suspendi omnes facultates tam ad effectum Indulgentiarum, quàm ob alias causas (a). Idem declaravit ibidem quòd per verbum *Incolæ* intelliguntur morantes in Urbe Romæ, animo ibi majorem anni partem morandi.

## CAPUT V.

### De Ministro Sacramenti Pœnitentiæ.

73. — **M**INISTER Pœnitentiæ nullus alius quàm Sacerdos esse potest, nam solis Sacerdotibus data fuit peccata remittendi potestas: *Accipite Spiritum Sanctum, quorum remiseritis peccata etc. Joan. 21.* Et quod dicit S. Thomas post sententiarum Magistrum, nempè quòd in necessitate debeat pœnitens cui potest, etiam non Sacerdoti, confiteri, quia tunc supplet Deus, intelligitur ut explicant alii DD. non de præcepto, sed ut tali actu humilitatis excitetur ad contritionem, aut ut solamen, aut consilium recipiat. Dicunt dumtaxat multi cum S. Antonin. *Pœnorm. Ledesin. Sanch. etc.* quòd in mortis articulo, si desit Sacerdos, possunt Clerici absolvere à censuris, ne infirmus sepulturâ, et suffragiis careat; sed probabiliùs id negant *Lug. Laym. Castrop. Salmant. etc.*, quia hoc nunquàm in Ecclesiâ fuit in usu: tantò magis quòd juxtà Rit. si excommunicatus cum pœnitentiæ signis decesserit, potest absolvi ejus cadaver ab habente facultatem. Ad hoc autem, ut Sacerdos validè hoc Sacramentum ministrare possit, præter ordinis potestatem, requiritur, ut habeat ab Ecclesiâ jurisdictionis potestatem, et juxtà Trid. etiam Episcopi approbationem. Hoc tamen non currit pro Regularibus; dùm hi confiteri possunt cuicumque Sacerdoti, etiam non approbato, modo à Præ-

---

(a) Ibid. 536. ad VI.

172 *Tract. 16. De Pœnitentiæ Sacramento.*

lato suo eis concedatur : Monialibus exceptis, quæ licèt exemptæ, sicut statuit Greg. XV., non possunt confiteri, nisi Sacerdotibus approbatis pro ipsis ab ordinario loci (a).

## PUNCTUM I.

### De approbatione Confessarii.

*Necessitas approbationis. Non est necessarium examen 74. Si approbatio injustè revocetur. An successor possit ad examen revocare etc. 75. An Sacerdos simplex possit absolvere à venialibus 76. An Parochus possit sibi adsciscere Parochum alterius Diœcesis 77. An ejusdem Diœcesis 78. Quinam Episcopus approbare potest 79. An Regulares approbati in unâ Diœcesi, etc. 80.*

74. — **A**PPROBATIO non est jam jurisdictionis collatio, sed est judicium à Trident. requisitum de Sacerdotis habilitate ad jurisdictionem recipiendam. Super hoc notanda sunt 1. quòd licèt peccaret Episcopus, qui injustè approbationem alicui negaret, nihilominùs sinè hâc nemo potest Confessiones audire, uti constat ex Propositione 13. damnatâ ab Alex. VII. quæ dicebat: *Satisfacit præcepto annuæ Confessionis qui confitetur Regulari, Episcopo præsentato, sed ab eo injustè reprobato.* Et in quantum ad Regularium Privilegia, quæ opponuntur respondent *Salm.* Privilegia loqui, cùm ipsis negata est injustè jurisdictio, non autem approbatio (b). 2. Ad approbationem non requiri necessariò examen, sed sufficere prudens Episcopi judicium de habilitate Sacerdotis; itâ *Laym. Coninch. et Busemb.* Dicunt item *Sulmant.* quòd licèt Prælatus internè aliquem reprobareret, tamen approbareret eum externè, hoc sufficeret ad ei conferendam jurisdictionem (c). No-

---

(a) *Lib. 6. n. 540. et 541.* — (b) *n. 546.* — (c) *n. 545.*

*Cap. 5. Punct. 1. De approbatione Confess. 173*

tandum 3. Quòd Episcopus potest hanc dare approbationem etiam per alios, nam hic est actus non ordinis, sed jurisdictionis (a).

75. — Notandum 4. Approbationem posse limitari quoad personas, et tempus, et locum. Si autem data esset absolute non dubitatur, quin peccaret Episcopus, si justâ non existente causâ eam revocaret. Dubium restat an talis revocatio injusta, non solum esset illicita, sed etiam invalida? Alii negant; sed affirmant *Suar. Lugo, Castrop. Conc. Salm.* etc. dicendo, quòd sinè justâ causâ non potest privari Confessarius jure suo jam acquisito. Cæterum rectè advertit *Lugo*, quòd in dubio revocatio præsumi debet justa; et hoc posito, sententia præfata difficulter potest deduci in praxim, dùm Episcopo in revocandâ approbatione multæ possunt esse causæ, quæ Confessario ignotæ sunt (b). Notandum 5. Episcopum successorem ex justâ causâ ad examen revocare posse omnes Confessarios approbatos à prædecessore, etiam Parochos, modò vehemens eorum imperitiæ adsit suspicio, ut decrevit S. C. 15. Jan. 1667. (c); et etiam Mendicantes, ut rectè dicunt (contrà aliquos) *Suar. et Lugo*; et super hoc refert *Cabass. Alexand. VII.* 30. Jan. 1656. in causâ Episcopi Andegav. quæ cum diversis Ordinibus Regularibus agebatur, damnasce ut erroneam hanc Propositionem: *Non possunt Episcopi limitare, seu restringere approbationes quas Regularibus concedunt ad Confessiones audiendas, neque ullâ ex parte revocare.* Et præterea refert decisum fuisse in Consilio Statûs Galliæ Episcopum non teneri reddere rationem revocationis approbationum (d). Notetur hic insuper S. Pium V. in Constitut. *Romani Pontificis* dixisse quòd Regulares approbati ab Episcopo prædecessore, ab Episcopo successore examinari de novo poterunt, et si minùs reperti fuerint, reprobari. Hinc inferunt multi AA. ut *Silvest. Mirand. Fagund. Cespida, Nicolius*, et alii apud *Ferraris*, Vicarium Capitularem non posse auferre facultatem Regula-

---

(\*) n. 550. v. 3. — (b) l. 6. num. 551. — (c) *Apud Lambert. Notif.* 9. n. 16. — (d) n. 552.

174 *Tract. 16. De Poenitentiae Sacramento.*

ribus ab Episcopo approbatis, nec ad examen revocare, modò approbatio ab Episcopo data non esset cum clausulâ, *Ad beneplacitum nostrum*; tunc enim morte Episcopi expirat. Nunc restant hîc discutienda 4. dubia.

76. — Dubitatur 1. An Confessiones venialium factæ Sacerdoti simplici sint illicitæ ac invalidæ? Quòd sint illicitæ hodiè in dubium revocari nequit post Decr. Innoc. XI. apud *Bonac.* (a) 12. Febr. 1679. in quo non solùm præceptum fuit Episcopis: *Ne permittant, ut venialium Confessio fiat Sacerdoti non approbato ab Episcopo*; sed præterea hoc vetitum fuit ipsis Sacerdotibus, cùm ibi dicatur: *Si quicumque Sacerdotes secùs egerint, sciant Deo se rationem reddituros.* Dubium ergò restat, an hujusmodi Confessiones sint etiam invalidæ? Communissima est sententia quæ negat; sed cùm valdè probabile sit talem facultatem non habere Sacerdotes simplices directè à Jesu Christo (ut dicunt alii), sed ab Ecclesiâ ut tenent *Suar. Lug. Bonac. Conc. Ronc.* etc. puto valdè probabile esse cum *P. Conc. Platel.* etc. tales Confessiones post Decr. Innoc. hodiè esse etiam nullas; nam non præsumitur Ecclesia velle jurisdictionem conferre eis, quibus expressè illa talis jurisdictionis prohibet usum (b).

77. — Dubitatur 2. An Parochus possit adsciscere Parochos alterius Diœcesis ad audiendas Confessiones in suâ Ecclesiâ? Affirmant *Castropal. Suar. Vasqu. Lugo, Wigandt, Conc. Bonac.* etc. dicendo, quòd Parochus in collatione Parochiæ approbatur pro totâ Ecclesiâ, ex eo quod dicit Trident. (*sess. 23. cap. 15*) *Nullum posse Confessiones audire, nec ad idoneum reputari, nisi aut Parochiale Beneficium, aut ab Episcopis approbationem obtineat.* Ex quo inferunt omnem Parochum approbationem universalem pro totâ Ecclesiâ accipere. Sed probabiliùs hoc negant *Laym. Barb. Piasec. Garc. Croix*, etc. cum *Lamb.* (c), nam per verba allata non intellexit Concil. dare Parochis approbationem universalem,

---

(a) *S. Thom.* 1. D. 5. q. 7. p. 2. — (b) *Lib. 6. a. 543. v. Quær.* — (c) *Notif. 86. n. 7.*

*Cap. 5. Punct. 1. De approbatione Confess. 175*

sed tantum declaravit quemlibet Parochum, collatam sibi Curam, sine alia approbatione approbatum remanere à Concilii dispositione; non autem ab Ecclesia, et pro tota Ecclesia, sed à suo Episcopo, et juxta ejus voluntatem, ut Confessiones suarum ovium audiat. Et super hoc adsunt plures Declarationes S. C. (a). Advertendum hic obiter Parochum qui à Curam se abdicavit, non posse Confessiones audire sine speciali Episcopi approbatione (b).

78. — Dubitatur 3. An Parochus possit sibi adsciscere alium Parochum alterius Parochiae, sed ejusdem Diocesis? Affirmant communius, praeter citatos DD. *Castropal. Croix, et Mazz.* Sed probabiliter hoc etiam negant *Barbosa cum Piasec. Homob.* et cum altera declaratione S. C. Et ratio est, cum probabilius sit, ut dictum est, Parochum non approbari ab Ecclesia universali, sed ut dictum est, à suo Episcopo, et pro ejus voluntate, quoties nescit Episcopum voluntatem habuisse, se pro tota Diocesi approbandi, ille non potest Confessiones audire, nisi tantum in sua Parochia: dum facile esse potest, quod Episcopus eum idoneum judicaverit pro uno, et non pro alio loco, nempe pro oppido, et non pro civitate. Recte tamen dicunt *Bonac. Cleric. et Lambert.* (c) sententiam oppositam bene practicari posse ubi sic fert usus; imò *Wigandt* absolute id admittit, quia dicit talem esse consuetudinem multarum Diocesium.

79. — Dubitatur 4. A quonam Episcopo obtinenda sit approbatio? Sub nomine Episcopi venit quilibet alius Praelatus jurisdictione Episcopali gaudens, ut gaudent nonnulli Abbates, et Capitula Sedibus vacantibus. Venit etiam Episcopus confirmatus, licet non consecratus, sed non qui tantum est electus, aut si Episcopatu se abdicavit, *Lugo, Salm. et Croix* (d). Sed quod magis refert, est ut sciatur quinam intelligatur pro Episcopo proprio, à quo approbatio impertienda est? Alii intelligunt ordinarium poenitentis, alii ordinarium Sacerdotis;

---

(a) *Lib. n. 544. dub. 1.* — (b) *n. 542. v. 2. Etiam.* — (c) *Not. 86. n. 13.* — (d) *n. 547.*

sed hodiè (quicquid dicat *Mazzotta*) procul dubio intelligendus est ordinarius loci, ubi Confessiones audiuntur, ex Bullâ, *Cùm sicut*, Innocenti XII. 19. Aprilis 1700. relatâ per extensum à *Salmant.* (a) (et confirmatâ à Benedicto XIV. in Bullâ *Apostolica*) ubi declaratum fuit, *quosvis Confessarios non posse audire Confessiones Sæcularium in vim Bullæ Cruciatæ sinè approbatione Ordinarii loci; secùs* (dixit) *invalidæ sunt Confessiones, et Confessarii suspensi; et concludit his verbis, Reprobâtâ tanquàm falsâ et temerariâ quâcunque contrariâ opinione.* Hoc non obstante *P. Mazzot.* sustinere contendit improbabilem non esse priorem opinionem, nempe intelligi etiam ordinarium Pœnitentis dicendo, Bullam Innocentii probabiliter intelligi tantum pro iis Confessariis, qui absolvunt contrâ voluntatem suorum ordinariorum. Sed nescio, quomodò hæc interpretatio locum habere possit, dùm expressè Bulla dicit, nullas esse Confessiones, quæ fiunt *sinè approbatione Ordinarii loci, in quo ipsi pœnitentes degunt.* Et si hoc currit pro iis qui privilegio gaudent *Cruciatæ*, tantò magis valebit pro eo qui nullo fruitur privilegio; et ità mecum sentiunt *Ronc.* et *Salm.* qui scripserunt post Bullam Innoc., se revocando ab eo quod priùs docuerant in *Tract. de Pœnitent.* (b). Dicunt tamen *Salm.* hoc currere pro iis, qui privilegio *Cruciatæ* donati sunt, non autem Jubilæi, aut huiusmodi; sed Benedictus XIV. in aliâ Bullâ *Benedictus Deus*, declaravit etiam in Jubilæo sæculares alium non posse eligere sibi Confessarium quàm à loci ordinario approbatum, et Moniales non alium quàm approbatum pro Monialibus (c). Advertendum contrâ valdè probabile esse cum *Croix*, et *Salm.* (qui hanc sententiam, ut communem habent) Parochum posse ubique locorum Confessiones suorum subditorum audire. Et circà hoc adest declarat. S. C. (d).

80. — Quoad Regulares autem antè Innoc. XII. declaraverat Innoc. X. suo Brevi (e) Regulares etiam

---

(a) *Lib. 6. Tract. 18. de Privil. t. 4. n. 80.* — (b) *num. 544. dist. 2.* — (c) *n. 548.* — (d) *n. 544. dist. 1. in fin.* (e) *Ap. Salm. de Pœnit. c. 11. n. 93.*

exemptos qui Confessiones secularium audire cupiunt, approbandos esse ab ordinario loci : *Regulares in unâ Diœcesi approbatos non posse in aliâ Confessiones audire, sinè approbatione Episcopi illius*, sunt verba Brevis, quod postea confirmatum fuit ab Innoc. XIII. in Bullâ *Apostolici Ministerii*, et deindè in quâdam aliâ Bullâ à Benedicto XIII. (a).

## PUNCTUM II.

### De jurisdictione Confessarii.

*Quinam habeat jurisdictionem ordinariam, et quinam delegatam 81. An delegata spiret morte etc. Si habetur à Principe aut ad causarum universitatem 82. De consensu præsumpto Episcopi 83. Qui absolvit cum jurisdictione dubiâ 84. Quis potest sibi eligere Confessarium 85. Quilibet potest confiteri approbato 86. Cuinam confiteri possunt Peregrini 87. Cuinam Religiosi 88. Cui Moniales 89. De titulo colorato, et de errore communi 90. De jurisdictione probabili 91. An excommunicati etc. possint absolvere moribundos 92. An Sacerdotes simplices coram approbatis 93. Casus excepti 94. De Confessario complice in peccato turpi 95. An Confessarii simplices coram superiore 96. An à casibus Papalibus 97. An moribundus teneatur per literas facultatem petere à superiore 98.*

81. — **J**AM dictum est alteram esse potestatem ordinis, quam circâ peccatorum absolutionem recipit quilibet Sacerdos à Jesu Christo, cùm Sacerdotio initiatur : Alteram potestatem jurisdictionis, quæ ei ab Ecclesiâ confertur, ut exerceat ordinis potestatem ergâ subditos suos, super quos Ecclesia auctoritatem ei concedit. Hæc autem potestas jurisdictionis altera est ordinaria, altera delegata. *Ordinaria* est illa quam habent omnes Pastores, ut sunt Papa, Episcopi, Archiepiscopi (cùm visitant subditos Suf-

---

(a) num. 549.

fraganeorum suorum), Parochi, et Prælati Religio-  
num. De Vicariis Generalibus Episcoporum dubita-  
runt nonnulli AA. an ipsi habeant jurisdictionem  
ordinariam in foro Sacramentali, adeo ut possint  
Confessiones excipere, et aliis facultatem dare, di-  
cendo eorum potestatem esse tantum circa causas  
fori externi. Sed affirmat sententia communissima,  
et verior, cum *Fagnan. Hostien. Nav. Azor. Silv. Sanch. Bos. Salm.* et aliis, quia Vicarii habent talem  
jurisdictionem non jam ab Episcopo, sed à Canone,  
sive à Lege, dum ipsi cum Episcopis unum consti-  
tuunt tribunal, ut apparet ex *Cap. 2. de Consuet. in*  
*6. et cap. Romana, de Apellat. in 6. (a). Delegata*  
autem est illa quæ conceditur ab iis qui habent  
ordinariam, ut à Papa qui pro totâ Ecclesiâ con-  
cedere potest, ab Episcopis pro suâ Diœcesi, à  
Prælatiis pro suis Ordinibus, et à Parochis pro suis  
Parochiis. Papa delegare potest facultatem contra  
consensum Episcoporum, et aliorum Prælatorum, et  
Episcopi et Prælati contra consensum Parochorum,  
et inferiorum Prælatorum, sed non è converso (b).

82. — Notandum 1. Jurisdictionem externam ter-  
minari morte concedentis, non autem internam, ut  
dicit *Busemb.* cum aliis: sed melius distinguunt *Sanch.*  
et *Salm.* dicendo hoc currere cum Delegatio est ge-  
neralis (sive sit à Papâ, aut ab Episcopo); secus  
autem cum est particularis pro particulari casu aut  
personâ (c). Notandum 2. Quod Delegatus non potest  
subdelegare, nisi id sibi expressè concessum est.  
Excipitur 1. Si quis esset Delegatus à Principe; sed  
hoc intelligitur ut explicant *Laym. et Castrop. (d)*,  
cum talis Delegatio facta est alicui pro officio, non  
autem cum electa est persona intuitu peritiæ suæ,  
aut cum ei commissa est alicujus causæ expeditio. 2.  
Si quis est Delegatus ad causarum universitatem,  
licet non à Principe; sed in hoc pariter distinguere  
oportet cum *Laym. (e)*, duobus modis posse alicui  
delegari jurisdictionem ad causarum universitatem:

---

(a) n. 557. et 558. — (b) *Lib. 6. n. 558. v. Delegata.* — (c) n.  
559. — (d) *Laym. de Pœnit. c. 10. n. 14. et Castr. eod. tit. d.*  
*un. p. 13. n. 15.* — (e) *Loco cit. n. 12. v. duobus.*



Primò cùm ei committitur aliquod officium cui annexa est jurisdictio, et hoc etiam, licèt officium non sit proprium, sed Vicarii, v. gr. Viceparochi, aut Vicerectoris, in locum Parochi absentis, aut non adhuc Sacerdotis. Talis Vicarius utique potest jurisdictionem suam subdelegare, sed non totam, sed pro unâ aut alterâ causâ, ut communiter dicunt DD., quia huic non solum commissum est Parochi exercitium, sed etiam officium, cui officio non solum competit solus usus, sed etiam jurisdictionis delegatio; ità *Laym. Castrop. Sanch. Coninc. Silv.* et alii cum *S. Thomâ (a)*, qui dicit: *Vicarius non potest totam suam potestatem communicare, sed potest partem.* Secundò, cùm alicui delegata est, non officium, sed jurisdictio tanquàm privilegium perpetuum officio suo, aut jurisdictioni annexum, quia tunc talis jurisdictio judicatur tanquàm ordinaria, prout est facultas *Cap. liceat*, 6. concessa Episcopis à Trident. *Sess. 24.* Dicunt autem *Rod. Beja*, et *Viva*, cum *Navar. Peirin. Naldo, Bord.* etc. quòd si Episcopus dat facultatem alicui Confessario absolvendi ab omnibus reservatis, posset hic subdelegare talem facultatem alteri in aliquo particulari casu; sed melius *Laym.* et *Castrop.* cum *Coninc.* hoc admittunt, si talis facultas concessa est ratione officii, v. g. Parochi, aut Viceparochi, ut superius dictum est, non autem cùm alicui ratione suæ peritiæ, aut probitatis concessa est; nam facultas subdelegandi competit tantum illi cui committitur officium, non autem cui committitur solus usus exercitii Jurisdictionis (b).

83. — Notandum 3. Ad Pœnitentiæ Sacramentum administrandum non sufficere internum Episcopi consensum, nec præsumptum de futuro, sive sit ratihabitio, nempè quòd si sciret, utique assentiretur, quia talis voluntas interpretativa non sufficit ad conferendam pro tempore præsenti jurisdictionem. Sed sufficit contrà consensus præsumptus de præsenti, signis externis patefactus, ut esset si quis, Episcopo præsente, et non contradicente, Confessiones audiret (c).

---

(a) *Quodlib.* 12. q. 13. — (b) n. 566. — (c) n. 570.

84. — Notandum 4. Peccare Sacerdotem qui absolveret ex dubiâ jurisdictione. Sed excipiunt casus in quibus urgeret aliqua necessitas, ut esset (sicut dicunt *Elbel*, *Busemb.* *Holzm.* etc.) 1. Si adesset periculum mortis. 2. Si pœnitens deberet satisfacere præcepto annuæ Confessionis, et non adesset Confessarius qui haberet jurisdictionem certam. 3. Si pœnitens celebrare deberet, aut communicare, et secus incurreret infamiæ notam, aut, addunt *Salm.*, si Sacerdos deberet ex obligatione eo die celebrare. Sed in hoc advertere oportet, quod dictum est *Tract. præcedenti num.* 34, quia si quis certus esset de peccato mortali, et non esset certus de Contritione, in tali casu recipiendo absolutionem dubiam, non posset communicare; tunc enim possideret præceptum de se probando, quod importat absolutionem certam, non verò dubiam. Ceterum in casibus allatis dicunt AA. citati posse Confessarium conditionatam dare absolutionem, *si possum.* Advertunt *Suar. Conc. Reg.* et *Busemb.* expedire tunc quòd pœnitens se accuset de aliquo peccato veniali, ut directè ab illo absolvatur, et indirectè ab aliis (a).

85. — Notandum 5. Possunt sibi eligere Confessarium ratione suorum privilegiorum, 1. Reges, et Principes (nempè qui supremo gaudent dominio). 2. Pontificis domestici (b). 3. Episcopi, etiamsi Titulares sint, ut dicit *Busemb.* Sed in hoc animadverti debet olim ex *Cap. fin. de Pœnit.* tàm Episcopos, quàm Superiores Regulares, ac etiam Prælatos minores exemptos (intelliguntur Prælati Rom. Curie et Superiores Regulares Locales) potuisse sibi in Confessarium eligere quemlibet Sacerdotem; nihilominus S. C. declaravit, ut refert *Fagnan.*, quòd Episcopi confiteri nequeunt, nisi approbatis ab Ordinariis domicilii ipsorum Sacerdotum, sicut explicat *Card. de Lugo*, et hoc confirmatum fuit à Gregorio XIII. 1532. 1. Decemb. ut refert *Fagnan.* et *Pitton.* (c). Concessum est tamen Episcopis secum conducere Confessarium jam approbatum, et ei confiteri etiam in alienâ Diœcesi. Et idem currit pro Cardinalibus:

---

(a) n. 571. — (b) n. 565. — (c) l. 6. 565.

Qui prætereà Romæ degentes possunt sibi et familiæ suæ Confessarium eligere, et eum quòcumque eunt, conducere. Quoad Parochos autem, damnata fuit ab Alexandr. VII Prop. 16. quæ dicebat, eos cuicumque Sacerdoti confiteri posse (a). Loquendo communiter de aliis, dixerunt nonnulli AA. posse aliquem confiteri simplici Sacerdoti, si approbatus esset indoc-tus, aut incurreret periculum gravis damni, si con-fiteretur approbato, aut si ille nollet ejus audire Confessionem; sed omnes istæ opiniones communiter refelluntur (b). Notandum etiam hic Capellanos cas-trorum non posse milites in stationibus commorantes absolvere sinè Pontificis facultate, aut sinè ordina-rii licentiâ, ut pluries declaravit S. C. (c).

86. — Notandum 6. Hodiè certum esse (quicquid olim erat in usu) cuilibet sæculari licere confiteri cuicumque Confessario approbato, etiam contradi-cente Parocho, et etiam pro adimplendo præcepto annuæ Confessionis. Nec obstat quod dixit *Joannes Launojus*, Confessionem præceptam juxtâ Concil. Later. in *Cap. Omnis, de Pœn. et remis.* faciendam esse proprio Parocho, cùm ibi dicatur, *confiteatur proprio Sacerdoti*, dùm pro Sacerdote proprio, ut declaravit Clemens VIII. et Clemens X. in Bullâ *Suprema* (d), intelligitur de quocumque Confessario approbato; et Joan. XXII. in Extrav. *Vas electionis*, damnavit *Joan. Poliacum*, qui docuerat nullas fuisse Confessiones proprio Parocho non factas (e).

87. — Notandum 7. Certum etiam et commune esse hodiè apud DD. ut docent *Castrop. Vasq. Suarez, Conc. Lugo, Bonac. Salm.* etc. peregrinos ratione conniventix Episcoporum, sive meliùs ex consue-tudine universali posse confiteri cuicumque Confes-sario approbato pro loco ubi illi reperiuntur; et talis consuetudo currit, etiamsi peregrinus profi-sciscatur à patriâ sine alibi confitendi, ut dicunt *Pontius, Fill. Renzi, Tambur. Mazz.* etc. (f): vetitum fuit à Clemente X. dumtaxat in alienam Dioe-

---

(a) *Ibid. d. 2.* — (b) n. 568. — (c) *apud Zach. ad Croix l. 6. p. 2. n. 1518.* — (d) *Apud Lambert. notif. 18. n. 7.* — (e) n. 564. v. *Ex conces.* — (f) n. 570.

182 *Tract. 16. De Poenitentiae Sacramento.*

tesim proficisci in fraudem reservationis; de quo in *Cap. VII. n. 135. et 136.*

88. — Notandum 8. Religiosos sinè licentiâ Prælatorum suorum non posse aliis Sacerdotibus extrâ ordinem suum confiteri, ex privilegio quo gaudent Ordines dato ab Innoc. IV. et aliis Pontificibus, et novissime concessum etiam fuit à Bened. XIV. 30. mart. 1742. Capuccinis, quibus vi suarum Regularum vetitum erat confiteri aliis; sed hi non possunt confiteri nisi approbatis ab ordinariis loci, vel Regularibus approbatis à superioribus Regularibus. Sed loquendo de Religiosis peregrinantibus, advertendum, quòd hi si socium sui Ordinis habent, modò ille sit idoneus, huic confiteri debent. Si autem deesset socius, aut alius Sacerdos idoneus sui ordinis, confiteri possunt cuilibet idoneo Sacerdoti Regulari aut seculari. Hoc totum commune est apud DD. *Laym. Ronc. Salm. Tamb. Croix*, etc. et certum est ex verbis Innoc. VIII. mox referendis. Dubium restat an confiteri debeant Sacerdoti approbato? Ità volunt *Wigandt, Conc. Antoine*, cum aliis paucioribus; sed communissima et verior est sententia opposita, quæ id negat cum *Suar. Escob. Castrop. Ronc. Bordon. Salm. Mazzot. Rodr. Tamb.* etc. (exceptis Capuccinis, qui ut paulò antè dictum est ex Bullâ Bened. XIV. debent confiteri approbatis). Et id probatur perspicuè ex concessionibus Sixti IV. et clariùs Innoc. VIII. qui sic dicit: *Nos igitur Fratribus hujusmodi quos itinerari, et per eorum superiores mitti contigerit, ut si aliquem Presbyterum idoneum ex professoribus dicti ordinis habere non possint, quemcumque Presbyterum idoneum Religiosum vel secularem eligere valeant, qui confessiones eorum audire licitè possit.* Et rectè dicunt *Salm. cum S. Antonin. Soto, et Silv.* quod per Tò quemcumque alium Presbyterum intelligitur quicumque Sacerdos simplex idoneus; nam hæc præsumitur etiam esse voluntas Prælatorum in dandâ suis subditis licentiâ foras proficiscendi, juxtâ communem consuetudinem (a). Advertit tamen *Busemb.* hoc intelligi pro non reservatis (b).

---

(a) n. 575. — (b) n. 574. in fin.

89. — Circà autem Confessiones Monialium plura hìc notanda sunt. I. Confessarii Monialium indigent speciali electione, aut saltem approbatione Episcopi loci, licèt Moniales sint exemptæ, et subjectæ Regularibus, ex Bullâ Gregor. XV. *Inscrutabilis*, et ex Bullâ Innoc. XIII. *Apostolici*, confirmatis à Bened. XIII. in Bullâ *Pastoralis*; et hoc etiam pro Confessione venialium, ut declaravit S. C. II. Elapso triennio hujusmodi Confessarii suspensi remanent, nisi accedat licentia S. C. ut etiam declaravit S. C. et hoc etiam currit pro Confessariis conservatoriorum. Si autem Confessarius destinatus esset pro supplemento, probabiliter dicit *P. de Alex. Tianen.* cum aliis, quòd potest confirmari pro alio triennio; quia prohibitio strictè sumenda est de electione ordinariâ. Notat insuper præfatus Auctor quòd aliquubi ob Confessariorum idoneorum deficientiam permittunt Episcopi illos ultrà triennium pergere ad earum Confessiones audiendas: advertit item *Bord.* quòd licèt possint aliquandò Moniales respuere Confessarium designatum, si justa accedit causa, v. g. si Confessarius nimio rigore vir esset, aut suorum propinquorum inimicus, etc. III. Ob diversa Decreta S. C. apud *P. de Alex.* nequeunt esse Monialium Confessarii 1. Vicarii Generales. 2. Parochi, cùm cura notabiliter pateretur detrimentum. 3. Regulares. 4. Canonici Pœnitentarii. Probabiliter tamen dicit præfatus Auctor *de Alex.* permissum esse Episcopo hos eligere, si ità expedire judicaret. IV. Episcopi et Regularium Prælati tenentur bis aut ter in anno exhibere Monialibus sibi subjectis Confessarium extraordinarium, ut præcipuè statuit Innoc. XIII. in Bulla *Apostolici ministerii*, extensâ à Benedicto XIII. ad totum Christianum Orbem, et ut novissimè confirmavit Bened. XIV. in Bullâ *Pastoralis*, 5. Augusti 1748. Dicit *Busemb.* cum *Quintanad.* Moniales, si eis non exhibetur extraordinarius, posse sibi eligere Confessarium, et citat quandam declarationem S. C. apud *Barbos.*; sed hæc opinio meritò rejicitur à *P. de Alex.* tantò magis quòd hodiè præfatus Benedictus declaravit in allatâ Bullâ quòd Moniales, tam Claustrales quàm

Conservatoriorum, si extraordinarium non obtinent, possunt ad Pœnitentiarium majorem recurrere, qui eis illum assignare debeat. Insuper præcipitur in dictâ Bullâ *Pastoralis*, quòd quælibet Monialis, licèt confiteri nolit, teneatur saltem se præsentare ad extraordinarium. Prætereà ibi præcipitur, ut in mortis articulo cuilibet Moniali concedatur Confessarius particularis, si eum illa expostulat; et si Monasterium est exemptum, et Prælatus Regularis illum non concedit, eum assignet Episcopus, et cùm Episcopus nec eum designaret, recurratur ad Pœnitentiarium majorem. Insuper ibi disponitur quòd si qua Monialis recusabit ordinario Confessario confiteri, Episcopus pro certis vicibus ei deputet alium (et in hoc Papa hortatur Episcopos, ne difficiles sint aliquandò concedere dictos extraordinarios illis qui efflagitant). Et si Monasterium est exemptum, deputetur à Prælato Regulari; et cùm ille recusaret, concedatur ab Episcopo, et hoc negligente, concedatur à Pœnitentiariorum majori. Deniquè præcipitur, ut Prælati Regulares bis aut ter in anno assignent Monialibus sibi subjectis Confessarium extraordinarium ex approbatis ab Episcopo pro Monialibus, qui (nota) saltem semel sit secularis aut alterius Ordinis; secùs eum eligat Episcopus; et Papa præcipit ut eo tempore omninò sit prohibitum ordinario Confessiones alicujus audire, ne Abbatissæ quidem, aut Novitiarum. (a).

90. — Restant nunc discutienda multa dubia. Quæritur 1. An in errore communi suppleat Ecclesia jurisdictionem quæ deest Confessario? Si error communis est adjunctus cum titulo colorato, sive putativo, certum est apud omnes Ecclesiam supplere; ità *Sot. Navar. Cajet. Sanch. Cardenas, Concinn. Antoine*, etc. et probatur ex lege *Barbarius, ff. de Offic. Prætor. et ex Cap. Infamis, 3. q. 7.* Ratio est, quia aliàs multæ animæ perirent, ideòque rationabiliter præsumitur Ecclesia supplere; advertit tamen *Sanch.* hoc non currere cùm titulus est fictus, sed cum verè est collatus à superiore, licèt sit tantum

---

(a) *Lib. 6. n. 576.*

putativus, quia fortè superiori prohibitum est illum conferre, sicut dicitur in *Novellâ 44. Cap. 1. Anth. de Tabell.* Sed majus dubium est, an Ecclesia suppleat jurisdictionem, cum solus intervenit error communis, sinè titulo colorato? Negant *Busemb. Concina, Ronc. Sporer, Holzm.* etc. dum dicunt, quòd secus Sacerdotes impii hinc occasionem sumerent se simulandi Confessarios esse, et errores disseminandi. Sed hæc ratio non convincit, quia quamvis Ecclesia his negaret jurisdictionem, nec damnum impediret; quare probabiliter affirmant *Lugo, Less. Ronc. Castrop. Sanch.* etc. et dicunt probabile esse iidem *Ronc. Spor. et Holzm.* cum *Carden. Viva, Hen. Elbel*, dum eadem ratio boni communis, quæ pro titulo colorato affertur, currit etiam pro errore communi (a).

91, — Quæritur 2. An liceat Confessario absolvere cum jurisdictione probabili? Hic tres adsunt sententiæ. Prima est pauciorum, nempe *Eliz. Conc. et Antoine*, qui absolute negant: Dicunt hi, quòd ex Propositione 1. proscriptâ ab Innoc. XI. non licet uti opinione probabili in Sacramentis conferendis. Secunda est communis et communiter affirmat cum *Less. Filliuc. Cardenas, Lugo, Sanch. Bonac. Castr. Salm. Viva, Croix*, etc. et moraliter certam appellant *Sanch. Cardenas, Dicast. Tamb. Gormaz*, etc. Alii assignant rationem erroris communis, sed hæc non convincit; ratio vera est consuetudo universalis, quæ est in Ecclesiâ in absolvendo cum jurisdictione probabili, ut testantur AA. citati; et consuetudo utique dat jurisdictionem, sicut docent etiam communiter *Suar. Barbos. Carden. Quaranta, et Pelliz.* Et probatur apertè ex *Cap. Contingat, de foro compet.* ubi sic habetur: *Nisi fortè hi quibus delinquentes ipsi deserviunt, ex indulgentiâ, vel consuetudine (nota) speciali jurisdictionem hujusmodi valeant sibi vendicare.* Neque hinc obstat dicta Prop. damnata quam opponunt, nam (ut benè respondent *Viva, et Wig. cum Gonet.*) Propositio loquitur de opinionibus circa ea, in quibus nil potest Ecclesia,

---

(a) n. 572.

ut circà materiam et formam Sacramentorum; sed circà jurisdictionem supplere quidem potest Ecclesia, et præsumitur eam certè supplere ob bonum animarum: quare Confessarius in tali eventu non absolvit cum sententiâ probabili, sed cum certâ. Tertia deniquè sententia, quam nos sequimur cum *Suar. Marchan. Gobat. Wigandt, Holzm. Barb. Sporer, Elbel* et aliis, dicit tunc tantum licere aliquem absolvere cum opinione probabili, cùm concurrat aliqua causa graviter rationabilis; aliter non præsumi debet Ecclesiam favere velle nimie Confessoriorum libertati. Causa autem rationabilis esset 1. Si Pœnitens præcipuè Confessarii auxilio indigeret. 2. Si complex peccati sit cognitus Confessario, qui habet jurisdictionem certam. 3. Si aliàs adesset periculum faciendi Confessionem sacrilegam. 4. Si Pœnitens timeret incurrere aversionem aut suspicionem nocivam, si confiteretur Confessario certam habenti jurisdictionem; aut si aliàs diutius à Confessione abstinere deberet. 5. Si urgeret præceptum annuæ Confessionis, aut lucrandi Indulgentias peculiares (a). Addo, si jam pœnitens aperuisset Confessario aliquod suum grave peccatum, et dubitaretur, an illud sit nec ne reservatum, ut dicitur num. 142.

92. — Quæritur 3. An in articulo mortis possint omnes simplices Sacerdotes absolvere, etiam Hæretici, Schismatici, aut Excommunicati vitandi? Jam compertum est in morte omnes Sacerdotes etiam degradatos posse absolvere à quocumque peccato, et censurâ reservatâ. Et hoc non solum in articulo, sed etiam in periculo mortis, ut sententia communissima et verior asserit; ità *Navar. Silv. Suar. Sanch. Lugo, Castrop. Salm.* etc. contra *Sotum*, et *Canum*; nam in hâc materiâ idem est de articulo ac de periculo, ut patet ex *Cap. Si quis suadente*, 29. causa 17. q. 4. ubi dicitur: *Nullus Episcoporum illum præsumat absolvere, nisi mortis urgente periculo.* Et ratio est quia quilibet fidelis tam tenetur ad confitendum in articulo, quàm in periculo mor-

---

(a) *Lib. 6. n. 573.*



tis. Tale periculum autem judicatur esse in prælio, in longâ navigatione, in partu difficili, et in omni periculoso morbo; ità *Sanch. et Salm.* qui dicunt idem de quocunque qui esset in periculo probabili incidendi in amentiam, aut esset captivus apud Turcas, et timeret futurum esse, ut eò nullus ad-ventarèt Sacerdos, ut confiteri posset (a). Sed veniamus ad quæsitum, an Sacerdotes ab Ecclesiâ abscissi, ut sunt Hæretici, Schismatici, et Excommuni-cati vitandi possint moribundos absolvere? Affir- mant *Sanch. Suar. Navar. Lugo, Salm.* et alii, et probant ex Trid. sess. 14. Cap. 7. ubi dicitur: *In eâdem Ecclesiâ Dei custoditum semper fuit, ut nulla sit reservatio in articulo mortis; atque idè omnes Sacerdotes quoslibet pœnitentes à quibusvis peccatis, et censuris absolvere possint.* Sed negant *Fagnan. Petroc. Concina*, etc. cum declaratione S. C. Et pro hâc sententiâ est *S. Thomas* (b) qui, loquendo de abscissis ab Ecclesiæ communione, dicit, hos tan- tum posse baptizare in mortis articulo, sed in nullo casu posse aliud ministrare Sacramentum. Nec ob- stat Concil. quia, ut ajunt, ibi nova lex non con- ditor, sed tantum declaratur jus antiquum, cum dicatur, *in eâdem Ecclesiâ Dei custoditum semper fuit* etc. Atque probat *Fagnan.* sicut etiam decla- ravit S. C. et idem *Nav.* fatetur, olim communem fuisse sententiam cum *Magistro sententiarum, S. Thomâ, Scoto, S. Antonin. Ricar. Turrecr.* excom- municatos in nullo casu posse absolvere (c). Atta- men *P. Lucius Ferraris* in suâ *Biblioth. verb. Moribundus*, advertit, quòd P. Franciscus Campioni in *Instruct. ad Confess. cap. 41. n. 12.* refert ex Card. Albitio *part. 1. de Inconst. in Fide cap. 13. et 19*, quòd prædicta Declaratio Sacræ Congregationis Conc. adducta à *Fagnano* non reperitur in Concilii Reges- tis: signum, quòd vel non emanarit, vel expuncta fuerit, uti contraria communi sententiæ, occasione cujusdam Episcopi, cui respondentem affirmativè ob- jecta fuit doctrina *Fagnani*; at dubio delato ad Innocentium XI, hic jussit suppressi quæstionem,

(a) n. 561. — (b) 2 p. q. 82. a. 7. ad 2. — (c) Lib. 6. n. 560.

nec ampliùs dubitari moribundum in defectu alterius Sacerdotis validè et licitè absolvi ab excommunicato vitando, degradato, aut hæretico.

93. — Quæritur 4. An Sacerdos simplex possit absolute moribundum coram approbato? Prima sententia communissima negat cum *Mol. Sanch. Azor. Bonac. Cardenas, Lugo, Laym. Salm.* etc. et probatur ex Trident. loco cit. ubi dicitur: *Verumtamen ut piè admodum, ne hac occasione aliquis pereat, in eadem Ecclesiâ Dei custoditum*, et sequuntur alia verba superiùs relata. Ex præfato textu infertur 1. Concil. novam non condidisse legem, sed declarasse antiquam, et antiqua lex erat quòd Sacerdotes simplices tunc tantum absolvere possent moribundos, cum deerant approbati, juxtà textus ab AA. cit. allatos. 2. Quòd in tantum Ecclesia dat facultatem Sacerdotibus simplicibus, in quantum adest necessitas extrema, *ne aliquis pereat*; sed cessat hæc ratio, cum adest approbatus. Contrà secunda sententia affirmat *Nav. Barb. Sayr. Sa*, etc. et probabilem appellant *Lugo, Viv. Sporer* etc. dicendo verba Concilii esse generalia; *Atque idè omnes Sacerdotes quoslibet pœnitentes à quibusvis peccatis censuris absolvere possunt*. Ad Canones antiquos respondent, eos non loqui de absolutione Sacramentali, sed de solâ reconciliatione peccatorum publicorum. Hoc non obstante, judico non esse recedendum à sententiâ oppositâ; 1. quia in Rit. Rom. (*de Pœnit. sub. init.*) hoc declaratur expressè, dum dicitur: *Sed si periculum mortis immineat, approbatusque desit Confessarius, quilibet Sacerdos potest absolvere*. Et quod Rituale declaret antiquum Ecclesiæ usum, constat ex eo quod Paulus V. in suâ Bullâ dicit, ubi præcipit inviolabiliter observari. Rituale, cum in eo contineantur ea quæ *Catholica Ecclesia et ab eâ probatus usus antiquitatis statuit*. 2. Quia præfata verba Concil. *atque idè* etc. ut dicunt *Pagnan. Petrocor.* et *Auctor. de Offic. Confess.* apud *Croix*, non jam ad quoslibet referuntur Sacerdotes, sed ad eos duntaxat de quibus loquitur Concilium in præfato *Cap. 7.*, nempe de iis qui *ordinariam, aut subdelegatam*

*habent jurisdictionem* ; tantò magis quòd in fine dicti capitis addit : *Extra quem articulum Sacerdotes , cùm nihil possint in casibus reservatis , id unum pœnitentibus persuadere nitantur , ut ad superiores pro beneficio absolutionis accedant.* En sermo est de simplicibus Confessariis ( de quibus tantùm dici potest quòd nihil possunt in reservatis ), non jam de simplici Sacerdote ; et ità declaravit S. C. Conc. ut refert *Fagnan.* Quòd autem Sacerdotes etiam simplices possint absolvere in morte , deficientibus approbatis , dicimus hoc non haberi à Trident. , sed ab aliis Canonibus , et communi Ecclesiæ consuetudine (a).

94. — Probabiliter tamen conveniunt DD. primæ sententiæ in dicendo , quòd sacerdos simplex potest absolvere etiam præsente approbato in sequentibus casibus : 1. Si approbatus non potest , nec vult absolvere. 2. Si is sit nominatim excommunicatus , aut suspensus. 3. Si sit approbatus tantùm in alienâ Diœcesi. 4. Si Moribundus ità horreret confiteri approbato , ut esset in periculo sacrilegè confitendi , ut dicunt *Croix* , et *Mazzot.* ex *S. Thomâ.* Et putat *Sporer* , idem esse , si infirmus confiteri non posset approbato sinè magnâ difficultate vel incommodo , aut si ipse putaret simplicem Confessarium fore sibi utiliozem. Si Confessio jam inchoata esset apud simplicem , quia tunc ille jam acquisivit jurisdictionem ; secùs autem , si infirmus jam absolutus fuisset ( modò non esset circumstantia peccati jam confessi ) ; et secùs etiam , si infirmus aliquâ excommunicatione reservatâ esset ligatus , quia tunc , licèt Confessionem incœpisset apud simplicem , præsente superiore , debet à superiore priùs ab excommunicatione absolvi , et postea Confessionem apud simplicem persolvere. 6. Si approbatus fuisset complex in peccato turpi pœnitentis , sicut declaravit Benedictus XIV. (b). Sed super hoc puncto complicitis opus est majore distinctione.

---

(a) *Lib. 6. n. 562.* — (b) *n. 563.*

95. — Præfatus Pontifex in duabus Bullis (quarum altera incipit *Sacramentum*, et altera *Apostolici*) dixit Confessarium ergà complicem *in peccato turpi contra sextum Præceptum* privari omni jurisdictione, et excommunicationem Papalem incurrere, si excipere audeat illius Confessionem. Excipit solam extremam necessitatem mortis, in quâ permittit absolvere complicem; modò alius desit Sacerdos, etiam simplex, qui infirmum absolvere valeat; aut modò ille Sacerdos non possit infirmi Confessionem excipere sinè gravi scandalo, et infamiâ approbati. Addit tamen Pontifex quòd ille (si potest) tenetur removere tale periculum scandali, aut infamiæ, sub pœnâ ejusdem excommunicationis, licèt si illud non removeret, valida esset absolutio (a). Circa cujusmodi Bullas advertendum 1. Quòd nomine *peccati turpis* contra sextum Præceptum, non solùm intelligendum est peccatum fornicationis etc. consummatum, sed etiam tactus, et colloquium obscœnum, quoties mortale attingit. Ità dicunt *Salmant.* (b). Contra vero non comprehenduntur culpæ veniales, sive tales sint ob parvitatem materiæ, sive ob defectum deliberationis; ità *Salmant. ibid. n. 277*. Idemque rectè dicunt *n. 278.* de mortalibus internis, vel non plenè externè significatis, quoniam etiam actio debet esse externè gravis. Nec comprehenduntur mortalia dubia facti vel juris; *Salmant. ibid. n. 280.* (vide id quod dicetur hìc infrà *n. 142.*). Nec cùm dubium vertitur, an Pœnitens ipse quoque graviter peccaverit, quia Bulla intelligitur de complici formali in peccato mortali turpi; *Salmant. cit. num. 283. et num. 241.* Advertendum 2. absolutio-nem impertitam à Confessario complici, si pœnitens non adhuc ab alio de peccato turpi absolutus est, esse invalidam etiam quoad alia peccata, secùs autem, si ab alio jam absolutus fuisset. Hæc duo videntur certa. Sed concurrunt duo dubia, an incurrat excommunicationem Confessarius qui jam non absolvit, sed tantùm audit complicem suum in Con-

---

(a) *cit. num. 563.* — (b) *Append. de Bullâ Cruc. cap. 6. p. 169. ex n. 282.*

fessione, et fingit eum absolvere? Ego dudum fui pro affirmativâ sententiâ, ex quodam Sacræ Pœnitentiariæ responso; sed postea lectâ Bullâ, *Inter præteritos*, ejusdem Pontificis, inveni declaratum oppositum, cum dicatur ibi: *Non minus Sacerdoti complici, qui vel extrâ mortis articulum Confessionem excipit pœnitentis, eumque (nota) absolvit; vel in articulo mortis absolvit, cum alius Sacerdos non desit, excommunicationis majoris pœna à nobis imposita fuit.* Alterum dubium est, an Episcopus virtute Cap. *Liceat*, et Sess. 24. Trident. possit absolvere Confessarium, qui absolvit complicem suum in peccato turpi. Vide dicenda *Tom. III. Tr. XX. de Privil. num. 37. (a).*

96. — Quæritur 5. An præsentate superiore, possit in articulo mortis quilibet Confessarius approbatus absolvere infirmum à peccatis, et censuris reservatis? Respondetur distinguendo: Quoad peccata utique potest, quia in morte cessat omnis reservatio, ut declaravit Concilium, adeò ut rectè dicunt *Suar. Salm. Pallud. Navar. Granad. Præpos.* etc. moribundo à reservatis absoluto nullam restare obligationem, si convaluerit, se præsentandi superiori (sed hoc non currit si pœnitens est absolutus in aliquâ necessitate, non quidem mortis) (b). Præterea dicunt *Suarez, Lugo, Sanchez, Salmantic.* etc. quòd si moribundus habet reservata, et adest Confessarius approbatus, non potest Sacerdos simplex absolvere, licet Confessarius ille careat facultate super reservatis; dum in mortis articulo (ut suprâ dictum est) cessat omnis reservatio. Quoad autem censuras reservatas, Confessarius simplex non potest coram superiore absolvere, quia cum certum sit moribundum, si convaluerit, teneri superiorem adire, non jam ut denuò absolvatur, sed ut suam obedientiam ostendat, et ut pœnitentiam majorem recipiat, si superior ei illam imponit, secus si non se præsentet, in eandem incidit censuram, ut docent communiter *Suar. Sanch. Salm.* etc. ex Cap. *Eos qui, de Sent. excom. in 6.* Hinc fit quòd si superior adest, ab eo à censuris infirmus absolvendus est (c).

---

(a) *Lib. n. 6. 554. 555. et 556.* (b) *Vide n. 91.* — (c) *Lib. 6. n. 563. D. I. et n. 567.*

192 *Tract. 16. De Pœnitentiæ Sacramento.*

79.—Quæritur 6. An præsentē Episcopo possit quilibet Confessarius absolvere moribundum à Papalibus? Alii DD. distinguunt ut *Mol. Suar. Sanch.*, et dicunt non posse, si casus est occultus; quia tunc Episcopus super illo ordinariâ procedit jurisdictione ex *Cap. Liceat*; et idem dicunt de percussione publicâ Clerici juxtâ caput *Ea noscitur, de sent. Excom.* ubi dicitur ob talem excommunicationem, si nequeat adiri Pontifex, adeundum esse Episcopum. Contrâ affirmant posse simplicem Confessarium absolvere etiam præsentē Episcopo, si casus est publicus (intellige præter Clerici percussione,) quia tunc eâdem ac Episcopus est præditus facultate Confessarius simplex. Sed hanc secundam partem communissimè negant *Navar. Castrop. Coninch. Avil. Sayr. Corn. Hurtad. Salmant.* etc. dicentes præfatum textum in *Cap. Ea noscitur*, non solum valere pro publicâ Clerici percussione, sed etiam pro quâlibet censurâ Papali, dum pro istis eadem currit ratio; et sicut in quæsito antecedenti probavimus, non possunt censuræ absolvi, præsentē superiore. Sed hoc non obstante, non puto improbabilem primam sententiam, cum certum non sit textum præfatum ad omnes extendi censuras (a).

98. — Quæritur 7. An Confessarius possit absolvere moribundum à censuris Papalibus, cum ille posset facultatem ab Episcopo per literas impetrare? Negant *Lugo, Bonac. Suar. Croix*, etc., sed communius et probabilius affirmant *Azor. Castrop. Sanch. Valenza, Conc. Carden. Spor. Szlm. Viva*, etc. tum quia in petendâ facultate per literas potest subesse periculum manifestationis; tum quia in *Cap. Quamvis, de sent. Ex om.* impeditus dicitur quicumque aliquo est præpeditus impedimento, quominus Pontificem adire possit (b).

CAPUT VI.

---

(a) n. 563. D. II. — (b) *Ibid.* D. III.

## CAPUT VI.

### De officio et aliis muneribus Confessarii.

*De scientiâ necessariâ Confessario 99. et 100. Quot sunt munera Confessarii 101. I. De examine 102. et 103. II. De judicio peccatorum 104. III. De instructione 105. IV. De admonitione 106. et 107. Si admonitio non sit profutura 108. ad 112. Si Matrimonium est nullum 113. Si sponsi sint parati ad nuptias 114. Si adest obligatio restitutionis. Si admonitio sit postmodum profutura 115. Si pœnitens interrogat etc. Si adest damnum commune. In dubio an admonitio etc. 116. V. De absolutione 117. Quæ certitudo de absolutione etc. 118. Si pœnitens pro se habeat opinionem probabilem 119. Si pœnitens negat aut tacet peccatum 120. VI. De corrigendis erroribus. De errore circa Sacramenti valorem 121. Circa restitutionem à quâ pœnitens dissuasus est etc. 122. Aut ad quam non fuit obligatus 123. An possit admoneri pœnitens licentiâ ejus non petitiâ 124. VIII. De obligatione ministrandi hoc Sacramentum. An cum periculo mortis, etc. 125. An Sacerdos simplex teneatur ad se habilem reddendum 126. et 127.*

99. — **C**UPIENTI hoc Sacramentum Pœnitentiæ administrare, primum omnium acquirenda est necessaria scientia, quâ hujus magni ministerii officio rectè fungi possit. Sed hîc advertendum est quod scripsit S. Gregor. quòd sit *Ars artium, regimen animarum*. Et S. Franciscus Salesius dicebat, Confessarii Officium esse maximi momenti et omnium difficillimum. Et ità est: Maximi utique momenti est, quia est finis omnium scientiarum, qui salus æterna est: Difficillimum, quia 1. requirit notitiam quasi omnium aliarum scientiarum, et omnium officiorum, et artium. 2. Scientia moralis tot materias disparatas complectitur. 3. Illa magnâ ex parte la-

Tom. II.

gibus positivis constat, quarum quælibet juxta proprium sensum et intelligentiam accipienda est. Præterea ob circumstantias, quæ casus dissimiles efficiunt, resolutiones variandæ sunt. Quidam qui eruditos, et Theologos magnæ notæ se jactant, Moralistas, quos Casuistas (nomen ignominia apud ipsos) appellant, dedignantur ne cursim quidem legere. Dicunt sufficere, ut Confessiones ritè excipi possint, principia generalia Moralis callere, illis enim posse resolvi, ajunt, omnes casus particulares. Quis negare potest, omnes casus particulares esse his principiis resolvendos? Sed totum opus, et totus labor est in aptando casibus particularibus tantis diversis circumstantiis irretitis, principia hujusmodi, utque discernatur quodnam principiorum occurrentibus circumstantiis congruat. Nequit id fieri sinè magnâ discussione rationum, quæ pro utrâque parte adsunt. Et hoc est illud, quod Moralistæ effecerunt, cùm elaborarunt in explicando à quibus principiis multi casus particulares resolvi debeant: Præterea, hæc nostrâ tempestate, ut dictum est, adsunt tot leges positivæ, tot Bullæ, tot Decreta, quæ nequeunt sciri, nisi Casuistæ legantur, qui ea collegerunt, et prout materiarum varietas postulat, ibi opportunè illa inveniuntur; ideòque, quo recentiores ii Moralistæ sunt, eo antiquis utiliores. Justâ ratione motus *Auctor Instructionum pro Novis Confessariis* (a), affirmat, multos Theologos quantò profundiores sunt in scientiis speculativis, tantò rudiores in scientiis moralibus, quæ, ut scribit *Gerson* (b), omnium difficillimæ sunt, et nemo doctus, quantumvis sit in his versatissimus, est, cui in dies nova non accidunt. Ex quo infert, numquàm Confessario deserendum esse Theologiæ Moralis studium. Doctissimus *Sperelli* (c) pariter dicit longè errare eos Confessarios, qui totos in Scholasticæ studio se applicant, æstimantes tempus in Morali frustrâ expendi; *Et postea nesciunt distin-*

---

(a) *Part. 1.º, 18.* — (b) *Tract. de Orat.* — (c) *De Episc.*  
p. 3. c. 4.



*guere lepram à leprâ : qui error (subjungit) Confessarios simul et pœnites in æternam perturbationem trahet.* Peccat igitur absque dubio graviter qui non sufficienter instructus audet Confessiones audire : Episcopus qui illum approbat : Pœnitens quoque qui noscens ignorantiam ejus, apud ipsum cōfītetur.

100. — Non negamus autem minorem scientiam exigi in audiendis Confessionibus simplicium, et Rusticorum, quàm Curialistarum, Negotiantium, Ecclesiasticorum, et similium. Minor item scientia requiritur, ut audiantur Confessiones in oppido, quàm in civitate; et præcipuè si alicubi sit tanta Confessariorum inopia, ut pœnites deberent, aut per longum tempus à Confessione se abstinere, aut aliò proficisci (a). Sed hoc non sufficit ad excusandos aliquos Confessarios, qui, cursim lectâ aliquâ brevi summâ Morali, temerè ad excipiendas Confessiones se intromittunt. Oportet saltem, ut Confessarius sciat I. Ad quæ sua jurisdictio se extendat. Advertat hiæ quisque, Sacerdotes seculares, et Regulares alterius ordinis non posse audire Confessiones Religiosorum sinè licentiâ suorum Prælatorum; exceptis casibus, si iter agant, si alibi morentur, et socium non habeant, aut alium Sacerdotem idoneum ejusdem Religionis. Et tunc Religiosi possunt absolvi à quocumque simplici Sacerdote (exceptis Capuccinis, vide num. 88.), dùm superiores tunc, dando licentiam his subditis, intendunt eam dare juxtà consuetudinem, scilicet confitendi cuivis Sacerdoti idoneo. (b). Item quivis Confessarius scire debet casus, et censuras reservatas, saltem eas in quas frequentius incurri solet, prout sunt Excommunicationes Papales quæ sunt in Bullâ Cœnæ, hæresis externata, lectio aut retentio aut venditio librorum Hæreticorum, qui ex professo de Religione tractant, aut continent hæresim formalem : item quinque casus Papales Clementis VIII. qui sunt percussio enormis, aut mediocris Clerici, vel Monachi, Simonia realis, aut confidentialis, Violatio Claturæ Monialium ad malum finem, Violatio immunitatis Ecclesiasticæ, et

(a) Lib. 6. n. 628. — (b) n. 575.

Duellum : item excommunicationes à summo Pontifice Benedicto XIV. emanatæ in absolventes complices in materiâ turpi (a), et in eos qui docent posse à Confessario exquiri nomen complicitis, etiam per absolutionis Sacramentalis negationem, si revelare recuset (b); et aliæ excommunicationes obviæ, quæ observari possunt in Tractatu de censuris. Sciât II. distinguere peccatum veniale à mortali, saltem in suo genere, quo communiter occurri solet; et de aliis saltem dubitare sciât. III. Sciât interrogationes quas facere debet: circumstantiâs peccatorum saltem speciem mutantes: quid constituat occasionem proximam, quid inducat restitutionis obligationem, item qualis esse debeat dolor, et propositum, et deniquè remedia ad emendationem efficaciora. Et ut brevibus me expediam, affirmo in statu damnationis esse eum Confessarium qui sinè sufficienti scientiâ ad Confessiones excipiendas se exponit. Deus ipse his verbis eum exprobrat: *Quoniam tu scientiam repulisti, repellam te, ne Sacerdotio fungaris mihi* (c). Nec excusabit eum Episcopi approbatio, cùm cognoscit manifestè se inhabilem; approbatio enim non infundit scientiam necessariam, sed supponit. Dico manifestè, dum qui tantum dubitaret, benè potest, imò debet quiescere in sui superioris iudicio confisus, si saltem seduliori studio se habilem reddere satagat. At nullus Confessarius intermittere debet Theologiæ Moralis studium, quia ex tot rebus tam diversis, et inter se disparibus, quæ ad hanc scientiam pertinent, multa quamvis lecta, quia rarius accidunt, temporis progressu è mente decidunt; quâ de re oportet semper frequenti studio eas in memoriam revocare.

101. — Præterea advertendum plura alia esse Confessarii munera, nempe I. ut pœnitentis conscientiam investiget. II. Ut de peccatorum gravitate, et numero debitum formet iudicium. III. Ut pœnitentem instruat de iis quæ scienda sunt circa fidem, et mores. IV. Ut eum admoneat de suis obligationibus. V. Ut absolvat dispositum. VI. Deniquè tenetur Con-

---

(a) Num. 553. — (b) n. 491. — (c) *Osee* c. 4.

fessarius emendare errores, quos in audiendis Confessionibus commisit.

102. — I. Igitur tenetur Confessarius diligenter pœnitentis conscientiam cognoscere. Confessarius est iudex; Judicis officium importat, ut sicut Iudex prius rationes cognoscere debet, inde causæ momenta discutere, et deniquè sententiam proferre; ita Confessarius prius conscius fieri debet pœnitentis conscientiae, postea ejus dispositionis inspicere, et tandem absolutionem impertire aut denegare. Et quoad primum munus, quod est peccata pœnitentis cognoscere, quàmvis debitum conscientiam examinandi sit præcipuum pœnitentis, nihilominus (quicquid alii DD. (a) dixerint), non est dubitandum, quin si Confessarius cognoverit pœnitentem non satis diligenter conscientiam suam discussisse, tenetur ipse eum interrogare, prius de peccatis in quæ verisimiliter incidere potuerat, et postea de eorum numero, et specie, ut probatur ex cap. *Omnis utriusque etc. de Pœnit. et Rit. Rom.* (b).

103. — Et hic multa advertenda sunt. 1. Perperam eos agere qui rudes dimittunt, ut melius se examinent; hoc P. Segneri (c) vocat errorem intolerabilem, et jure optimo, quia hujusmodi omnes quantum laborent, difficulter se examinabunt, ut par est, et ita exactè, sicut potest ipse Confessarius. eos examinare; et contra cum dimissi sunt, periculum erit ne exterriti difficultate se examinandi, à confitendo retrahantur, et in peccatis obdurescant (d). Quà de re confessarius debet ipse ex hujusmodi pœnitentibus peccata exquirere, eos interrogando juxta ordinem Præceptorum, præcipuè si sunt famuli, aurigæ, muliones, milites, satellites, caupones, et alii id genus, qui æternæ salutis vitam negligentem vivere solent, et rerum divinarum sunt ignari, quia stant procul à concionibus, et Ecclesiis. Et hic pejor error esset, si ob defectum examinis dimitteret aliquem rudem, qui antea propter ruborem aliquod peccatum reticuerit, licet repetendæ essent Confes-

(a) Ap. Lochner. Instr. pag. 33. — (b) lib. 6. num. 607. — (c) Confess. instr. c. 2. — (d) lib. 6. n. 607. v. Sed hæc.

siones multorum annorum , propter majus periculum quod tunc subest , nempe quòd si non redeat , peribit. Mihi videor aliquem Confessarium audire sic respondere : *Si non redit , pejus sibi erit malum.* Pulchrum quidem charitatis spiritum ! Sed sic non loquuntur qui verum habent zelum animas lucrandi : dicamus melius , qui hoc munere dumtaxat Deo funguntur. Advertat nihilominus Confessarius se non teneri tam minutè hos interrogare ; interroget tantum de peccatis , in quæ faciliter incidere possunt , spectatâ eorum conditione et capacitate (a). Imò cum pœnitens , licet rudis , videatur sufficienter instructus , et diligens in confitendo peccata cum circumstantiis suis , juxtâ statum suum et capacitatem (aliò enim modo tenetur se examinare doctus , et aliò rudis) , tunc Confessarius nihil aliud tenetur interrogare (b). II. Notandum cum *Lug. Salm. et Dicast.* melius esse , si Confessarius singillatim examinet peccata statim ac exponit pœnitens , quàm ut differat examen usque ad finem ; quia aut faciliter Confessarius obliviscitur eorum quæ audivit ; aut obligandus esset pœnitens cum suo gravi onere ad repetenda confessa (c). III. Errare eos Confessarios , qui volunt certum judicium facere de peccati qualitate , an sit grave , vel leve , exquirendo à rudibus istis , utrùm pro mortali habebant , an pro veniali ; hi enim multoties respondent ut casus sibi verba suggerit , et hoc experientiâ testamur (ut ego millies observavi). Quod si Confessarius paulo post iterum interroget ; respondent modo toto à primo diverso. IV. Advertendum circa numerum peccatorum , quorum habitu aliqui tenentur , cum non possit haberi numerus certus ; curet Confessarius statum pœnitentis cognoscere , nempe vivendi rationem , applicationem quam impendit ad alia negotia , tempus consuetudinis cum complice , locum ubi potissimum moratus est ; et deindè interroget de numero , interrogando pœnitentem , quoties circiter peccaverit in die , aut in hebdomadâ , aut mense ; proponens ei plures numeros , ex gr. ter , aut quater , octies , vel

---

(a) *Ibid. ad n. III.* — (b) *Ibid. ad II.* — (c) *Ibid. ad n. IV.*

decies, ut videat cui numero potius ille adhæreat; et si pœnitens numero majori adhæret, optimum factum erit, si iterum interrogetur de numero majori, sed in hoc, ut benè advertit *Buxemb.*, Confessarius non sit nimis sollicitus, et anxius ad formandum certum iudicium de numero peccatorum; notet frequentiam in genere, et in confuso iudicium faciat, apprehendendo peccata quotquot sint apud Deum. Aliqui DD. dicunt, circa peccata interna habituatorum, ut sunt peccata odii, delectationum, et desideriorum pravorum, sufficere plerumque interrogare de tempore, per quod duravit malus habitus; sed hoc mihi omninò non satisfacit, quia potest esse quòd aliquis sit magis intentus ad externa negotia, aut moretur ubi pauciores sibi occurrent pravarum cogitationum occasiones, alius erit magis alio animi passione allectus; ideòque opus est interrogationes generales adhibere, de propriâ applicatione, de loco, de animi inclinatione, etc. ut formet iudicium majoris, vel minoris frequentiae actuum interiorum. Cæterum post duas, vel tres interrogationes, non debet angi Confessarius, si ei iudicium quod facit, videtur esse nimis confusum; nam ex conscientiiis implicatis, et confusis moraliter impossibile est maiorem claritatem sperare: V. Regulariter loquendo non expedit, ut Confessarius reprehendat pœnitentem in Confessionis cursu, ne ille exterrfactus omittat aliquod peccatum. Nihilominus expedit aliquandò intrâ Confessionem ei proponere malitiam alicujus gravioris peccati, modò statim ei præbeatur animus dicendo: *Sed nunc vis verè vitam mutare? eja ergò, fac ut hæc confessio sit bona: noli timere; dic omnia peccata, quoniam ab omnibus te absolvam.* VI. Oportet animadvertere, quòd licet Confessiones generales sint utilissimæ, nihilominus Confessarius non sit nimis rigorosus ad procurandum, ut Confessiones præteritæ repetantur (a); nam præsumptio stat pro validitate, quoties error non sit manifestus, ut ait *Segneri*. Nec lapsus sunt certa indicia Confessiones fuisse nullas, præcipuè si per

(a) *Lib. 6. n. 605.*

200 *Tract. 16. De Pœnitentiæ Sacramento.*

aliquod tempus non ceciderit, aut si antequàm caderet, sibi aliquam vim intulerit. Aliud tamen iudicium fieri debet, si pœnitens plerumque statim ceciderit, post duos nempe vel tres dies à Confessione factâ, quin aliquo modo tentationi obstiterit; tunc enim videtur moraliter certus doloris, ac propositi defectus.

104. — II. Cùm Confessarius peccata audiverit tenetur iudicium facere de gravitate, et numero eorum, quia licet, ut validè absolvat, sufficiat ut peccatum cognoscat, saltem sub confusâ ratione peccati; attamen ut licitè absolvat, debet prudens formare iudicium uniusejusque culpæ, saltem in iis quæ communiter occurrunt; nam alias magis obscuras et minùs usuales sufficit ut audiat et absolvat, ut sunt coram Deo; *Lug. Holzmann. Salm. Spor. etc. (a)*. Advertendum hìc sæpiùs errare Confessarios qui iudicium certum formare cupiunt de peccati quantitate, utrùm sit grave, aut leve, interrogando pœnitentes rudes, quomodò illud tenebant in conscientiâ, an tamquàm mortale vel veniale. Hi plerumque respondent ad sortem, et dicunt quod priùs in os venit, et hoc experienciâ cognoscitur (sicut mihi mille millies accidit); quòd si mox Confessarius iterum eos interrogat, dicunt totum oppositum. Præterea, hìc advertendum, quoad pœnitentis obligationem, quòd si ille advertit Confessarium non apprehendere gravitatem peccati sui, tenetur illum monitum facere, aliàs ejus Confessio erit sacrilega. Et ità pariter si peractâ Confessione, advertit Confessarium non percipisse suum peccatum, debet illud repetere.

105. — III. Confessarius tenetur instruere Pœnitentem cùm observat, aut prudenter judicat illum necessaria Fidei, et salutis ignorare. Sufficiet cæteroquin quòd tunc antequàm absolutionem ei impartiat, eum instruat circà Mystéria principalia; prout dictum est *Tom. I. Tr. IV. n. 3*, quia quoad cætera necessaria de præcepto sufficit, quòd pœnitens promittat, quòd se instruere faciat ab aliis, saltem quoad substantiam; et Confessarii qui nimia

---

(a) n. 627.

caritate fervent non recusant eos docere per seip-  
sos. Debet pariter Confessarius instruere pœnitentem  
circa obligationem compensandi famam; hono-  
rem, aut bona, occasionem vitandi, scandalum  
illatum reparandi, correctionem faciendi, aut eleē-  
mosynam largiendi, quandò ad id tenetur. Item  
animadvertendum, quòd si pœnitens accedit indis-  
positus, tenetur Confessarius (ut docent *Laym.*  
*Suar. Busemb. Spor. etc.*) pro viribus efficere, ut  
eum disponat ad absolutionem (a). Circa quod nes-  
cio quomodò excusari possint coram Deo illi Con-  
fessarii desides, qui ubi cognoscunt pœnitentem non  
esse satis dispositum, eum à se dimittunt, dicendo  
ei inurbano modo: *Discede hinc, te absolvere  
non possum, redi imposterum.* Ego dico cum AA.  
citatis, Confessarium quoties pœnitentis Confessio-  
nem suscipit, sub rigorosâ caritatis obligatione,  
quantum facere potest, teneri ut ad absolutionem  
eum disponat, ei proponendo illius peccatorum  
turpitudinem, Gratiæ Divinæ efficaciam, damna-  
tionis periculum, et his similes veritates. Nec suâ  
referre debet quòd in hoc tempus insumatur, et  
quòd reliqui pœnitentes abibunt, ne tantum expec-  
tent. Ille tunc non tenetur aliorum bona prospici-  
cere, sed tantum pœnitentis sui: pro hoc dum-  
taxat illo tempore Deo rationem redditurus est,  
non pro aliis. Satiùs est (dicebat *S. Franciscus Xa-  
verius*), paucas Confessiones audire, et ritè factas;  
quàm multas, et temerè properatas, et sinè fructu.  
Quot istorum ad me venerunt indispositi, et ego,  
Divino auxilio opitulante, disponere curavi: et dis-  
positos tutò, et meâ maximâ consolatione absolutos  
dimisi! Saltem hoc inserviet ut benè instituat  
ad reddendum dispositum pœnitentem pro tempore,  
quo redditurus erit.

106. — IV. Confessarius tenetur admonere pœ-  
nitentem. Sed ut admonitiones convenientes faciat,  
non debet Confessarius tantum cognoscere speciem,  
et numerum peccatorum, sed etiam eorum origi-  
nem, et causas, ut remediis opportunis occurrat.

(a) *Lib. 6. n. 608. Hic Adverto.*

Nonnulli Confessarii interrogant tantum de specie, et numero peccatorum, et nihil amplius: si vident pœnitentem dispositum, eum absolvunt; sin minus, quin aliquid eis dicant, statim eum dimittunt, dicendo: *Abi, non possum te absolvere.* Non ita boni Confessarii agunt: hi prius indagare incipiunt originem, et mali gravitatem, interrogando de peccandi consuetudine, de occasionibus, de tempore, de loco, de personis, cum quibus, quibus rerum circumstantiis; sic enim melius poterunt Pœnitentes corripere, eos ad absolutionem disponere, et remedia salutaria adungere.

107. — His interrogationibus adhibitis, et cognitâ morbi origine ac gravitate, Confessarius ad debitas animadversiones faciendas procedat. Et quamvis ipse tamquam Pater debeat in caritate pœnitentes auscultare, tamen ut Medicus tenetur (quantum opus est) eos monere et corrigere, eos præsertim qui multis mortalibus gravati ad pœnitentiæ Sacramentum rarò accedunt. Et hoc munus etiam adimplere debet, si pœnitens aliquâ illustri fulgeat qualitate, nimirum si fuerit Magistratus, Princeps, Sacerdos, Parochus, aut Prælati, si de aliquâ sui muneris omissione sine nimio animi sensu se accusaret. Ait Benedictus XIV. in Bullâ *Apostolica* §. 12. Confessarii admonitiones concionibus ipsis esse efficaciores; et jure merito, quia concionatorem latent circumstantiæ particulares quæ Confessario apertè innotescunt; ideòque multò melius poterit debitas adhibere animadversiones, et remedia, quæ morbis expediunt, applicare; et ita etiam Confessarius tenetur pœnitentem admonere de aliquâ ignorantia culpabili, si quâ laborat, sive hæc sit juris naturalis, sive positivi. Quod si pœnitens teneretur ignorantia culpabili, tunc si ea esset circa media scitu necessaria ad salutem, aut illa bono communi officiat, omninò debet Confessarius ab hâc ignorantia eum remove, et veritatem docere, licet nullus speretur fructus.

108. — Sed quæritur: si ignorantia esset circa alia, et esset invincibilis, adeo ut pœnitens esset in perfectâ bonâ fide, an Confessarius eum teneat



tur admonere de veritate, etiamsi ex admonitione nullus speraretur fructus? Nonnulli DD. affirmant, ut *Adria. Wigandt, Conc.* et alii pauci cum *Eliz. et Gonzalez* (licet hi excipiant ignorantiam circa praecepta humana); hanc opinionem novissimè etiam tutatus est pluribus *P. Liberius* de Jesu Carmelita Excalceatorum in suis controversiis Dogmaticis, sed ex hoc non multum sibi decoris adeptus est, dum rationes quibus utitur sunt nimis, tenuis furfuris. Rationes quas adducit sunt eadem, quæ in oppositionem adducuntur. Contra negat sententia communis et vera, cum *Cano, Suar. Nav. P. Sot. Cord. Laym. Sanch. Lug. Vasq. Castrop. Bonac. Ponc. Coninc. Anacl. Escob. Roncagl. Sporer. Elb. Viv. Holzm. Salm.* et aliis innumeris (a), et in hoc invenio convenire duos alios AA. doctrinæ valde rigidioris, nempe *Habert* et *Antoine*; loquendo *Habert* de Matrimonio irritato, ex aliquo occulto impedimento, dicit: *Si adversum malum occultum, et invincibiliter ignoratum nullum appareat remedium, et gravia incommoda praevideantur, dissimulandum est (à Confessario) impedimentum, et conjux in bonâ fide relinquenda.* Et pariter *Antoine* sic scribit: *Si probabile periculum sit, ne ex admonitione sequatur peccatum formale pœnitentis, vel grave scandalum etc. differenda est monitio, petenda dispensatio (b),*

109. — Auctores nostræ sententiæ probant 1. afferendo textum *S. Augustino* relatum in *Can. Si quis, de Pœnit. D. 7.* Sed cæteroquin satis congruè hunc textum solvit *Conc.*, quia reverà ad rem non facit; potius facit auctoritas *S. Bernardi* (*Serm. 41. in Cant.*) qui dicit: *Mallem aliquandò tacuisse, et dissimulasse, quod agi perperam deprehendi, quàm ad tantam reprehendisse perniciem.* Probant 2. ex *C. Quia circa, de Consan.* ubi interrogatus *Innoc. III.* circa aliquos qui Matrimonio copulati erant ex dispensatione subreptitiâ, respondit ad Episcopum: *Dissimulare poteris, cum ex separatione grave videas scandalum imminere.* Sed hæc Decretalis ne satis quidem probat, dum dubium est an

---

(a) *Lib. 6. n. 610.* — (b) *Ibid.*

Pontifex ità respondendo voluisset forsàn dispensare super impedimento, ut dicitur, in radice Matrimonii. Ceterùm præfata sententia probatur ratione validissimâ, nempe ex duobus malis minus permittendum est, ut vitetur majus; quare Confessarius in nostro casu tacere debet et permittere pœnitentem (in bonâ fide constitutum) in peccato materiali versari, ut ipse à formali liberetur, veritatem rei non aperiendo; nam Deus tantùm peccatum formale punit, et ab hoc solo se offensum iri declarat; ideòque per consequens dicimus Confessarium aliter agendo peccare. Sed hæc ratio meliùs expendetur in responsionibus ad ea quæ opponuntur.

110. — Objiciunt 1. illud Ezechiëlis : *Si me dicente ad impium, impie, morte morieris, non fueris locutus, ut se custodiat impius à viâ suâ : impius in impietate suâ morietur, sanguinem autem ejus de manu tuâ requiram. Ezech. 33. 8.* Sed quis non videt hîc loqui de impio, qui est in malâ fide, et quem tenetur utique Confessarius omni casu corrumpere, ut respiscat? Et sic intelligendi sunt alii textus Scripturæ, ac Sanctorum Patrum, qui in contrarium afferuntur. Objiciunt 2. *Cap. qui scandalizaverit, 3. de Reg. Jur.* ubi dicitur : *Utiliùs scandalum nasci permittitur quàm veritas relinquatur.* Sed ut responsio intelligatur, oportet percipere casum, de quo loquebatur Beda, Auctor hujus textus. Beda (referente Glossâ) loquebatur de eo, de quo dixit Jesus Pharisæis : *Non quod intrat in os, coinquinat hominem, sed quod procedit ex ore,* etc. *Matth. 15. 11.* Itaque loquendo Beda de scandalo mero Pharisæico, ideò dicit quòd licèt Pharisæi scandalizarentur, vel ut meliùs dicam, admirarentur doctrinam tamquàm laxam, utiliùs erat hoc scandalum permittere, quàm veritatis expositionem omittere. Quid ergò ad nostrum casum? Opponunt 3. quandam doctrinam *S. Thomæ (a)*; sed ibi loquitur clarè S. Doctor, dicit enim veritatem non lædi cùm à concionatore, cujus munus est

---

(a) *In 4. d. 38. q. 2. a. 4. q. 1. ad 3.*

eam patefacere, veritas tacetur, sed cum illa mutilatur, nempe cum pars ejus patefit, et pars tacetur, adeo ut ex taciturnitate partis aliquis error in alios diffunditur; verb. gr. si Concionator diceret: in tertio gradu non licere contrahere Matrimonium inter propinquos, auditores inducerentur ad credendum, utique licere in quarto. Opponunt 4. et dicunt Confessarii esse etiam munus Doctoris, ideoque illum teneri ad docendum veritatem: Respondetur quod Confessarius non tantum Doctoris, sed etiam Medici fungitur officio; unde cum observat medicinam, nempe admonitionem in poenitentis perniciem redundare, debet ab illa abstinere. Et licet sit Doctor, quia tamen munus ejus est caritatis, à Redemptore institutum dumtaxat in bonum animarum, debet ille utique veritatem docere, sed circa illa dumtaxat quæ poenitenti prosunt, non autem circa ea quæ nocitura sunt, ideoque ait S. Thomas (a) loquendo de eo qui docendi officium habet: *Contrarium veritati non doceat, sed veritatem* (nota) *secundum congruentiam temporis et personarum proponat ille, cui incumbit officium docendi.*

III. — Opponunt 5. hujusmodi ignorantiam poenitentis in hoc casu non esse invincibilem, sed vincibilem, dum ipsi patet via ad veritatem cognoscendam; et si vincibilis est, est etiam culpabilis. Sed respondetur quod ignorantia, ut sit culpabilis in aliquo, non sufficit quod cognoscere possit veritatem, sed necesse est, ut ei superveniat dubium præcepti, aliàs ignorantia ejus ex necessitate invincibilis est. Certum autem est, ut docet S. Thomas (b), eam esse ignorantiam invincibilem, quæ studio superari non potest. Quo igitur studio superare quis potest ignorantiam suam, si nulla de illa dubitatio, aut saltem de obligatione quam habet illam vincendi, venit ei in mentem? Propterea dicunt DD. S. Antonin. Silv. Gers. Suar. Cajet. Navar. Armil. Castrop. San. Vasq. Sair. Salm. etc. (c) ad constituendam ignorantiam vin-

---

(a) 2. 2. q. 43. a. 7. ad 2. — (b) 2. 2. q. 76. a. 2. — (c) n. 1. v. 2.

cibilem, opus esse ut homo advertat præceptum, aut saltem obligationem ad illud advertendi; nam sicut ad hoc ut ad legis observantiam teneamur, necesse est, ut lex sit nobis intimata; ita, ut teneamur ad advertendum ad legem, opus est ut nobis indicetur talis obligatio per ejus notitiam, aut saltem per dubitationem de illâ; quare scitè concludit loquendo de hoc puncto *P. Segneri (a)*: *Tunc ignorantia invincibilis est, cum personæ principium dubitandi non suboritur, et consequenter nullus ei modus offertur, ut errorem suum vincat.*

112. — Opponent 6. et dicunt sic: si talis pœnitens admonitus esset, jam ille peccaret, cum tunc reus jam fieret ignorantiae vincibilis; ergo est semper indispositus ad absolutionem. Sed hoc argumentum, cui valdè innituntur adversarii, mihi videtur parùm sapientiæ eorum dignum. Quis non videt fallaciam, quæ involvitur, et responsionem claram quæ patet? In pœnitente non est necessaria dispositio interpretativa, nempe quod si ille in tali aut tali rerum conflictu reperiretur, non peccaret, quando ad id omninò non reflectit; quia aliter, si Confessarii præsumere vellent interpretativas pœnitentium indispositiones, paucos possent absolvere, dum possent judicare quod multi eorum, quibus filii interfecti fuissent, certe odio moverentur in interfectores; si à Tyrannis essent tormentis tentati, à fide deficerent; sufficit ergo in pœnitente eam dispositionem actualem invenire, ut absolvat; nempe ut hîc et nunc statuatur amplius non peccare in quocumque casu generali. Et sic sufficit pro absolutione, quod pœnitens *hîc et nunc* sit dispositus per voluntatem actualem; nec obstat quod esset indispositus per interpretativam, nempe si à Confessario monitus esset. Itaque (concludamus) ex his oppositionibus dignoscitur quàm persistere nequeat sententia opposita. Sicut etiam (mihi lubet aliquantulum ad alia divertere) sunt labantes quædam

---

(a) *Lib. I. Confes. Instruct. c. 7.*

aliæ opiniones quas hodiè tutari volunt nonnulli, qui jactare videntur rigidioris esse nominis. Ceteroquin commendare mihi nunquàm fuit animus eos auctores, qui, ut animarum bono consulerent, conscientiarum habenas nimis laxare voluerunt; quia licèt Dominus velit omnes homines salvos fieri, sed vult ut per legum suarum observantiam salventur. At nec laudare possum alios, qui nimis conscientias coercere quærunt, assignando multis leges quibus Deus noluit, aut saltem non manifestavit se velle nos teneri. Nescio utrùm minùs scrupuli sit faciendum animas ad certas nimis rigidas opiniones adstringere cum periculo earum totalis perniciiei? quàm approbare opiniones nimis benignas. Quod pejus est, nunc temporis tot libri contumeliis, acerrimis objurgationibus, et satyricis aculeis suffulti circumferri conspiciuntur vicissim inter Auctores tam rigidæ quàm benignæ sententiæ; quod quidem scandalo toti Ecclesiæ est, et obloquendi inimicis materiam offert. Et pariter pro veritate in propatulo collocandâ, eam magis dubiis et tenebris offundit: dùm ex hujusmodi dicendi ratione quilibet facillè existimat non rationem, sed potius susceptæ sententiæ adhæSIONem, ac concitati animi æstum eos ad sic scribendum compulisse, et qui ex adhæSIONe et animi æstu loquitur, nec sibi fidem assequitur, nec alios persuadet.

113. — Sed undè discessimus revertamur. Ex præfatâ communi sententiâ infertur 1. cum *Laym. Sanch. Lugo, Castrop. Salm. Holzm. Hab. Antoine*, et aliis communiter, quòd in casu quo pœnitens contraxisset Matrimonium invalidum ob aliquod occultum impedimentum, et in bonâ fide versaretur; et contrà esset periculum infamiæ, scandali, aut incontinentiæ, si ei aperiretur nullitas; tunc confessarius debet eum relinquere in bonâ fide, usque dùm ei dispensatio impetrabitur; excepto, si dispensatio statim et faciliter obtineri possit à Papâ; aut saltem ab Episcopo juxtâ communem, et valde probabilem sententiam (a); quòd si non vacat

---

(a) *Lib. 6. num. 612.*

tempus adeundi Papam, et aliter imminet periculum scandalı, aut infamiæ, potest Episcopus dispensare in impedimentis etiam dirimentibus post Matrimonium contractum; Vide *Tract. XVIII. n. 58.* Sed in eo casu quo si forte uxor se accusat negasse debitum viro, quæritur an possit Confessarius eam obligare ad illud reddendum? Multi affirmant, ut *Lugo, Sanch. Coninch. Cardub. Henrig. Escob. Lod. Croix* etc., quia tunc illa (uti dicunt) eum putet Matrimonium esse validum, tenetur sequi dictamen conscientiæ. Sed in hoc tutior mihi videtur opinio *Soti, Hurtad. et Bonac.* quod tunc Confessarius ei dicat in genere, quod illa nequit absolvi, si obligationi suæ satisfacere renuit; et quod jam scitur mulierem teneri suo viro debitum reddere (a). Sed si Matrimonium contractum non est, sed jam jam contrahendum est nulliter, quæritur an Confessarius debeat monere pœnitentem de nullitate, cum animadvertit monitionem profuturam non fore? Alii absolutè negant; alii affirmant; sed probabilius *Castrop. et Salm.* dicunt regulariter loquendo in eo casu faciendam esse monitionem, præsertim si impedimentum oritur ex consanguinitate, quia tunc nulla subest infamia in suspendendis nuptiis; tantò magis quod hujusmodi impedimentum facillè postea potest cognosci ab ipsismet sponsis, et tunc peccatum eorum facillè ex materiali potest fieri formale. Quare in tali casu cum semper subsit aliqua spes fore ut prosit, non est omittenda correctio, ita *Layman*; sed si omninò desperetur fructus, dicunt iidem citati AA. *Laym. Castrop. Salm. cum Croix, et Aver.* quod Confessarius tacere debeat usquè dum impetrabit dispensationem (b).

114. — Sed hic congruit loqui de quodam casu facilis eventus, et difficilis resolutionis: Quomodo se gerere debeat Confessarius, si sponsis in Ecclesià jam paratis pro celebrandis nuptiis, alter eorum

---

(a) num. 611. — (b) num. 61.

in Confessione aperiret impedimentum occultum, et non possit sinè infamiâ, aut scandalo Matrimonium differri? Nonnulli DD. suadent, ut pœnitens voveat castitatem, saltem ad tempus, ut possit in differendo Matrimonio hæc causa proponi. Sed meritò dicunt *Ronc. et Instructor pro Nov. Confes.* quòd hoc remedium periculo non caret, quia facilliter potest pro prætextu cognosci. Alii autem tenent permittendum esse tale Matrimonium, quin aliquid ei dicatur. Sed valdè probabiliter, et communissimè docent *Suar. Pignat. Cabass. San. Bonac. Ronc. Salm.* etc. cum Benedicto XIV. (a) quòd in tali casu, et in tali rerum angustia potest dispensare Episcopus; et hanc facultatem dicunt *Sanch. Ronc. Castrop. Conin. Vasq. Val. Salm. Elbel,* etc. Episcopum posse aliis etiam delegare, etiam generaliter, dum annexa est officio Episcopali. Inò dicunt, et quidem non sinè fundamento, *Ronc. et Instructor etc.* præfatus cum auctoritate *Pignat.* quòd cum in hoc casu lex impedimenti reddatur nociva, posset Parochus, aut alter Confessarius prudens declarare talem legem non obligare. Advertunt tamen pro majori securitate, et etiam pro reverentiâ ergà Ecclesiæ leges recurri debere ad Sacram Pœnitentiarum, ut ab eâ obtineatur dispensatio (b).

115. — Hinc infertur 2. cum *Cano, Suar. Ponc. Laym. San. Lu. Vasq. Coninch. Ronc. Salm.* et aliis etiam communiter, quòd ubi omninò desperetur fructus, omittenda est etiam admonitio alicujus restitutionis faciendæ, quia evitari debet priùs damnum spirituale proximi, quàm temporale alterius. Et idem dicunt *Suar. Lugo, Sanch. Laym. Ronc. Vasq. Castrop. Salm.* si ex admonitione timeantur scandala, infamiæ, aut rixæ; quia semper melius est malum formale avertere, quàm materiale (c). Animadvertunt tamen *Ronc. et Viva* cum *Laym.* non ità facillè judicari debere pœnitentem cognita

---

(a) *De Synod. l. 7. c. 31. n. 2.* — (b) *Lib. 6. n. 613.* —  
(c) *Ibid. v. inf. II. c. III.*

veritate parere nolle ; et si non statim , saltem cùm animi commotio sedata erit. Imò ait *Lugo* cum aliis, admonitionem non esse omittendam, licèt scandalo futura sit , cum spes fulget scandalum brevi fore ut cesset ; sed hæc doctrina intelligi debet sicut docet Benedictus XIV, nempe quòd locum habeat in casu quo tacente Confessario , peccator in malo obfirmaretur, cum scandalo aliorum ; aut cùm pœnitens in proximâ versatur occasione peccatorum saltem cogitationis , quibus olim solitus fuit assentiri (a). Animadvertunt contrà *Lugo*, *Tamb.* et *Busemb.* Confessarium posse relinquere Pœnitentem in bonâ fide , et differre ad tempus opportunius admonitionem , si pro tunc timet, ne æquo animo eam haud ferat (b).

116. — In duobus tamen casibus omittendum non est, quin Confessarius veritatem pœnitenti aperiat. Primus, quando Pœnitens eum interrogaret : Quia tunc procul dubio Confessarius veritatem ei aperire debet, dùm non esset amplius nunc invincibilis ignorantia. (c). Secundus casus est, cùm ex ejus ignorantia damnum spirituale Communitati futurum fuisset, ut docent communiter *Lugo*, *Busemb.* *Avers.* *Salm.* *Dicast.* etc. (d), quia tunc Confessarius admonere tenetur pœnitentem, licèt admonitio pro tunc ei scandalo sit ; nam talis pœnitens, cùm videat à nemine se absolvi, nisi resipiscat, speratur fore ut saltem intrâ aliquod temporis emendetur ; contrà non obstat quòd pro illo tunc admonitio sit ei occasio ruinæ, quia Confessarius est Minister non tantùm constitutus pro consulendo bono particularium pœnitentium, sed etiam pro bono totius Reipublicæ Christianæ, idèoque præferre debet bonum commune bono privato sui pœnitentis. Omninò igitur à Confessario admonendi sunt Principes, Gubernatores, Prælati, Parochi, et Confessarii, qui officio suo desunt, sive injustè administrando justitiam, sive eligendo indignos Minis-

---

(a) num. 619. v. *Excip. III.* — (b) num. 609. v. 9. —  
(c) num. 611. v. *Excip. II.* — (d) num. 665.



tros, sivè conferendo Officia aut Beneficia indignis, sivè in vana impendendo fructus suorum Beneficiorum cum scandalo aliorum, aut indebitè Sacramenta ministrando; nam ignorantia istorum difficulter erit invincibilis, et licèt esset invincibilis, semper damnum afferret Communitati, saltem ob scandalum, dùm alii de facili putant esse licitum quod vident factitari à superioribus. Et sicut docet Benedictus XIV. in laudatâ Bullâ *Apostolica*, idem practicandum est cum iis qui Sacramenta frequentant, ne alii ab eis pravum sumant exemplum (a). Quid autem faciendum sit à Confessario in dubio, utrùm correctio profutura, an nocitura sit; dicunt *Lugo. Dicast. Salm.* etc. tunc librandum esse timorem damni et spem utilitatis; et eligendum quod videtur præponderantius. Ceterùm, regulariter loquendo, in dubio semper potiùs vitanda sunt mala formalia, quàm materialia; idem *Conc.* loquendo de correctione fraternâ, dicit quòd in dubio utrùm illa profutura an obfutura sit, omittenda illa est, quia imprudenter operatur (sic ille scribit) qui dubitando, se conjicit in periculum causæ esse proximo alicujus peccati (b).

117. — V. Confessarius tenetur absolvere pœnitentem cum est dispositus. Circa hanc dispositionem multa advertanda sunt. 1. Perpauco esse pœnitentes, præsertim rudes, qui præposito actu doloris ad confitendum accedant. Nonnulli Confessarii putant satis suo muneri fecisse, si duntaxat hujusmodi pœnitentes sequenti modo interrogent: *Eja, postulasne à Deo veniam de omnibus his?* (quod reverà non est verus actus doloris): *Te pœnitet ex corde omnium peccatorum?* Et nullo alio verbo interposito, absolutionem eis elargiuntur. Aliud sanè est bonorum Confessariorum institutum; hi enim in primis elaborant, ut pœnitentes (sermo est de iis qui lethalibus tenentur) verum dolorem et detestationem peccatorum conceipiant, et priùs per

---

(a) *Cit. num. 615. v. Excipe tamen I.* — (b) 616. v. *Utrum.*

attritionis actum eos præparent, v. gr. *Fili mi, ubi nunc esse deberes in æternum? in inferno. In illo igne semper cruciandus esses.... Nec tibi ulla spes amplius restaret, ut te illinc eripere posses... Ibi esses moraturus ab omnibus derelictus, à Deo rejectus per totam æternitatem.... Igitur tene pœnitet Deum offendisse, propter infernum quem meruisti?* Advertendum hic est non fieri actum attritionis, si quis diceret, se pœnitere peccati commissi, quia meruit infernum, sed opus habet, ut dicat se pœnitere offendisse Deum, propter quod meruit infernum. Postea curet, ut eliciatur actus contritionis hoc modo : *Fili mi, quid egisti? peccasti in Deum summum et infinitè bonum : nullam illius rationem habuisti : Avertisti faciem tuam ab eo : projectisti eum post tergum tuum : Contempsisti amicitiam, et gratiam ejus : Eja ergò, quia offendisti Deum, bonitatem infinitam, nunc ex toto corde te pœniteat. Detestare, et odio habere super omnia mala omnes injurias, quibus immeritò Deum tam bonum affecisti : Nonne jam promptus es millies mori, potius quàm hæc in posterum committere?* Advertendum 2. regulariter loquendo teneri Confessarium absolvere dispositos, sed posse etiam absolutionem differre eis, cum cognoscit id expedire, ut docent communiter DD. (a). An autem hoc expediat nec ne facere sinè pœnitentis consensu, vide dicenda *Tom. III. Tr. ult. Punct. II.* cum sermo erit de Recidivis. Advertendum 3. Confessarium certum fieri debere de pœnitentis dispositione, ut possit eum absolvere, dum actus pœnitentis (in quibus consistit dispositio) sunt materia Sacramenti Pœnitentiæ, sed sicut in ceteris Sacramentis, quia materia est physica, physica debet esse etiam certitudo; ità in hoc quia materia est moralis (cum sit interna, adeoque parùm sensibus perceptibilis), sufficit certitudo moralis; juxtà regulam *S. Thomæ (b)*, qui dicit : *Certitudo non est similiter quærenda in omnibus, sed in undâque materiâ secundum proprium modum : Unde sufficit Confessario pro absolutione imper-*

---

(a) *Lib. 6. num. 462.* — (b) 2. 2. q. 47. a. 9. ad 2.

tiendâ, ut prudens iudicium probabile de pœnitentis dispositione habeat, ut scribit *Instructor Confess. Nov.* (a), quin obstet aliqua prudens suspicio in contrarium de dispositione. Idem dicunt *P. Card. P. Mazzot. et P. Suar.* qui ita scribit : *Sufficit ut Confessarius prudenter et probabiliter iudicet pœnitentem esse dispositum.* Idem docet *Catech. Rom. (de Pœnit. n. 60.)* : *Si auditâ Confessione (Sacerdos) iudicaverit neque in enumerandis peccatis diligentiam, nec in detestandis dolorem pœnitenti omninò defuisse, absolvere poterit.* Itaque juxtâ *Catechismum* absolvere potest pœnitentem, quoties non iudicat ei omninò defuisse dolorem; nam cæteroquin præsumentus est adfuisse in pœnitente qui jam confessus est (b).

118. — Hic occurrit loqui de illâ magnâ questione hodiè adeò controversâ inter DD. an Confessarius possit et debeat absolvere eum qui vult sequi aliquam opinionem quam probabilem iudicat, licèt Confessarius uti talem non habeat? Si pœnitens est indoctus, adeò ut nequeat sibi formare conscientiam rectam ex probabilitate illius opinionis, certum est tunc eum non posse absolvi. Sed dubium restat cùm pœnitens est capax sibi formandi conscientiam rectam, an possit et debeat Confessarius eum absolvere? Negant *Fagn. Elizar. Antoin.* et alii rigidioris sententiæ fautores, dicentes in Sacramento Pœnitentiæ Confessarium esse iudicem et Pœnitentem debere stare iudicio Iudicis sui. Sed sententia communis docet Confessarium in eo casu posse et debere absolvere sub gravi (saltem si Confessio facta fuerit de materiâ gravi, dùm dicunt *Suar. Sanch. etc.* (c) negare absolutionem de materiâ levî non excedere veniale). Itâ *Navar. Sot. Azor. Suar. Salm. Med. Castrop. Valen. Sair. Vasquez, Laym. Roncagl. etc.* et in hoc consentiunt etiam AA. probabilioristæ, ut *Wigandt, Pontas, Victoria, et Cabass.*; sed præcipuè notandum est

---

(a) *Instruct. p. 1. cap. 15. num. 360.* — (b) *num. 57 et 461.* — (c) *Lib. 3. num. 25.*

quod docent *Navar. et S. Antoninus. Navar.* (a) dicit : *Si sint contrariæ Doctorum opiniones . . . ; et (Confessarius) credit evidenti se textu vel ratione niti , pœnitentem dubiâ , non debet eum absolvere ; at si Confessarius non adeò forti ratione utitur , vel pœnitens utitur pari vel ferè pari , et habeat aliquam pro se Doctorem clarum , poterit eum absolvere , ut post Adrianum tenuimus c. siquis d. 7. n. 66. Audiamus etiam S. Antoninum (b) : Caveat Confessor , ne sit præceps ad dandam sententiam de mortali , quando non est certus , et clarus ; ubi . . . sunt variae opiniones . . . consulat quod tutius est ; non tamen contemnat contrariam opinionem tenentem , ne propter hoc (nota) deneget absolutionem. Excipit tamen postea , Si autem omninò conscientia Confessarii dictaret illud esse mortale , quod est idem quod dicit etiam *Navar.* , et quod nos pariter hîc infra advertemus , nempe cum pœnitentis opinio Confessario omninò falsa videtur. Confirmat postea alibi (c) *S. Antoninus* quod suprâ retulimus , dicendo : Si credit (Confessarius) quod sit peccatum , debet ei conscientiam facere : sed dato quod ille non vellet cognoscere illud esse peccatum , nihilominus tenetur eum absolvere , hoc cum grano salis intelligendum est , nempe cum pœnitens tenet suam opinionem fundamento valido esse innixam ; et contrâ Confessarius ea pro omninò falsâ ( ut dictum est ) non habet ; dùm subjungit immediate post Sanctus , quid ex ratione et non ex proterviâ hæc opinio est. Idem dicit *S. Raymundus* (d) : Unum tamen consulo , quod non sis nimis pronus judicare mortalia peccata , ubi tibi non constat per certam scripturam . . . , aliàs possent induci homines in desperationem. Idem quoque dicit doctissimus *Silvius* (e) loquendo de superfluo mulierum ornatu : Si Confessarii non possint clare percipere , utrùm sibi sit mortale aut veniale , persuadeant , ut pœnitens abstineat ; si tamen nolit ,*

---

(a) *Man. Cap. 26. num. 4. — (b) part. 3. tit. 17. Cap. 16. §. 2. — (c) Part. 3. tit. 10. cap. 20. in fin. — (d) Lib. 3. de Pœnit. §. 21. — (e) 2. 2. q. 154. art. 2.*

*non ei faciant conscientiam de mortali, neque absolutionem negent.* En quomodò loquuntur uniformiter Auctores tam antiqui quàm moderni.

119 — Ratio autem est hujus sententiæ, quia pœnitens, facta Confessione, habet jus certum et strictum ad absolutionem; undè Confessarius gravem illi irrogat injuriam, quoties pœnitentis opinio ei non videtur omninò falsa. Nec valet dicere quòd pœnitens non est dispositus, cùm sequi renuit Confessari judicium; nam respondetur quòd Confessarius non est judex opinionum, quas pœnitens sequi teneatur, sed tantùm dispositionis sui pœnitentis, ut patet ex Trid. sess. 14. c. 5. ubi dicitur Sacerdotes in hoc tantùm sunt Judices, in quantum ipsi, auditis peccatis, debent impertiri aut denegare absolutionem pœnitentibus pro eorum dispositione, et eis pro modo culpæ Pœnitentiam imponere: *Dominus noster J. C. . . . Sacerdotes . . .* (verba Trident.) *reliquit præsides, et Judices ad quos omnia mortalia crimina deferantur . . . qui, pro potestate clavium remissionis, aut retensionis peccatorum sententiam pronuntiarent* etc. Itaque in quantum ad opiniones quæ ad pœnitentis dispositionem pertinent, aut in quantum ad administrationem Sacramenti (v. g. si Confessarius judicaret se jurisdictione carere super tali casu) pœnitens Confessarii judicio stare debet. Sed in quantum ad alias opiniones quæ respiciunt pœnitentium obligationes generales Confessarius non est judex, nec potest eum obligare ad suas sequendas opiniones, imponendo ei tot novas leges ad quas priùs non tenebatur, adeò ad recipiendam absolutionem, teneatur à suis desciscere opinionibus ipsi probabilibus visis, et fortè probabilioribus. Contrà pœnitens cùm peccata sua confessus sit, et cùm habeat sufficiens fundamentum, quo licitè possit aliquam sententiam sequi, non potest Confessarius sine gravi injustitià absolutionem ei denegare, nisi cùm illam opinionem omninò falsam habet (a). Dico omninò falsam, nam

---

(a) Lib. 6. num. 604.

licet dicant *Lugo*, *Layman*, *Sanch.* et *Croix* cum *Suar.* et *Carden.* Confessarium teneri absolvere pœnitentem, licet illius opinionem pro falsâ haberet: et idem dicit *Sotus*: *Quis Sacerdos existimet opinionem esse falsam, non tamen inde existimare debet sibi non licere ipsum absolvere, siquidem propter probabilitatem excusabitur ille à culpâ.* Nihilominus hoc intelligendum est, ut scitè explicat *Sanch.*, cùm illa opinio jam probabilis existimata esset inter DD. auctoritatis probatæ et aliquam (addendum est) verisimilitudinem haberet; non verò quando Confessarius ex opinione propriâ aliquod haberet principium, cui sibi videretur nulla responsio congrua dari posse, et contrâ cognosceret pœnitentis opinionem (licet ab aliquibus DD. defensam) falso fundamento inniti; quia tunc dico cum *Navar.*, et *S. Antonin.* (verba cujus superius relata sunt) non posse, nec debere absolvere pœnitentem, nisi à suâ opinione descisceret. Certum in controversiâ præfatâ, ubi altera sententia, (sed paucorum) affirmat peccare Confessarium, si absolvit Pœnitentem sequi volentem opinionem, quæ non videtur omnino falsa, adversus suam: altera verò (quæ communis, et tantorum AA. modernorum, et antiquorum) dicit peccare, si non absolvit, ubi ejus Confessionem suscepit, non video quomodo tutus esse possit in conscientiâ ille Confessarius, qui ei denegat absolutionem (a). Quomodo autem se gerere debeat Confessarius in opinionum delectu, et an uti debeat rigidioribus, an benignioribus, vide dicenda *Tom. III. Append. IV. §. I.* ubi loquar de prudentiâ Confessarii.

120 — Præterea quæritur, quomodo se gerere debeat Confessarius cum pœnitente, cujus suspicatur, aut scit aliquod peccatum, quod ipse negat, aut reticet? distinguendum est: si extrâ Confessionem, et ex scientiâ propriâ, certum est, quòd tunc  
non

---

(a) *Lib 6. num. 604. v. Ceterum.*

non potest eum absolvere; modo prudens non adsit dubium, quòd pœnitens de illo jam apud alium confessus sit. Si verò duntaxat suspicatur, aut scit ex aliorum relatione, et Pœnitens illud negat, plerumque non potest ei tunc denegari absolutio, dùm in hoc foro credendum est Pœnitenti tam pro, quàm contrà. Attamen abs re non est quod dicit *Elbel*; quòd si Confessarius audiret peccatum à testibus ità fide dignis, ut moraliter fieret certus, non debet ei absolutio impertiri; quia regulæ locus est in dubio, non autem in facto moraliter certo (a). Si verò Confessarius cognovit peccatum ex confessione complicitis, tunc prius non potest utique de eo in particulari interrogare pœnitentem, nisi specialem obtinuisse licentiam ab altero complice; sed tantum potest interrogare in generali: et pariter in hoc non debet esse multus in repetendis interrogationibus, ut revelationis periculum vitet. Nihilominus probabiliter dicunt *Laym. Silvest. Navar. Spor. et Holzm.* quòd potest aliquam interrogationem etiam particularem adhibere, si illa communiter fieri solet personis talis conditionis, v. g. sponsis, si inter se nimis confidenter usi sint: servis, si aliquid dominos defraudaverint, etc. Sed difficultas major extat, an absolvendus sit complex, cùm, his adhibitis diligentis, ille tacet peccatum? Alii affirmant absolvendum esse conditionatè; alii absolutè; sed melius sentiunt *Suar. Dicast. Croix, Viva*, etc. quod cùm Confessarius moraliter certus est Pœnitentem sacrilegè occultare peccatum, non potest eum absolvere, sed voce submissâ debet aliquam recitare orationem ad occultandam absolutionem, quam ei denegat (b). Quoad autem obligationem quâ tenetur Confessarius esse in gratiâ, cùm audit Confessiones, aut saltem cùm impertitur Absolutionem; et an excusetur in casu extremæ necessitatis; vide dicenda in *Tom. III. Appendice III. de examine*, etc. n. 11.

---

(a) *Lib. 6. num. 631.* — (b) *Ibid. V. Si autem.*

121 — Tenetur Confessarius ad corrigendos errores, quos in excipiendis Confessionibus commisit, aut in dandâ absolutione. Sed hîc plura distinguenda sunt. I. Cùm erravit circâ Sacramenti valorem, verb. gr. si absolutionem non protulit, aut si eam carens jurisdictione impertitus est : tunc, si ille erravit inculpabiliter, non tenetur cum suo dedecore, aut alio gravi incommodo pœnitentem admonere; quia talis admonitio est solius caritatis, quæ ad tantum non obligat; ita commun. *Lugo, Salmant. Spor. Viva, Elbel*, et alii. Excipitur si talis Confessarius esset Parochus, aut si pœnitens esset in mortis articulo, aut in gravi periculo non amplius confitendi constitutus. Si verò erravit ex culpâ gravi; Quæritur 1. an teneatur ad admonitionem cum suo gravi incommodo? Negant *Bonac. Suarez, S. Anton. Navar.* et id probabile vocant *Salmant. cum Vasquez, Hurtad.* etc. tùm quia (dicunt) non videtur tale præceptum cum tanto onere obligare, cùm hoc Sacramentum à solâ caritate administratur; tùm quia sicut pœnitens non teneretur cum tali gravamine ad confitendum; ita nec Confessarius tenetur ad efficiendum ut talis Confessio valida fiat. Sed rectè affirmant *Lugo, Tamb. Leand. Sporer, Viva*, et *Elbel*, quia licet Confessarius ex caritate Confessiones excipiat, semper tamen ac eas suscipit, tenetur postea ex quasi contractu ad Sacramentum administrandum modo quo debet; et sic 1. rationi satisficit. Respondetur ad 2. aliam esse pœnitentis obligationem ab illâ Confessarii : quia si pœnitens nosset suæ Confessionis invaliditatem, poterit saltem postea per contritionem, aut per aliam Confessionem malo suo prospicere, sed Confessarius non potest eum in ignorantia relinquere cum tanto illius damno (a).

122 — II. Si Confessarius suâ gravi culpâ pœnitentem à restitutione deobligavit, tunc tenetur etiam cum suo gravi incommodo (licentiâ tamen ab eo petita) eum admonere; aliàs admonitionem

---

(a) num. 619.



omittendo tenetur ipse ad restitutionem : intelligitur, quoties si tempore debito poenitentem admonuisset, jam ille restituisset ; ità communiter *Lugo*, *Castrop Bonac. Viva*, *Spor. Salm. Elbel*, etc. Et scitè hic advertunt *Lugo*, *Bonac.* et *Busemb.* quòd si Confessarius jam admonuisset poenitentem priusquàm impotens fieret, tunc licèt poenitens non restituisset, ad nihil ipse tenetur ; quia cùm consilium sit merè auctoritativum, sufficit quòd Confessarius tempore opportuno illud revocet, juxtà dicta *Tom. I. Tract. X. num. 44.* Dicitur tempore opportuno, quia si fortè poenitens tempore Confessionis erat dispositus ad restitutionem, si admonitus fuisset, et postèa factà sibi admonitione nollet restituere, tunc rectè dicit *de Lugo* (quidquid *Antoine* dicat) Confessarium ipsum teneri ad restituendum, quia tunc ejus consilium jam fuit proxima causa damni (a). Sin autem Confessarius graviter in hoc non peccavit, non tenetur ad admonitionem cum suo gravi incommodo, sed tenetur cum aliquo levi incommodo, ut dicunt *Lug. Spor. Elb.* etc., quia quilibet tenetur cum levi suo incommodo ad reparandum, cùm potest, damnum grave proximi (b). Sed hinc quæritur an Confessarius in tali casu admonitionem omittendo teneatur ad restituendum ? Negant *Sanch. Cajet.* et *Nav.* dicentes quòd cùm Confessarius non læserit justitiam, non tenetur ad admonitionem, nisi ex caritate quæ non obligat ad restitutionem. Sed communiùs, et meliùs affirmant *Lug. Spor. Salm. Elb. Viva, Ariag.* etc., quia ejus consilium (licèt inculpabiliter datum) prosequitur ad influendum in creditoris damnum ; quare cognito errore, tenetur ex justitià ad removendam damni causam (c) ; non secùs ac si quis sinè culpà gravi incendisset domum proximi, si potest sinè gravi incommodo, tenetur ex justitià ad illum extinguendum, sicut communiter dicunt *Less. Layman, Lugo, Bonac. Trul. Salm. etc.* (d)

---

(a) Num 621. v. Sed. — (b) Lib. 6. num 621. v. Hoc  
(c) Ibid. v. An autem. — (d) Lib. 3. num 994.

123 — III. Quandò autem Confessarius non jam deobligasset pœnitentem à restitutione, sed tantum omisisset eum admonere, tunc si inculpabiliter omisit, non tenetur cum gravi suo incommodo ad eum admonendum, ut supra dictum est; sed tenetur etiam cum aliquo incommodo, ut dicunt DD. cum aliquali proportionem ad reparandum damnum creditoris. Si verò neglexit suam culpam gravi, tunc tenebitur admonere cum majore incommodo. Sed hic præterea quæritur, an Confessarius omissam debitam correctionem, teneatur ad restitutionem? Multi multa sentiunt. Alii affirmant de quolibet Confessario, quia quilibet Confessarius (ut dicunt) tenetur ex officio pœnitentem docere de sua obligatione; ita *Mol. Vasq. Navar. Sayr. Filliuc.* etc. Alii affirmant de solo Parocho, ut *Less.* et *Antoine*, affirmando quod parochus tenetur impedire quominus subditi sui damnum aliis inferant. Sed universaliter id negat sententia communissima et verior cum *Cabbass. Azor. Suar. Castrop. Sanch. Bonac. Lug. Valenz. Coninch. Salm. Croix*, etc. et ratio est quia Confessarius licet teneatur ad monendum pœnitentem, sed ex sola caritate, non ex iustitia; et loquendo etiam de Parocho, licet ex iustitia teneatur ad monendos subditos, talis obligatio tamen versatur tantum circa eorum bona spiritualia, non autem temporalia. Et hoc currit, etiamsi Confessarius aut Parochus ex malitia admonitionem negligeret, ne pœnitens restitueret; quia tunc deest influxus positivus in alterius damnum, qui semper requiritur pro restitutionis obligatione, sicut dictum est *Tom. I. Tract. X. n. 36. (a).*

124. — Restat hic discutienda magna quæstio, quæ inter DD. agitur, nempe an Confessarius, non petita licentia pœnitentis, possit eum admonere de errore in Confessione commisso. Nos paucis expedimur. Affirmant universaliter loquendo *Suar. Petroc. et Spor.* et probabile putant *Laym. Castrop.*

---

(a) *Lib. 6. n. 621.*

*Cap. 6. De officio et aliis muneribus Conf. 221*

*Bonac. Salm.* etc. dùm dicunt hanc admonitionem spectare ad perficiendam Confessionem, quæ imperfecta relicta est. Sed nos dicimus cum sententiâ communissimâ, quòd distinguendum est : Si iudicium completum est per absolutionis collationem, tunc non potest Confessarius sinè pœnitentis licentiâ cum eo de errore colloqui; quia talis admonitio esset exprobratio illius peccati, quæ Confessionem redderet odiosam; ita *Sot. Silv. Sanch. Valent. Graf. Diana, Reginald. Megal. Croix* etc. cum *de Lugo*, qui dicit contrariam repugnare Theologorum communi sensui. Secùs autem ut rectè dicunt *Croix, Sto, et Arriaga*, si Confessarius non adhuc absolutionem impertitus fuisset, quia tunc iudicium non est adhuc absolutum; aut si non rectè protulerit absolutionem, tunc benè posset pœnitentem admonere, siquidem tunc nulla evenit peccati exprobratio (a).

125. — VII. Loquamur deniquè de obligatione quam habent Sacerdotes de administrando Pœnitentiæ Sacramento. Sacerdotes simplices regulariter loquendo non tenentur ad illud ministrandum, nisi in casu extremæ necessitatis. Parochi verò tenentur toties quoties rationabiliter expetiti sunt à subditis, qui opportunè illud petunt. Vide dicta *Tract. VII. n. 24*. Sed hìc quæritur 1. An Sacerdos simplex aut simplex Confessarius ( quia quoad Parochum vide dicta *Tract. VII. n. 28.* ) teneatur cum periculo vitæ ad absolvendum moribundum in peccato mortali existentem? Negant *Sot. Sa, Navar. Coninch., et Lugo* probabile putat, dùm ille potest per contritionem sibi consulere; excipit tantum *Coninch.* si moribundus eâ laboraret ignorantia, ut nesciret elicere actum contritionis. Sed sententiâ verior affirmat cum *Suar. Tourn. Lorca, et Valent*; quia licet possit moribundus per contritionem supplere, tamen cum hæc sit difficilis, negari non potest, quin, si inabsolutus relinquitur, in magno suæ damnationis peri-

---

(a) *Lib. 6. n. 622.*

culo manserit. Undè fit quòd sicut in casu quo proximus sinè tuâ absolutione certè peribit, teneris ad mortem certam subeundam, ut eum absolvas; ità in casu quo ille in probabilitè damnationis periculo manet, teneris te exponere probabili periculo mortis; nam in æquali periculo quisque tenetur postponere vitam temporalem suam vitæ æternæ proximi<sup>(a)</sup>.

126. — Quæritur 2. An Sacerdos simplex teneatur se habilem reddere pro excipiendis Confessionibus, cùm videt indigenas suos esse in gravi necessitate spirituali ob Confessariorum penuriam? Apud nulum Auctorem de re Morali tractantem hoc dubium inveni discussum; tantùm ad manus mihi pervenit quidam libellus, cui Titulus (*Parroco di Villa p. 308.*), cujus Auctor est R. D. Joseph Jorio, cujus Doctrinam ac pietatem varia opuscula, quæ edidit, satis comprobant; ibi ex Italico hæc transcribo: *Qui solertiâ pro audiendis Confessionibus pollet, et observat in suo oppido Confessariorum penuriam, et videt, aut non frequentari, aut malè haberi tale Sacramentum, tenetur illud administrare. Et, si ætate non multùm processit, tenetur in conscientia ad se habilem reddendum.* Affert idem Auctor auctoritatem Pat. Pavonis, Societ. Jesu, viri admodùm docti et pii, qui in suis Operibus Italicis sic scribit: *Munus meum qui Sacerdos vocor, est, me Prælato meo parere, cùm mihi imponit ut Confessionem excipiam, et legitimo impedimento non præpedior: quia Prælatus potest id mihi præcipere, et ego nullam rationem habeo ut talentum otiosum teneam etc. Insuper mihi inest debitum me Episcopo offerendi, ut facultatem Confessiones audiendi ab eo expostulem, cùm animadverto in gravi necessitate esse populum ob Confessariorum deficientiam.* Et reverà (subjungo hîc aliquas reflexiones quas animo rependi super hoc puncto, cui parùm Sacerdotes animum intendunt) certum est Sacerdotes esse à Deo electos non solùm ut sacrificent, sed etiam

---

(a) Lib. 6. n. 249.

principaliter esse constitutos, ut animarum saluti incumbant; sicut enim divinus Pater misit Filium suum pro Mundi salute, ita Christus Dominus constituit Sacerdotes in suum locum suffici, ut pro se legatione fungerentur; *Sicut misit me Pater, et ego mitto vos. Joan. 20. 21.* Quapropter Sacerdotes vocantur, nunc lux Mundi, nunc Sal terræ, nunc Dei Coadjutores. Idcirco etiam Trident. sess. 23. C. 14. præcipit ut promovendi ad Presbyteratum prius *ad docendum ea, quæ scire omnibus necessarium est ad salutem, ac (nota) ad ministranda Sacramenta,...* idonei comprobentur. Et St. Thomas (a) dicit quod Dominus ad hunc finem instituit Ordinem Sacerdotum in suâ Ecclesiâ, ut ipsi Sacramenta aliis ministrarent: *Et ideo posuit Ordinem in eâ, ut quidem aliis Sacramenta traderent.* Præcipua autem obligatio Sacerdotum est circa administrationem Sacramentorum Eucharistiæ, et Pœnitentiæ; dum ideo duplex eis confertur potestas sacrificandi nempe, et absolvendi à peccatis. Et animadvertatur quod Dominus Spiritum Sanctum in Sacerdotes infudit præcipuè, ut absolvant à peccatis, prout legimus apud Joan. loc. cit. 7. 22. 23. *Sicut misit me Pater, et ego mitto vos. Hæc cum dixisset, insufflavit, et dixit eis: Accipite Spiritum Sanctum, quorum remiseritis peccata, remittuntur eis.* Itaque cum hoc sit Sacerdotum præcipuum munus, et unus ex principalibus finibus, cur Deus eligit aliquem ad Sacerdotium, dico quod Sacerdos tenetur ad se habilem reddendum ad illud, saltem cum necessitatem cognoscit ob aliorum deficientiam, ne ab Apostolo exprobre- tur quod in vacuum gratiam recepit.

127. — Hoc posito quomodo excusabitur à peccato ille Sacerdos, qui suâ socordiâ negligit audire Confessiones, aut se habilem reddere ad illas audiendas, cum videt gravem necessitatem, quâ opidum suum premitur? Ego nescio quomodo iste possit non exprobrari à Domino, et immunis esse.

---

(a) Suppl. 3. q. 32. a. 1.

224 *Tract. 16. De Pœnitentiæ Sacramento.*

à poenâ quam minatus est in servum pigrum, qui talentum datum negotiationi abscondit, ut habetur ex *Matthæi 25.* qui textus ab Expositoribus (*Cornelio à Lapide, Calm. et Tirino, cum S. Ambrosio*) explicatur propriè de iis qui operâ suâ procurare possunt, et negligunt salutem animarum : *Notent hoc* (ait *Cornelius*) *qui ingenio, Doctrinâ, aliisque dotibus sibi à Deo datis non utuntur ad suam aliorumque salutem ob desidiam, vel metum peccandi; ab his enim rationem poscet Christus Dominus in die Judicii.* Admodum terrore plenæ sunt comminationes Domini in negligentes Sacerdotes : *Si me dicente ad impium, impie, morte morieris; non fueris locutus... ipse impius in iniquitate suâ morietur, sanguinem autem ejus de manu tuâ requiram. Ezech. 33. 8.* Nec dicant hujusmodi Sacerdotes obligationem suam satis explere, si alio modo animabus subveniant, nempe instruendo, corrigendo, orando; non sufficit, dico; quia ipsi tenentur succurrere proximis in eo quod ipsis opus est ad salutem. Si frater ciborum opus habet, non sufficit eum de vestibus providere. Sæpè accidit in Oppidulis quòd plures fortè non egent instructione, aut monitione, quia forte jam sunt satis instructi, et correcti, sed deest ipsis Sacerdos qui eorum Confessiones excipiat. Nec valet dicere officium audiendi Confessiones esse opus caritatis, et caritatem non obligare cum tanto incommodo, quia est labor insumendus pro acquirendâ scientiâ requisitâ ad Pœnitentiæ Sacramenti administrationem; quia respondetur, quòd licèt tale exercitium sit caritatis, nihilominus est munus quod ortum non habet à simplici caritatis motivo, sed ex officio proprio Sacerdotali (ut dictum est) cui ex Divinâ institutione hoc munus adnexum est, et cui Sacerdos satisfacere tenetur, cum id populi necessitas expostulat. Deniquè neminem juvat se excusare allegando insufficientiam, et imbecillitatem suam; quoad insufficientiam, suppositis antea dictis, ille tenetur ad studendum, et ad se idoneum efficiendum; quoad autem imbecillitatem, quâ quis putaret cum merito excusari, nempe cum humilitatis sensu, audiat quid dicit *S. Franc. Sales.*

Sanctus appellat falsam humilitatem eorum qui recusant salutem animarum vacare, sub colore quod propriam debilitatem cognoscunt. Dicit totum hoc esse artificium amoris proprii, et humilitatis perversæ, quâ prætenditur propriam socordiam specioso prætectu colorare. Subjungit quod Deus nobis aliquid ingenii concedendo, intendit, ut nos illo utamur: undè verè humilem se ostendit qui illo utitur, et obedit. Superbo nihil audendum est assumere, tanquàm sibi fidenti; humilis contrà animo magno esse debet, quia non suis viribus innititur, sed spem in Deum collocat, cui placet suam Omnipotentiam exaltare nostrâ inbecillitate; et ideò concludit, humilem omnia aggredi posse.



## CAPUT VII.

## De casuum Reservationē.

*Reservatio est jurisdictionis restrictio* 128. *Ignorantes non excusantur à casu, benè quidem à censurâ.* *Differentia inter casus Papales, et Episcopales.* 129. *Qui reservare possit etc. De casibus Regularium* 130. *De reservatione injustâ; et an Superior absolvendo possit ad alium remittere pro non reservatis etc.* 131. *An peccata venialia, aut interna, aut non consummata etc.* 132. *Quandò inferior potest absolvere etc. et an pœnitens debeat se præsentare etc.* 133. *Si injustè negatur facultas etc. Si negatur à Prælato Regulari* 134. *De Peregrinis, quandò casus est reservatus tantum extrâ, aut tantum in patriâ* 135. *Quomodò intelligendum In fraudem reservationis* 136. *An qui peccat in patriâ possit absolvi extrâ illam ab habente facultatem* 137. *An possit absolvi in patriâ qui peccat extrâ? Et an peccans in patriâ, possit absolvi à censurâ extrâ illam? Et an peccans extrâ incurrat censuram ibi reservatam?* 138. *Qui recipit in bonâ fide absolutionem à simplici Confessario* 139. *Qui obliviscitur de reservato apud superiorem etc.* 140. *An ex Confessione nulliter factâ apud superiorem etc.* 141. *An simplex possit absolvere dubiè reservatum* 142. *Qui post Confessionem cognoscit pro certo reservatum* 143. *Qui peccat in confidentiam licentiæ* 144. *An licentia extendatur ad peccata post illam commissa* 145. *De facultatibus Episcoporum, et regularium remissivè* 146.

128. — **R**ESERVATIO casuum definitur : *Est negatio jurisdictionis circâ aliquod peccatum.* Hinc notandum 1. communissimam sententiam esse cum *Sanch. Castrop. Holzm. Tambur. Wigandt, Concîn. Antoine, Fagnan. Croix, et aliis (contrâ Ronc. Salm. Ciera, etc.)* Ignorantes non excusari à reservatione licèt invincibiliter eam ignorassent; quia reservatio non est poena quæ respicit peccatores, ut supponunt



adversarii, sed est restrictio jurisdictionis respectu Confessariorum; et hoc apertè præcipitur à Trid. sess. 14. c. 7. ubi dicitur: *Nullius momenti absolutionem eam esse debere, quam Sacerdos in eum profert, in quo ordinariam, aut subdelegatam (nota) non habet jurisdictionem.* Undè concludit, quòd *Sacerdotes nihil possint in reservatis.* Nec valet dicere cum *Salm. et Ronc.* quòd licèt reservatio directè respiciat Confessarios, et limitet eorum facultatem, attamen finis reservationis respicit pœnitentes, ut à peccatis reservatis exterreantur; undè fit quòd, cessante fine adæquato in ignorantibus, cessat etiam reservatio. Quia respondetur, quòd finis reservationis est non solum ut fideles avertantur à reservatis, sed etiam (ut dicunt *Fagnan.* et alii) ut prolapsi convenientes recipiant pœnitentias, admonitiones, et remedia quæ non conveniunt ab aliis applicari, quàm à Superioribus, qui semper existimantur prudentiores, et magis idonei, sicut exprimitur in Trid. *Patribus nostris visum est, ut atrociora quædam et graviora crimina non a quibusvis, sed a summis duntaxat Sacerdotibus absolverentur.* *ibid.* Ex quo deducitur evidenter quòd etiam in ignorantibus non cessat finis adæquatus reservationis (a).

129. — Ex hoc deducitur, ut etiam communiter dicunt AA. citati pro nostrâ sententiâ, quòd etiam in casibus ab Episcopis reservatis, quibus annexa est censura, licèt ignorantes à censurâ excusentur, cum in ipsis desit contumacia necessaria pro incurrendâ censurâ, nihilominus non excusantur à reservatione; nam hæc est differentia inter casus Papales, et Episcopales, quòd Papales (exceptis duobus qui reperiuntur relevati sinè censurâ, nempe accusatio sollicitationis contrà Sacerdotem innocentem, ut habetur ex Bullâ *Sacramentum* Benedicti XIV. et receptio donorum à Regularibus, ut dictum fuit *Tom. I. Tr. XIII. n. 8. in fin.*) principaliter sunt reservati ob censuram. Et idcirco ignorantes ab illis excusantur circà reservationem, ut

---

(a) *Lib. 6. num. 531.*

228 *Tract. 16. De Pœnitentiæ Sacramento.*

docent communiter *Suar. Castrop. Sanch. Laym. Mol. Cajet. Gonet., Wigandt, Abelly, Salm. Croix, Ciera, Viva* etc. (contrà *P. Concina* quem unicum reperio adversum): dum ignorantia certè à censurâ, ut dicemus *Tract. XIX. n. 8.* et ut expressum est in *Cap. 2. de Constit. in 6. (a).* Contrà in casibus Episcopalibus, quia principaliter reservatur peccatum, (licet injungatur censura), ideòque ignorantes sicut non eximuntur à peccato, ita nec à reservatione; dum, ut dictum est, propter reservationem super illo peccato penitus sublata est Confessario jurisdictio (b).

130. — Notandum 2. Casus reservare posse omnes Superiores qui potestate ordinariâ gaudent, prout sunt Papa, Episcopi, Prælati Religionum, et etiam qui potestate quasi Episcopali fulgent, sicut declaravit S. C. Conc. apud *Fagnan.* non autem Parochi, nam ipsis saltem ex consuetudine hæc facultas abrogata est (c). Dictum est Prælatos Religionum posse etiam reservare casus, sed ut decrevit Clemens VIII. tantum undecim reservare possunt, et non ultrà, sinè consensu Capituli generalis pro totâ Religione, aut Provincialis pro Provinciâ. Casus autem determinati fuerunt à Clemente, et sunt sequentes 1. Apostasia. 2. Egressio nocturna, et furtiva à Monasterio. 3. Sortilegium. 4. Peccatum mortale contrà paupertatem. 5. Furtum mortale de bonis Monasterii. 6. Peccatum carnale opere consummatum. 7. Perjurium in judicio. 8. Cooperatio in abortu foetus animati, etiam effectu non secuto. 9. Occisio vel gravis percussio cujuscumque personæ. 10. Falsificatio manûs, vel sigilli Officialium Monasterii. 11. Malitiosum impedimentum, retardatio, aut aperitio literarum à Superioribus ad inferiores, vel contrà. An autem Prælati possint infligere censuram super alio casu, illum non reservando, affirmat *Busem.*, sed communiùs et probabilius negant *Lugo, Sanch. Diana et Holzm. (d).*

---

(a) *Lib. 6. n. 580.* — (b) *n. 582.* — (c) *n. 578.* — (d) *n. 583.*

131. — Notandum 3. Reservationem non posse emanari sinè justâ causâ ; quare dicunt nonnulli reservationem injustam esse invalidam, quia Trident. dedit hanc facultatem Prælati reservandi casus in ædificationem, non in destructionem : sed sententia communior et verior cum *Laym. Suar. Lug. Holzm. Ciera* etc. dicit illam fore graviter illicitam, sed validam ; quia sicut potest Prælati non concedere facultatem pro aliquibus casibus, ita potest etiam reservare eam (a). An autem possit Superior absolvere à reservatis, et pro aliis remittere pœnitentem ad inferiorem, alii admittunt propter consuetudinem ; sed hæc consuetudo communissimè negatur à *Salm. Cano, Nav. Laym. Castrop. Salm. Croix* etc. Tantummodò hoc permittitur à præfatis AA. in casu rarissimo magnæ necessitatis, putà si Superior præpeditus esset aliquo gravissimo negotio, et contrà pœnitens esset in necessitate communicandi, et repugnantiam ostenderet bis peccata sua confiteri (b).

132. — Notandum 4. Posse etiam reservari venialia, ut communiter admittunt *Suar. Lugo, Ciera, Holzm. Conc.* etc. contrà *Vasq.* ; quia licet non adsit obligatio confitendi venialia, attamen ipsa remitti nequeunt per Sacramentum, nisi ex Ecclesiæ jurisdictione ; ideoque sicut illa hanc negare potest, ita etiam limitare (c). Et ita pariter reservari possunt peccata interna, ut etiam communiter dicunt *Sot. Silv. Suar. Croix, Antoine* etc. Nec obstat dicere Ecclesiam non judicare de peccatis occultis ; dùm respondetur quòd Ecclesia reservando non est quòd judicet de peccatis internis, sed judicat de absolutione illorum, quæ est actus externus (d). Cæterùm prudentia exposcit (et hoc fert usus) ne reserventur nisi mortalia, et graviora (juxtà normam datam à Concilio, quod dicit *atrociora quædam et graviora crimina*), et externè gravia ; undè com-

---

(a) n. 579. — (b) n. 595. — (c) n. 582. *dub.* 1. — (d) *Ibid.* *dub.* 2.

230 *Tract. 16. De Pœnitentiæ Sacramento.*

muniter docent *Lugo, Sanch. Suar. Bonac. Granad. Ciera* etc. peccatum leve in quantum est externum non cadit sub reservatione, licet internè esset grave; quia Superiores non intendunt reservare, nisi peccata externè gravia, et insuper consummata, et perfecta in specie suâ. Hinc rectè dicit *P. Mazzotta*, non reservari incestum, et sodomiam extrâ vas peractam, neque sodomiam imperfectam, putâ inter marem et fœminam, ut dicunt insuper *Silv. Azor. Bonac. Tourn.* etc. (a).

133. — Notandum 5. Quòd cùm non adiri potest superior, potest inferior indirectè absolvere à reservatis, urgente aliquâ causâ, v. g. ut vitetur scandalum, aut infamiæ nota, aut ut satisfiat præcepto Paschali, aut si pœnitens aliàs diutius perseverare deberet in mortali, ex eo quia Superior longè abest; ita communiter *Suar. Laym. Castrop. Conc. Wigandt, Salm. Ciera, Viva* etc. (b). Dictum est indirectè, quia cessante impedimento, tenetur postea pœnitens se præsentare Superiori, ut directè absolvatur à reservatis; ratio est quia Confessarii simplices, ut declaravit Trident. (*Sess. 14. c. 7.*) extrâ articulum mortis nihil possunt in reservatis; undè extrâ mortis articulum, licet impedimentum esset perpetuum si casus est Episcopalis, et impedimentum casu cessaret semper recurrendum est ad Episcopum pro absolutione directâ. Et si casus est Papalis, et impedimentum est perpetuum, et pœnitens ne ad Episcopum quidem recurrere posset (ut debebat, cùm non posset adire Papam) etiam obtentâ absolutione in casu necessitatis à Confessario simplice, debet saltem se præsentare Episcopo (c); vide dicenda *Tom. III. Tract. XX. n. 45.* Et advertendum quòd tunc, si peccatum est reservatum cum censurâ, non se præsentando, reincidit in censuram, ut dictum est *n. 96.* Cùm autem quis haberet peccata reservata, et cùm esset in necessitate communicandi, si nul-

---

(a) *n. 582. v. Cùm non sit.* — (b) *n. 585.* (c) *Lib. 6. n. 585. dub. 1.*

lus adesset qui haberet facultatem, an iste teneatur confiteri simplici Confessario; et an si confiteatur debeat illi narrare tam reservata, quam non reservata, vide dicta *Tract. XV. num. 27. et 28.* ubi diximus teneri confiteri ea, saltem cum necesse est ut Confessarius iudicium certum formare possit de ejus dispositione; unde addimus hinc, quod si Confessarius interrogat, debet omnia manifestare; nam, sicut rectè animadvertit *Lugo*, licet pœnitens non teneatur per se ad aliquod peccatum aperiendum, attamen tenetur illud exponere, cum de illo interrogatur à Confessario, qui jus habet noscendi totam consciensiam pœnitentis, tum ut cognoscat ejus dispositionem, tum ut remedia applicet, in quibus duobus ille est verus Judex (a). An autem quilibet Confessarius absolvere possit moribundum à Papalibus, præsente Episcopo, vide *num. 97.*

134. — Notandum 6. Licet Superior injustè negaret facultatem, inferiorem non posse absolvere à reservatis, sicut communiter docent *Sot. Suar. Laym. Lugo, Ciera, Salm.* etc., quidquid dicant *Henriq. et Diana*; nam sicut est valida reservatio injusta, (ut dictum est *num. 131.*) ita etiam valida est injusta negatio facultatis (b). Cæterum proculdubio graviter peccant Episcopi, qui injustè negant facultatem; et peccant etiam contra justitiam, cum ex tali denegatione notabile damnum subditorum animæ patientur; ita communiter *Lugo, Suar. Coninc. Quintanad. Fagund. Diana, et Ciera, ex S. Thoma*; præcipuè (ait *Ciera*), si pœnitens adduci non possit ut adeat Superiorem. Contra Superior justè semper denegare potest facultatem, donec pœnitens notitiam necessariam ei non affert ad reparandum publicum scandalum, aut damnum; nam aliàs à nemine tamquam indispositus absolvi potest; *Suar. Lugo*, etc. (c). Advertendum tamen hinc circa Regulares, i. quòd (ut habetur ex Bullâ 26. Urbani VIII.) declaravit Clemens VIII. quòd si Superior

---

(a) *Ib. dub. 3.* — (b) *n. 526. ad 4.* — (c) *Ibid. a. 6.*

Regularis negat facultatem Confessario deputato , potest hîc *pro ista vice* (ut loquitur Bulla) absolvere pœnitentem , et ita communiter asserunt DD. *Lugo, Gabriel, Avers. Bus. Salm. cum P. Viva*, qui dicit , quòd *pro istâ vice* intelligitur toties quoties Superior injustè negat facultatem. Et idem dicunt *Pelliz. Dian. Quintanad.* si illam denegat alteri Religioso doctiori, et prudentiori, licèt non deputato ; et idem dicit *Pelliz.* si denegatur eidem pœnitenti. Advertendum 2. quòd propter Privilegium concessum Fratribus Minoribus , omnes Regulares semel possunt absolvi à reservatis per eorum Confessarios , licèt super reservatis careant facultate , *Suar. Diana, et Rodriq. (a).*

135. — Notandum 7. Circà Peregrinos ; Peregrini in quantum ad casuum reservationem plerumque judicandi sunt juxtâ leges Diœcesis , in quâ reperiuntur. Undè fit quòd si peccatum est reservatum tantùm in illâ Diœcesi , non potest Peregrinis absolvi à simplici Confessario , etsi illud peccatum non est reservatum in suâ Patriâ ; ita tenent , contrâ aliquos communiùs et veriùs , *Suar. Lugo, Bonac. Conc. Wigandt, Ciera, Diana, Salm. etc.* cum quâdam declaratione S. C. Ratio est quia hodiè Peregrini, stante communi consuetudine, non absolvuntur jam ex consensu præsumpto suorum Ordinariorum , ut supponunt adversarii , sed ex voluntate Ecclesiæ universalis. Contrâ reservatio non respicit pœnitentes, ut dictum est *num. 128*, sed Confessarios dumtaxat ; undè ipsi non possunt absolvere ab illis peccatis tantùm, super quibus limitata est facultas (b). E converso si peccatum est reservatum tantùm in patriâ , non autem in illâ Diœcesi, benè potest Peregrinus absolvi ab unoquoque Confessario , ut rectè docent *S. Antonin. Cajet. Lugo, Suar. Bonac. Cabass. Conc. Ronc. Mazzot. Salm. etc.*, quia hæc est consuetudo approbata communiter ab Episcopis,

---

(a) *Ibid. a. 5.* — (b) *n. 588. dub. 1.*

et Pontificibus, nempe ab Eugenio IV. (ut testatur *Lugo*) et præcipuè à Clemente X. in suâ Bullâ *Superna*, editâ 21. Junii 1670. Modò (limitavit Clementens) non esset quòd pœnitens proficisceretur à patriâ suâ in fraudem reservationis: *Posse autem* (sunt verba Pontificis) *Regularem Confessarium in Diœcesi in quâ est approbatus, confluentes ex aliâ Diœcesi à peccatis in ipsâ reservatis, non autem in illâ ubi idem Confessarius est approbatus, absolvere; nisi eosdem pœnitentes noverit in fraudem reservationis ad alienam Diœcesim pro absolutione obtinendâ migrasse.* Bulla loquitur propriè de Confessariis Regularibus, ut observatur; sed intelligitur etiam pro sæcularibus, ut rectè dicunt *Croix, Viva, et Ronc.* et ut declaravit etiam S. C. (a).

136. — Quomodò autem intelligenda est clausula illa in fraudem reservationis, multæ et diversæ adsunt opiniones. *P. Mazzot.* cum *Tamb.* et aliis intelligit, cum casus est deductus in forum contentiosum; sed hæc explicatio nihil concludit, dum Pontifex loquitur de foro Sacramentali, non autem de externo. Episcopus *Milante* intelligit quandò pœnitens peccasset in confidentiam absolutionis, sed non cum alio proficisceretur, ut faciliùs ibi absolvi posset: sed nec huic explicationi assentiri valeo: Pontifex enim non loquitur de iis qui peccant, sed de iis qui migrant in fraudem reservationis. Alii alias applicationes afferunt; sed communiùs, et probabiliùs *Lugo, Ronc. Viva, cum Porcella, et Fagund.* et *Instruct. Confess. Nov.* cum *Passerino* explicant, quandò pœnitens fine unico, et principali proficiscitur, ut alibi faciliùs absolvatur, et ut proprii Pastoris iudicium aufugiat; quia tunc propriè dicitur intervenire fraus, quandò elusoria redditur lex; et quidem lex reservationis eluditur, cum pœnitens principaliter à patriâ migrat ut in aliâ Diœcesi faciliùs absolvatur. Contrà non migrat in fraudem, qui aliquò proficiscitur alio fine, v. gr. lucrandi Indul-

---

(a) *Lib. 6. n. 589. v. Idque.*

234 *Tract. 16. De Pœnitentiæ Sacramento.*

gentias ; aut fine alia negotia agendi , aut citiùs vel cum minori incommodo confitendi , aut rependi Confessarium non cognitum , aut prudentiorè a quo meliùs dirigi possit , et per quem sperat uberiores conscientiæ pacem fore consecutorum (a).

137 — Dicit autem *Roncaglia* , quòd pœnitens , qui discedit aufugiendi fine proprii Pastoris iudicium , in alienâ Diœcesi non potest ne à Confessariis quidem , qui super reservatis habent facultatem , absolvi , quia tunc etiam migraret in fraudem (b). Sed contradicunt *Milante*, et *Viva*, cum *Suar. Nav. Lug. , Bonac.* cum communiori DD. qui dicunt quòd si casus est reservatus in utrâque Diœcesi , Peregrinus liberè absolvi potest ab habente facultatem ; et hæc opinio non videtur improbabilis , quia reverà tunc non videtur pœnitens committere fraudem in reservationem , cum eat ad Confessarium approbatum etiam pro reservatis (c). Præterea dicit *Mansi* , et adhæret etiam *Ronc.* non posse absolvi qui extra Patriam peccatum commisisset reservatum in patriâ hoc fine , ut postea extra absolvatur. Sed etiam circa hoc oppositum sentio , quia peccator tunc non diceretur discessisse in fraudem reservationis ut absolveretur , sed aliò se contulisse , ne reservationem incurreret (d).

138 — Contrà rectè dicunt *Castr. Suar. Coninc. Conc.* (quicquid dicant alii) non posse absolvi in Patriâ à reservato pœnitentem qui peccavit in Monasterio Regularium , licèt exempto , quia quamvis hæc Monasteria sint exempta etiam quoad locum , ut dictum est *Tract. II. n. 39*, nihilominus nec per hoc potest eum absolvere Confessarius , cui limitata est jurisdictio super tali casu. Et idem currit propter eandem rationem , si pœnitens peccasset extra Diœcesim , licèt ibi talis casus non esset reservatus. Ità etiam dicimus cum *Ronc. et Wigandt* contrà alios ,

---

(a) *Ibid. v. Quomodd.* — (b) *n. 589.* — (c) *n. 588.* — (d) *n. 589. v. Quomodd.*



non posse absolvi à Confessario simplici pœnitentem extrà Diœcesim à censurâ quæ in Patriâ est reservata, quia totam facultatem Confessarii simplices ad absolvendum à censuris habent ex *cap. Nuper., de Sent. excomm. in 6*, ubi expressè dicitur quòd Confessarii absolvere nequeunt à censuris reservatis (a). Dicimus etiam cum *Avers. et Mazzot.* quòd si Peregrinus peccat in aliâ Diœcesi, ubi ille casus est reservatus, non potest ibidem absolvi à simplici Confessario, tùm quia ibi ratione delicti jam incurrit reservationem; tùm quia Confessarius (sicut dictum est n. 135.) non potest absolvere Exterum, nisi juxtà limites jurisdictionis sibi ab Ordinario suo concessæ. Advertendum tamen quòd talis Peregrinus jam incurrit reservationem; ut dictum est, non verò censuram illi annexam, ut rectè dicunt *Suar. S.l. Conc. Salm. Avil. Sayr. Mazzott.* etc. contrà aliquos; nam in *cap. A nobis, de Sent. excomm. in 6.* dicitur, *solos subditos comprehendi sub excommunicatione latâ ab Episcopo futuris delictis.* Et ratio, quia censura non incurritur, nisi ab iis qui non tantùm subditi sùnt, sed etiam contumaces; Peregrinus contrà; licèt fiat subditus ob peccatum nihilominùs non potest dici contumax (b).

139 — Quæritur 1. An pœnitens qui bonâ fidè confitetur reservatum Confessario simplici, aut si obliviscitur illius, sit validè absolutus? Negat *Antoine*, dicendo simplicem Confessarium, cùm nihil possit in reservatis, non posse ne indirectè quidem absolvere ab illis. Sed communior est sententia opposita affirmans (ut fatetur ipse *Antoine*) cum *Suar. Cas. Lugo, Conc. Salm. etc.* et etiam est probabilior, quia Confessarius simplex licèt careat jurisdictione circâ reservata, non autem caret eâ in non reservata; quare jam non reservata directè absolvuntur, et indirectè reservata, nam mortalia non possunt absolvi nisi omnia simul, cùm non possit unum remitti, non remisso alio; et cùm hæc sententia sit communis,

---

(a) n. 590. — (b) n. 591.

et valdè probabilis ; si fortè falsa esset , saltem supplet Ecclesia quoad jurisdictionem , juxtà dicta num. 91. (a).

140 — Quæritur 2. An pœnitens confessus Superiori , si obliuiscitur reservati , possit postea de illo à quovis absolvi ? *Prima* sententia affirmat , *Lugo , Sanch. Castr. Ciera , Salm.* etc. dicens tunc præsumi superiorem solvendo velle etiam eum liberare ab omni vinculo reservationis , sicut pariter dictum est num. 69. de Jubilæo. *Secunda* sententia contrà negat eum *Suar. Silv. Angelo , Con. Antoine , etc.* quia ad auferendam reservationem , ut dictum est , requiritur , ut peccatum subjiciatur judicio superioris , ut ab eo competentem recipiat pœnitentiam , et medicinam ; adeò ut non debet judicari ablata reservatio , nisi adsit specialis præsumptio quòd superior vult eam auferre. Ratio equidem est valdè valida ; quâ de re hæc sententia mihi videtur probabilior , ad differentiam sententiæ relatæ num. 69 , quia ibi ratione Jubilæi conceditur Pœnitenti Privilegium posse absolvi à quocunque Confessario. Hoc non obstante primam sententiam improbabilem putare nequeo ; nisi adesset specialis præsumptio quòd superior distulisset absolutionem , si audisset Confessionem ; etiam reservati (b).

141 — Quæritur 3. An auferatur reservatio per Confessionem invalidam superiori factam. Respondetur : Si Confessio est invalida , sed inculpabiliter , communiter affirmant *Cajetan. Suar. Lugo , Wigandt , Castrop. Bonac. Ronc. Coninc. Holzm. Croix , et Salm.* (contrà *Concinam*) , quia tunc jam ex unâ parte superior intendit actualiter , et absolute Pœnitentem liberare tam à peccato quàm à reservatione ; et ex aliâ parte , jam Pœnitens subjicit peccatum suum superioris judicio , et ab ipso jam recipit remedia et pœnitentiam , quam semper tenetur adimplere , licet postea percipiat Confessionem fuisse invalidam , ut advertit *Bonac.* Nec valet dicere quòd superior , et tantò

---

(a) *Lib. 6. num. 596. v. Quæritur I.* — (b) num. 597.

minùs delegatus non auferunt reservationem, nisi per absolutionem; quia quoad Superiorem, benè potest ipse concedere illam extrà Sacramentum; et in eo casu benè præsumentum est auferre velle; et in quantum ad delegatum, licèt iste non possit sinè absolutione eam auferre, nihilominùs tunc judicatur posse eam auferre ex voluntate ipsius superioris, aut saltem virtute consuetudinis approbatæ ex auctoritate communi DD. (a) Major difficultas fit, quandò Confessio est sacrilega; tunc dicunt absolutè *Holzm. Viva, Ronc. Conc. et Croix* non auferri reservationem, quia non præsimitur superior velle, ut subditus ex suo scelere beneficium reportet. Sed pariter communiùs affirmant *Suar. Lugo, Castrop. Bonac. Vasq. Filliuc. Salm. Cajet. Conin.* etc. et non improbaliter, quia aliud est finis Confessionis, qui est remittere peccatum; aliud est finis reservationis, qui est ut subjiciatur peccatum iudicio superioris, et hic jam obtinetur; et licèt superior ex voluntate interpretativà nolle, nihilominùs jam vult voluntate actuali illam auferre. Secùs autem dicendum (ut rectè advertunt *Lugo, Suar. et Vasq.*), si pœnitens culpabiliter taceret peccatum, aut, addit *Suar.*, si ipsi confiteretur reservatum sinè animo illud vitandi, aut pœnitentiæ satisfaciendi, modò postea non mutaret voluntatem (b). Et secùs etiam currit de Confessione sacrilegà, aut invalidà factà in Jubilæo, ut dictum est n. 67. quia ibi alia procedit ratio.

142 — Quæritur 4. In dubio an pœnitens nec ne incurrerit aliquod reservatum, an possit à simplici Confessario absolvi? Respondetur: Quandò dubium est facti, nempè utrùm peccatum fuerit veniale, an mortale, an mortale fuerit nec ne consummatum, tunc apud omnes (excepto *Wigandt*) pro certo habetur quòd possit; ità *Suar. Sanoh. Lugo. Conc.* et alii; quia reservatio utpotè odiosa, est strictè interpretanda, undè intelligenda de peccatis

---

(a) num. 598. — (b) *Ibid.* v. Qu. IV.

certè gravibus, et consummatis, ut dictum est n. 132. Si verò dubium est circà jus, nempe quandò controvertitur inter DD. an aliquod peccatum sit vel non reservatum Confessario; in hoc casu negant *Conc. Wigandl*, et *Antoine* cum *Armil.*, dicentes quòd Confessarius non potest absolvere cum jurisdictione quæ tunc ei dubia facta est. Sed etiam in tali casu AA. citati, et communiter etiam affirmant *Filliuc. Hurtadus, Bonac. Sà, Henriq. Anaclet. Elbel, Viva, Spor. Salm.* etc. et hoc sive dubium sit positivum, sive negativum, quia in utroque currit eadem ratio; dùm in dubio Confessarius possidet facultatem absolvendi. Præterquàm quòd cum hæc sententia sit communis, et probabilissima, in casu, quo fortè esset falsa, supplet Ecclesia. Nec obstat dicere quòd Clemens VIII. suo Decreto prohibuit Confessariis Privilegiatis absolvere à casibus Bullæ Cœnæ, licèt essent *dubiè reservati*; et quòd pariter in *Extrav. Perlectis*, vetitum est Episcopis absolvere à percussione gravi Clericorum, etiam in dubio an sit gravis vel levis; quia respondetur, quòd ambæ hæc prohibitiones magis confirmant nostram sententiam: Ergò, dicimus, in aliis casibus reservatis, exceptis his duobus, rectè potest dari absolutio; nam *exceptio firmat Regulam*. Sed hic notandum quòd Clemens (ut referunt *Ronc.* et *Antoine*) anno 1602. moderavit præfatum Decretum, auferendo illa verba *etiam dubiè reservatis* (a). Limitant autem nostram sententiam *Sanch. Bonac.* etc. in casu quo illud peccatum reservatum judicaretur in foro externo; sed hæc limitatio meritò etiam refellitur à *Lug., Escob. Spor. Tamb. et Salm.* quia differt forum externum ab interno. In illo attenditur præsumptio, et non præstatur pœnitenti fides. Sed in hoc Sacramentali omninò creditur pœnitenti, donec non constet de opposito. (b)

---

(a) *Lib. 6. num. 600.* — (b) *Ibid. v. Limitant.*

143. — Quæritur 5. An qui confessus est simplici Confessario dubiè reservatum, omninò liberetur à reservatione, etiamsi postea illud cognoscat certè reservatum? Negat *P. Conc.*; sed affirmant communiter *Lugo, Dicast. Aversa, Spor. Viva, Sanch. et Salm.* cum aliis; quia cum confessus sit peccatum tanquam dubiè reservatum, jam directè absolutus est (ut fatetur ipse *P. Conc.*) ideòque remanet directè reservatio ablata. Alius est casus, ut diximus n. 35. Quando pœnitens confitetur peccatum uti dubium, et deindè recordetur esse certum, quia tunc tenetur ipse iterum confiteri ut certum, ut suppleat integritati, et ut exponat Confessario, ut reverà fuit in conscientia; sed in casu nostro, remisso peccato, est jam, ut dictum est, ablata reservatio; undè cessat obligatio adeundi Superiorem, ut liberetur ab illà (a).

144. — Quæritur 6. An possit absolvi à reservatis, qui peccavit in confidentiam licentiæ? Aliqui dubitarunt, sed communior sententia affirmat cum *Sanchez, Lugo, Filliuc. Bonac. Molfes. Salm. Aver.* etc. Ratio est, quia, esto superior nolit, ut subditus ansam capiat occasione licentiæ, attamen non intendit postea absolutionem negare pœnitenti, quem verè pœnitet sui peccati et proponit illud vitare. Idem diximus de Jubilæo n. 70. (b).

145. — Quæritur 7. An licentia data pro reservatis extendi possit ad peccata post ipsam commissa? Respondetur; non extendi jam si licentia datur pro solis peccatis speciatim nominatis, aut pro numero determinatis. Secùs verò si indefinitè conceditur; ita communissimè *Lugo, Ronc. Bonac. Passerin. Præpos. Aver. Dicast. Salm.* etc.; excipitur tamen, si pœnitens, cui præsertim licentia concessa est aliud peccatum committeret post notabile tempus, v. gr. post mensem, aut si licentia concessa fuisset intuitu alicujus festivitatis particularis (c).

---

(a) *Ibid.* v. Quæritur II. — (b) num. 601. — (c) *Ibid.* Qu. 4.

146. — Quoad autem facultates Episcoporum absolvendi à casibus Papalibus occultis, et impeditis, vide dicenda *Tom. III. Tract. XX. Punct. II.* et quoad facultates Regularium, vide ibidem ex n. 97.

## CAPUT VIII.

### De Sigillo Confessionis.

*Obligatio Sigilli 147. De iis qui tenentur ad Sigillum 148. An teneatur qui est requisitus de consilio à Confessario ex pœnitentis licentiâ 149. An consultus ab ipso pœnitente 150. An qui legit folium Confessionis 151. Cadunt sub Sigillo I. Peccata etiam levia. II. Peccata complicitis, sed ex licentiâ pœnitentis potest admoneri complex 152. III. Obiectum peccati. IV. Pœnitentia. V. Circumstantiæ, sed non impertinentes. VI. Revelationes, et virtutes quandò etc. VII. Scrupuli 153. VIII. Defectus naturales 154. Casus de pœnitente surdo 155. Casus in quibus non adest obligatio Sigilli. De licentiâ pœnitentis : et an liceat eum admonere intra Confessionem, quin ab eo petatur licentia 156. Casus in quibus læditur Sigillum. 1. Qui diceret in Monasterio, etc. 157. Qui diceret in oppido etc. 158. II. Qui utitur notitiâ Confessionis ad gubernationem, cum gravamine, etc. 159. Si redit Pœnitens malæ conscientie 160. An Confessarius possit sibi cavere de damnis etc. 161. An possit præberi schedula Confessionis, etc. 162. Si Pœnitens minetur mortem etc. 163. An liceat uti opinionibus probabilibus etc. 164.*

147. — **S**IGILLUM Sacramentale inducit obligationem tacendi peccata et omnia alia in Confessione manifestata in ordine ad absolutionem etiam colloquendo cum ipsomet pœnitente : Et hæc obligatio est ita stricta, ut Confessarius in nullo casu et tempore potest ea revelare, licet mortem subiturus esset. Ut clarius super hanc materiâ valde implicatè procedam,

procedam, adnotemus hîc primo loco eos qui tenentur ad Sigillum : Secundo ea quæ cadunt sub sigillo : Tertio casus in quibus lædatur sigillum : Quarto casus in quibus non lædatur.

148. — Et primo loco adnotabimus eos, qui tenentur ad sigillum. Generaliter loquendo, tenentur omnes ii, ad quos quocumque modo pervenit notitia Confessionis. Sed loquendo in particulari, tenentur 1. Confessarius, qui frangendo sigillum tria peccata committeret, sacrilegii ob injuriam quam infert Sacramento, injustitiæ quâ afficit pœnitentem et etiam detractionis, si peccatum non esset publicum. Confessarius, si fortè interrogaretur de peccatis auditis, potest rectè affirmare etiam juramento se nihil audivisse; nam de omnibus; quæ ipse in Confessione excepit, nullam habet scientiam communicabilem; ità communiter *S. Anton. Suar. Laym. Wigandt, Antoine*, et alii cum *S. Thomâ (a)* qui dicit : *Potest jurare se nescire, quod scit tantum ut Deus.* Et hoc etiamsi, ut dicunt *Lugo, Vasq. Suar. Laym. Croix*, etc. (contrà *Conc.*) Confessarius requisitus esset ad respondendum non ut homo, sed uti Dei Minister : Aut si requisitus esset ad respondendum sinè æquivocatione, ut dicunt *Lugo, Holzm. Croix*, etc., nam tunc ille jam respondet sinè æquivocatione, nempe intelligitur sinè illo æquivoco quod potest licitè omitti; nam contrà interrogans non habet jus, ut ei respondeatur sinè illo æquivoco quod non potest omitti sinè peccato. Si verò Confessarius interrogatur, an vel ne dederit absolutionem pœnitenti; respondere debet : *Functionus sum officio meo.* Sed sic dicere aliquandò etiam suspicionem negatæ absolutionis afferre potest; undè omnibus istis interrogationibus temerè factis semper satius erit respondere exprobrando sic; *Suntne interrogationes faciendæ!* Si autem accideret casus, quòd Confessarius non absolvisset, et Clericus interrogaret, utrùm pœnitens communicaturus sit?

---

(a) *In 4. dist. 21. q. 3. a. 1. ad 3.*

242 *Tract. 16. De Pœnitentiæ Sacramento.*

Confessarius respondere debet : *Interroga eum, an velit communicare* (a). II. Tenetur etiam ad sigillum Prælatus qui requisitus fuit de licentia pro casibus reservatis, ut rectè dicunt *Suar. Lugo, Conc. et Salm.* (contrà *Castrop. et Vasq.*) quia secus redderetur odiosa Confessio. III. Interpres. Qui audiret aliquod (etiam casu inculpabiliter) à pœnitente prolatum in ordine ad Confessionem, ut dicunt comm. *Bonac. Laym. Castrop. Salm.* etc. contrà *Sol.* Ità pariter qui auscultat peccatum voce elatâ confessum, sed in aliquâ necessitate naufragii, conflictus etc.; secus autem si pœnitens tantum ad suam confusionem vellet publicè confiteri; *Castr. Coninch. Salm.* etc. V. Omnes quibus aliquid sacrilegè revelatum est, communiter *Laym. Holzm. Salm. Conc. Spor.* etc. VI. Laicus qui dolo se finxisset Confessarium; *Suar. Lugo, Ronc.* et alii communiter contrà *Sotum, et Vasq.* VII. Qui alterius rudis Confessionem scripsit. Nonnulli addunt etiam pœnitentem sub eodem sigillo Sacramentali teneri ad reticenda ea quæ Confessarius ei dicit; sed hoc negant communis et vera sententia cum *Layman, Wigandt, Suar. Castrop. Bonac. Salm. Holzm. Busemb.* etc. quia reverà jus sigilli institutum est in pœnitentium beneficium. Omnes tamen conveniunt cum *Holzm.* pœnitentem vinculo secreti naturalis teneri ad reticenda à Confessario sibi dicta, quorum propalatio potest illi damno esse; et ego subjungo tale vinculum esse strictius simplici naturali; dùm consilia ab aliis data sunt spontanea, sed illa Confessarii data sunt ex officio et obligatione; undè infero quodd rarissimus esse posset casus in quo pœnitens tale secretum licitè revelare posset, cum damno Confessarii (b)

149. — Quæritur 1. An Doctor quem Confessarius consulit de licentiâ pœnitentis teneatur ad sigillum Sacramentale? Negant *Castrop. Vasq. Tamb. Diana,* etc. dicentes tunc peccati notitiam non ha-

---

(a) *Lib. 6. num. 645.* — (b) *num. 647.*



beri ex Confessione, sed ex manifestatione factâ ex licentiâ, et consequenter nomine pœnitentis; undè sicut non teneretur ad sigillum Sacramentale, qui consultus esset ab ipsomet pœnitente, ità nec requisitus pœnitentis nomine. Sed communiùs et probabiliùs affirmant *Siv. Navar. Lugo, Laym. Bonac. Spor. Croix, Petrocor. Ronc. Mazzot. et Viva*, et expressè docet *S. Thomas (a)*. Ratio est quia eadem Sacramenti institutio exigit, ut remaneat sigilli obligatio unicuique ad quem pervenit notitia peccati causâ Confessionis, aliàs confessio semper redderetur odiosa. Opponit *Tamb.* quòd pœnitens in dandâ licentiâ præsумitur voluisse abstrahere illam notitiam ab obligatione sigilli; sed nos respondemus cum *Lugo, et Spor.* quòd imò præsумitur oppositum, nempe quòd quilibet pœnitens, dando licentiam, eam det majori quam imponere potest restrictione, cum agatur de re tam odiosâ quàm est peccata sua propalare (b). Advertendum tamen hic quòd non obstante sigillo, Doctor, qui consilium dedit, donec iudicium per absolutionem non perfectum est, potest liberè loqui de illo casu cum Confessario, et cum aliis in consilium convocatis, quia moraliter sic intelligitur fuisse data licentia. Advertendum etiam, quòd si eveniret unquam quòd duo Confessarii semotim peterent consilium ab eodem Doctore de pœnitentis licentiâ, dicit *Lugo*, quòd non potest Doctor cum secundo loqui de circumstantiis auditis à primo, et ignotis secundo; sed pace tanti Doctoris, ego contrarium sentio, quia pœnitens dando licentiam secundo Confessario loquendi de casu cum eodem Consultore; sicut certè credendum est, nihil aliud velle Pœnitentem quàm consilium rectum, ità etiam certè præsумendum est illum consentire, ut Consultor dicat quicquid scit, et quicquid dicendum sit, ut bonum præbeat consilium (c).

150. — Quæritur 3. An teneatur ad sigillum ille quem ipse pœnitens consulit de Confessione quam

---

(a) *In 4. dist. 21. q. 3. a. 1. q. 3. et a. 2. ad 4.* — (b) *num. 648.* — (c) *Lib. 6. num. 648. v. Notandum. 11.*

244 *Tract. 16. De Pœnitentiæ Sacramento.*

alii facere intendit? Affirmant *Tamb. Conc. Spor. Antoine, Croix, Diana* etc. dùm dicunt quòd dùm oporteat pœnitentibus consilium capere, ut benè confiteantur, si Consultor non teneretur ad sigillum, Confessio redderetur odiosa. Sed probabiliùs negant *Suar. Castrop. Avers. Henriq.* etc. Ratio est, quia sigilli Sacramentalis obligatio non oritur nisi ex solâ Confessione Sacramentali, ad finem recipiendi absolutionem factâ, ut docent omnes cum *Vasq. Suar. Gabriel, Coninch. Castrop.* cum eodem *P. Conc.* et cum *S. Thomâ (a)* qui dicit: *Sigillum Sacramentale Confessionis non se extendit, nisi ad ea de quibus est Sacramentalis Confessio.* Undè fit quòd Consiliarius in quantum ad notitiam ei præstitam ad Consilium ab eo capiendum (non autem absolutionem), tenebitur ille quidem ad sigillum naturale, non autem Sacramentale. Ad rationem oppositam respondetur quòd timor revelationis redderet consultationem jam odiosam, sed non Confessionem. Si unquàm consultatio in aliquo casu esset necessaria ad Confessionem, non negamus tunc revelationem reddituram fore Confessionem odiosam; sed hunc casum nescimus reperire, quòd quis ut confiteatur, debeat absolutè alios consulere præter Confessarium. Secùs autem esset, meo iudicio, contra *Henriq.*, si pœnitens consuleret Confessarium, ut postea apud ipsum confiteretur de ipsismet, quæ tunc illi aperit; quia tunc illa consultatio iudicatur confessio proximè inchoata, dùm facta est ad recipiendam ab eo ipso absolutionem (b).

151. — Quæritur 1. An teneatur ad sigillum qui legit chartam, ubi pœnitens scripsit suam Confessionem? Affirmant *Spor. Ronc.* et alii pauci; tùm quia illa scriptura est proximè ordinata ad Confessionem futuram; tùm quia manifestatio talis scripturæ redderet odiosam Confessionem. Sed negant communissimè, et probabiliùs *Sot. Navar. Suar. Bonac. Wig. Sayr. Laym. Conin. Lugo, Castrop.*

---

(a) *In 4. d. 21. a. 1. q. 2. sed contra.* — (b) *num. 649.*

*Holzm. Viva, Elbel, Salm.* etc., quia sigillum non contrahitur in præparatione ad Confessionem, sed dumtaxat in Confessione actuali aut proximè inchoatâ, ut superius diximus. Et cum scriptura ordinariè non sit necessaria ad confitendum, respondetur ad secundam rationem oppositam (pari modo ac responsum est in quæst. antecedenti) quod timor revelationis scripturæ redderet odiosam scriptionem, non autem Confessionem. Rectè tamen excipiunt 1. *Lugo, Spor. Holzm.* etc. si illa scriptura confecta esset à muto, qui non posset aliter confiteri. 2. Si esset epistola ad superiorem scripta pro obtinendâ licentiâ reservatorum. 3. Si illa charta, ut rectè dicunt *Viva, Wigandt*, cum ipso *de Lugo*, esset consignata Sacerdoti pro Confessione faciendâ, quia tunc etiam habetur tanquàm Confessio inchoata; aut (addunt) si illa charta relicta esset casu in Confessionali post factam Confessionem. Ceterùm extrà hos casus, ut dicunt *Laym. Castrop. et Spor.* qui legeret hujusmodi scripturas (et tantò magis qui eas proderet) non potest excusari à peccato gravi, nisi sciret certò ibi contineri levissima peccata. Addunt ampliùs *Laym. et Spor.*, quod peccata ibi contenta non possent revelari, nisi in casu maximæ necessitatis, ut esset ad salvandam Republicam, aut vitam innocentis (a).

152. — Secundo loco adnotantur quæ cadunt sub sigillo, et sunt : I. Omnia peccata pœnitentis ab illo manifestata animo se accusandi (non autem si narrata fuissent per modum simplicis narrationis) etiam venialia licèt minimæ; nam in materiâ hujus sigilli certum est apud omnes non dari parvitatem materiæ; et hoc licèt pœnitens indispositus recessisset sinè absolutione (b). II. Peccata complices à pœnitente manifestata etiam sinè necessitate (c): jam dictum est *num. 42.* nunquàm licere Confessario interrogare pœnitentem de nomine complices. An cum licentiâ possit admonere complicem; negant

---

(a) *num. 650.* — (b) *num. 637.* — (c) *num. 640. II.*

*Tamb.* cum *Vasq.* dicentes peccata complicitis etiam cadere sub sigillo Sacramentali, adeòut Confessarius nequeat de illis loqui, non petitâ licentiâ tam pœnitentis quàm complicitis. Sed affirmat vera sententia cum *S. Anton. Gers. Adri. Navar. Suar. Lug., Ronc. Croix*, etc. nam sigillum Sacramentale ad nihil aliud institutum est, nisi ut pœnitentes libenter se confiteantur, quin timeant ne futurum sit ut peccata sua sciantur. Nec valet dicere quod aliàs Confessio redderetur aliis odiosa; nam respondetur quòd illud tantum odium Confessionis evitandum est, quod retrahit pœnitentes à Confessione, non autem illud quod movet impios ad optandum ne eorum complices confiteantur. Ceterum Confessarius non debet esse importunus in petendis licentiis, replicatis petitionibus, nam illis licentiis quæ non sunt omninò spontaneæ et plenè liberæ, etiam obtentis, ille nec uti poterit. (a).

153. — III. Cadit etiam sub sigillo objectum peccati, v. g. si filius accusatur se odisse patrem, quia ille rixatus est: rixa patris esset objectum peccati, quæ rixa non potest manifestari à Confessario, ut communiter *Filliuc. Viva, Renzi, Spor. et Tamb.* Probabiliter tamen hi duo postremi AA. dicunt, quòd si quis v. g. confiteatur se gavisum de homicidio in publicâ plateâ commisso, homicidium non caderet sub sigillo, quia tunc non censetur voluisse secreto ligare, quod publicè notum est. Ceterum est regulariter accepta ab omnibus illa regula, quòd non cadunt sub sigillo omnia illa quorum manifestatio non inducit periculum revelationis directè aut indirecte, nec gravamen pœnitentis (b). IV. Pœnitentia imposita si illa est gravis, imò melius dicendum, si non est de minimis, quæ plerumque solent imponi pro venialibus levissimis. V. Omnes circumstantiæ peccatorum etiam explicatæ post absolutionem, quoties illæ detectæ sunt in ordine ad Confessionem; v. g. si quis confiteretur Ordinibus

---

(a) num. 640. *Dub. I.* — (b) *Lib. 6. num. 641. d. 2.*

initiatum fuisse cùm esset spurius, aut se jactasse pro docto cùm esset ignarus; ignorantia tunc et esse spurium cadunt sub sigillo. Et hoc currit etiam in dubio an circumstantiæ declaratæ sint nec ne in ordine ad Confessionem, ut communiter dicunt *Suar. Bonac. Salm. Tamb. Croix. et Mazzot. (a)*. Ceterùm rectè notant *Coninc. Tannerus, et Diana*, quòd non adest obligatio sigilli de illis quæ à pœnitente tantùm per accidens narrantur, et minimè ad Confessionem vel ad peccatorum explicationem conferunt (b) VI. Cadunt sub sigillo revelationes, et virtutes, cùm deteguntur Confessario ad manifestandum aliquem defectum commissum, aut propriam ingratitudinem ergà Deum; secùs verò si manifestantur tantùm, ut Confessarius statum Animæ suæ cognoscat. Ità scitè distinguunt *Lugo, Croix, Ronc. Mazzot. et Viva.* VII. Cadunt sub sigillo scrupuli, et scrupulositas, quam pœnitens in exponendis peccatis suis, vel in declarandâ conscientia suâ ostendit, ut rectè dicunt *Conin. Lugo, et Granat.* contrà *Marchant.*, quia saltem in obliquo est materia Confessionis. Secùs autem esset, dicit *Lugo*, si scrupulositas non appareret ex pœnitentis relatione, sed appareret ex modo ipso confitendi; sed huic nec acquiescere valeo, dùm rationabiliter dicunt *Castrop. Hurtad. Conin. Spor. Tamb.* etc quòd multi ægrè ferunt se haberi et vocari scrupulosos, præcipuè si sunt Prælati, et Confessarii, aut Judices, etc., quia esse scrupulosus saltem est defectus naturalis, cùm sit signum perplexæ et confusæ mentis, et tales defectus naturales per Confessionem cognitos non licet propalare, ut mox dicemus. Quapropter ego non admitterem, nisi loquamur de secularibus, qui cùm dicuntur esse scrupulosi potius laudantur, dum sic habentur timoratæ conscientie (c).

---

(a) n. 637. ad FI. — (b) n. 641. v. III. infra ad IV.  
— (c) n. 644.

154 — VIII. Cadunt etiam sub sigillo (ut jam innuimus) defectus naturales pœnitentis, v. gr. quod sit Surdus, Balbutiens, Pauper, Ignarus, etc. quoties habetur eorum notitia ex Confessione, ut dicunt communiter *Suar. Lugo, Busemb. Roncagl. Mazzot.* etc. Et hoc etiamsi pœnitens exponeret tales suos defectus sinè necessitate, sed solùm ad meliorem suorum peccatorum explicationem, ut rectè notant *Lugo, Salm. Croix*, etc.; secus autem, ut subjungunt communiter iidem AA. citati, si illorum manifestatio nihil ad Confessionem referret; nam tunc non censetur pœnitens velle eos subijcere sigillo; imò etiamsi vellet subijcere, dico quòd non posset, dùm ille impertinenter eos manifestat (a). Quod dicunt *Lugo, Navar. Ronc. Mazzot.* et alii cum *Diana* (qui eam opinionem vocat communem, sed verum non est, ut videbimus) nec cadere sub sigillo defectus qui innotescunt ex ipsismet actionibus pœnitentis, aut ex modo confitendi, verb. gr. quòd sit rudis, balbutiens, aut naturæ impatientis, irresolutæ, etc., quia tunc (ut loquuntur) non est quòd manifestantur, sed committuntur in Confessione; *Spor. Tamb. Conc. Antoine, Renzi* etc. refellunt, dicentes quòd quoties ipsi percipiuntur causâ peccatorum explicationis, propalatio eorum redderet odiosam Confessionem: nec acquiescere valeo illi quod dicunt iidem AA. *Spor. Tamb. et Conc. cum Wigandt et Viva*, quòd non adsit sigillum, pro talibus defectibus, si à pœnitente referuntur, ita ut ex circumstantiis appareant communiter noti, quia tunc (ut dicunt) non præsumitur pœnitens eos narrare, nisi ut notos, dùm rectè dicit *Holzm.* eorum manifestationem posse aliquo modo retardare pœnitentes à Confessione. Nihilominus hoc intelligitur tantùm pro iis defectibus quorum manifestationem ex se ægre ferre potest pœnitens, ut esset dicere quòd sit hebes mente, naturâ iracundus, rudis, incapax, pauper (si ille est civilibus natalibus); non verò

---

(a) num. 642.

cùm sunt defectus qui rubori aut exprobrationi ei non sunt, ut est esse cæcus, surdus, mendicans, et huiusmodi, et contrà jam communiter innotescunt. Nec etiam puto licere plerumque, contrà id quod dicit *Lugo*, manifestare peccata commissa à pœnitente dùm confitetur, v. g. convicia illata ab eo in Confessarium, et huiusmodi, quia in hoc indirectè manifestaretur aut absolutio denegata, aut aliqua vehemens objurgatio. Quod autem dicit *Roncagl.* quod si pœnitens communiter nosceretur nimis prolixus, et molestus in confitendo, Confessarius non frangit sigillum, si ab eo aufugeret, ut liberaretur ab illo tædio; hoc potest admitti, sed tantùm quandò communiter unà simul ille pœnitens haberetur bonæ conscientia; secùs autem dicerem, si adesset suspicio quod ejus conscientia sit gravata etiam culpis gravibus.

155 — Loquamur hìc de illo casu facili eventu, sed qui apud AA. non invenitur discussus. Quæritur quid faciendum Confessario, si quis confitendo confusè de materiis gravibus, et interrogatus à Confessario de circumstantiis, et de habitu, cognosceretur esse surdus, dùm non respondit, aut respondit abs re; et contrà Confessarius ob adstantes non posset vocem elevare? Ego sic dico: Si circa principium Confessionis animadvertit pœnitentem esse surdum, tunc ei imponere debet, ut tempore et loco opportuno redeat, cùm non adsint qui eum audire possint; et interim potest circumstantibus indicare ejus surditatem, cùm illa est communiter nota. Sed si in progressu Confessionis id animadvertet, tunc non potest Confessarius elatà voce ei imponere, ut redeat, quia aliis suspicionem ingereret illum de materià gravi confessum fuisse; ideòque in tali casu dicerem, quod Confessarius cùm peccata meliori modo quo possit, intelligere curaverit, absolutionem det pœnitenti absolutam, si probabiliter eum judicat dispositum, conditionatam, si de dispositione dubitat; et pœnitentiam in hoc casu debet adjungere levem, cùm alii eam audituri sunt (a).

---

(a) *Lib. 6. n. 644. v. Petes hìc*

156. — Tertio loco, adnotamus casus, ex quibus non oritur obligatio vel fractio sigilli. I. Cùm Confessio fuit ficta, aut pravo fine facta, v. g. furandi, seducendi Confessarium, aut ei illudendi. II. Si quis diceret aliquod, et se protestaretur id dicere sub sigillo Confessionis, in hoc nunquàm adest sigillum Sacramentale, quia tale sigillum oriri nequit, nisi à solo Sacramento (a). III. Si Confessarius dicit in generali Confessionem fuisse de materiâ levi. Dico de materiâ levi, quia esset fractio sigilli dicere eam fuisse de pluribus venialibus, aut nominare aliquem culpam, licet minimam, in particulari, cùm in hoc sigillo non detur parvitas materiæ: ita communiter *Laym. Suar. Lugo, Salm.* etc. (b). IV. Si laudat conscientiam pœnitentis, sed in hoc advertere debet, ne suspicionem det malæ conscientiæ aliorum qui eodem tempore forsitan sibi confessi essent. V. Si dicit se aliquem confessum fuisse, modò pœnitens ei non vetuisset, ne se proderet; aut modò ille clam ad confitendum non venisset, ut advertunt *Navar. Busemb. Holzm. Sporer,* etc. VI. Si generaliter loquitur se audivisse tale quoddam peccatum in Confessione, ita tamen ut moraliter non possit in pœnitentis cognitionem venire; sed in hoc ceteroquin Confessariis non modica cautio adhibenda est, præsertim loquendo in Oppidis; quia sæpè ob circumstantias personæ, aut oppidi auditores faciliè possunt venire in cognitionem, aut saltem in suspicionem pœnitentis. VII. Si utitur notitiâ habitâ extrâ Confessionem, modò non manifestet aliquam circumstantiam ex solâ Confessione cognitam. Et in hoc etiam cautè procedendum est, quia aliquandò, si non est revelatio, saltem potest esse circumstantibus periculum scandali, cùm apprehendere possint, sic Confessiones revelari (c). VIII. Si manifestat aliquid ex licentiâ pœnitentis, quod certè licitum est, ut docent *Nav. Laym. Lugo, Conc. Wigandt, Roneagl. et alii communi-*

---

(a) num. 636. — (b) n. 640. — (c) n. 638.



ter cum *S. Thomâ* (a), contrâ *Sotum*, *Durandum*, et alios pauciores, qui dicunt non posse pœnitentes hanc dare licentiam; sed nos dicimus cum communi, quòd tale sigillum, sicut tantum in pœnitentium favorem impositum est, ita ipsi possunt remove. Advertendum tamen, quòd ut Confessarius uti possit tali licentiâ, debet esse 1. expressa: 2. omninò spontanea; undè non potest uti eâ, qui unquam eam obtinisset minis, aut metu reverentiali, ut esset si eam obtinisset replicatis petitionibus, postquam pœnitens in principio renuisset eam dare. Quapropter semper consultum est, ut inducatur pœnitens ad loquendum extrâ Confessionem de eo, quod patefacere debet; 3. Non sit revocata, quia pœnitens semper potest eam revocare: et idem puto currere, quandò censetur pœnitens in alio casu, si adesset, fore ut eam revocaret, quia tunc uti tali licentiâ videtur fore ut redderet etiam odiosam Confessionem. Advertendum hìc cum *Henriq. Grassiis*, et *Diana*, quòd in dubio, an Confessarius nec ne locutus fuisset de licentiâ, potiùs credendum est Confessario, quàm pœnitenti, aut ejus hæredibus, v. g. quandò Confessarius ex licentiâ pœnitentis detegit restitutionem faciendam. Præterea advertendum interdum talem licentiam facto concedi à pœnitente, nempe cum ille ex se de rebus in Confessione manifestatis loqui incipit, ut comm. docent *Tann. Bon. Suar. Conc. Antoin. Roncagl. Buf. Salm* et alii cum *Lugo*, qui præterea advertit, quòd tunc perseverat jam judicium sacramentale, cum illa licentia censeatur moraliter conjuncta cum Confessione factâ (b). Jam dictum est n. 124. nunquam illicitum esse monere pœnitentem, non petita ab eo licentiâ de errore in Confessione commisso. Licitum est tamen intrâ Confessionem monere de omnibus defectibus commissis, et peccatis confessis etiam in præteritis Confessionibus, ut communiter *Lugo*, *Salm. Wigandt*, *Conc. Antoin. Roncagl. Spor.*, etc.

---

(a) in 4. *Dist.* 21. q. 3. a. 2. — (b) *Lib.* 6. n. 651.

( quicquid dicant *Diana*, et *Fagund.* ) quia sæpè Pertinet ad Confessarii officium meminisse rerum præteritarum, quoties censentur prodesse pœnitenti. Ne quis dicat, pœnitentem retinere jus sigilli etiam in novâ Confessione, quàm facit; imo dicendum est potiùs Confessarium in actu Confessionis habere jus dicendi quicquid prodest pœnitenti, et sciendi ea omnia, quorum notitia potest inservire ad meliùs monendum pœnitentem (a). Et hoc dicunt etiam communiter præfati AA. licere Confessario hoc facere immediatè post Absolutionem (b).

157 — Quarto loco notantur casus, quandò læditur sigillum. Regula generalis est quòd læditur sigillum, quoties utitur Confessione, directè vel indirectè revelando peccatum, aut in pœnitentis gravamen. Sed descendamus ad casus particulares. I. Frangit sigillum, qui diceret se in tali Monasterio audivisse peccatum grave ejusdam Religiosi, aut diceret quòd ibi committuntur peccata gravia, licèt personam reticeret, quia tunc quilibet ejusdem Monasterii damnum pateretur; ità communiter *Suar. Busemb. Diana, Concin. Castrop. Laym. etc.* quicquid dicant *Escob. Henriq. etc.* idem dicit *Diana* cum *Maldero* si diceret se audivisse peccatum alicujus Religiosi talis Ordinis. Sed probabiliter huic contradicit *P. Conc.*; dùm hoc dicere non censetur sigilli revelatio, nec gravamen pœnitentis, nam in quolibet Ordine communiter adsunt Religiosi pravi; modo illa non esset Religio strictæ observantiæ(c). Dicit etiam *Diana* quòd Confessarius alicujus Monasterii Monialium scandalum afferret, si concionando nominaret defectus in Confessione auditos. Sed hoc etiam intelligendum est cum grano salis, nempe in casu quo nominaret aliquam culpam particularem alicujus Monialis, aut illius Monasterii; secùs autem si loqueretur in communi de defectibus quæ communiter in omnibus Monasteriis committi solent aut possunt; aliàs qui audit Confessiones in Monasteriis, nun-

---

(a) n. 653. — (b) n. 652. — (c) n. 654. v. d. 2.

quàm posset ibi concionari; quod dicendum non est, et communiter oppositum fert usus, et constat ex Cap. *Sacerdos*, afferendo *num. seq. (a)*.

158 — Quæritur autem, an frangat sigillum, qui diceret in tali oppido committi talia peccatorum genera, quæ ipse audivit in Confessione? Negat *Navar. Ren. Fagund. etc.* Sed communissimè et meritò affirmant *Suar. Bonac. Tamb. Loym. Lugo, Con. Diana, Viva, Castrop. etc.* si locus est parvus; quia tunc revelatio cum redundaret in infamiam Communitatis, redundaret etiam in gravamen poenitentis. Secùs autem si oppidum est magnum, et delicta sunt publica, ut dicunt iidem *AA. Lugo, Conc. Viva, etc.* cum *Petrocor. et Habert*, qui rectè hoc permittunt tunc etiam concionatoribus, modo non manifestent vitia, contrà quæ invehuntur, se audivisse in Confessione; et modo non descendant ad circumstantias particulares, et disserant in generali, ut dictum est, cap. *Si Sacerdos de offic. jud. ord.*, ubi hoc habetur: *Si Sacerdos sciat pro certo, aliquem esse reum alicujus criminis, vel sic confessus fuerit... non debet eum arguere nominatim, sed indeterminatè (b)*. Dubium tamen restat quodnam oppidum dicatur parvum, et quodnam magnum. Ego sic dicerem, sicut aliorum etiam coepi consilium: Ut dici possit, *Hic regnat v. g. blasphemia*, requireretur ut oppidum constaret saltem tribus millibus personis circiter; sed minùs si tantùm diceretur, *hic committuntur multa peccata gravia*, quin nominentur in specie. Ut nominetur autem aliquod peccatum afferens infamiam, (quod tamen esset etiam publicum) meo judicio requiritur, ut oppidum sit valdè populo frequens, v. g. 6. aut 7. millibus animarum. Si concionator verò haberet notitiam peccatorum extrà Confessionem, potest majore libertate loqui; sed pariter cautione utendum est, ne suspicionem revelationis ingeret illis qui ei confessi sunt (c).

---

(a) n. 654. *sub init.* — (b) *Ibid. v. Dub. I.* — (c) *num. 654.*

254 *Tract. 16. De Pœnitentiæ Sacramento.*

159. — Frangit sigillum qui utitur notiâ Confessionis ad externam gubernationem in pœnitentis gravamen. Hoc est contrà id quod scribit *Sambovius*, innixus multis AA. antiquis *Adri. Valen.* cum *S. Bonavent.* et *S. Thomâ* (a). Sed Clemens VIII. Decr. 1594. die 26 Maji hoc prohibuit dicens : *Tàm superiores pro tempore existentes, quàm Confessarii qui postea ad superioritatis gradum fuerint promoti, caveant diligentissimè, ne eâ notiâ quam de aliorum peccatis in Confessione habuerunt, ad exteriorem gubernationem utantur.* Et licèt hoc Decretum fuerit editum tantum pro Regularibus Prælatiis, rectè tamen *Croix*, et *Holz.* quicquid dicat *Habert*, tenent extendi etiam ad sæculares, cùm certè ratio currat etiam de ipsis, nempè quia aliàs Confessio redderetur odiosa. Præterquam quòd clarius hoc factum est ex alio Decreto S. C. publicato ex mandato Innoc. XI. anno 1682. quo sequens Propositio damnata fuit : *Scientiâ ex Confessione acquisitâ uti licet, modò fiat sinè directâ aut indirectâ revelatione, et gravaminè pœnitentis ; Nisi (en quod damnatum fuit) aliud multò gravius ex non usu sequatur, in cujus comparatione prius meritò contemnatur.* Deinde statuit : *Mandantes etiam universis Sacramenti pœnitentiæ Ministris, ut ab eâ (Doctrinâ) in praxi deducendâ prorsus abstineant.* Itaque ex præfato Decreto vetitum est uti notiâ Confessionis in pœnitentis gravamen, licèt ex non usu majus damnum ei eveniret. Hinc rectè dicunt *Croix*, *Viva*, *Holz.* et *Mazzot.* — (contrà id quod etiam dicit *Sambov.* cum *S. Anton.*) numquàm licere ex notiâ Confessionis remove- indignum ex officio, aut ei negare suffragium ad electionem Officii, aut Beneficii, aut negare ei Sacramenta, aut à servo auferre claves aut præteritâ benevolentia communicatione privare, aut ei torvum oculum ostendere, claves arcæ abscondere, fores claudere (b). Ità nec etiam licitum est (nec clàm) negare Communionem pœnitenti, aut eum monere,

---

(a) *Suppl. q. 11. a. 1. ad 3.* — (b) *Lib. 6. n. 656.*

postquam ei denegata fuit absolutio, ut diximus n. 124. et ut hîc dicunt communiter *Tourn. Conc. Mazzot. Croix, Holzm. etc.* contrà *Petroc.* qui pro se citat *S. Bonavent. S. Thomam, S. Antonin.* et alios, qui olim tenebant posse negari; sed hodiè oppositum certum est ex Decret. Innoc. XI. superiùs relato. Dicunt contrà *Castrop. Bonac. Habert, Antoine, Spor. etc.* posse Confessarium ex notiâ Confessionis cautiorem se reddere in custodiendis bonis, et in socordiâ suâ removendâ, modò non ingeratur suspicio peccati, nec adsit exprobratio aliqua pœnitentis; et huic adhæret *S. Thomas (a)* dicens: *Potest (Confessarius) dicere Prælato, quòd diligentius invigilet, ità tamen quòd confitentem non prodât.* Sed hæc omnia reprobât *P. Conc.* et non immeritò, dùm hæc in praxim deducendo difficulter quis evitare potest omne periculum revelationis aut gravaminis. Ceterùm advertendum 1. Regulam ab omnibus acceptam esse, etiam à *P. Concina*, licere uti notiâ Confessionis, quoties non subest nec gravamen, nec revelatio; undè bene potest Confessarius ex illâ mores suos componere, pro pœnitente orare, humaniùs cum eo tractare, casui studere, in interrogationibus se dirigere; aut instruere; aut alios monere in generali, ab aliquo damno cavere (b). Et ità etiam dicimus quòd sublato periculo revelationis aut gravaminis, Confessarius sciens pollutam esse Ecclesiam, potest, imò debet abstinere à celebratione, ut dicunt *Lug. Aver. Tamb. contrà Coninch. Sporer, Silvest. etc.* (c). Advertendum 2. quòd si quis prætenderet Beneficium, et superior extrà Confessionem sciret ipsum esse indignum propter aliquem defectum ætatis, aut scientiæ etc. non solùm potest, sed etiam debet ei denegare suffragium, licet ex Confessione cognovisset aliquod ejus crimen, ut dicunt *Merbes. Natal. de Alex. et Petroc.* cum *S. Thomâ (d)*. Nec obstat quòd pœnitens tunc posset suspicari ex Confessione ei denegari Beneficium, quia licet

---

(a) *Suppl. q. 11. a. 1. ad 1.* — (b) *Lib. 6. n. 657. v. communiter.* — (c) *num. 660.* — (d) *In 4. d. 21. a. 1. ad 6. et vide lib. 6. num. 657.*

adsit obligatio vitandi rationabiles suspiciones, non autem suspiciones, et conjecturas leves et irrationabiles, quas facile callidi suspicantur, ut docent *Lugo*, cum *Medin. Castr. Scot. et Croix*, cum *Gob. Tamb. et Gorm. et S. Thomá* (a) qui dicit: *Si amotio subditi ab administratione possit inducere ad manifestandum peccatum in Confessione auditum, vel ad aliquam (nota) probabilem suspicionem habendam de ipso, nullo modo Prælati debet subditum remove* (b).

160 — Dicit *Roncaglia*, et meritò, quòd si Confessarius cognoverit ex Confessione, aliquem esse malæ conscientiæ, non potest idèd (sinè aliâ causâ sufficienti) se excusare ab eo audiendo, si ille iterum redit ad confitendum, quoties ex excusatione aliis ingeret suspicionem; secùs autem dicendum, si Confessarius esset solus, et aliquo prætextu abiret, aut se excusaret ne eum audiret. Sed huic ultimo acquiescere nequeo, quia talis fuga aut excusatio redderet Confessionem odiosam tam pœnitenti, quàm aliis in genere; nam si fideles scirent Confessarios ex notitiâ Confessionis posse prætextus fingere, ut eos aufugiant; hoc eis occasio esset, ut Confessionem odio haberent. Undè dico quòd in tali casu Confessarius tunc tantum potest pœnitentem non audire, cum jam prius ex alio motivo statuerat aliam non excipere Confessionem (c).

161 — Quæritur 1. An Confessarius possit se cavere ab aliquo damno sub aliquo prætextu, si cognosceret ex Confessione sibi parari insidias in vitam et bona? Si abest revelatio sigilli et pœnitentis gravamen, proculdubio potest; sed dubium restat, utrum possit, quandò ex Confessarii actionibus insidias parantes argumentari possent Confessionem factam à complice de insidiis paratis? permittunt *Castrop. Wig. Laym. Petroc. etc.*, quia tunc, ut dicunt, Confessarius non revelat peccatum confessum, sed tantum Confessionem peccati factam. Sed meritò negant *Lugo, Sanch. Ronc. Salm. Mazzot.*

---

(a) *Quodlib. 5. a. 13.* — (b) *Lib. 6. n. 661.* — (c) *Lib. 6. n. 659. v. notand. Sub fin.*

etc. quia tunc semper intervenit revelatio indirecta, dum, talibus circumstantiis positis, non tantum revelatur Confessio, sed indirecte etiam peccatum confessum, aut saltem præbetur rationabilis suspicio.

162 — Quæritur 2. An cum Confessarius requisitus est de schedulâ Confessionis, possit eam exhibere pœnitenti non absoluto? Diversæ adsunt sententiæ, sed communior et probabilior cum *Laym. Ronc. Croix, Spor. Elhel, Holzm.* etc. (contrâ *Bonac. et Lugo*) ita distinguunt: Si schedula loquitur de solâ Confessione, illa non debet negari; quia si negaretur ex unâ parte revelaretur pœnitentis indispositio; ex aliâ si concederetur non jam testificaretur absolutio data, sed tantum Confessio facta, quæ jam revera facta est. Secus autem, si Confessarius deberet scribere schedulam, quod Pœnitens sit absolutus; quia tunc non obstat sigillum, cum mendacium juxta omnes sit intrinsecè malum, et in nullo casu dicendum est. Attamen si schedulæ essent jam impressæ, et ibi assereretur etiam absolutio data (quod à Prælati permitti nunquam deberet), tunc mihi videtur probabile cum aliis (quos consului), licite posse eam præberi etiam non absolutis, saltem cum palam eam petunt, quia tunc Confessarius nec dicit nec scribit aliquod mendacium, sed tantum facit illam actionem præbendi schedulam, quam ceteroquin negare non potest, quin pœnitentis indispositionem manifestet (a).

163 — Quæritur 3. An Confessarius possit vitare pœnitentem qui ei minatur mortem, ob absolutionem quæ ei denegatur? Respondetur cum *Lugo, et Ronc.* quod benè potest ab eo aufugere, quoties non datur aliis suspicio denegatæ absolutionis; nam illæ minæ jam non sunt Confessio, aut peccata narrata in Confessione, sed sunt peccata commissa intrâ Confessionem. Quod si non posset aufugere quin suspicionem istam ingerat, tunc pro absolutione recitare potest aliquam orationem. Nec obstat dicere

---

(a) *Lib. 6. num. 639.*

quòd ista videretur simulatio administrationis Sacramenti ; quia tunc eveniret simulatio , quandò diceret illam orationem , ut crederetur absolutio ; secùs verò cùm profert tantùm ut liberetur ab illâ vexatione. Posset etiam , ut dicit *P. Cardenas* , ut liberaretur à vexatione proferre formam ità : *Ego te non absolvo* , prolato verbo non submissa voce : vide dicenda in *Tom. III. Append. II. de Exam. n. 16. (a)*.

164 — Quæritur tandem 4. An liceat in hâc materiâ sigilli uti opinione probabili ? *Gobat. Croix , Diana* , etc. dicunt tantùm expedire , ut teneantur opiniones quæ magis favent sigillo : Sed meliùs dicit *P. Viva* , non licere uti scientiâ acquisitâ per Confessionem , nisi quandò moraliter certum est , aut saltem probabilissimum ( adeò ut oppositum non sit probabile ) non adesse aliquam fractionem sigilli , aut aliquod gravamen pœnitentis. Et duplici ratione hoc asserit ; primò quia sic requirit reverentia debita Sacramento ; sed hæc ratio sufficienter non convincit , dùm dicunt multi graves AA. *Pontius , Sanch. Salon. Vasq.* etc. non deberi majorem reverentiam quàm probabilem tam Præceptis Divinis , quàm Sacramentis. Secundò propter periculum gravaminis pœnitentis , quia , etiam gravamen probabile odiosam reddit Confessionem. Hæc ratio est valdè fortis , et effecit ut à primâ sententiâ ad hanc venirem : quandoquidem ex unâ parte non licet uti opinione probabili in præjudicium juris certi quod possidet proximus , ut jam dictum est *Tom. I. Tr. I. n. 21.* ex aliâ parte certum est quòd pœnitens possidet jus ne gravetur ex suâ Confessione ; quare non licet Confessario uti aliquâ opinione , quæ potest afferre probabile gravamen pœnitenti (b).

---

(a) num. 659. — (b) num. 633.



## CAPUT IX.

### De Sollicitatione in Confessione.

*Bulla Gregorii XV.* 165. *Punct. I. Claus. I.* In actu etc. 166. *Claus. II.* Sive antè etc. 167. *Claus. III.* Occasione Confessionis 168. *Prætextu Confessionis* 169. *Claus. IV.* Extrà confessionem etc. *An requiratur simulatio etc.* 170. *Punct. II.* *Casus in quibus denunciandum est* 171. *Casus in quibus non* 172. *Si mulier sollicitat Confessarium* 173. *An Confessarius divertens ad tactus etc.* 174. *Si emendatus etc.* 175. *Punct. III.* *An possit absolvi antequàm denunciaret ? An pœnitens teneatur epistolâ etc. et si cùm possit ex se , repugnet etc.* 176. *De excommunicatione quàm incurrit* 177. *Si admonitio non est profutura* 178. *Debet fieri denunciatio , licèt non probetur ; etiam ab aliis qui sciunt etc. et licèt sit occulta sollicitatio* 179. *Punct. IV.* *Quid si sollicitatio dubia* 180. *Qui laudat pulchritudinem etc.* 181. *Casus particulares* 182. *De inhabilitate sollicitantium ad celebrandum* 183.

165 — **E**X Bullâ Greg. XV. tenentur Confessarii ad monendos pœnitentes de obligatione denunciandi Episcopis illos sacrilegos Confessarios qui eos ad turpia sollicitassent. Primum omnium juvat hîc adnotare verba præfatæ Bullæ , anno 1622. *Omnes Sacerdotes , tam sæculares , quàm Regulares , qui personas , quæcumque illæ sint , ad inhonesta inter se , sive tum aliis quomodolibet in actu Sacramentalis Confessionis , sive antè , sive post immediatè , seu occasione , vel prætextu Confessionis , etiam Confessione non secutâ , sive extrà Confessionis occasionem in confessionario , aut in loco quocunque ubi Confessiones audiuntur , seu ad Confessionem audiendam electo , simulantes ibidem Confessiones audire , sollicitare vel procurare tentaverint , aut cum eis illicitos , et inhonestos sermones sive tractatus habuerint.* Et indè subjungitur : *Mandantes omnibus Confessariis , ut*

suos pœnites , quos noverint fuisse , ut suprâ , ab aliis sollicitatos , moneant de obligatione denunciandi sollicitantes , seu tractantes , etc. Inquisitoribus , et locorum Ordinariis.

## PUNCTUM I.

*Expenduntur Clausulæ appositæ in Bullâ Gregorii.*

166. — **C**LAUSULA I. *In actu Sacramentalis Confessionis.* Ad hoc sufficit ut Confessio inchoata sit, licet non perfecta. Et hîc nota denunciandum esse Confessarium qui intrâ Confessionem daret chartam pœniteni, in quâ ad venerea eam incitaret, ut habetur ex Propositione 6. damnatâ ab Alexandro VII. idem currit si in Confessione diceret pœnitenti ut expectet domi : Aut si interrogasset ubi habitet, et deindè ad eam accederet et sollicitaret, quoties ex circumstantiis dignosceretur quòd interrogatio facta sit fine sollicitationis; itâ rectè dicunt *Bonuc. et Bordon. (a).*

167. — Clausula II. *Sivè antè, sivè post immediatè.* Illud *antè immediatè* intelligendum est itâ stricte, ut nullum intercedat intervallum inter sollicitationem et Confessionem, ut communiter dicunt *Bos. Passer. et Delhen. apud Ronc.* Si autem dùm mulier antè sedem confessionalem confessura manet, Confessarius non casu, sed ex proposito manibus aut pedibus eam tangeret, certè denunciandus esset. Si verò Confessarius eam sollicitasset occasione quòd pœnitens petisset ab eo confiteri, dicimus cum *Bordon. (contrâ Salm.)* non propter hanc Clausulam denunciandum eum esse, sed per Clausulam III. *Occasione Confessionis*, quoties Confessarius uteretur illâ petitione ad eam sollicitandam; secùs verò cùm uteretur eâ tantùm ad colloquendum, et deindè tentatus sollicitasset (b). Pariter illud *post*

---

(a) *Lib. 6. n. 676. — (h) num. 677.*

*immediatè* intelligitur quandò nulla alia intermediat actio, ut communiter *Salm. Potestas, Hurtad. Peyr.* etc. Hinc dicit *Potestas*, quòd cùm pœnitens jam discessisset à confessionali, et hic postea eam sollicitaret, non est denunciandus; sed si *immediatè* post Confessionem ei diceret: *Expecta paulisper*, et post aliquod intervallum (non autem die sequenti) accederet, et eam sollicitaret, tunc denunciandus est, licèt in principio de alio negotio tractaret, quia tunc ille tractatus prudenter præsumitur fictus. Nihilominus quidam Doctor hoc negabat, et non abs re, si illud negotium, de quo in principio loquitur Confessarius, esset magni momenti, et prætexus non appareret. Proculdubio denunciandus est, si diceret pœnitenti, *hodiè me expecta domi tuæ*, et postea nullâ occasione negotii magni momenti eam sollicitaret. Idem currit, si statim à Confessione in aliquem locum secretum conduceret. Idem, si *immediatè* post Confessionem illâ accedente ad sibi deosculandam manum, ipse malitiosè adstringeret manum illius (a).

168. — Clausula III. *Occasione, vel prætectu Confessionis.* *Occasio* intelligitur quandò Confessarius invitat pœnitentem, vel pœnitens Confessarium ad veram Confessionem: *Prætectu* vero ad Confessionem fictam. Et 1. in quantum ad *occasionem*, si Confessarius requisitus à pœnitente ad excipiendam ejus Confessionem, sermonem aliò diverteret, et eam sollicitaret, jam ex hâc Clausulâ denunciandus est, licèt non adhuc in Confessionali sedisset, nec mulier genuflexisset, ut dicunt communiter *Castr. Salm. Ronc. et Potestas* (b). Idem hoc currit, licèt mulier peteret crastino confiteri, ut rectè dicunt *Conc. et Mazzot.* contra *Quarti, et Leand.* Nec obstat dicere quòd talis sollicitatio non est proxima ad Confessionem, quia jam verificatur quòd sit prætectu Confessionis (c). An autem denunciandus sit Confessarius quia ob peccatum auditum à pœni-

---

(a) *Ibid.* — (b) *num. 678.* — (c) *Ibid. Dub. 1.*

tente postea accedit domum ejus ad ibi eam sollicitandam : negant *Nav. Trullenc. Salm.* etc., quia tunc (dicunt) Confessarius non utitur occasione Confessionis, sed tantum notitiâ in Confessione habitâ. Sed probabilius affirmant *Ronc. Conc. Mazz. Potestas, Bordon. Lezan.*, quia reverâ tunc jam occasione Confessionis sollicitat, cum sollicitatio impulsus habeat à Confessione; et rationabiliter præsumitur Confessionis notitiâ ad sollicitationem usum fuisse, cum, auditâ mulieris fragilitate, interrogat v. g. de ejus habitatione, si ibi sola moretur etc. aut (ut dicit *P. Conc.*) si Confessarius cum tali pœnitente nunquam antea familiariter usus esset, et postea cognitâ ejus levitate accederet sollicitaturus, aut litteris sollicitaret, aut requisitus de Confessione, promitteret se eam auditurum, modò illa pravo suo desiderio consentiat (a).

169. — II. In quantum ad *prætextum* Confessionis, certè denunciandus est Confessarius qui prius exposceret pœnitentem, an velit confiteri, et postea eam sollicitaretur, ut rectè dicunt *Conc. Roncag. Bordon. et Mazzot.* Secus verò qui licentiam à Superiore peteret, ut in domum mulieris se conferat prætextu Confessionis, sed finis esset eundi ad eam tentandam, ut rectè dicunt *Salm. Ronc. Bordon. et Tancred.*, quia tunc Confessionis prætextus non est respectu pœnitentis, sed Superioris. An debeat denunciari confessarius qui cum pœnitente convenit, ut se infirmam simulet, et pretextu Confessionis ad se eum advocet; affirmant *Fagund. Mazz. Conc.* etc. Sed communius et probabilius negant *Ronc. Escob. Bordon. Diana, Leand. Trullench.* etc., quia non est quòd tunc fiat sollicitatio pretextu Confessionis, sed sub tali pretextu executioni mandatur eorum indigna conventio; adeoque pretextu non inservit ad sollicitandum, sed ad domesticis illudendum, ne de malo suspicentur. Tantò minùs mulier teneretur ad denunciandum, si illa pretextu confi-

---

(a) *Lib. 6. num. 678. dub. 2.*

tendi Confessarium sollicitaret, et ille consentiret. Secùs autem esset, si Confessarius mulierem sollicitasset, licèt extrà Confessionem, sed illà repugnante ob timorem ne videretur, Confessarius ei insinueret, ut se simulet ægrotam et tali prætectu illum ad se advocet; quia tunc rectè verificatur quòd prætectus Confessionis sit motivum quo ille ad sollicitandum pergat, et consensum mulieris obtineat. Ità etiam puto denunciandum fore Confessarium vocatum à matre ad audiendam Confessionem filiae, et ille sub tali prætectu accedit ad colloquendum cum filià pravo fine, et eam sollicitat. Ità etiam censeo denunciandum esse eum qui vocatur ad absolvendam mulierem sensibus destitutam, et ille sub tali prætectu, sivè occasione accedit ad eam, et inhonestè eam tangit. Idem dicendum cum *Escob. et Diana* de Confessario qui in Confessionali, aut in alio loco electo ad audiendas Confessiones pro audiendâ Confessione, ut simulat, sollicitat poenitentem (a).

170. — Clausula IV. *Extrà Confessionis occasionem in confessionario, aut in loco quocumque, ubi Confessiones audiuntur, seu ad Confessionem audiendam electo, simulantes ibidem Confessiones audire, sollicitare, vel provocare tentaverint, aut cum eis illicitos, et inhonestos sermones, sivè tractatus habuerint.* Notant *Escob. et Ronc.* quòd illud *simulantes ibidem Confessiones audire*, intelligitur quandò tam mulier simulat confiteri, quàm Confessarius audire Confessionem, inferentes id ex verbo *simulantes* quod comprehendit utrumque. Sed meliùs dicunt *Castrop. Trullench. Fagund. et Diana*, quòd ut denunciandus sit, sufficit quòd Confessarius maneat in Confessionali, aut in alio loco electo ad audiendas confessiones, et ibi muliere genuflexâ ipse eam sollicitat; nam tunc facto ipso Confessarius jam simulat Confessionem, dùm ità sufficienter efficit, ut adstantes credant quòd mulier confiteatur.

---

(a) num. 679.

Secùs autem esset, si extrà confessionalem sedem eam sollicitaret, dùm illa sistit, aut sedet (a). Dicitur est *extrà confessionalem*; sed hic suboritur aliud dubium, an sit denunciandus qui sollicitat, aut tractat de turpibus in confessionario, Confessionem non simulando? negant *Castr. Escob. Ronc. Salm.* etc. ratione ductà ex verbis in Bullâ: *In confessionario, aut in loco quocunque electo, simulantes ibidem Confessiones audire.* En igitur (dicunt) quòd præter confessionarii locum, requiritur etiam simulatio. Sed probabiliùs dicimus cum *Potestate, Diana, Conc. et Mazzot.* quòd si Confessarius sollicitat extrà confessionarium, tunc, ut denunciandus sit, requiritur simulatio Confessionis; sed si ille sollicitat in confessionario, sufficit ut adsit solus tractatus inhonestus. Et hoc probatur ex Decr. Pauli V. 10. Julii 1614. quo præcepit procedi in Confessarios, *qui tractant cum mulieribus in confessionali, extrà occasionem Confessionis de rebus inhonestis.* Itaque juxtà hoc Decretum non requiritur jam aliqua simulatio. Opponitur quòd hoc Decretum jam moderatum sit à Greg. suâ Bullâ; sed respondetur quòd nullum Decretum censetur revocatum, nisi subsequens sit omninò oppositum, adeòut non possit aliter explicari; sed hic rectè potest explicari Bulla Gregorîi, quòd simulatio non requiritur respectu Confessionarii, sed alterius loci ad Confessionem electi, dùm verba *simulantes ibidem*, apposita sunt immediatè post verbum *electo*. Additur quòd juxtà aliud Decretum Inquisitionis Rom. relatum in Opere præcipitur denunciatio omnium illorum, *qui abusi sunt Sacramento Pœnitentiæ, Confessionem, aut confessionarium adhibentes ad fines inhonestos* (b)<sup>6</sup>

PUNCTUM.

(a) n. 680. — (b) n. 680.

## PUNCTUM II.

### Qui denunciari debent.

171. — **H**ODIÈ ex Bullâ *Sacramentum* Benedicti XIV. 1741. (quicquid antè illam dixerint nonnulli AA.) omninò denunciandi sunt Confessarii sollicitantes. 1. Licèt jurisdictione privati sint. 2. Licèt sollicitatio fuerit mutua. 3. Licèt pœnitens consenserit (et hîc advertendum quod juxtâ Decretum relatum in Opere (a) pœnitens quæ consentit, non tenetur delictum suum aperire, imò super illud nec debet interrogari) 4. Licèt sollicitatio multò abhinc tempore evenerit (b). Item ex Bullâ Gregorii XIII. denunciandus est laicus qui se simulat Confessarium et sollicitat (c). Insuper denunciandus est Confessarius sollicitans, licèt de tali delicto aliundè fuerit accusatus, convictus, et in eum animadversum sit, ut rectè dicunt *Bon. Diana, Salm.* etc. contrà aliquos (d). Præterea procul dubio denunciandus est qui pœnitentem sollicitat, ut ipsa seducat aliam ad secum peccandum; et hoc tum ratione Decreti allati n. 170. in fin. tum ex Bullâ Greg. qui imponit denunciandos omnes, qui in *Confessione* personas ad inhonestam inter se, sive (nota) cum aliis quomodolibet... sollicitare... tentaverint. Et idem currit, si Confessarius in confessionali tractaret, ut pœnitens cum alio peccaret, uti constat ex præfatâ Bulla *Sacramentum*, ubi imponitur denunciatio, licèt sollicitatio non pro seipso, sed pro aliâ personâ peracta fuerit (e).

172. — Contrà non adest obligatio denunciandi 1. Confessarios qui sollicitant ad alia peccata non inhonestam, ut communissimè, et rectè dicunt *Castr. Bonac. Holz. Ronc. Mazzot.* etc. contrà paucos; quia talis obligatio nullibi expressa legitur. Nec ob-

---

(a) n. 700. — (b) num. 687. Qu. IX. — (c) n. 688. — (d) n. 687. — (e) n. 691. Qu. XIII.  
Tom II.

stat verba Bullæ, *illicitos et inhonestos sermones, sive tractatus*, adversarii opinionem suam firmando super verbo *illicitos*, quæ respondetur quòd utrumque verbum *illicitos*, et *inhonestos* ad idem refertur, sicut apparet ex contextu totius Bullæ (a).

2. Defunctos, nam pro ipsis omninò cessat finis tam emendationis, quàm animadversionis (b).

3. Pœnitentes qui sollicitant in Confessione, ut communiter docent DD. contrà *Caramuel*. me quidem admirante, nam in aliis est ità benignus, ne dicam laxus, et hìc tam severus, sed præter rationem, dùm pro legibus pœnalibus regula communis est quòd illæ non se extendunt ad casus similes. Neque hìc certè eadem currit regula de pœnitentibus ac de Confessariis, propter multa motiva quæ patent, et præcipuè propter suspicionem quæ intervenire posset revelationis sigilli, si Confessarii denunciassent pœnitentes (c).

173. — Sed quæritur 1. An mulier quæ sollicitavit Confessarium, teneatur illum denunciare, si ipse consensum præstitit. Affirmant *Ronc. Felix, Potestas, Saln. Mazzot.* etc. dicentes quòd ex Bullæ sensu debet imponi pœnitentibus denunciare non tantùm Confessarios sollicitantes, sed etiam illos qui in confessionali habent tractatus turpes. Sed negant *Bon. Castrop. Hurtad. del Bene, Trull., et Diana* vocat hanc opinionem probabilem, et tutam; et adhæret etiam *Ronc.* dicendo cum *Bordon.* quòd per tractatum inhonestum intelligitur ille, cujus auctor est Confessarius; sed ratio, quæ mihi validior pro hâc tuendâ sententiâ videtur, est quòd in Bulla Gregorii illis solis pœnitentibus debent Confessarii imponere onus denunciationis, quos noverint fuisse ab aliis sollicitatos. Pœnitentes sollicitantes dici non possunt sollicitati; undè ex verbis Bullæ videtur deduci, quòd mulier sollicitans potest si vult denunciare Confessarium, sed ad id non tenetur: Tùm quia in eo casu faciliter se exponit periculo, ne infamia propria manifestetur à Confessario denunciato: Tùm quia non præsumitur

---

(a) n. 684. — (b) n. 692. — (c) n. 689.



Pontifex voluisse imponere mulieri, quæ sollicitavit Confessarium, onus tam grave ut ipsamet debeat eum accusare, ideòque Pontifex expressit illa verba, *quos noverint sollicitatos*. Quidam dicere voluit hanc opinionem postea fuisse reprobata à Benedicto XIV. in Bulla *Sacramentum*, sed perperam hoc venditat, dum Pontifex nihil aliud dixit, nisi quòd debeat denunciari, *licet sollicitatio inter Confessarium et Pœnitentem mutua fuerit*. Sed magni interest inter mutuam sollicitationem, et illam Pœnitentis, cui Confessarius consentit; dum DD. rectè distinguunt primum à secundo casu, ut videre est apud *Potestatem* (a) ubi dicunt sollicitationem mutuam evenire, cum Confessarius sollicitatus à Pœnitente ad unam inhonestatis speciem, ipse sollicitat eam ad aliam; ut dicetur numero sequenti; aut cum Confessarius sollicitatus in principio dissentit, aut sermonem aliò divertit, et postea aliquo intervallo elapso eam sollicitet; et in his casibus mutue sollicitationis, dicebant plures AA. *Castrop. Peyrin. et Acuma*, quòd non aderat obligatio denunciationis: sed hæc opinio est illa quam damnavit Benedictus. Et meritò, nam in talibus casibus jam verificatur quòd Pœnitens verè sollicitata fuerit; sed in nostro casu quando Confessarius simpliciter consentit, non verificatur, nec potest dici Mulier fuisse sollicitata. Quando autem Confessarii coöperatio dicenda sit vel simplex consensus, aut etiam sollicitatio, hoc pendet à circumstantiis, à discursu, et facto, qui inter ipsum et pœnitentem intercedunt (b).

174. — Quæritur 2. An denunciandus Confessarius, qui sollicitatus ad copulam, divertit ad tactus? Affirmat *Salm. Leand. et Diana*, sed probabiliter negant *Castropalaus, Escob, Hytard. Trullench.* etc. Ratio, quia Mulier ad copulam sollicitans virtualiter provocat eum ad tactus, qui in copula continentur, atque ordinariè ad copulam præmittuntur; unde tunc verè accidit, quòd Confessarius (ut mox supra dictum est) non sollicitat, sed

(a) tom. 2. de Denunc. n. 581. — (b) Lib. 6. n. 681.

sollicitatus consentit. Secùs tamen (ut rectè ajunt *Castrop.* et alii) dicendum, si ille sollicitatus ad fornicationem, diverteret ad sodomiam, vel contrà; quia istarum turpitudinum una non continetur in aliâ (a).

175. — Quæritur 3. An debeat denunciari Confessarius sollicitans jam emendatus? Negant *Sotus*, *Molf. Lugo*, *Castrop. Sor. Escob. Fagun. Trullen. Hurt.* etc. et hæc opinio probabilis appellata est à *P. Viva*, et ab *Instructore*, etc. Ratio est (ut dicunt) quia tunc cessat finis principalis denunciationis qui est emendatio rei. Dicunt autem signa emendationis esse. 1. Si multò abhinc tempore non ampliùs Mulierem tentavit, licèt hæc pluries ad eum regressa esset. 2. Si tres annos benè vixit. 3. Si Religiosus factus est. 4. Si habetur pro viro rectæ conscientiæ, et vix semel atque iterùm in id prolapsus sit, aut si senex factus est, aut si post sollicitationem statim se pœnituit. Advertit tùm *P. Viva* ea signa non sufficere, nam ipsa debent emendationis judicium moraliter certum constituere. Sed hoc non obstante, ego cum *Suar. Azor. Salmant.* etc. judico absolutè probabiliorem sententiam oppositam, nempe quod etiam emendati denunciandi sunt, quia Ecclesia in tali delicto non solùm requirit rei emendationem, sed etiam animadversionem ad aliorum exemplum (b).

### PUNCTUM III.

#### *Quis tenetur ad denuntiandum.*

176. — ANTEQUAM ad punctum descendamus, tria notabilia advertere oportet; primum quod Pœnitentes sollicitati absolvi nequeunt, antequàm fiat denunciatio; et si fortè justo detinentur impedimento, debent saltem promittere quàm primum id se esse facturos. Notanda sunt verba Bullæ *Sacra-*

---

(a) n. 682. — (b) n. 686.

mentum Benedicti XIV. ubi clariùs id exprimitur : *Caveant diligenter Confessarii ne pœnitentibus , quos noverint jam ab alio sollicitatos , Sacramentalem absolutionem impertiant , nisi priùs , denuntiationem ad effectum perducentes , delinquentem indicaverint competenti judici , vel saltem se cùm primùm poterunt , delaturos spondeant , atque promittant (a).* Sed hìc dubitatur , an Pœnitens , qui personaliter non potest denunciare , teneatur id facere per litteras aut per alios ? Affirmant *Salm.* et huic opinioni adhæreo ego etiam cum *Viva* , et *Ronc.* (quicquid dicant alii ,) quoties moraliter non adsit periculum infamiæ : quia Pœnitens tenetur tali debito , modo quo potest , satisfacere , undè si personaliter non potest , tenetur saltem per litteras . Nec obstat quod diceretur *Tract. XX. nu. 44* , nempe quòd si pœnitens habens casum reservatum , est impeditus , ut se præsenteret superiori , non tenetur per Epistolam ; quia ibi obligatio est adeundi personaliter superiorem , ut ab eo recipiat monitionem ; sed hæc obligatio , juxtà verba Pontificis , est ut tantum Prælato indicet delinquentem , ut remediis opportunis damno , quod ille asferre potest , consulat (b). Hæc autem denunciatio per litteras , si Episcopo eam deferre nolit , potest mitti Romam . Confessarius autem , si ipse denuntiationem ex auctoritate Episcopi excipere velit , si eam nequit scribere , satis erit ut Prælatum certiores faciat de Confessarii nomine , et de qualitate sollicitationis , quin mentionem faciat de consensu , vel dissensu à pœnitente præstito . Dictum est si eam excipere velit . Ceterum advertunt *Viva* , *Tamb.* et *Ronc.* non expedire in praxi ut Confessarius hoc sibi onus suscipiat hujusmodi denuntiationes afferendi , nisi cùm in aliquo casu raro observasset nullam aliud remedium suppetere quo damno communi prospici possit (c). Dicunt præterea del *Bene et Instr.* etc. quòd si mulier valde repugnaret Episcopum adire , potest illa alium expectare Confessarium , qui velit denuntiationem referre Episcopo , si præsens Confessarius id facere recusat . Et eo casu

(a) n. 693. — (b) n. 699. — (c) *Ibid. v. Advertunt.*

quo Pœnitens induci non posset ad denunciandum etiam per Confessarium, refert *P. Mazzot.* Decretum ubi dictum est quòd tunc recurrendum est ad Sedem Apostolicam pro opportuno remedio, et interim non absolvatur; et testatur idem Auctor quòd aliquandò Sedes Apostolica in casu magni ruboris aut alicujus vani timoris, pro illâ vice à denunciationis onere liberavit (a).

177. — Secundò advertendum est, quòd pœnitens, qui, cùm posset, non denunciat intrâ mensem (qui computatur à die quo obligatio advertitur), incurrit excommunicationem ipso facto (b). Sed hìc dubitatur, an illâ denunciatione executa, possit absolvi ab excommunicatione à quocumque Confessorio? Negant *Salm. Diana, Mazzot.* etc. Sed affirmat probabiliter doctissimus *Christianus Lupus*, cui adhæret *Ronc.* dicens quòd reservatio hujus censuræ durat usquedùm durat contumacia; et hoc rectè confirmatur ex verbis Decreti relati in Opere (c), ubi dicitur quòd pœnitens non potest absolvi ab excommunicatione, *se prima non avrà soddisfatto al suo obbligo*: infertur igitur quod eùm satisfecerit suo muneri, potest absolvi. Contrà verò hìc advertendum, quòd si quis injustè accusaret, sive coöperaretur ad accusandum de sollicitatione aliquem Sacerdotem innocentem, incurreret reservationem Papalem, sed absquè censurâ, prout dictum est num. 129. ex Bullâ, *Sacramentum*, Benedicti XIV. ubi dicitur: *Quæcumque personæ, quæ execrabili hujusmodi flagitio se inquinaverit, vel per seipsam innocentes Confessarios impiè calumniando, vel scelerestè procurando, ut id ab aliis fiat, impiis suasionibus, aut promissis, aut blanditiis, aut minis, aut alio quovis modo etc.* Advertunt tamen *Salmanticenses* (d), id intelligi de suasionem efficaci, ità ut ipsa sit causa injustæ damnationis secutæ. Adduntque (e) intelligi, nisi suasio antè executionem denunciationis efficaciter revocetur.

---

(a) *Lib. 6. n. 699.* — (b) *n. 695.* — (c) *n. 693.* — (d) *Salm. Append. de Bullâ Cruc. c. 6. n. 231. et 232.* — (e) *Ibid. cit. n. 332. in fin.*

178. — Tertiò animadvertendum est, quòd licèt monitio denunciationis, quæ imponenda est, profutura non sit, etiam facienda est, ut scitè advertit *Pater Ronc.*, tùm quia hìc agitur de damno communi, juxtà dicta *num. 116*, tùm quia in Bullâ Gregor. obligatio non est imposita Pœnitentibus, sed Confessariis, ad admonendos sollicitatos, ut denuncient etc. (a).

179. — Hinc notandum primò quòd denunciatio facienda est à pœnitente, licèt ille sollicitationem probare non possit, ut rectè dicunt *Castrop. Bord.* et *Bannes*, et opinio opposita, quam pauci tenent, videtur utique reprobata per Propos. 5. damnatam ab Alex. VII. (b). 2. Rectè asserunt *Suarez*, *Castrop. Salmant.* et alii communiter, denunciationem non tantùm faciendam esse à Pœnitentibus sollicitatis, sed etiam ab unoquoque qui id sciat, modò id sciat à personis fide dignis, ut exprimitur in Decreto (c), ubi dicitur quòd denunciandi in fine sunt omnes illi, de quibus notitia habetur Pœnitentiæ Sacramento se abusos fuisse. Et hoc currit, licèt sollicitatio sciretur sub secreto naturali, ut rectè dicunt *Escob. Castrop. Trull. Salm.* etc., quia nulla adest obligatio servandi secretum etiam promissum cum juramento, quando alioquin adest damnum commune; excepto casu, si secretum sit manifestatum ad consilium capiendum. 3. Proculdubio facienda est denunciatio, licèt occulta sit sollicitatio, ità communiter *Salm. Ronc. Fill. Trull. Bannes*, etc., nec obstat dicere leges pœnales esse strictè interpretandas, quia talis regula non currit in casu (ut esset noster) quo si teneretur stricta obligatio, lex inutilis redderetur.

---

(a) n. 694. — (b) n. 680. et 695. — (c) n. 680. *in fine*.

## PUNCTUM IV.

*De sollicitationibus dubiis.*

180. — **Q**UÆRITUR primò an cum sollicitatio est dubia, denunciatio facienda sit? Distinguere oportet : si factum, aut dictum fuit certa sollicitatio, et tantum dubitatur de sollicitante, tunc denunciatio certè facienda est, ut superior saltem de personâ inquirere possit. Superiori tamen abstinendum est ab inquirendo, si ei facile non est se certum reddere de personâ, ad evitandum periculum infamiâ notandi aliquem innocentem. Quòd si persona est certa, et tantum dubitatur utrùm dictum, aut factum sit vera sollicitatio, tunc communius, et probabilius, dicunt *Ronc. Conc. Potestas, Bonac. Salm.* etc. cum *Instructore pro Confess.* non adesse obligationem denunciandi; ità ex *R.g. 49. Jur. in 6. In pœnis benignior interpretatio facienda*; tùm quia in dubio nemo famâ suâ privandus est; tùm quia deniquè delicta dubia non sunt dicenda delicta (a). Excipitur tamen primò, nisi vehementia indicia essent (v. g. de pravâ vitâ, aut malâ famâ Confessarii) quæ moralem certitudinem formarent, ut dicunt *Ronc. Conc. Boss. Instructor etc.* Excipitur 2. cum *Bon. Acun.* etc. si verba de se sollicitationem præ se ferrent, licèt dubitaretur de intentione, dùm præsumptio intentionis accipienda est juxtà verborum proprietatem. Secus autem si in oppositum adesset præsumptio fraudis; putà si mulier aut ejus conjuncti cum Confessario aliquam habuissent contentionem, aut si illa esset aliquantùm mente hebes (b). In casu verò quo indicia alicujus essent momenti, licèt non sufficientia ad certificandum denunciationis debitum, conveniret, ut saltem certior fieret superior, ad hoc ut in posterum se dirigere possit.

---

(a) n 702. — (b) *Ibid.*

181. — Quæritur 2. An denunciandus sit Confessarius, qui, dùm pœnitens confitetur, ejus pulchritudinem laudat? Alii affirmant, alii negant; sed meliùs incedit *Escob.* qui dicit in hoc considerandas esse circumstantias, et præsertim discursus qui in Confessione tenebatur. Dicunt alii denunciandum esse Confessarium, qui colloquens cum servâ in Confessione, laudat domìnâ, ut illi hoc referat, et idem dicunt si donum grande, et insolitum daret pœnitenti. Sed nos dicimus etiam attendendas esse circumstantias, v. g. si pœnitens est pauper, si est conjuncta, si illa priùs alio dono Confessarium donavit, etc. (a).

182. — Hic nonnullos casus particulares referemus in quibus DD. censent denunciandum esse Confessarium. Primò, si confessarius diceret pœnitenti: *Ego te ducerem in uxorem, si essem sæcularis*; ità *Salmant. Potest.* et *Diana* contrà *Bordon*, quia reverà sunt verba nimis excitativa ad venerem. 2. Si diceret: *Expecta me hodiè domi tuæ, quia te allocuturus sum*; et postea, quin de alio negotio loquatur, aut de neniis locutus eam sollicitaret. 3. Si illi diceret. *Hæc tua peccata cadere me fecerunt in pollutionem*; *Ronc. Bord. et Potest.* 4. Si mulieri petenti confiteri diceret: *Nolo te audire in Confessione, ne aliquid mihi contingat, quia amore tuè captus sum.* 5. Si diceret: *Si quis tibi pecuniam daret, peccares?* Et illam affirmantem non reprehenderet, aut si reprehenderet postea oblatâ ei pecuniâ, eam sollicitaret. 6. Si diceret: *Promitte mihi quòd cum domum tuam veniam, facies quod volo*; cum mulier confitetur de turpibus cum alio patris, et diceret: *Cur etiam non es mecum humana?* aut ei confitenti de turpi desiderio ergà illum, responderet: *De hoc loquemur post Confessionem.* Si objurgaret concubinam suam, quòd cum alio peccavit, addendo minas, et contumelias; aut si objurgaret eam de peccatis cum aliis, et non de iis secum commissis (b). Ità etiam denunciandus esset qui diceret pœnitenti: *Dic mihi quanti me amas?* aut: *Sentis in te eas ten-*

(a) *Lib. 6. n. 703.* — (b) *n. 704.*

tationes erga me , quas ego experior ergà te ? aut Vellem te semper videre , et esse juxtà te ; aut : Tuta causâ somnium prævum passus sum ; aut : Ingrata mihi es , quid non me amas .

183. — Notandum hîc deniquè , quodd Benedictus XIV. in Bullâ *In generali Cong.* in Confessarios sollicitantes , ( aut sacrificio ad sortilegia abutentes ) præter pœnas priùs latas , addidit perpetuam inhabilitatem ad celebrandum , dicendo , quodd sollicitantes in actu Sacramentalis Confessionis , sive illius occasione , et prætextu , præter pœnas à Jure inflictas , perpetuam etiam inhabilitatem incurrant ad Sacrificii celebrationem . Hic dubitatur primò , an hæc inhabilitas ineurratur antè sententiam declarationem ? Ex unâ parte videtur negandum , dùm in simili casu , nempe Simoniaci , qui incurrit inhabilitatem ad recipienda Beneficia , jam requiritur sententia , ut docent *Molin. Nav. Laym. Castrop. Salm.* etc. Sed hoc non obstante affirmandum est , quia juxtà sententiam communem *Laym. Castrop. Anacl. Salm. Vivæ , Mazzot.* etc. sententia requiritur ad illas pœnas , quæ positivæ dicuntur , et indigent actione , non verò ad privativas , quæ important , aut inhabilitatem ad aliquod jus acquirendum , aut jure acquisito utendum : et ità reapse loquuntur DD. communiter de inhabilitate , quam habet Beneficiatus , qui omisit officium , ad percipiendos fructus beneficii . Quoad autem primum casum simoniaci dicendum est DD. rationes particulares pro illo habuisse , quæ ad nostrum casum non faciunt . Dubitatur 2. An ab hujusmodi inhabilitate excuset ignorantia invincibilis ? In hoc videtur dicendum idem ac dictum est de irregularitate ex delicto (a) ; Quarè vide dicenda *Tract. XIX.* loquendo de *Censuris n. 84.* An autem in hæc possit dispensare Episcopus , vide dicenda *Tom. III. Tract. XX. de Privilegiis , n. 53. (b).*

---

(a) *Lib. 7. n. 351.* — (b) *Lib. 6. n. 705.*



# TRACTATUS XVII.

## DE SACRAMENTIS EXTREMÆ UNCTIONIS , ET ORDINIS.

### CAPUT I.

#### *De Extremâ-Uncione.*

*De essentiâ , et effectibus Extremæ-Uncionis* 1. I. *De materiâ remotâ* 2. *De materiâ proximâ* 3. *An necessaria sit Unctio omnium sensuum* 4. II. *De Formâ , et quomodò aptanda est* 5. III. *De Ministro* 6. IV. *De subjecto cui ministranda est Extrema-Unctio* 7. *Quandò replicari possit* 8. *De Dispositione* 9. *An ministranda sit pueris* 10. *An amentibus , ebriis , impœnitentibus , mutis , etc.* 11. *An adsit gravis obligatio suscipiendi hoc Sacramentum* 12. *De administratione.* 13.

I. — **E**XTREMA-UNCTIO definitur : *Sacramentum à Christo Domino institutum , et à B. Jacobo promulgatum , ad salutem animæ vel etiam corporis conferendam infirmis de vitâ periclitantibus per unctionem Olei Benedicti , et orationem Sacerdotis.* Dicitur 1. *Sacramentum* , quia Extrema-Unctio est verum Sacramentum , ut declaravit Trid. *Sess.* 14. *Can.* 2. *de extrem.* Dicitur 2. *Promulgatum à B. Jacobo* , uti habetur ex Epistolâ hujus Apostoli c. v. *Infirmatur quis in vobis ? inducât Presbyteros Ecclesiæ , et orent super eum , ungentes eum oleo in nomine Domini ; et oratio fidei salvabit infirmum , et alleviabit eum Dominus ; et si in peccatis sit , remittentur ei.* Dicitur 3. *Ad salutem animæ , vel etiam corporis* , ut notentur effectus hujus Sacramenti : Effectus primarius est , ut confortet animam in mortis agone ad resis-

tendum diaboli tentationibus : effectus secundarij sunt tres : 1. Tollere reliquias peccati. 2. Extinguere debitum pœnarum , quæ satisfaciendæ adhuc restant. 3. Conferre etiam salutem corporis , si salutis animæ expedit , ut dicit Trid. *Sess. 14. c. 2.* Quoad autem remissionem peccatorum sententia communior , et probabilior affirmat præcipuum effectum hujus Sacramenti esse non remissionem peccatorum (uti contendunt *Scotistæ*) , sed reliquiarum peccatorum abstersionem ; ita *Gonet* , *Sot. Suar.* etc. cum *S. Thomâ* (a). Dicit autem Angelicus , quod si infirmus invincibiliter ignoraret peccata sua , modò illorum saltem generaliter illum pœniteat per attritionem , per hujus Sacramenti virtutem ei remittuntur omnia tam venialia , quàm mortalia. Ità etiam dicunt *Bellar. Sudr. Laym.* etc. deducunt ex Trid. loco cit. ubi sic legitur : *Cujus onotio delicta , si quæ sint adhuc expianda , ac peccati reliquias abstergit.* Imò valdè probabiliter dicunt *Merbes. Habert, Tournely, Suar. et Salmant.* contrà *Gonet* , *Petrocor.* etc. quod hoc Sacramentum remittit peccata gravia , non quidem per accidens , sed per se , licèt consequenter ; quia licèt hoc Sacramentum sit vivorum , nihilominus institutum fuit à Deo ad remittenda peccata per se , juxtà verba Apostoli : *Et si in peccatis sit , remittentur ei* , et ut deducitur etiam ex *Canon. 2. Tridentini* in præfatâ *Sessione 14.* Dictum est *consequenter* , quia principaliter Extrema-Unctio instituta est ad abstergendas reliquias peccatorum , nempe internam imbecillitatem , obscuritatem etc. Sed quia cum in animâ reperiatur peccatum , non possunt abstergi illius reliquiæ , quin remittatur peccatum ; ideoque consequenter hoc Sacramentum abstergendo reliquias , tollit etiam peccatum (b). Communis autem sententia est cum *S. Thomâ et S. Bonav.* quod possit hoc Sacramentum esse validum , et informe adeò ut remoto obice peccati , saltem per attritionem , si infirmus illud recipit bonâ fide existens in peccato ,

---

(a) *Suppl. q. 39. n. 1.* — (b) *Lib. 6. n. 73.*

reciperet primam gratiam (a). Ideòque dicunt *Laym. et Tamb.* cui adhæret Benedictus XIV. (b), quòd si infirmus non est capax alterius Sacramenti, Sacerdos potest Missam interrumpere, ut ei Extremam Uctionem afferat, ut gratiam recipiat, si est in peccato, et habet attritionem (c). Dicitur 4. *Infirmis de vitâ periculantibus*, ut denotetur subjectum, cui hoc Sacramentum exhibendum est. Dicitur 5. per *Uctionem Olei benedicti* ad denotandam materiam. Dicitur 6. et tandem, *Et orationem Sacerdotis*, ad denotandam formam. Sed de omnibus sigillatim disserere opus est, et I. De Materiâ, II. De formâ, III. De ministro, IV. De subjecto cui ferenda est, V. De Administratione.

2.—I. Quoad *Materiam*. Materia remota est Oleum benedictum pro infirmis; et singulis annis, veteri combusto, renovandum est ex præscripto Clementis VIII, quod obligat sub gravi, ut probabiliùs tenent *Bonac. Castrop. Croix* etc. contrà alios. Sed casu quo novum haberi non possit, licèt uti veteri, ut dicunt *Laym. Aver. Salm.* etc. cum quâdam declaratione S. C. Et casu quo anni decursu deficeret, licitum est (urgente necessitate) immiscere Oleo consecrato non consecratum, sed in minori quantitate, ut dicit *Rituale*, et hæc mixtio potest pluries fieri, ut dicunt *Bonac. Ronc. Carden. Possev. et Croix*, et ut declaravit S. C. Modò Oleum quod immiscetur sit minoris quantitatis veteri (d). Notandum 1. quòd hoc plenum debet esse ex olivis, et benedictum proculdubio de necessitate præcepti; dubium restat, an etiam necessitate Sacramenti? Negant *Juvenin, Cajet. Sanch.* etc.; sed sententia communissima affirmat cum S. *Thomâ* (e), *Scot.*, *Petrocor. Conc. Salm.* etc. dum in Trident. *Sess. 14. C. 1.* dicitur *Intellexit enim Ecclesia materiam* (Extremæ Uctionis) *esse Oleum ab Episcopo benedictum*, in quo certe dogmaticè locutum est (f). Notandum 2.

---

(a) *ibid.* n. 6. et n. 707. — (b) *de Synod. lib. 7. cap. 2. n. 5.*  
 — (c) *Lib. 6. num. 728.* — (d) n. 708. — (e) *Suppl. q. 29. a. 5.* —  
 (f) *Lib. 6. n. 709. D. I.*

probabile esse cum *Bellarm. Valen. Barbos. Castrop.* etc. (contrà *Suar. Laym.* etc.) quòd Oleum debet esse benedictum de necessitate Sacramenti in ordine ad Extremam unctionem. Quà de re sententia opposita quòd possit dari hoc Sacramentum cum Oleo Confirmationis vel Catechumenorum, in praxi non est probabilis, nisi in solo casu necessitatis; et tunc administrandum est sub conditione, et si postea haberi possit Oleum Infirmorum repetendum est, ut præscripsit S. Carolus Borromæus (a). Notandum 3. quòd benedictio hujusmodi potest à Papâ simplicii Sacerdoti committi, ex Decreto Clementis VIII. (b). Notandum 4. Ad validitatem Sacramenti sufficere digiti extremitatem in Oleo intingere, et ungere. Sed fit dubium utrùm sufficiat una gutta? Negant *Filliuc. Suar. Peyrin. Trullen.* etc., dicentes oleum debere diffundi. Sed communius et probabilius affirmant *Tannerus, Escob. Hurtad. Dicast. Croix,* etc. modò illa gutta sufficiat ad inungendas omnes partes; nihilominus quia prima non est improbabilis, saltem extrinsecè, illa in praxi sequenda est (c).

3. — Materia proxima est Unctio facta à Sacerdote in quinque sensibus, aut saltem in partibus proximis, si fortè infirmus esset aliquo sensu mutilatus. Hic notandum 1. quòd non est necessarius tactus immediatus manus, cùm in necessitate (ut tempore pestis) potest uti virgâ oblongâ oleo tinctâ, quæ postea comburenda est; ità *Silv. Wigandt, Escob. Busemb.* (d). Notandum quòd licèt unctiones sint multæ, omnes tamen unum constituunt Sacramentum. An autem singulis unctionibus conferatur gratia partialis, negat *S. Thomas* (e) dicendo totam gratiam conferri in ultimâ unctione. Sed affirmant multi alii cum *Scoto*, quia quælibet Unctio habet suam formam gratiam significantem. Utræque sententia est probabilis (f).

---

(a) *Lib. 6. Ibid. Dub. 2.* — (b) *Ibid. D. 3.* — (c) *Ibid. Dub. 4.*  
 — (d) *n. 710.* — (e) *Suppl. q. 29. a. 8.* — (f) *Lib. 6. n. 707.*

4. — Sed quæritur an Uctio quinque sensuum sit de necessitate Sacramenti? Alii probabiliter negant, ut *Silv. Becan. Merbes. Natal. de Alex.* etc. dicentes sufficere unam unctionem in quâlibet corporis parte, dùm Apostolus aliud non dicit, quàm *ungentes eum Oleo*. Sed communiùs affirmant *Sot. Suar. Castrop. Laym. et Salm.* cum *Bellar. S. Bonaventurâ, et S. Thomâ*, quia hiæ est usus Ecclesiæ communi sensu Doctorum sic practicatus. Tantùm tempore necessitatis (dicunt hi AA. sicut etiam Rituale) potest conferri hoc Sacramentum, sed sub conditione, sub unâ unctione in aliquo membro, sed satius esset in capite sub hâc contractâ formâ: *Per istam sanctam Uctionem indulgeat tibi Deus quicquid per sensus deliquisti*, ut volunt nonnulli; aut ut meliùs volunt alii: *Per istam etc. indulgeat tibi Deus quicquid deliquisti per sensus, nempe visum, auditum, gustum, odoratum, et tactum*; præmittendo verbum *deliquisti*, ut si infirmus deficiat antè verborum absolutionem, possit Sacramentum validum esse. Sed si infirmus supervivit, repetendæ sunt unctiones in singulis sensibus, additis orationibus omissis, ut præscribit Rituale; ubi etiam dicitur quòd in dubio utrùm infirmus sit vivus, apponenda est conditio *si vivis* (a). Certum est autem non esse de necessitate Sacramenti ungere ambas partes utriuscujusque sensûs, nempe utrumque oculum etc.; undè in casu necessitatis, si tempus non suppetat, aut adest periculum infectionis, aut si infirmus non volvi potest in aliud latius, sufficit ungere alterutrum oculum, alterutram auriculam etc. Uctio renium, dicit Rituale, quod *in Mulieribus semper omittitur, atque etiam in Viris, quando infirmus non potest commodè moveri*. Uctio autem pedum ex sententiâ communi cum *Laym. Suarez, Castrop. Ronc. et Salm.* ex *S. Thomâ* (b), non est de necessitate Sacramenti, sicut nec etiam (juxtâ communem) ordo inter unctiones partium; licèt hujus ordinis inversio, ut dicunt, esset graviter illicita (c).

---

(a) n. 710. v. Quær. — (b) *Suppl. q. 32. a. 6.* — (c) n. 710. Verbo, Certum.

5. — II. In quantum ad formam, verba sunt ista : *Per istam sanctam unctionem, et suam piissimam misericordiam indulgeat tibi Dominus quidquid per visum (sive per auditum etc.) deliquisti. Amen.* Verbum *Deliquisti* est de essentiâ, ut rectè dicunt *Croix, Gobat. et Mazzot.* (contrâ *Boscum*); nam remissio peccatorum est effectus principalis hujus Sacramenti. Verbum *Sanctam* certum est non esse de essentiâ, s' d peccari si omittitur. Verba autem *per suam piissimam Misericordiam*, multi contendunt esse de essentiâ; sed communiùs, et probabiliùs negant *Laym. Castrop. Bonac. Ronc. Salm.* Omnes tamen conveniunt illorum omissionem esse peccatum grave (a). An autem valeat forma, non deprecatoria, qualis est nostra, *indulgeat*, sed indicativa *ungo te, etc. ut possis superare potestates*, ut erat forma Ambrosiana; affirmant *Juven. Tourn. et alii*; sed negat sententia communis cum *Suar. Merbes. Petrocor. et aliis cum S. Bon. et S. Thomâ* (b), et jam præscribit *S. Jacobus : Et orent super eum ungentes..... et oratio fidei salvabit infirmum.* Ad formam Ambrosianam respondit *Benedictus XIV.* quòd verba *ut possis* jam dignoscere faciunt esse deprecatoriam, et hunc sensum faciunt, *ungo te, orans ut possis etc.* (c). Notandum 2. Formam aptandam esse modo sequenti ut præscribit *Rit.* Sacerdos intincto pollice in Oleo Sancto, in formam Crucis, inungere debet, aptando crucem, et verba in unctione cujuscumque partis, semper incipiendo à dextrâ parte : *Per istam sanctam unctionem* ✠, *et suam piissimam misericordiam indulgeat tibi Dominus quidquid per visum, (dùm ungentur oculi) deliquisti.* Advertendo non terminandam formam antequàm altera pars ungatur. Pars lita debet abstergi ab ipso Sacerdote, aut à Ministro (si est in Sacris) gossipio, quod postea comburendum est, et cineres in Sacrarium projiciendæ. Deindè eodem modo ungentur aures, *per auditum* : Narices *per odoratum*; Os (labiis clausis) *per gustum, et locutionem* : Manus (Sacerdotibus extrâ, aliis intrâ pal-

(a) n. 711. — (b) *Suppl. q. 29. a. 8.* — (c) *L. 6. n. 711. D. 1.*

mas) *per tactus* : pedes (in plantis,) *per gressum* : Renes, *per lumborum delectationem* (a). Notandum 3. quòd juxtà Ritum Græcum septem debent esse Sacerdotes qui ungunt, quisque partem suam, sed juxtà Latinum unus est Minister; sed in casu necessitatis potest unus Sacerdos unam partem ungere, et alius aliam, pronunciando quisque formam correspondentem illi parti, ut dicunt communiter *Suar. Coninch. Castopal. Bonac. Salm. Spor.* etc., sed non potest unus ungere, et alius proferre formam; nec unus ungere unum oculum, et alter alterum; sicut declaravit Benedictus XIV. in Bullâ *Etsi Pastoralis*, an. 1742. §. V. n. 4. Si tamen Sacerdos non posset proseguire omnes unctiones, debent reliquæ suppleri ab alio quin repetantur jam factæ; nisi esset quòd posteriores supplerentur post aliquod tempus notabile, v. g. post horæ quadrantem, quia tunc debent omnes repeti, ut dicunt *Merati, Avers. Croix* etc. (b).

6. — III. In quantum ad Ministrum notandum 1. Ministrum proprium Extr. Unct. esse Pastorem aut alium Sacerdotem ex ejus consensu, quo deficiente, validum esset Sacramentum, sed illicitum, adeoque graviter peccaret Sacerdos. An autem sufficiat consensus præsumptus Parochi; alii negant, sed probabiliter affirmant *Sanch Castrop. Valent. Bonac. Salm.* etc. Regulares autem administrando hoc Sacramentum sinè licentiâ Pastoris, incurrunt excommunicationem Papalem in *Clem. 1. de Privil.* §. 1. Advertendum tamen quod S. Pius V. in suâ Bullâ, *Immarcessibilem*, an. 1567. concessit Patribus Theatinis (et per communicationem aliis Religiosis) posse administrare hoc Sacramentum suis servis, mercenariis, ac quibuscumque hospitibus qui fortè morantur in domibus dictæ Congregationis; item Sixtus IV. prius concesserat Regularibus posse dare Eucharistiam, et Extremam Uctionem Laicis, si Parochus injustè aut malitiosè negaret. Communis autem sententia est quòd in necessitate, si Parochus est absens, aut non vult Extr. Unct. afferre,

---

(a) *Lib. 6. n. 711.* — (b) *n. 724.*

nec potest adiri Episcopus, tunc quilibet Sacerdos etiam Regularis potest hoc Sacramentum conferre (modò non sit excommunicatus, vel suspensus), tunc enim præsumitur licentia dari à Pontifice; ità contrà paucos docent *Suar. Laym. Bonac. Conc. Tour. Nat. ab Alexand. Salm. Bened. XIV. etc.* et idem concessit *S. Carol. Borrom.* pro suâ Diœcesi (a). An autem Parochus suspensus possit hoc Sacramentum conferre? alii affirmant, sed probabilius negant *Bonac. Suar. etc.* (b). Notandum 2. cum *Soto, Possev. Bonac. etc.* non incurrere irregularitatem (ut aliqui nimis quàm par est scrupulosi tenent) Sacerdotem, si jubendo volvi infirmum ut ungeretur, ille spiraret; dùm, ut rectè dicunt *Suar. Cornejius, Salmant. etc.* talis irregularitas deberet esse ex delicto, à quo utique liber est qui caritatis officium exercet. Notandum 3. quòd Parochus tenetur sub gravi afferre Extremam-Unct. petentibus, nisi excuset causa justa, ut periculum vitæ (vide dicta *Tract. VII. num. 27. et 28. de IV. Præcepto*); sed in quolibet casu tenetur, si fortè infirmus probabiliter esset in peccato mortali, et multo abhinc tempore confessus non fuisset, ut communiter dicunt *Suar. Castr. Spor. Conc. Salm. etc.* (c). Notandum 4. probabile esse cum *Gobat. Arriag. et Croix*, quod licitè possit Parochus apud se domi retinere Oleum Sanctum (diligenter custoditum) aliquandò, cùm crederet noctu accersiri, et quòd alioquin non perveniret opportuno tempore (d).

7. — IV. Quoad subjectum, cui conferenda est Extrema Unct., notandum 1. quòd. ut animadvertit Rit. et ut docet *Bened. XIV.* in Epistolâ, quæ incipit *Ex quo*, ad Ecclesiasticos Ritûs Græci, pro novâ editione Euchologii (quod idem sonat ac Rituale, vel Manuale) non esse ministrandum hoc Sacramentum *benè valentibus, sed iis dumtaxat qui gravi morbo laborant* (e) ideoque non dandum est capite damnatis, in conflictu aut periculosâ navi-

---

(a) *Act. Mediol. p. 4.* — (b) n. 723. — (c) n. 729. — (d) n. 730.  
 — (e) *In Bull. t. 4. in ord. 53. an. 1756.*



gatione, aut alio mortis proximo periculo versantibus. Tantummodò infirmis graviter decumbentibus quibus mors imminet, aut senibus decrepitis, qui *præ senio* (sunt verba Ritualis) *deficiunt, et in diem videntur morituri, etiam sinè aliâ infirmitate.* Nec obstat Ritus Græcus quem opponit *Juvenin*, juxtà quem feriâ V. majoris Hebdomadæ omnes adstantes inunguntur oleo infirmorum; sed respondet Bened. XIV. quòd talis unctio non datur uti Sacramentum, cùm sinè ullâ formâ ungantur, (ut latè disserit in cit. Ep. pro edit. Euchologii ex §. 46.) sed tanquàm vera cæremonia sacra (a). Et ità pariter dicendum cum communi *Suar. Castropal. Bonacin.* etc. (contrà *Wig.*) quòd si detur hoc Sacramentum infirmo non gravi morbo decumbenti, non solùm illicitè, sed etiam invalidè conferretur (b). Si autem daretur in morbo gravi, quin aliquod videatur imminere periculum mortis, daretur quidem validè, sed illicitè. Nec obstat quòd Bened. XIV. cit. §. 46. docet, nempe quòd dandum sit graviter decumbentibus, nam hoc intelligendum est ad præscriptum Ritualis nostri, nempe quòd morbus gravis ità sit, ut probabile adsit periculum mortis, *ut mortis periculum* (præscribit Rit.) *imminere videatur.* Sed quæritur 1. in quo morbi gradu danda est vel dari potest Extrema-Unctio? Quandò adest periculum proximæ mortis, tunc non dubitatur, quin non solùm possit, sed etiam danda est juxtà Rit. *debet hoc Sacramentum infirmis præberi qui... tam graviter laborant, ut mortis periculum imminere videatur.* Et juxtà communem DD. cum Catech. Rom. (de Extr. Unct. §. 9.) peccat graviter Parochus, qui differt E. U. usquequò infirmus destituatur sensibus, nàm tùm ille privatur effectu consequendi salutem tam animæ quàm corporis, quam consecuturus fuisset si tempestivè inunctus fuisset: *Gravissimè peccant* (dicit Catechismus) *qui illud tempus ægroti ungendi observare solent, cum jam omni salutis spe amissâ, vitâ et sensibus carere incipiat.* Idcirco Bened. XIV. in Euchologio Græco-

(a) Lib. 6. n. 712. et 713. — (b) n. 713. D. 2.

rum, sive Rituali Græcis assignato (vide in Bullar. loc. cit. §. 46.) præcipit ut hoc Sacramentum præbeatur, dùm infirmi *sibi constant, et sui compotes sunt.* Hoc currit in quantum ad obligationem præbendi Extremam Unctionem. Sed in quantum ut possit licetè præberi, dicunt communiter DD. sufficere ut infirmitas sit periculosa mortis, licetè remotè; ità *Suar.*, qui dicit: *Ut ex tali infirmitate mors possit moraliter timeri, saltem remotè.* Idem tenent *Laym. Castrop. Bonac. Coninc. Salm.* et alii. Idem dicit Bened. XIV. (a), et *Honoratus Tourn.* qui adducit Concilia Aquisgran. et Mogun. Et hoc perspicuè infertur tùm ex Florentino, ubi dicitur: *Subjectum hujus Sacramenti esse infirmum, cum de ejus morte timetur;* tùm ex Trid. Sess. 14. c. 3. ubi hæc leguntur: *Hanc Unctionem infirmis adhibendam, illis verò præsertim, qui in exitu vitæ constituti videantur.* Ibi particula *præsertim* rectè denotat quòd potest dari E. U. etiam aliis infirmis, qui non sunt constituti in exitu vitæ. Sed clariùs hoc confirmatur à Bened. XIV. in præfatâ Bul. (Eucholog. cit. §. 46.) ubi dicitur, ne Sacramentum E. U. ministretur benè valentibus, *sed iis dumtaxat qui gravi morbo laborant.* Undè rectè dicit *Castr.* quòd quoties potest infirmo non jejuno præberi Viaticum; potest et expedit dari E. U. Rectè tamen dicunt *Laym.* et *Castrop.* quòd ut dari possit, non sufficit periculum dubium mortis, sed requiritur saltem probabile, sive prudens timor mortis; ut ceteroquin communiter admittunt *Suar. Castrens. Escob.* et *Holzm.* cum *Mastriò*, et *Scoto.* Quæritur 2. An possit dari Parturientibus? Respondetur cum *Lug. Filliuc. Bonac. Escob. Trullen.* et aliis communiter non posse, si mulier patitur in partu tantùm dolores communes, licet sit primus partus, aut licet aliis vicibus fuerit in periculo mortis. Secùs autem si gravissimis doloribus cruciaretur, adeò ut actu ei immineret periculum mortis (b).

8. — Notandum 2. quod dicit Rit. circà repetitionem hujus Sacramenti. *In eadem infirmitate hoc*

---

(a) de Synod. l. 8. c. 7. n. 4. — (b) n. 713. Dub. 3.

*Sacramentum iterari non debet, nisi diuturna sit, aut cùm infirmus convaluerit, iterùm in periculum mortis incidit.* Adeòque cùm infirmitas non est diuturna, nempè non est febris tabida, hydropisis, et similes, non potest denuò ungi, nisi convaluerit, et iterùm in aliud vitæ discrimen inciderit. Quandò autem est diuturna, si ille in eodem vitæ periculo perduravit, nec potest quidem denuò inungi; secùs autem si illud periculum evasit (non post quatuor aut 5. dies, sed post tempus notabile, ut communiter dicunt *Conin. Suar. Wig. Bonac. Viva*, etc.) et deindè iterùm in illud incidit; et hoc scitè docet *Bened. XIV.* (a) posse licitè practicari etiam in dubio (intellige positivo) quòd mutatus sit status infirmi (b).

9. — Notandum 3. quoad dispositionem Animæ, quòd si infirmus sit in peccato mortali, debet esse saltem contritus putativè, ut hoc Sacramento muniat. Sed hoc intellige, si tempus non suppeteret confitendi, secùs ut rectè advertit *Busemb.* debet priùs poenitentiae Sacramento muniri, tamquàm magis necessario; undè fit quòd iste casus sit moraliter impossibilis. Dumtaxat accidere posset, si infirmus esset sensibus destitutus. Ceterùm, ut dicit *Ris.* et juxtà Ecclesiæ usum, si tempus et infirmi qualitas id patitur, non debet Extrema-unctio conferri nisi priùs confessus sit, et communicaverit. Hoc tamen Sacramentum antè Viaticum sumere, aut omni culpâ caret, aut ad summum est veniale; *Suar. Croix, et Benedict. XIV.* (c).

10. — Notandum 4. quòd Extrema Uctio non est danda pueris ratione expertibus, ut dicit *S. Thomas* (d), et etiam *Ritual. Rom.*, quia in infantibus non potest verificari forma in quâ exprimitur remissio peccati, non quidem originalis (cùm hoc remissum sit), sed actualis: *Indulgeat tibi Dominus quidquid deliquisti* etc. Contrà sententia communior et probabilior est cum *Laym. Nav. Suar. Val. Sa, Escob. Spor. et Ben. XIV.* (e) adversùs *Sot. Wig.*

---

(a) *de Synod. l. 7. c. 23.* — (b) *n. 715.* — (c) *Lib. 6. num. 716.* — (d) *Suppl. q. 32. a, 4.* — (e) *de Synod. l. 7. c. 21.*

etc. præbendam esse E. U. pueris ratione pollentibus, licet non adhuc Communione capaces; dum in Rit. expressè dicatur: *Debet hoc Sacramentum infirmis præberi, qui ad usum rationis pervenerint.* Nec obstat S. Thomas loco cit. ubi dicit, *non debet dari pueris*; nam intellige rationis expertibus, dum ratio ibi à Sancto assignata alia non est, nisi quod ipsi sunt incapaces peccati actualis. An autem possint hoc Sacramento inungi pueri, de quibus dubitatur an necne ad usum rationis pervenerint? Tres adsunt sententiæ, sed probabilior mihi videtur illa De Lugo, Escob. Dicast. etc. qui dicunt eos pueros ungendos esse sub conditione, cum sufficiat pro causâ ne illi hujus Sacramenti fructu priventur, si fortè pervenerint jam ad illius capacitatem (a). Et idem dicendum de amentibus, de quibus dubitatur an unquàm ratione præditi fuerint (b).

11. — Notandum 5. non esse præbendam E. U. perpetuò amentibus; dico *perpetuò*, quia si aliquod lucis intervallum habent, possunt recte inungi, ut docet S. Thomas; imò dicit Rit. *Infirmis autem qui, dum sana mente essent, illud petierint, seu verosimiliter petiissent, seu dederint signa contritionis, etiamsi deinde loquelam amiserint, vel amentes effecti sint, vel delirent, aut non sentiant, nihilominus præbeatur.* Sed si suspicatur quod infirmus phrenesim patiens posset aliquid contra Sacramenti reverentiam committere, non est inungendus nisi (ait Rit.) *periculum tollatur omnino.* Hoc periculum tamen probabiliter dicit Tamb. potest removeri infirmum ligando aut efficiendo, ut ab aliis teneatur. Ebrii, qui jamjam morituri sunt, etiam inungendi sunt, ut dicunt Croix, Gobat, et Lohner, modò non constet eos in peccato mortali existere, dum Rit. dicit: *Impænitentibus, et qui in manifesto peccato mortali sunt, et Excommunicatis penitus denegatur.* Dicunt tamen Conin. Tamburin. Lohner., et Croix, quod vulnerati in aliqua rixa sensibus destituti possunt sub conditione inungi, dum recte præsumi potest,

---

(a) num. 719. — (b) num. 732.

quòd in illo extremo statu eos peccatorum suorum poeniteat, si usus rationis in eis reperitur. Muti autem, surdi, et cæci à nativitate proculdubio inungendi sunt etiam in sensibus, quibus privantur; quia licet cum illis non peccassent externe, nihilominus potuerunt peccare cogitatione; ita communiter *Possev. Salm. Diana, Præpos. etc.* cum *S. Corolo Borrom. et S. Thoma (a)*, quicquid dicant *Croix*, et *Gobat. (b)*.

12. — Quæritur hîc an infirmus teneatur sub gravi ad suscipiendam Extremam Uctionem? Prima sententia affirmat cum *S. Bonav. Soto, Merbesio, Ronc. Habert, et Conc.*, dicens verba Apostoli, *inducat Presbyteros*, importare præceptum grave. Sed sententia communior negat cum *Suar. Nav. Esti. Silv. Tamb. Castrop. Salm. etc.*, quibus adhæret *S. Thomas*, qui dicit hoc Sacramentum non esse de *necessitate salutis*. Hoc non obstante puto valdè probabilem esse primam sententiam, et dico illam omninò infirmis suadendam non tantùm ratione præcepti, cùm de illo saltem non constat utrum obliget sub gravi, an sub levi; quantum ratione caritatis, quam moribundus ergà seipsum exercere debet; licet enim posset ille aliis muniri mediis, cùm tamen in eo statu reperiatur, ex unâ parte debilis est, ut bonis actibus mentis suæ sibi prospicere possit; ex aliâ parte (ut dicit Trident.) tunc Dæmonis insidiæ sunt vehementiores; undè videtur se exponere magno periculo tentationibus succumbendi, qui hoc Sacramento præmuniri negligit, quod Jesus Christus instituit hoc fine, ut robur conferat ad resistendum Diabolo in illo extremo agone. Omnes autem conveniunt quòd per accidens potest infirmus sub gravi ad hoc teneri, v. g. si ille non posset aliud suscipere Sacramentum, et existeret in mortali, aut si secùs induceret alios ad credendum se esse hæreticum, aut hoc Sacramentum contemnere. Et certum est etiam talem contemptum esse gravem, quandò est formalis: Formalis tamen intelligitur, ut dicunt commu-

---

(a) *Supplem. quæst. 3. art. 7.* — (b) *Lib. 6. n. 732.*

niter *Suar. Castrop. Salmant.* etc. contra *Merb.* non quandò infirmus recusaret hoc Sacramento inungi, ex aliquâ repugnantîâ, aut negligentîâ, sed quandò propriè omitteret, quîa parvi illud ducit. Hoc confirmatur ex Bullâ Martini V. ubi dicitur : *Hoc Sacramentum neque negligi sinè culpâ, nec contemni posse sinè peccato mortali.* En vide quòd hîc rectè notatur contemptum importare culpam gravem, negligentiam verò levem (a) :

13. — V. Deniquè quoad administrationem hujus Sacramenti, notandum primò, quòd juxtâ Rituale Sacerdos debet instruere mensam tobaleâ albâ desuper cum vase, in quâ septem gossipii globi prompti sint ad abstergendas partes unctas : Candelâ ex cerâ, cujus lumen inservire debet dùm inungitur. Ex Ecclesiâ verò secum deferat saltem Clericum unum, qui afferat Crucem (sed sinè hasta), aquam benedictam cum aspersorio, et Rituale ; et ipse Sacerdos sinè sonitu Campanulæ deferat decenter vas Olei clausum in bursâ sericâ violacei coloris collo, ut nunc mos est, suspensâ ; et si iter esset longum potest Sacerdos super equo sedens sacram unctionem deferre. Advertit Rituale, quòd si infirmus peractâ Confessione sit proximus morti, tunc idem Sacerdos qui defert Viaticum potest etiam deferre Oleum sanctum. Sed si potest haberi alius Sacerdos, aut Diaconus, qui Oleum sanctum deferat, per ipsum deferatur, qui superpelliceo indutus Sacerdotem Viaticum portantem sequatur. Notandum 2. esse peccatum mortale ministrare E. U. sinè superpelliceo et stolâ. An autem ab hoc excuset necessitas, negant *Suar. Castrop. et Bonac.* ; nam (ut dicunt) reverentia Sacramenti præferenda est utilitati privatæ. Sed hoc non obstante, probabiliter affirmant *Possev. Croix, Escob. Quintan. Diana, et Leand.* in casu quo infirmus aliter sinè Sacramento esset decessurus, dùm non præsumitur Dominus ob sacrarum vestium deficientiam velle infirmum privari tanto auxillio (b). Ità etiam

---

(a) num. 733. — (b) *Lib. 6. num. 726.*

etiam grave est, ex se loquendo, omittere orationes præscriptas à Rituali, ut omnes fatentur; intelligitur etiam extrâ necessitatem, quia si adest periculum mortis imminens, dicit Rituale ut infirmus *cito un- gatur*, et deinde si supervivat, dicantur orationes prætermisæ. Intelligitur item de orationibus quas dicere debet Sacerdos; nam Psalmi Pœnitentiales, et Litanie cum precibus sequentibus dicendæ sunt ab astantibus, dum inungitur infirmus; probabilius (contrâ alios) dicit *Tamb.* quòd sint tantum de consilio. Rituale enim non præcipit eas recitandas, sed tantum ibi dicitur; *Dum infirmi Sacro liniuntur oleo, dicuntur flexis genibus* ab astantibus, etc. (a), Notandum 3. non esse grave deferre oleum, aut administrare illud sinè lumine, ita *Barbos. Possev. Quintanad. Escob.* etc. aut sinè Ministro; imò de hoc dicunt *Bonac. Escob. Possev.* etc. nullum esse peccatum; sed ego puto non vacare culpâ dum dicit Rituale: *convocatis Clericis, saltem uno*: hinc extrâ necessitatem esse veniale ungere sinè Ministro, ut dicunt *Tolet. Dicast. Graff,* etc. sic etiam veniale esset conferre hoc Sacramentum omissis Crucibus inter ungendum (b). Advertendum deniquè quòd tempore interdicti vetitum est præberi hoc Sacramentum, ex cap. *Quod in te, Pœnit.*

## CAPUT II.

### De Sacramento Ordinis.

*An quilibet ex septem ordinibus sit Sacramentum 14. An materiæ, et formæ Sacramentorum sint in specie à Christo Domino determinatæ 15. Quæ sit materia Ordinis, an manuum impositio, aut instrumentorum traditio 16. De ceteris ad Ordinem spectantibus sermo erit in Examine Ordinandorum.*

14. — **D**E doctrinis ad hoc Sacramentum spectantibus loquemur in *Tom. III. App. III. de Examine*

(a) num. 728. — (b) num. 728.  
*Tom. II.*

*Ordinandorum* in Capitibus II. et III. hîc tantum breviter discutiemus tres celebres quæstiones quæ super hanc materiam agitantur. Prima quæstio est an quilibet ex septem Ordinibus sit Sacramentum? Quatuor circumferuntur sententiæ. I. affirmat universaliter, ut *Bellarmin. Gonet. Sanc. Salm.* etc. et hujus sententiæ est *S. Thomas (a)*. Ratio unica hujus sententiæ est Decr. Eugenii IV. ad Armenos, ubi dicitur, quod materia Ordinis est illa, cujus traditione confertur Ordo, et deinde singulis septem Ordinibus assignat materiam propriam. Nec obstat quod Minister Ordinationis sit solus Episcopus, ut dicitur in Trident. *Sess. 23. cap. 4. et 7*; nam respondent hoc intelligi de Ministro ordinario, sed non de extraordinario, quem Papa assignare potest ad conferendos Ordines. II. Sententia cum *Cajet. et Durando*, dicit solum Sacerdotium esse Sacramentum; sed hæc sententia est singularis, et improbabilis; dum non est dubitandum quin Diaconatus sit Sacramentum, siquidem in illius Ordinatione habentur illa tria requisita ad constituendum Sacramentum, nempe 1. signum sensibile, quod est manuum impositio. 2. Institutio Divina, nam Conc. docet in Ecclesiâ adesse Hierarchiam à Deo institutam ex Episcopis, Sacerdotibus, et Ministris, et nomine ministrorum saltem debent intelligi Diaconi. 3. Promissio gratiæ significatæ per verba Episcopi, *Accipe Spiritum Sanctum ad robur*, quæ habentur pro formâ. III. Sententia cum *Soto, Nav. et Vasq.* prætendit omnes Ordines majores esse Sacramentum. IV. Sententia nobis probabilior cum *Gratiano, Petro Lombardo, Morin. Estio, Tourn. Cabassut. Habert*, et aliis affirmat Sacerdotium, et Diaconatum dumtaxat esse Sacramenta. Probatur 1. hæc sententia, quia si essent Sacramenta cæteri Ordines, præter Sacerdotium, et Diaconatum, non possent illi ab Abbatibus conferri, sicut jam conferuntur, cum unus Minister Ordinis Sacramenti non possit esse alius quam Episcopus, ut probat *Tourn. (b)*

---

(a) 3. p. qu. 37. a. 2. ad 1. et a. 3. -- (b) *De Ord. qu. 4. a. 2. conclus. 2.*



dicens quòd ad Ordinationem ex institutione Divinà necessariò requiritur in Ministro character Episcopalis ; et subjungit hoc probari ex traditione , quia nunquàm concessum est quacumque urgente necessitate aliis , quàm Episcopis , facultas ordinandi Presbyteros , et Diaconos. Et respondetur ad quoddam Privilegium quod asseritur ab Innoc. VIII. concessum fuisse Cisterciensibus , ut possent conferre tales Ordines , quòd illud est valde dubium ; et licet fuisset certum , fuit tamen illud idem interpretatum à S. C. Concilii , et etiam à Clemente VIII. intelligi pro facultate non ordinandi , sed concedendi dimissorias. Probatur 2. quia in aliis Ordinibus desideratur materia , nempe impositio manuum quæ est unica materia hujus Sacramenti , ut dicemus in quæstione 3. Et desideratur etiam forma ; cum in collatione cæterorum Ordinum non reperiatur forma aliqua significans gratiæ productionem , sed tantum fiat mentio potestatis , sive officii quod Ordinatis confertur. Ad Decretum Eugenii respondetur quod materiæ cæterorum Ordinum non sunt à Pontifice assignatæ uti essentielles , sed tantum uti accidentales , ad explicandam potestatem quæ recipitur (a). Ex hac sententiâ infert Bened. XIV. (b) non posse damnari certi sacrilegii illos , qui promoventur ad Ordines Diaconatu inferiores cum conscientia peccati mortalis.

15. — Secunda quæstio est an materiæ , et formæ Sacramentorum (et præsertim Ordinis) sint omnes in specie determinatæ à Christo Jesu ? Prima sententia negat cum *S. Bonavent. Bellar. Valent. Morin. Lugo , Salm.* etc. Unica ratio istorum est , quia secus non possent diversæ esse materiæ , et formæ Sacramentorum in Ecclesiis Græcâ , et Latinâ , ut præsertim est in Sacramento Ordinis , dùm in Græcâ Sacerdotium , et Diaconatus conferuntur per solam manuum impositionem , sed in Latinâ præter impositionem requiritur traditio instrumentorum , sicut expressum est in Decreto Eugenii IV. ut superius dictum est. Quapropter asserunt quòd quoad Bap-

(a) *Lib. 6. n. 736.* -- (b) *De Syn. l. 8. c. 9. n. 12.*

tismum et Eucharistiam, Jesus-Christus in specie instituit tam materias, quàm formas; sed circa alia Sacramenta, eas instituit tantum in genere, relinquendo Ecclesiæ facultatem determinandi eas in specie, adhibendo eas res et verba, quæ exprimerent Sacramenti effectum. Hæc sententia est probabilis; sed probabilior est opposita, quæ dicit materias, et formas omnium Sacramentorum fuisse in specie determinatas à Domino; ità *Merbes. Habert, Juvenin, Tournely, Petrocor. Concina*, et alii multi cum *S. Thomâ (a)*, qui non potest negari fuisse pro hâc sententiâ, dum dicit: *Quia ergo sanctificatio hominis est in potestate Dei sanctificantis, non pertinet ad hominem suo iudicio assumere res quibus sanctificetur: sed hoc debet esse ex Divinâ institutione determinatum. Et ideo in Sacramentis novæ legis, quibus homines sanctificantur, oportet uti rebus ex divinâ institutione determinatis.* Huic sententiæ adhæret *Bened. XIV. (b)*, qui dicit nullum haberi fundamentum, undè probetur hæc potestas fuisse à Christo Jesu Ecclesiæ concessa, imò probatur oppositum ex *Trident. sess. 21. cap. 2.* ubi dicitur Ecclesiam nihil posse circa substantiam, sed tantum circa administrationem Sacramentorum. Quoad autem diversitatem Ecclesiæ Græcæ et Latinæ, respondetur quòd traditio instrumentorum non habetur pro materiâ essentiali, sed accidentali, licèt integrali. Et Decreto Eugenii respondemus cum *Merbes. Tourn. et Conc.* quòd Pontifex non jam determinavit materias essentielles Ordinis, sed tantummodò instruere voluit Armenos circa Ritum Ecclesiæ Romanæ, cum quâ cupiebant uniri. Nec valet dicere quòd Eugenius non loquebatur de Ritu, sed de materiâ; quia respondetur quòd si hoc verum esset, sequeretur certum esse quemlibet Ordinem etiam minorem, cui sigillatim Papa designavit materiam, esse Sacramentum; sed hanc certitudinem etiam ipsimet adversarii negant (c).

---

(a) 3. p. q. 60. a. 1. -- (b) *de Syn. l. 8. c. 10. n. 10.* -- (c) *Lib. 6. n. 11.*

16. — Tertia quæstio est, quænam sit materia Sacerdotii, an sola imposito manuum, an etiam instrumentorum traditio, et quænam sit forma? Tres adsunt sententiæ. I. Quæ est *Fagnan. Sol.* et aliorum paucorum, vult materiam esse solam traditionem instrumentorum, quæ Episcopus tradit Ordinando; et formam esse verba, *Accipe potestatem offerendi Sacrificium etc.*, et hæc solâ materiâ, et formâ dicit tradi potestatem, tam sacrificandi, quàm à peccatis absolvendi. Momentum totale desumunt ex Decr. Eugenii IV. ubi dicitur: *Ordo presbyteratus traditur per Calicis cum vino, et Patenæ cum pane porrectionem.* Sed hæc sententia communiter ab aliis DD. non recepta est. II. Sententia est *Bellarmin. Estii, Scot. Laym. Salm. Conine. Holz. Vasq.* etc. quæ vult in Ordinationem Sacerdotii duplicem esse materiam essentialem, dicendo per traditionem instrumentorum dari potestatem super Corpus Christi Reale, nempe sacrificandi, cum formâ, *Accipe potestatem*; et per impositionem manuum tradi potestatem super Corpus Christi Mysticum, nempe absolvendi à peccatis cum forma, *Accipe Spiritum Sanctum, quorum remisit peccata, remittuntur eis.* III. Sententia quam tenent *Martene, Becan. Tourn. Juvenin, Petrocor. Conc.* et alii cum *S. Bonav.* cui adhæret *Bened. XIV.* (a) vult utranque potestatem Sacerdoti conferri per secundam impositionem manuum, nempe cum Episcopus extendit manus super Ordinandum unâ cum Presbyteris assistantibus, sicut declaratur à Trid. *sess. 14. c. 3. de pæn.*, ubi dicitur, quod Ministri Extra.unct. sunt aut Episcopi, aut Sacerdotes ab ipsis ritu ordinati per impositionem manuum Presbyterii. Probatur hæc sententia, 1. ex Trid. *sess. 23. c. 2*, nempe quod ex Scripturis satis docemur nos ea, quæ maximè attendenda sunt in ordinatione Sacerdotum, et Diaconorum; sed ex Scripturis nihil aliud assignatum habemus pro materiâ Sacramenti Ordinis, quàm manuum impositionem: dicendum

(a) *De Syn. l. 8. c. 10. n. 6.*

igitur est præter impositionem nihil aliud in ordinatione esse de necessitate essentiali. Probatur 1. ex Ritu Græco, quo ordinantur (ut dictum est) solâ manuum impositione; cùm valor Sacramentorum essentialiter dependeat ex materiis, et formis à Jesu Christo institutis. Accedit etiam quod notat *Bened. XIV.* loc. cit. cum *Martene*, quòd traditio instrumentorum non priùs in Ecclesiam invecta est, quàm à sæculo VIII. vel IX. Ad hoc AA. adversarii nihil quod respondeant habent, nisi quod relatum est in quæstione secundâ, nempè quòd à Domino relicta sit Ecclesiæ potestas determinandi in specie materias, et formas Sacramentorum; sed ad hoc jam ibi satisfactum est. Quænam autem sit forma juxtâ hanc tertiam sententiam, alii dicunt esse verba, *Accipe potestatem etc.* Sed fortè probabilius dicunt *Morin. et Tourn.* esse orationem quam recitat Episcopus in præfatâ impositione; et verba quæ recitat in fine in tertiâ manuum impositione, *Accipe Spiritum*, esse dicunt tantum declarativa *Spiritus Sancti* jam accepti. Hæc tertia sententia est probabilior, sed quia secunda etiam est probabilis, saltem extrinsecè, idèd. illa in praxi sequenda (a). Cetera spectantia ad hoc Sacramentum, jam dictum est à principio, quòd notentur in *Examine Ordinandorum*.

---

(a) *Lib. 6. n. 749.*



# TRACTATUS XVIII.

## DE SACRAMENTO MATRIMONII.

### CAPUT I.

#### *De Sponsalibus.*

### PUNCTUM I.

#### De naturâ sponsaliorum.

*Definitio sponsaliorum. An pueri antè septennium etc. Qui promittit sinè animo se obligandi, aut adimplendi. Qui dolo aut errore etc. 1. Si conditio dederit causam contractui 2. De sponsalibus metu initis 3. An promissio debeat esse mutua? 4. An externata signis? Quid si promittit pater pro filio præsente; et quid si pro absente 5. An in dubio favendum sit libertati. Qui promittit in futurum etc. Quid si mittitur anulus etc. An requiratur dispensatio etc. 6. De impuberibus etc. De tactibus inter sponsos 7.*

I. — **S**PONSALIA definiuntur: *Promissio voluntaria et deliberata, et mutua, signo sensibili expresso futuri Matrimonii inter personas habiles.* Dicitur 1. *Promissio*, quia solum propositum non externatum, nec acceptatum, certè non obligat (a). Dicitur 2. *Voluntaria*, et *Deliberata*, nam ad inducendam obligationem gravem, quam secum inducit promissio sponsalitia, requiritur spontanea, et plena de-

---

(a) *Lib. 6. n. 831.*

liberatio. Ex quo deducitur 1. quòd nemo potest teneri ad sponsalia, nisi constet de suo perfecto rationis usu; sed si constat, utique ille remanet obligatus, licèt esset puer, qui adhuc non explevit septennium, juxtà probabiliorem, et communiozem sententiam *Sanch. Coninc. Bonac. Salm.* etc. contrà *Palaum*, et alios, modò (. intelligi debet) hujusmodi puer comprehendat aliquo modo onera, quæ secum affert status conjugalis. Deducitur 2. quòd non remanet obligatus qui promittit sinè animo contrahendi, aut sinè animo se obligandi, licèt cognosceret obligationem quæ ex sponsalibus oritur, ut probabilius dicunt *Sanch. Pal. Laym. Less. Salm. Mazz.* etc. contrà *Pontium, Sotum, Vivam*, etc., quia quandò obligatio oritur ex propriâ voluntate, ubi deest voluntas, deest etiam obligatio. Et hoc valet etiamsi promissio sit jurata, ut rectè dicunt *S. Bonav. S. Antonin. Sanch. Palaus, Salm. Bon.* cum *S. Thomâ*, quia juramentum sequitur naturam promissionis (a). Secùs verò dicendum, si adfuisse defloratio cum fictâ promissione, ut dictum fuit *Tom. 1. Tract. X. n. 93.* cum de restitutione locuti fuimus (b). Qui promittit sinè animo contrahendi, at cum animo se obligandi, iste certè remanet obligatus, licèt à principio ei deesset animus promissionem exequendi (c). Deducitur 3. quòd non remanet obligatus qui promittit inductus vi, aut dolo alterius, aut errore circà substantiam, aut circà conditionem substantialem, ut esset cum ille expressè promitteret sub illâ particulari conditione: quod cæteroquin est commune cum cæteris contractibus; vide dicta *Tract. X. n. 124.*

2. — Quæritur 1. An valeant sponsalia cum dolo, aut error sit circà aliquam conditionem, non jam substantialem, sed accidentalem, sed eam quæ causam contractui ità dedit, ut sinè illâ sponsus non contraxisset? Plures DD. dicunt sponsalia tunc irrita esse: sed nos oppositum ut probabilius te-

---

(a) num. 833. -- (b) *Lib. 6. n. 833.* - ( ) num. 832.

nuimus (a); vide dicta *Tract. X. n. 124.* ubi diximus etiam, quòd pars decepta habet ceteroquin actionem ad rescindendum contractum, licet deceptio evenisset ab aliquo tertio, insciâ parte, ut docet *Sanch. cum Covarr. et alii.* Imò probabiliter dicunt *Less. Laym. Spor. et Viva*, quòd si res integra est (ut evenit in simplicibus sponsalibus), et error sit invincibilis, in conscientiâ deceptus non tenetur stare contractui, ne Judicis quidem post sententiam (b). An autem stando primæ sententiæ, nempè quòd talis contractus dolo dante causam contractui sit ex se irritus, eo casu etiam decipiens liber extet à suâ obligatione? negamus juxtà probabiliorem cum *de Lug. Pal. Less. Laym. etc. contra Sanch Pontium etc.* ex generali ratione quòd nemiui patrocinari debet fraus sua (c).

3. — Queritur 2. An sponsalia contracta metu injusto, gravi, et ab extrinseco sint ex se invalida? Alii, ut *Coninch. Dicast. Viva, etc.* dicunt non esse irrita, sed irritanda arbitrio partis, quæ metum passa est, sicut dictum est de omnibus aliis contractibus *Tract. X. num. 125.* Sed sententia probabilior, et communissima cum *Sanch. Pontio, Laym. Bonac. Azor. Sa, Bec. Boss. Salm. etc.* contendit esse omninò irrita, quia sponsalia sequuntur naturam Matrimonii, quod certè nullum est, dùm metu contrahitur; ideòque sicut nemo tenetur hujusmodi Matrimonium contrahere; ità nec potest teneri sponsalibus quæ sunt medium ad Matrimonium. Undè fit quòd ex talibus sponsalibus nullum oritur publicæ honestatis impedimentum (d). Dictum est tamen 1. si metus est *injustus*, quia si esset justus, sicut est validum Matrimonium (prout dicemus postea), ità sunt valida etiam sponsalia (e). Dictum est 2. si metus sit *gravis*; si enim metus est levis, obligant sponsalia juxtà sententiam probabiliorem et communiozem *Bonac. Ponc. Medin. Salm. Croix, Viva, Mazzot. etc.* (contra *Nav. Less. Ronc. etc.*), dùm judicatur sponte contrahere ille, qui cùm pos-

---

(a) d. 835. -- (b) *Ibid.* -- (c) *Lib. 6, num. 835. v. An autem.*  
 -- (d) *num. 844.* -- (e) *Ibid.*

298 *Tract. 18. De Sacramento Matrimonii.*

sit metum repellere, cùm ille sit levis, non respuit (a). Excipitur tamen, si talis metus, licet levis, dederit causam contractui, ut probabiliter dicunt *Laym. Sanch. Bonac. Wigandt, Salm. Croix, Lugo, Azor.* adversus *Pontium, Vivam* etc. Tantò magis hoc currit, si qui passus est metum huiusmodi levem, tamquàm gravem apprehendisset (b). Dictum est 3. *ab extrinseco*, quia si fuisset ab *intrinseco* (v. g. si quis promitteret, timens ne cogeretur ad solvendum debitum, aut ne in carceres conjiceretur) tunc iste tenetur ad sponsalia (c).

4. — Dicitur 3. quòd promissio sponsaliorum debet esse *mutua*. Hinc si alter sponsorum promittit, alter verò non, neuter eorum remanet obligatus; pràterquàm si pars promittens vellet se obligare independentè ab alterius promissione; sed in eo casu non teneretur illa vi sponsalium, sed vi simplicis promissionis (d), quæ juxtà opinionem probabilem innixam auctoritate *S. Thomæ* (ut dictum est *Tract. X. n. 127.*); cùm obliget tantum ratione fidelitatis, non obligat sub gravi. Sed hic quæritur 1. An quis possit se obligare sponsalibus sub gravi cum verà promissione sponsalitià, independentè ab obligatione alterius partis? Negant *Pontius, Vasq. et Conc.*, sed communior et probabilior est sententià opposita *Sanch. Laym. Bonac. Coninc. Spor. Salm.* etc. (e). Quæritur 2. An pars non repromittens, sed solum acceptans alterius promissionem sponsaliorum intelligatur se obligasse? Affirmant *Ponc. S. Ant. Silv.* etc. Sed probabilius negant *Sanch. Bonac. Laym. Conin. Sot. Castrop. Salm.* etc., quia rectè potest stare promissio unius sinè repromissione alterius: nec acceptatio includit repromissionem, cùm possit jam aliquis acceptare alterius obligationem, quin seipsum obliget (f). Advertendum tamen est (ut probabiliter dicunt *Spor. et Tambur.*) plerumque

---

(a) *Ibid. Qu. II.* — (b) *Ibid. Qu. III.* — (c) *Lib. 6. n. 1053.* — (d) *num. 836.* — (e) *n. 837.* — (f) *n. 836. Qu. I.*



sponsos non intendere se obligare, nisi sub conditione, ut altera pars etiam se obliget (a)

5. — Dicitur 4. *Signo sensibili expressa*; quia non sufficit ad se obligandum taciturnitas sponso-  
rum. Excipitur casus, si pater aut mater pro filio,  
aut filiâ præsente et tacente promitteret, ut habetur  
ex *Cap. un. §. fin. de Despons. impub.* ubi dicitur:  
*Porro ex sponsalibus quæ parentes pro filiis puberi-*  
*bus vel impuberibus plerumque contrahunt, ipsi*  
*filiû si expressè consenserint, vel tacitè, ut præse-*  
*tes fuerint, nec contradixerint, obligantur* (b). Ad-  
vertendum tamen 1. hoc habere locum quoad fo-  
rum externum, sed quoad conscientiam filius non  
tenetur sponsalibus si internè dissentit, ut dicunt *Bon-*  
*nac. Ronc. Holzm. et Anacl.* Et idem puto dicen-  
dum, si filius nec assentit, nec dissentit, sed nega-  
tivè se habet; dùm ad contrahendam aliquam  
obligationem requiritur positivus consensus. Nec  
obstat verbum textûs *obligantur*; quia intelligi de-  
bet, (ut rectè dicunt *Bonac. et Salm.*) quoties ad-  
est consensus internus (c). Advertendum 2. hoc  
procedere solùm in casu quo promittunt parentes, non  
autem si promittunt alii, licèt sint tutores, aut curato-  
res; quia præfata legis dispositio tantùm comprehen-  
dit parentes, qui pro filiis promittunt (d). Si tamen hu-  
jusmodi parentes promittunt pro filio absente, alii  
DD. ut *Sanch. Ponc. Ronc. Escob. Boss.* etc. dicunt  
non sufficere filium certiorum factum promissioni non  
contradicere, sed ampliùs requiri, ut ratificet me-  
dio aliquo signo expresso, aut tacito. Hæc senten-  
tia est probabilis, sed probabilior est opposita *Bonar.*  
*Palud. Castr. Conc. Sot. Salm. Spor.* etc. quæ affirmat  
sufficere taciturnitatem filii absentis; et hujus sen-  
tentia est etiam *S. Thomas* (e) qui dicit: *Robur*  
*habent* (Sponsalia) *in quantum illi, inter quos*  
*contrahuntur, ad ætatem debitam venientes non re-*  
*clamant, et intelliguntur consentire quæ per alios*  
*facta sunt.* Et probatur etiam ex cit. *cap. un. de*  
*Despons.* in 6. ubi dicitur: *Et est idem, si filii*

(a) num. 837. in fin. — (b) Lib. 6. n. 838. — (c) num. 838. v.  
Id tamen. — (d) n. 838. et 839. — (e) in 4. d. 27. q. art. 2. ad 1.

*tempore sponsaliorum absentes, et etiam ignorantes eadem sponsalia, post scienter ratificaverunt tacite, vel expressè. Expressè intelligitur externè consentiente, tacite intelligitur non contradicentè, ideòque dicitur ibi, Et idem est: in tantum dicitur ratificaverunt, quia agitur de re nomine alterius actà. Notant tamen Castrop. et Coninc. non sufficere, si filius casu sciat sponsalia à parente celebrata, et non contradicat: sed ampliùs requiritur, ut parens per se, aut per alium eum certiore faciat (a).*

6. — Hic quæritur 1. An in dubio verborum, aut signi promissionis sponsalium, sit potiùs favendum Matrimonio, an libertati? Alii dicunt Matrimonio, sed probabiliùs (ut dicit *Viva*) favendum est libertati (b). Quæritur 2. An teneretur vi sponsalium qui diceret: *Non ducam aliam nisi te?* Quicquid dicant alii, verior sententia est, et valde communior *Laym. Castrop. Sanch. Escob. Boss. Holzm. Salm. Anchl.*, quæ docet istum non posse aliam ducere uxorem, sed non teneri ad illam ducendam. Teneretur tamen, ut dicunt *Pontius, Viva, et Perez*, si verba essent de præsentì: *Nolo aliam nisi te* (c). Mittere anulum aut alia dona sponsalitia non inducunt sponsalium obligationem, nisi is esset regionis mos, ut docent communiter *Sanch. Castrop. Conc. Bossius, Busemb. etc.* aut nisi præcessisset promissio alterius partis, et altera acceptasset anulum ab illà missum, ut communiter *Castrop. Busemb. Escob. Sanch. Silvest. Holzm. et alii*; aut si missus fuerit à parentibus cum illius consensu, ut rectè subjungunt *Sanch. Castrop. Boss. Mol. etc.* Sponsalia autem celebrata inter eos qui aliquo tenentur impedimento, sub conditione, *si Papa dispensat*, licet non sint valida, obligant tamen ad expectandum usquè dùm exitus videatur dispensationis, si ipsa de facili obtineri possit (d). Vide dicenda *Punct. III. num. 15.*

---

(a) *num. 839. dub. 2. --- (b) num. 840. v. Quando. --- (c) Lib. 6. n. 842. --- (d) num. 843.*

7. — Dicitur 5. et demùm, *Inter personas habiles*; hôc intelligitur, quòd non valeant sponsalia, si deest sponsis ætas præscripta, aut si inter eos aliquod subsit impedimentum (a). Hic notandum 1. promissionem Matrimonii per verba de præsentì inter impuberes valere pro sponsalibus; secùs de puberibus, qui clandestinè contraherent, nempè sinè Parrocho, et testibus; quia cum invalidus sit contractus ex se, dùm ei obstat lex Tridentini, ille nullam parit obligationem. Intelligitur hoc tamen pro locis ubi Trident. receptum est, nam pro aliis locis sponsalia inita verbis aut signis de præsentì, (putà copulâ affectu maritali exhibitâ) transeunt in Matrimonium (b). Notandum 2. inter sponsos non solùm esse mortales actus impudicos, sed etiam pudicos, quoties ad id fiunt ut delectatio sensibilis habeatur, eodem modo, ac sunt mortalia inter solutos, ut dictum est *Tom. I. Tract. IX. n. 2*; nullus enim sponsorum (quicquid dicant alii) acquirit jus ad alterius corpus; undè sicut sponsis vetita est copula, ità etiam tactus: qui idèò permittuntur, in quantum sunt ad illam ordinati; ità rectè docent *Lessius, Bonac. Ronc. Conc. Suar. Viva, Croix, Mazzot.* et alii plures. Vix sponsis permitti possunt (ut dicunt *La Croix, Viva*, et alii) oscula illa, vel amplexus, quos mos patriæ permittit, modò non sint pressi, neque per notabile tempus protracti. Nec practicè probabilis est opinio illorum AA. dicentium licitos esse sponsis tactus pudicos, si ipsi non intendant delectationem veneream, sed solam sensibilem; in hoc enim ordinariè adest periculum incidendi in veneream tam sensibili propinquam, aut saltem in prava desideria progrediendi ad veneream (c) Et sic etiam sub gravi prohibitum est Sponsis se delectari de copulâ futurâ; cùm illa ipsis in præsentì statu actualiter sit vetita (d). Vide dicta *Tom. I. Tract. III. num. 51.*

---

(a) num 840. — (b) num. 853. in fin. — (c) Lib. 6. n. 854.  
 (d) Ibid. in fin.

## PUNCTUM II.

## De sponsaliorum obligatione.

*Quomodo, et quando sponsalia sint exequenda* 8. *Quid si unus promittit duabus mulieribus* 9. *An filius possit insciis parentibus se obligare* 10. *Qui à sponsalibus recedit etc. Et de poenâ appositâ recedenti* 11. *An debeatur legatum relictum sub conditione, si nubât, etc. aut si non nubat* 12.

8. — **S**PONSALIA obligant certè sub gravi ad contrahendum Matrimonium; et si non est præfixum tempus obligant statim, juxtà sententiam veriorum Pontii, Castrop. Ronc. Coninch. Salm. etc. contrà Sanch. Nav. Holzm. etc. qui contendunt non obligare, nisi cùm pars instat; sed ratio nostra est, quia omnes obligationes, ubi terminus præfixus non est, debent quamprimum adimpleri, ut exprimitur *L. Eum quia §. Quoties, ff. de verb. oblig.* ubi dicitur: *Quod sine termino præfixo debetur, statim debetur.* Probabiliter tamen dicunt Castrop. Coninch. Salm. etc. quòd in casu quo altera pars commodè posset pro Matrimonio contrahendo instare, et taceret, tunc prudenter potest judicari consentire illam dilationi (a). Hoc valet quoad partes, sed quoad Judicem, rectè docent Sanch. cum S. Bonav. S. Antonin. Navar. Conc. Castrop. Holzm. Ronc. Salm. et aliis communiter, quòd ille non debet eos cogere ad Matrimonium, si ex eo timentur scandala, aut rixæ, ut exprimitur in *Cap. 10. de sponsalib.* ubi dicitur: *Ecclesiasticâ censurâ compellas, nisi rationabilis causa obstiterit.* Et ità declaravit etiam S. C. Et in dubio semper satius erit, ut dicunt Busemb. Tamb. et Concina evitare damna talis Matrimonii, quàm evitare damnum partis; undè si unquàm pars repitens ideò excommunicata fuit,

---

(a) num. 845. in fin.

*Cap. 1. Punct. 2. De sponsaliorum oblig. 503*

expedit ut Judex eam absolvat, quoties timetur ne futurum sit, ut hujusmodi nuptiæ malum exitum habeant (a).

9. — Notandum 1. quòd si quis sponsalia cum duabus contrahit, et secunda conscia erat Sponsaliorum, quæ cum primâ inita erant, Matrimonium cum primâ erit contrahendum. Si verò erat inscia, aliqui DD. dicunt quòd in casu quo copula intercessisset cum secundâ, sponsus hanc ducere debet; Sed communiùs et probabiliùs dicunt *Nav. Sanch. Led. Bon. Ronc. Elbel, Laym. Soto, Holzm. Anact. Croix*, etc. in omni casu ducendam esse primam, quia promissio facta secundæ semper nulla est, et de re illicita, cum jam promissa fuerit priori sponsæ, ideoque non tenet, licet juramento firmata fuisset. An autem cum intercesserit copula cum secundâ; debeat prior cedere ex æquitatè? Alii affirmant, sed non improbabiliter *Holzm. Anact. Gutt. et Pichler*, sentiunt ne teneri quidem ad hoc primam, dum secunda sponsa imbecillitati suæ imputare debet incommodum talis damni (b).

10. — Notandum 2. sponsalia inita à filiis, insciis parentibus, certè esse valida, ut declaravit *Trid. Sess. 24. Cap. 1. de Ref. matrim.* contra *Lutherum*, et *Bucerum*. Celebris illa quæstio est, an peccet graviter filius, qui invitis parentibus, Matrimonium contrahit? In hoc quatuor adsunt sententiæ. *Prima* dicit peccare graviter, sive contrahit insciis, sive invitis parentibus; et hoc ratione gravium scandalorum, et damnorum quæ ceteroquin ex hujusmodi Matrimoniis oritura sunt; ita *Poncius, Silvius, Nav. Mol. Conc. Petrocor. et Ronc. Secunda* autem sententia dicit filium teneri sub gravi obligatione parentes certiores facere, et etiam consilium accipere, alioquin eis gravem inferret injuriam; sed non teneri postea eorum consilio stare, cum non teneantur filii, juxta id quod docet *S. Thomas* (c), parentibus parere in iis quæ ad Matrimonium spectant, cum in id totalis requiratur libertas; ita *Vasq. Sanch. Barb. Laym.*

---

(a) *Lib. 6. n. 846.* --- (b) *n. 848.* --- (c) *2. 2. q. 104. a. 5.*

*Bonaç. Filliuc. Viv. etc. Tertia* sententia dicit, quòd quoties Matrimonium non affert dedecori familiæ, et non adsit causa ob quam parentes justè contradicant, filius non peccat graviter si uxorem ducit, aut nubit insciis parentibus; cùm enim ille non teneatur eorum stare consilio, consequens est non posse esse gravem illius obligationem, ut eos consulat; ità *Castrop. Bossius, Holzm. Salm. Pichler, Elbel, Covar. Renzi, Led. Vict. Henr. Spor. Aver. Dicast. etc. Quarta* sententia quasi cohærens cum tertia distinguit, et dicit, si parentes justè vetant filio aliquod Matrimonium particulare, putà quia esset illud dedecori, aut scandalo familiæ, tunc filius peccaret graviter, si illud contraheret. Et in casu quo esset dedecori familiæ, ille non tenetur sponsalibus contractis, etiam juratis, licèt sponsam deflorasset, cùm sufficiat tunc si tantùm illam detet, si potest; cùm justitia non possit obligare ad actum qui sinè peccato executioni mandari nequit. Secùs autem dicunt, si pater sinè justâ causâ impediret Matrimonium, ità *Laym. Delb. et Adversa* (a). Ceterùm omnes conveniunt communiter DD. ad excusandum filium in casibus sequentibus; nimirùm 1. si pater injustè vetaret statûs conjugalis electionem, et filius esset in periculo incontinentiæ. 2. Si filius injustè à parentibus vexaretur. 3. Si pater longè abesset, et filius posset prudenter præsumere ejus consensum. 4. Si pater impediret Matrimonium suo statui conveniens, nam cùm in tali casu peccaret pater, non teneretur filius ei obedire, ut communiter dicunt *Sanch. P. Sotus, Cordub. Boss. Gutt. Rebel. Viva, etc.* 5. Si pater vellet filio uxorem indignam, infirmam, aut pravæ conditionis dare (b). Quæritur autem hîc, an filius teneatur obedire parenti, qui jubet eum statum Matrimoniale inire: aut uxorem à quâ ipse abhorret, ducere? Plerumque ab omnibus negatur; sed *Laym. Sanch. Bellarm. Sot. Petrocor. Croix, Bossius, et alii* communiter excipiunt, si ob tale Matrimonium gravis inimicitia dirimenda esset, aut si parentes à magnâ

---

(a) *Lib. 6, n. 849.* -- (b) *n. 849. v. Conveniunt.*

paupertate per illud essent sublevandi; sed hoc intelligitur, quoties filio status Matrimonialis esset assumendus; intelligi etiam debet, quoties illi non esset horror valdè intolerabilis ergà illam mulierem; caritas enim neminem potest obligare ad tantum, ut ei vivendum esset totam vitam suam cum uxore quam notabiliter horreret (a).

II. — Notandum 3. partem, quæ voluntariè à sponsalibus promissis recedit, amittere arrhas sponsalicias, et teneri amplius acceptas restituere cum refectione omnium damnorum, quæ ab hoc suo recessu emanant. Quò circà advertendum esse illicitam et invalidam promissionem pœnæ quæ opponeretur in sponsalibus in recedentem, uti constat ex *Cap. Gemma de spons.* ubi hæc habentur: *Cùm itaque libera Matrimonia esse debeant, et ideo talis stipulatio propter pœnæ interpositionem sit merito improbanda*, etc. Itaque in tali casu, qui recedit non tenetur ad præfatæ pœnæ solutionem, licet promissionem juramento obfirmasset (b) Et si pœna unquam soluta sit, qui eam exegit, tenetur ad restituendum, uti sentit probabilior opinio *Castrop. Soti, Boss. Guttier. Hurtad. Salm.* etc. adversus *Sanch. Less. Escob. Mol.* et alios, quia illi nullus titulus est, quo eam sibi retineat; dùm lex omninò irritat talem promissionem, ut expressum est in *L. fin C. de sponsal.* ubi dicitur promissio pœnæ *ex utraque parte nullas vires habebit* (c). Hoc tamen currit quando pœna opponitur à sponsis, aut à sibi conjunctis, aut amicis; secus autem, si ab extraneo, ut notant communiter *Sanch. Castr. Salm.* etc. (d). Insuper currit, si pars justè recedit; sed si injustè repugnat Matrimonium inire, licet sit probabilis sententia *Sanch. Bonac. Boss. Conc. Becan.* etc. ne teneri quidem ad eam pœnam, quia secus Matrimonii libertas etiam aliquam pateretur læsionem; attamen probabilior est opposita *Pontii, Laym. Castropal. Suar.*

---

(a) num. 850. --- (b) num. 853. Qu. II. --- (c) *Ibid.* Qu. III. --- (d) n. 853.

*Vasq. Salm. Anac.* § *Ronc. Holzm.* etc. quia præfata pœnæ promissio non est prohibita neque jure naturali, nec positivo. Non quidem naturali, cum æquum sit subjici pœnæ eum qui injustè recedit, libertas autem quæ in Matrimonio requiritur, est libertas rationabilis, non irrationabilis; aliàs punquàm posset Judex censuris, aut carceribus cogere sponso ad contrahendum. Nec positivo, nam (sicut affert *Pontius*) in *Novella* 18. expressè approbatur pœnæ impositio in recedentem injustè à sponsalibus. Et textus canonicus in *C. Gemma*, superius relatus, debet intelligi de recessu justo, non autem de injusto (a). Advertendum etiam quod Benedictus XIV. in Bullâ *Nimiam licentiam*, die 12 Maji 1743. damnavit, et irrita declaravit pacta inter conjuges inita de non appellando à sententiâ pro Matrimonii nullitate, adeò ut in nullo foro obligent nec interno nec externo, sub pœnâ excommunicationis Papæ reservatâ præterquàm in articulo mortis.

12. — Sed quæritur hîc, an legatum relictum puellæ sub conditione ut nubat certo juveni, ei debeatur; cum nubit alteri? Respondetur: per se loquendo, non debetur, ut habemus ex *L. Titio*, §. 1. ff. de *Condit. et demonstr.* dùm illa jam libera restat ad acceptandas aut respuendas tales nuptias. Sed excipitur 1. Si secùs pater ei legitimam denegaret. 2. Si illud Matrimonium esset indignum, quia tunc talis conditio reputatur, ut turpis; ita communiter *Laym. Mol. Ronc. Vasq. Salm. Boss.* etc. cum *Rot. Ronc.* Si autem sportsus esset dignus, sed pater puellæ vellet ut illa alteri nuberet, *Pontius*, etc. dicit tunc legatum ei non deberi, ex sententiâ quam ipse tenet, non peccare filiam cum nubit personæ dignæ, licet invito parente; multi alii tamen, ut *Bos. Sanchez. Mol. Coninc. Guttier.* etc. tenent oppositum, dicentes quòd, cum non possit puella, parente dissentiente, nubere, parenti obtemperando, privari non debet legato (b). Si autem mulieri sit relictum legatum sub conditione, ne nubat, et illa nuberet, si ipsa est virgo, etiam ei debetur legatum: secùs autem si est vidua (c).

---

(a) *Ib. Qu. I.* -- (b) *l. 6. n. 853. v. Q. IV.* -- (c) *l. 3. n. 930. v. d. 7.*



## PUNCTUM III.

### De sponsaliorum dissolutione.

*Solvuntur sponsalia* I. Ob nuptias cum alio initas. An deobligatus restet nocens 13. II. mutuo consensu, licet intercesserit juramentum. Quid de impuberibus 14. III. Ob impedimentum superveniens. An teneatur petere dispensationem 15. An disparitas dirimat sponsalia 16. An parentum dissensus 17. IV. Ob delictum atrox. An ob fornicationem. Et an talis fornicatio malitiam contineat diversam 18. V. Ob notabilem mutationem, v. g. odii, æris alieni, morbi, etc. An ob novam hæreditatem. An si melior occasio, etc. 19. VI. Ob discessum in longinquam regionem 20. VII. Ob terminum elapsus 21. VIII. An ob Religiosam Professionem aut ob Ordines Sacros. An ob ingressum, etc. 22. An si ante ingressum etc. 23. An peccet qui Sacris initiatur 24. An votum castitatis, aut Sacros suscipiendi Ordines dirimat, etc. 25. An requiratur Judicis auctoritas etc. 26. Quænam probatio requiratur etc. 27.

13. — **D**ISSOLVUNTUR sponsalia ob sequentes causas. I. Ob *Matrimonium validum* ab aliâ parte contractum (a). Hoc certum est quoad partem innocentem; sed dubium fit, an etiam nocens liber à sponsalibus remaneat ex Matrimonio à se contracto. Affirmant *Sanc. Bonac. Laym. Wigandt*, et alii, quibus etiam inclinât *Concina*: Sed oppositam sententiam *Pontii, Cast. Concina. Ronc. Silvii, Salm. Ledesm.* etc. ego puto absolutè probabiliorem, nam talis dissolutio non probatur nec lege positivâ, nec naturalî; nam ratio naturalis dictat obligationem jam contractam sponsaliorum, durante Matrimonio, suspendi dumtaxat, non extinguî (b).

---

(a) *Lib. 6. n. 875.* — (b) *n. 875. v. Quæritur.*

14. — II. Ob *mutuum consensum* sponsorum. Sed hìc advertendum quòd inter puberes ob talem consensum mutuum solvuntur sponsalia, licèt fuerint juramento firmata; intelligitur, modò absit justa causa, aliàs peccarent sponsi, non quidem graviter, sed leviter, ut dicunt *Sanch. Ronc. Navar. Holzm. Salm.* etc. licèt juramentum principaliter fuerit factum in Dei honorem, quia in omnibus juramentis in proximi favorem redundantibus, semper subauditur conditio, nisi à parte remittantur (a). Inter impuberes autem non dissolvuntur mutuo consensu, nisi cùm ad pubertatem pervenerint: uti habetur ex *cap. De illis, de sponsal. Impub.* Itaque impuber cùm pubertatem attigerit, poterit à sponsalibus recedere, modò statim animum suum declaret: hoc statim, intelligitur intrà tres dies, qui incipiunt non quidem à tempore pubertatis, sed à die quo pars venit in notitiam privilegii posse recedere. Quòd si sponsus dissentit jam antè pubertatem, et in dissensu perseverat, jam sponsalia soluta sunt, statim ac puber ille fuit factus: modò hunc dissensum suum aperuerit; ut vult sententia probabilior *Ronc. Castr. Suar. Conc.* etc. (contrà *Sanch. Bonac.* etc.) quia tale beneficium non est concessum nisi reclamantibus, quod proculdubio intelligitur externè (b). An autem sponsus cùm ad pubertatem pervenit possit recedere, licèt sponsalia juramento firmaverit, negant *Bonac. Sanch. Ronc.* etc. Sed probabilius affirmant *Ponc. Castr. Concina, Viva, Palud. Salm.* etc. quia juramentum sequitur naturam contractus, sive sponsaliorum, quæ inter impuberes sunt revocabilia: Nec obstat *Cap. Literis, de sponsal.*, quia sicut animadvertunt *Castr. Ponc. et Viva* ibi tantum loquitur de *Impubescentibus*, ut exprimit textus, nempe de proximis pubertati, qui meritò habentur uti puberes, et huic sententiæ etiam assentitur *Sanch.* cum aliis (c).

15. — III. Ob *Impedimentum superveniens*. Sed hìc distinguenda sunt impedimenta: si impedimen-

---

(a) n. 855. — (b) n. 856. — (c) *Ibid. Quær.*

tum est tantum impediens, probabilior est sententia, et est communissima cum *Sanch. Castropal. Palud. Bonac. Conin.* etc. (contrà *Sotum*) sponsalia non dissolvi; modò impedimentum non sit ob votum Religionis, et etiam probabiliter castitatis, ut infrà dicitur *num. 25*. Si verò impedimentum est dirimens, certum est sponsalia dissoluta esse, quoad partem innocentem, etiamsi nihil aliud esset, quàm fama apud maiorem partem viciniae; secùs autem quoad nocentem, juxtà probabiliorem sententiam, et communiorem. *Sanch. Castrop. Coninc. et Guttier.* (contrà *Dicast.*) ex illà generali regulà, quòd nemo potest ex suo delicto commodum reportare (a). Propterea in eo casu sponsus qui impedimentum contraxit, tenetur dispensationem procurare, quoties de facili potest, et intrà tempus breve; secùs cùm magnà impensâ, aut magno labore, et tempore opus esset; etenim ille tenetur fidem præstare mediis ordinariis, non autem extraordinariis, ut probabiliùs *Sanch. Bonac. Gutt. Wigandt, et Sporer*, contrà *Castr. Ronc. et Salm.* qui eum obligant, etiamsi impensa esset nimia. Meritò tamen excipit *Spor.* cum *Lamb.* si sponsus teneretur ad Matrimonium, ut damnum reparet deflorationis, aut infamiae sponsæ (b). Et si fortè aderet impedimentum tempore quo celebrata fuerunt sponsalia, et hæc celebrata fuerunt cum pacto impetrandi dispensationem, tunc licet sponsalia non sint valida antè dispensationis impetrationem, ac proindè non inducant impedimentum publicæ honestatis; nihilominùs remanent sponsi obligati ad expectandum conditionis eventum; et sponsalia, quæ cum aliâ personâ inirentur, essent nulla, ut dicunt *Spor. et Ronc.* cum *Decret. S. C.* Et dicimus cum *Sanchez, Ronc. Lug. Laym. Bon. Salm. Castrop.* etc. dispensatione obtentâ, huiusmodi sponsalia sinè novo consensu esse valida, modò consensus præstitus adhuc perseveret (c); vide infrà n. 34.

16. — Quæritur hic 1. An notabilis disparitas conditionis inter sponsos, sit impedimentum potens

(a) *L. 6. n. 857.* — (b) *n. 858. et l. 3. n. 650.* — (c) *n. 859.*

sponsalia dissolvere? Respondetur, quòd si tempore contractùs ignorabatur disparitas, sponsalia utique sunt nulla. Secùs si cognita erat; præterquàm si tale Matrimonium non posset iniri sinè notabili familiæ dedecore, v. gr. si nobilis filiam rustici, aut fabri ducturus esset; ità communiter *Laym. Sanch. Panorm. Ronc. Spor. etc. (a)*. Et idem dicitur si sponsus esset longè ditior, quia tunc promissio sponsalitia uti prodiga non obligat, cùm nunquàm quis teneatur ad exequendum illicitum, licèt sit tantùm venialiter illicitum, juxtà communiorem, et veriore sententiam *Soti, Prad. Bann. Suar. Salm. etc. (b)*. Hoc tamen intelligitur (loquendo de disparitate divitiarum) modò sponsa aliquà peculiari prærogativâ nobilitatis, honestatis, prudentiæ, aut pulchritudinis prædita non esset, quâ carentiam bonorum fortunæ compensasset, et modò non adesset desflatio, aut modò infamiâ notata non remaneret sponsa, si Matrimonium non fieret (c). Dicunt autem DD. quòd licèt Matrimonium non sit familiæ opprobrium, nec liceret illud contrahere, cùm timerentur damna, aut odia inter parentes. Sed considerando quòd obligatio hoc Matrimonium non contrahendi in hoc casu non esset nisi caritatis actus, nescio quomodò posset excusari sponsus cum suo damno aut incommodo à tali Matrimonio non contrahendo, ut vitet odia inter parentes; nisi esset quòd ex tali Matrimonio orituræ essent communes perturbationes apud plures familias in oppido parvo, adeò ut posset aliquo modo judicari esse malum commune toti Regioni (d).

17. — Quæritur 2. An dissensus parentum sit impedimentum adeò potens, ut solvi possint sponsalia? Respondetur: Si parentes injustè dissentiant, non potest filius à Matrimonio resilire, cùm jure Canonico certum sit Parentum consensum non esse de necessitate valoris Matrimonii, sed tantùm honestatis. Secùs verò dicendum, si parens justè contradicat, ut cùm tale Matrimonium esset familiæ de-

---

(a) num. 851. l. 3. n. 643. — (b) *Ibid. v. Sed quid, et seq.* — (c) *L. 6. n. 581. v. Juxtà* — (d) *Ibid. v. Ad id.*

decori, aut scandalo parentibus; *Laym. Nav. Sanch.* etc. aut, ut ait *Roncagl.*, si filius justè timeret hæreditate privari paternâ, modò hoc periculum non præviderit, cum sponsalia contraxit (a).

18. — IV. Ob *Atrox delictum* alterius partis, ut si alter sponsus in hæresim incideret, aut aliquod homicidium, aut grave furtum, aut aliud facinus, quod gravi sibi esset damno, aut infamiæ, committeret. Si autem crimen esset fornicationis, distinguere oportet virum à muliere. Quoad sponsam, certum est virum liberum fieri, si illa ab alio carnaliter fuerit cognita, licèt invita, juxtà communem et veriore sententiam *Sanch. S. Antonin. Sot. Concina Navar. Ponc.* etc. et ut habetur ex *C. 33. Raptor. c. 27. q. 2.* ubi permittitur sponso repudiare sponsam vi raptam; aut si ipsa permisit impudicè tangi. Contrà quoad sponsum, sive ipse fornicasset antè, sive post sponsalia, etiam communiùs, et probabiliùs dicunt *Sanch. Ponc. Castrop. Salm.* etc. sponsam non posse recedere. Exeipiunt tamen, et meritò præfati AA. cum aliis, si celebratis sponsalibus, cognovisset sponsa, ex aliâ muliere sponsum habuisse prolem; aut in hoc vitium frequenter lapsum fuisse, cum multis congressum habendo (b). Dubitatur autem inter DD. an fornicatio inter sponsos habeat malitiam diversam, quæ mutet speciem? Tres adsunt sententiæ omnes probabiles. Prima affirmat tam de sponsâ, quàm de sponso; quia ex utrâque parte irrogatur injuria juri acquisito ad corpus alterius: ità *Castr. Laym. Salm.* etc. Secunda affirmat de solâ sponsâ, non verò de sponso, qui fornicando non videtur gravem afferre injuriam sponsæ; ità *Sanch. Bonac. et Fill.* Tertia etiam probabilis negat de utroque, quia neuter sponsus acquirit jus ad corpus alterius: ità *Pon. Trullen. Covar. Vival.* et probabilem vocant *Sanch. Laym. Lug., Salm. Elbel,* etc. (c). An autem nec ne teneatur sponsa, virgo reputata, suum defectum patefacere, si talis non est? vide dicenda numero sequenti.

---

(a) *L. 6. n. 877.* — (b) *n. 861. et 862.* — (c) *L. 6. n. 847.*

19. — Ob *Mutationem notabilem*, quæ suboritur, ut esset 1. timor gravis odii inter sponsoſ (cognitâ ab altero alterius asperitate) aut inter parentes; itâ *Bonac. Laym. Busemb.* 2. Si detegatur alter sponsus nimio ære alieno gravatus, aut si sponsa dotem non haberet; *Sanct. Tol. Ponc. Bon. Spor.* etc. 3. Si alteruter sponsus in lepram, paralyſim, morbum gallicum incidat, aut aliud simile ei accidat quo difformis, aut inhabilis ad familiam sustentandam evadat, *Sanct. Conin. Layman, Bon.* et alii communiter cum *S. Thomâ (a)* et ſufficit, ut de hoc prudens habeatur suspicio (b). Et si fortè tempore sponsaliorum alterutra pars haberet aliquem personalem defectum occultum ex descriptis aut suæ familiæ, qui redderet nuptias nocivas alteri parti ignoranti, illa non potest Matrimonium contrahere, nisi illum manifestet. Dictum est *nocivas*, quia si eas redderet tantum minus appetibiles, v. gr. si sponsa putabatur dives, pulchra, aut virgo, et postea talis non esset, quoties illa non fingat esse à tali defectu immunem, non tenetur illum manifestare, sed potest dissimulare, quia tunc non fingit, sed vitium suum occultat: nec aliquis tenetur suam patefacere infamiam, cum illa jus alterius non lædit; itâ communissimè *Sanct. Ponc. Castrop. Coninc. Ronc. Salm. Escob. Croix,* et alii, contra *Concinam (c)*. Ad judicandum quænam causa valeat dissolvere sponsalia, hæ duæ regulæ attendendæ sunt. Prima est, quod ob causas sponsalibus supervenientes, ſufficit ea, quæ si prævisa esset, illa utique contracta non fuissent; unde tunc pars à tali defectu immunis remanet, quæ præsumitur contraxisse semper sub conditione quod talis rerum non adsit mutatio, quæ prævisa si fuisset, eam à contrahendo removisset. Secunda regula est, quod ob causas sponsalia præcedentes ſufficit, ut adsit illa, quæ si suboriretur, valet ea impedire. Hinc fit, quod si ignorantia illius causæ non dedisset causam contractui, sed fuisset concomitans, nempe quod

(a) *Suppl. q. 43. a. 3. ad 3.* — (b) *L. 6. n. 863.* — (c) *n. 864 et 869.*

quòd si fuisset cognita, etiam contracta fuissent sponsalia, tunc non possunt dissolvi; ità *Sanch. Ronc. Castrop. Salm.* et alii communiter (a). Sed hic quæritur, an superveniente alterutro sponzorū pingui hæreditate, possit ille recedere à sponsalibus? Affirmant *Hurtad. Trull. Leand.* etc. dicendo, tunc notabiliter mutari sponzorū conditionem. Sed alii communissimè, ut *Sanc. Boss. Comit. Castrop. Escob. Concina, Ronc.* etc. id negant, quia tunc ille jam non deceptus est in conditione alterius partis, in quā nulla accedit mutatio. Quare dicit *Croix*, quòd si sponsus inveniret sponsam melioris conditionis, non potest primam derelinquere; sed in hoc casu, quo conditio esset longè melior, ego non auderem, meliore advertentiā salvā, damnare sponsum, si vellet ducere secundam; quia magni lucri amissio æquivalet magno damno, ut dictum est *Tom. I. Tract. VI. n. 22.* et ità invenio dixisse multos Theologos in Vitā S. Joannis à Capistrano *Cap. 9.*

20. — VI. Ob *Discessum alterius partis in Regionem longinquam*; Undè fit quòd si sponsus aliò domicilium suum transferret, aut in locum longinquum proficisceretur, licèt cum animo redeundi, sponsa liberatur à promissione, et potest nubere cui velit, ut exprimitur in *Cap. De illis 3. De sponsal.* ubi dicitur: *Qui præstito juramento promittunt se aliquas mulieres ducturos, et postea eis incognitis, dimittunt terram, se ad partes alias transferentes, liberum erit mulieribus se ad alia vota transferre.* Sed si sponsus ad vicinas partes se animo redeundi transferret; tunc sponsa aut expectare debet regressum, aut debet requirere sponsum ut redeat; et si ille prosequatur absentiam, aut expectare debet usquè ad competens tempus ad prudentis arbitrium, aut (ut meliùs dicunt alii) adeatur Judex, ut præfigatur terminus (b). Hoc currit cùm in sponsalibus terminus non præfixus fuit; quia si jam fuit appositus, observetur quòd infrà dicitur.

---

(a) n. 865. v. *Ad videndum.* — (b) n. 866.  
*Tom. II.*

21. — VII. Ob *Termini præfixi lapsum*, hoc nihilominus intelligitur cum tempus est appositum ad solvendam obligationem; et tunc libera restat pars innocens, licet promississet sponsalia juramento, ut dicunt omnes cum *S. Thomâ (a)*, et est expressum in *Cap. Sicut 22. de spons.* ubi Papa damnavit sponsum, qui sponsalibus initis cum unâ, contraxerat cum aliâ; *Nisi* (addidit tamen) *terminum præfixit, et per eum non stetit, quin ad statutum terminum Matrimonium consummaverit.* Igitur, si per ipsum non stetisset, justè recessisset (b). Et hoc currit etiamsi terminus elapsus fuisset defectu alterius partis, sed inculpabiliter, ut communiter, et probabilius contendunt *Laym. Castrop. Nav. Conin. Conc. Salm. Ronc.* (contrà *Bonac. Ponc. Vivam, Sanch.* etc.); et hoc deducitur perspicuè ex eodem textu citato (c). An autem elapso termino liberetur etiam qui culpâ suâ distulit nuptias; affirmant *Ronc. et Conc.* et hæc opinio videtur non posse dici improbabilis, nam eam expressè tenet *S. Thomâs (d)*, dicens: *Si per eum stetit, debet agere pœnitentiam de peccato factæ promissionis, et contrahere (potest) cum aliâ, si vult.* Sed attentâ ratione, et communiori sententia *Poncii, Sanch. Laym. Navar. Castrop. Conin. Salmant. Palud.* etc., mihi videtur valdè probabilior opposita, quia nemo debet commodum ex suâ culpâ reportare. Ceterum, si ex utriusque partis culpâ steterit, quin Matrimonium contractum fuisset, certum est elapso termino utraque liberari (e).

22. — VIII. Ob *Professionem Religiosam aut ob Ordinis Sacri Susceptionem* certè solvuntur sponsalia, etsi juramento firmata (f). Quæritur autem 1. An ob ingressum in Religionem remaneat libera tam pars quæ ingreditur, quàm altera? Affirmant *Busemb. Sanch. Bon. Tbl.* etc. Sed ego puto absolutè probabiliorē oppositam, quæ est communior, cum *Laym. Spor. Ponc. Castrop. Croix, Conin. Viva, Gonet*;

---

(a) in 4. *D. 27. q. 2. a. 3. ad 2.* — (b) *L. 6. n. 867.* — (c) *n. 868.*  
 — (d) in 4. *D. 27. q. 2. a. 3. ad 3.* — (e) *num. 868. D. 3.*  
 — (f) *num 869.*



*Salm.* et aliis pluribus, liberam remanere tantum partem quæ in sæculo remanet, dum altera Religionem ingrediens videtur suo juri cessisse; secus autem pars ingrediens; illa enim ingrediendo non fit inhabilis ad contrahendum Matrimonium. Opinio autem illorum quod utraque pars libera restet, non videtur satis probabilis (a).

23. — Quæritur 2. An cum sponsalia sunt jurata, teneatur sponsus, antequam Religionem ingrediatur, Matrimonium contrahere? Dicunt *Sotus, Nav. Led.* etc. illum teneri nuptias contrahere, sed antè Matrimonii consummationem posse, si velit, Religionem ingredi. Sed sententia opposita est communior, et verior *Ponc. Sanch. Petrocor. Castr. Bonac. Holzm. Spor. Salm.* etc., quia juramentum semper intelligitur factum sub conditione, nisi eligatur status perfectior. In unico casu tantum tenenda est prima sententia, cum Matrimonii celebratio necessaria esset ad legitimandam prolem jam conceptam; aut ad reparandum scandalum, aut infamiam sponsæ. Et tunc non permetteretur sponso Religionem ingredi relicto Matrimonio rato, ut advertit *Busemb.* (b). Quod confirmatur ex eo quod dictum fuit *Tom. 1. Tract. X. n. 97.* ubi diximus, quod si sponsus, etiamsi castitatem vovisset (aut Religionem, ut dicunt DD. ibi citati) et postea sponsam deflorasset sub promissione (licet factâ) Matrimonii, tenetur procurare dispensationem voti, ut Matrimonium ad effectum adducat. Si autem sponsus post sponsalia, sed defloratione remotâ, voveret Religionem ingredi, procul dubio tenetur ad votum, et non obligatur sponsalibus; nisi cum è Religione egrederetur. Sed si votum esset etiam profitendi, tunc certè utraque pars libera remanet, quia tunc qui vovet, fit omnino inhabilis ad Matrimonium, ut pro certo affirmant *Salmant. Viva*, etc. (c).

24. — Quæritur 3. An peccet sponsus Sacris si initiatur Ordinibus, sponsâ insciâ, aut non consentiente? Certum est Ordinatum à sponsalibus li-

---

(a) n. 870. v. *Hinc.* — (b) *Ibid.* D. 2. — (c) n. 873.

berum esse ex *Extrav. Antiquæ de Voto*. Dubium in hoc versatur, an peccet graviter; alii affirmant, quia tantum, ut in Religionem se recipiat, permis- sum est jure Canonico (uti volunt) à sponsalibus divertere, non verò ut statum amplectatur Eccle- siasticum. Hoc non obstante valde probabilis est sententia opposita *Ponc. Nav. Conin. Bonac. Gutt. Sot. Sil. Salm. Escob. Henrig.* etc. ex ratione su- periùs allatâ, quia in sponsaliorum promissione semper subauditur conditio, modò non eligatur status perfectior (a). Si autem sponsus Minoribus tantum Ordinibus initiaretur, non potest sponsa propter hoc deslectere, juxta sententiam commu- nioem, et verioem *Sanch. Ponc. Palud. Wigandt, Salm.* (quicquid dicant *Ronc. et Spor.*) dùm Or- dines Minores non impediunt Matrimonium, cum etiam dentur Clerici conjugati (b).

25. — Quæritur 4. An votum castitatis, aut Sacris Ordinibus initiandi sit validum, et dirimat spon- salia etiam quoad voventem? Dico *voventem*, quia altera pars procul dubio liberatur. Dico votum *post sponsalia*, quia si ipsum antecederet fuerit emissum, sponsalia sunt irrita, cum irrita sit pro- missio rei illicitæ. Dubium igitur in hoc restrin- gitur, quid si votum sponsalia subsequatur? Alii dicunt probabiliter fuisse nullum quia in tertii præ- judicium emissum; ita *Laym. Nav. Castrop. Ca- bass. Ronc.* etc. Sed alii communius, ut *Ponc. Pe- trocor. Suar. Gonet. Coninc. Sot. Azor. Bon.* vo- lunt esse validum: Et probabile dicunt ipsi AA. citati *Laym. Sanch. Castrop. Cabass. et Salm.* cum *S. Thomâ* (c) qui dicit: *Per votum simplex sunt sponsalia dirimenda*. Ratio Angelici est, quia ubi concurrunt duæ obligationes, præferenda est po- tior; sed ratio communior aliorum est superius re- lata, nempe quòd sponsalia promissa esse intelli- guntur semper sub conditione, nisi status melior eligatur. Quòd circà adest etiam quædam decisio S. C. Conc. apud *Pitonnium* (d) sub die 5. Martii

(a) num. 871. — (b) num. 872. — (c) *Suppl. q. 53. a. 1. ad 1.*  
— (d) *de matrim. n. 2513.*

1701, ubi dicitur votum castitatis, aut suscipiendi ordines sacros, irritare sponsalia etiam jurata. Addunt *Bonac. et Sanch.* voventem solutum remanere à sponsalibus, licet postea voti dispensationem impetraverit, et hoc non omninò est improbabile, sed probabilius mihi videtur oppositum cum *Rebell. Aver. et Salm.* quia prior obligatio non penitus extinguitur, sed suspenditur, donec votum servatur (a).

26. — Quæritur 5. An ad sponsalia dirimenda semper intercedere debeat Judicis auctoritas? Respondetur negativè, cum sponsalia fuerint publica, et causa etiam est publica, et certa; idem dicendum si sponsalia fuerint occulta, et causa est occulta. Secus verò, si causa non est certa, sed est dubia sive juris, sive facti, quia tunc omninò intercedenda est Judicis auctoritas; ita communiter *Sanchez, Castrop. Holzm. Gut.* etc. Cum verò sponsalia sunt publica, et causa est occulta, tunc si causa non potest probari in Judicio, non requiritur Judex, sed cum jam probari potest, requiritur, sed non sub gravi, nisi esset ad evitandum grave scandalum, ut dicunt DD. citati cum *Nav. Ponc.* et aliis communiter. Cum autem defectus posset probari, sed esset occultus, debet pars innoeans alteram admonere; et tunc si illa non quiescit, ut sponsalia solvantur, tunc poterit licite defectum ad Judicem deferre; *Laym. Ponc. Sanch. Castrop. Conin.* etc. (b).

27. — Quæritur 6. Quænam probatio requiritur ad solvenda sponsalia? Respondetur, si causa est circa aliquod impedimentum (sive sit dirimens, sive impediens) tunc sufficit quilibet testis juratus, modò sit occultatus, ut habetur in *Cap. Super eo de Test. et attest.* et hoc valet, licet ille sit criminossus, et non citatus, sed tantum productus à parte; et etiam si deponeret in secreto, tacito suo nomine, ut dicunt *Sanch. Castrop. Salm. Coninc. Holzm. Viva, Croix, Gutt.* etc. (c). Si causa verò non fuerit impedimentum, sed alia sufficiens

---

(a) num. 873. *Dub. I.* — (b) n. 878. *Dub. 1.* — (c) *Ibid. D. 2.*

### 318 *Tract. 18. De Sacramento Matrimonii.*

ad efficiendum, ut alter sponsorum possit à sponsalibus desciscere, tunc, ut dicunt communius *Sanch. Laym. Castrop. Salm. Coninc.* etc. requiruntur duo testes. In *Cap. In omni, de Test.* requiruntur duo testes jurati, ubi agitur de damno tertii. Nihilominus probabiliter tenent *Palud. Aver. Salm. et Trull.* sufficere etiam unum testem fide dignum, in casu quo ipse testaretur sponsæ fornicationem. Ceterum hoc currit quoad forum, sed in conscientia communis est sententia sufficere unum tantum testem pro omnibus casibus; *Sanch. Castrop. Croix, Con. Salm.* etc.

## CAPUT II.

### *De Matrimonio.*

#### PUNCTUM I.

#### De Materia, formâ, et Ministro Matrimonii.

*Quænam sit materia, forma, et quinam sit Minister 28. Illationes. An sponsi possint simulare. De Matrimonio clandestinis. An, cum convalidantur, requiratur præsentia Parochi etc. 29. De finibus Matrimonii 30. An sufficiat consensus per signa. 31. De Matrimonio per procuratorem, aut epistolam 32. De consensu conditionato 33. An adimpletâ conditione, novo opus sit consensu 34.*

28. — **C**OMMUNIS inter DD. est sententia Ministros Matrimonii esse ipsos contrahentes. Materia est mutua traditio juris quod alter in alterius acquirit corpus, per verba aut signa consensum exprimentia. Forma autem est mutua acceptatio iisdem verbis aut signis expressa. Sed huic adversantur *Canus, Juvenin, Conc. et Tournely*, dicentes Ministrum

---

(a) *Ibid. v. Si verò.*

Matrimonii esse Sacerdotem assistantem, et formam esse verba, *Ego vos in Matrimonium conjungo etc.* Sed nostram sententiam tenent *Bellarmin.* qui eam vocat communem in Scholis ( ut eam appellat etiam idem *Canus* ), *Gonet*, *Frassen*, *Cabass. Ronc. Abel. Wigandt*, *Van-Espen*, *Pontas*, *Petroc. Benedic. XIV. Fagnanus*, qui oppositam vocat periculosam in fide, *Merbes.* qui asserit oppositam nunquam fuisse probabilem, et *Henriq. Manuel*, *Sotus* vocant eam temerariam. Pro nostrâ sententiâ etiam stant *Scot.* et *S. Thomas (a)*. Et quòd ipsi sponsi, non autem Sacerdos, sint Ministri Matrimonii, probatur 1. ex Conc. Florentino, ubi dicitur causa efficiens Matrimonii esse mutuus consensus sponsorum; ergò ipsi sunt Ministri. 2. Probatur ex Trident. sess. 24. c. 1. ubi Matrimonia sinè Parochi præsentiâ dicuntur olim fuisse rata, nempe indissolubilia; contrâ probatur aliundè ex cap. *Quanto, de Divort.* quòd Matrimonia fidelium ideò sunt rata, quia sunt Sacramentum: *Etsi Matrimonium ( sunt verba textûs ) infidelium verum existat, non tamen est ratum. Inter fideles autem verum et ratum existit, quia Sacramentum Fidei ( nempe Baptismus ) quod semel est admissum, nunquam admittitur, sed ratum efficit conjugii Sacramentum, ut ipsum in conjugibus illo durante perduret.* Igitur Baptismus, non Parochus efficiebat tunc ratum Sacramentum Matrimonii, adèd ut esset indissolubile, sicut indissolubilis est Baptismi character. Hoc argumentum valdè exaltat *Benedictus XIV. (b)*. 3. Probatur ex eo quòd verba, *Ego vos conjungo etc.* ut testantur *Martene*, et *Simonetus* apud *Bened.* olim non dicebantur, sed alia; idque probant ex pluribus antiquis Ritualibus. Si autem verba prolata à Sacerdote fuissent forma Sacramenti, uti autumant adversarii, illa semper eadem, vel saltem æquivalentia esse debebant. Adde quòd Tridentinum permittit Parochus posse uti etiam aliis verbis, juxta receptum uniuscujusque Provinciæ ri-

---

(a) *Scot. in 4. d. 26. q. 4. n. 14. et S. Th. in 4. d. 26. q. 1. a. 1. ad 1. et d. 28. q. 1. ad 3.* — (b) *Bened. XIV. de Syn. l. 8. c. 13. num. 4.*

*tum. 4. Probatur ex eodem Concilio loc. cit. ubi dicitur ità : Qui aliter quàm præsente Parocho . . . contrahere attentabunt , inhabiles reddit , et hujusmodi contractus irritos et nullos esse decernit. Igitur non est nullum Matrimonium , si fiat coram Parocho , licèt ille taceat ; sed tantùm cùm fit illò absente ; itàque ejus verba , quæ adversarii supponunt esse formam , non sunt necessaria et per consequens non est Minister Matrimonii Sacerdos (a). His tamen non obstantibus oppositam sententiam , nimirum Parochum esse Ministrum Matrimonii , quam tenent *Guillelmus Paris. Canus , Toletus , Maldonatus , Estius , Juveninus , Tournely , et Collet* ejus *Continuator , Natalis Alexand. Conc.* et alii , territus ab auctoritate tantorum virorum non audeo improbabilem dicere , tantò magis quòd *Benedictus XIV. in Opere de Synodo (b)* eam valdè probabilem vocat.*

29. — Ceterum exprimâ nostrâ sententiâ , quam saltem probabiliorem censemus , infertur 1. quòd Parochus assistendo Matrimonio publicorum peccatorum non peccat uti minister , sed tantùm uti cooperator sacrilegii eorum , uti diximus *Tract. XIV. n. 6.* Infertur 2. quòd sponsi qui in mortali Matrimonium contrahunt , duo committunt sacrilegia , unum quia Sacramentum suscipiunt , alterum quia in peccato ministrant , licèt hoc secundum probabiliter non sit grave , quia sponsi non sunt ministri consecrati ad hoc Sacramentum , uti volunt *Concina , Tournely , Gonet , et alii cum S. Thomâ (c)* ; quamquàm loco citato oppositum sustinuimus. An autem sponsa possit contrahere licitè cum publico peccatore ? vide dicta *Tract. XIV. n. 6. (d)*. An autem possit simulare celebrationem nuptiarum , justâ intercedente causâ , v. g. si aliquod interesset impedimentum dirimens , et non posset sinè gravi damno hujusmodi simulationem omittere ? negat *P. Milante* , sed affirmant communiter *Sanch. Castropal. Conc. Card. Coninc. Viva , Croix , Henrig.* etc. dicunt enim cùm tunc non adsit contractus defectu consensûs ,

---

(a) *Lib. 6. ex num. 897.* — (b) *Bened. XIV. loc. cit. num. 5.*  
 — (c) *Vide lib. 6. n. 32.* — (d) *L. 6. n. 55. v. Si autem.*

nec Sacramentum intercedit, nec propterea Sacramenti simulatio (a). Infertur 3. quod sponsi debent esse in gratiâ, etiam cum per procuratorem contrahunt, quia cum sint veri contractus, sunt vera Sacramenta; *Bellarmin. Sanch. Navarr. Sot. etc.* (b). Infertur 4. quod Matrimonia clandestina, nempe celebrata coram Parocho repugnante assistere, et dare Benedictionem, sunt graviter illicita, sed sunt valida, et vera Sacramenta. Hinc refert *P. Ferrariæ Biblioth. verb. Matrim. pag. 24. n. 3*, pluries declarasse S. C. sufficere ad valorem Sacramenti præsentiam Parochi nulla verba dicentis. Idcirco animadvertendum, quod Matrimonia celebrata coram Parocho, tunc tantum sunt nulla, cum Parochus adfuisset quidem, sed nihil audivisset, aut percipisset, modò ille ex industriâ non affectasset non percipere; ita decrevit S. C. Conc. ubi dictum fuit: *Matrimonium non valere si non intellexisset, nisi ipse Parochus affectasset non intelligere*. Infertur 5. quod Parochus assistendo Matrimonio in mortali, non peccat graviter, quia nec conficit, nec ministrat Sacramentum, *Sanch. Bonac. Suar. Coninc. Reg. etc.* Advertendum tamen quod si ille omittit pronunciare Benedictionem, *Ego conjungo vos*, etc. peccat mortaliter, ut vult sententia probabilior cum *Barbosa, Rebell. Henriq. etc.* quia omittit cærimoniam gravem Ecclesiæ. Infertur 6. quod Matrimonia celebrata coram Parocho, et duobus testibus cum occulto impedimento, obtentâ dispensatione, convalidantur, et vera Sacramenta fiunt solo consensu de novo à sponsis præstito (à quo tamen potest dispensare Papa, vide num 82.); nec requiritur Parochi præsentia; ita communiter *Navarrus, Fagn. Nat. de Alex. Hab. Tournely, Sanch. Card. Sot. Lamb. Salm. Van-Espen*, et alii (contra *Comit. et Conc.*) et ita declaravit S. C. et ita est praxis S. Pœnitentiariæ ex oraculo S. Pii V. qui eâ consultus (ut refert *Cardenas*,) declaravit non opus esse Parocho, et testibus, cum Matrimonium jam semel palàm initum est; et reverà S. Pœnitentia in con-

(a) num. 62. — (b) num. 884.

### 322 Tract. 18. De Sacramento Matrimonii.

cedendâ dispensatione dicit : *Ut uterque inter se secretè contrahere valeant* (a). Et hoc argumentum, ut ait Benedictus XIV. loco citat. valdè probat Ministrum Matrimonii non esse Sacerdotem, sed ipsos sponsores; aliàs rectè dicit, quòd Ecclesia, nisi id haberet pro certo, numquàm permetteret sponsores relinqui in periculo, quòd remaneant sinè gratiâ Sacramenti. Adest tamen Decretum S. C. sub die 8. Junii anni 1619. apud *Ferrar. Bibliot. tom. 5. v. Matrimonium n. 19.* quòd si Matrimonium esset nullum ex causâ publicâ, scilicet ob defectum ætatis, tunc reconvolandum est antè Parochum et testes.

30. — Hic plura notanda sunt. Notandum 1. quoad honestatem finium Matrimonii, duos esse fines intrinsecos, et essentielles, mutuam corporum traditionem, et vinculum indissolubile, quicumque contraheret hos fines excludendo, nempe aut animo non reddendi debitum, aut contrahendi ad tempus, Matrimonium esset nullum (b). An autem peccet venialiter qui Matrimonium contraheret principaliter in concupiscentiæ remedium affirmant *Bossius, Navar. Conin.* etc. cum *S. Thomâ* (c). Sed probabiliter negant *Castrop. Ponc. Ronc. Cajet. Croix, Conc. Holzm.* et alii multi, qui innituntur eo quod dixit Apostolus: *Propter fornicationem unusquisque uxorem suam habeat.* 1. Cor. 7. 2. sicut explicant *Estius, Salm. et Corneltus*, cum *S. Joanne Chrysost.* illud propter fornicationem, non intelligitur ad evitandam fornicationem alterius conjugis, sed propriam. Et hoc probatur ex eo, quod dicit *cap. 7.* idem Apostolus: *Bonum est homini mulierem non tangere; propter fornicationem autem unusquisque suam uxorem habeat.* En vide quòd prius suadeat cœlibatum, sed postea in remedium incontinentiæ hortatur ad duccendam uxorem; igitur loquitur ibi de incontinentiâ propriâ; et deinde subjungit: *Quòd si non se continent, nubant; melius est enim nubere, quam uri* (d). Et ità probabilius etiam dicunt *Ponc. Castrop. Cajet. Coninc. Salm.* etc. culpâ vacare matrimonium

---

(a) num. 1110. — (b) num. 882. — (c) *Suppl. q. 49. a. 3. ad 2.*  
 — (d) *L. 6. n. 882. v. D. 1.*



contrahi principaliter ob aliquem finem accidentaliter extrinsecum, v. gr. ad conservandum familiæ decus, ad conciliandam duarum familiarum pacem etc. (a). Si quis autem contraheret animo se obligandi, sed postea negandi debitum, aut vitandi prolis procreationem, peccaret graviter, sed valide contraheret; modò ta is intentio non deducatur in pactum, sicut contractum fuit Matrimonium inter B. Virginem, et S. Josephum (b).

31. — Notandum 2. quoad contrahentium consensum, non esse de Matrimonii valore verba, sed satis esse signa exprimentia, ut certum est ex *cap. Tuæ Fraternitatis 25. de Sponsal. (c)*. Et satis sufficiens signum esset, si mulier, expresso jam viri consensu, manum ei extenderet; secùs autem si tantùm eam non retraheret, postea quàm sponsus illius manum apprehendit. Sicut nec sufficit annuli donatio, nec conductio sponsæ in viri domum, nisi esset quia ob loci consuetudinem hujusmodi signa consensum expriment; ita *Sanch. Punc. Salm. et alii communiter (d)*. Dicimus autem venialiter peccare, qui solis signis vellet exprimere suum consensum, et nollet uti verbis, nisi verecundia excusaret (e).

32. — Notandum 3. quòd cùm per procuratorem celebratur Matrimonium, si fortè mandans revocaret consensum (licèt internè) antequàm contrahatur, Matrimonium esset nullum. Sed quæritur an esset validum cùm mandans, dùm mandatum dedit, animum contrahendi non habuisset, sed tempore contractûs consensum præstitisset? Alii dicunt Matrimonium non valere, quia tale mandatum, quod nullum fuit cùm datum est, non potest postea consensu interno reconvallidari; ita *Castrop. et Coninc.* Hanc sententiam non puto improbabilem: sed opposita est communior *Sanch. Bon. Ronc. Salm. e'c.* et est etiam probabilior, quia procurator contrahendo non exprimit voluntatem præteritam mandantis, sed præsentem ad tempus contractûs, quæ jam adest (f). Ad hoc autem, ut procurator validè

(a) n. 883. — (b) n. 881. ad 5. et n. 882. in fin. — (c) n. 887. — (d) n. 889. — (e) n. 888. — (f) n. 886.

contrahat, multa requiruntur. 1. Ut illud sit mandatum speciale. 2. Ut persona; cum quâ contrahendum est, sit determinata. 3. Ut procurator contrahat per se (non per alios) coram Parocho, et testibus, illis mandatum exprimendo; quod sufficit si oretenùs sit datum, ut dicunt *Castropal. Sanch. Salmant. Guttier.* etc. 4. Ut procurator non excedat condiciones in mandato appositas, v. g. temporis, dotis, etc. secùs Matrimonium est nullum. Sed si ille contraheret sinè Episcopi licentiâ, aut sinè proclamationibus, Matrimonium esset validum; ità communiter DD. (a). In hujusmodi nuptiis Parochus interrogare debet procuratorem; *Vis in uxorem Titiam nomine N. N.?* et postea 'ad mulierem: *Vis in virum N. N. medio præsente procuratore?* Potest etiam Matrimonium contrahi per epistolam, et sic fiet: sponsus scribit ad sponsam quòd ipse in virum ei se tradit, et ex tunc eam in sponsam acceptat. Sponso idem rescribit viro; et hæc responsio legitur coram Parocho, et testibus. Cæterùm satis est etiam, ut vir scribat mulieri modo relato, et sponsa, quin sponso rescribat, litteras coram Parocho et testibus aperiât, et suum præbeat consensum; ità *Sanch. Villal. Dian. Salm.* etc. (b).

33. — Notandum 4. quòd cùm consensus est conditionatus, si conditio est de *præteritis* aut de *præsenti*; et conditio jam verificata est, aut verificetur, tunc jam sufficit talis consensus ad contrahendum. Pariter sufficit si conditio esset de *futuro*, sed de futuro necessario, v. gr. *Si pater tuus morietur*: ità omnes cum *S. Thomâ*: modò ex hoc non intelligatur suspendi consensus usquè ad patris mortem; *Ronc. Salmant Conc.* etc. Sed si conditio est de futuro contingenti, iterùm distinguendum est: si conditio esset turpis, aut contrà substantiam Matrimonii, v. g. contrà Sacramentum, contrà fidem conjugalem, aut prolem: si dicatur, v. g. *Te volo, si prolis generationem vitabis*; aut *si adulterium committes*; aut si dicat: *Te duco usquedum uxorem te meliorem inveniam*; tunc Matrimonium est

---

(a) n. 889. — (b) *Ibid. in fin.*

nullum. Si autem conditio est turpis alio modo, aut si est impossibilis, tunc habetur pro non adjectâ, et Matrimonium est validum, *cap. fin. de Condit. app.* ubi dicitur: *Si conditiones contra substantiam conjugii inserantur (juxtâ exempla superius allata) matrimonialis contractus caret effectu; licet aliæ conditiones, si turpes, aut impossibiles fuerint, debeant pro non adjectis haberi.* Et ratio est, quia tunc præsumitur datus consensus, non obstante conditione appositâ. Sed si unquam sponsi verè non intenderent consentire sinè tali conditione, Matrimonium etiam esset invalidum. Cæterum in dubio debet judicari in favorem illius, ut docet *Sanch. Ponc. Ronc. Holzm. etc. ex cap. fin. de Sent. et re judic. (a).*

34. — Contrà si conditio de futuro esset honesta, tunc matrimonialis contractus nullus foret, sed tantum sponsalitiis. Sed hic quæritur an, adimpletâ conditione, requiratur novus consensus pro Matrimonio? Alii affirmant, ut *Suar. Ponc. Sol. Concina, Gonet*, et alii, quibus favet *S. Thomas (b)*, qui dicit: *Aut (conditio) est contingens, ut acceptatio parentum, et tunc non facit Matrimonium.* Ratio hujus sententiæ est, quia Matrimonium non solum est contractus, sed etiam est Sacramentum cujus valor non potest pendere ab effectu futuro. Alii tamen negant, ut *Laym. Bonac. Cast. Salm. Ronch. Salmant. Coninc. etc.* quia Matrimonium, licet sit etiam Sacramentum, habet tamen rationem contractûs, et ad hujus rationis normam ejus valor dirigitur. Hæc secunda sententiâ videtur probabilior, sed quia prima est etiam fundata, in præxi expedit eam sequi. Et idem dicendum in casu quo sponsi aliquo impedimento præpediantur; et ipsi contraxissent sub conditione, *Si obtinebitur dispensatio*; et hoc ita declaratum fuit à Sacra Congregat. (c) Advertendum hic tamen, quod conditio suspendit Matrimonium, quod non suspendit demonstratio, aut causa, aut modus appositus. *Demonstratio* est cum dicitur: *Duco te, quæ es virgo,*

---

(a) *L. 6. n. 890. et 891* — (b) *Suppl. q. 47. a. 5.* — (c) *Vide P. Zach. Adnot. ad Croix l. 6. p. 3. n. 83.*

## 326 *Tract. 18. De Sacramento Matrimonii.*

*nobilis* etc. *Causa* cùm dicit : *Duco te quia es virgo*; modus est cùm dicit : *Duco te ut mihi in ancillam famuleris*. Et hic modus non suspendit, licet sit de modo impossibili, aut turpi; ita *Sanch. Salm.* et *Viva*, quia consensus non dependet à modo, uti dependet à conditione. Addit *P. Viva* cum *Castrop.* licet modus sit contra substantiam Matrimonii, v. g. *Te duco ut adulteres*, etc. Sed probabilius contradicunt *Sanch.* et *Salm.* quia reverà non videtur habere animum contrahendi, qui habet intentionem omninò oppositam contractui (a). Si verò apponitur dies, v. g. *Te duco post 10. dies*, probabilius et communiùs dicunt *Viva*, *Coninc. Perez*, *Salm.* etc. (contra *Sanch.*) quòd intelligitur suspensus cònsensus, usquè ad terminum appositum (b).

## PUNCTUM II.

### De usu licito Matrimonii.

*Usus conjugii est illicitus. I. Si Matrimonium est nullum. II. Si est dubium : An liceat contrahere cum dubio impeditenti 35. An liceat petere, aut reddere urgente dubio. 36. Quid si Nuptiæ fuerint contractæ cum dubio. 37. III. Si adsit periculum sanitatis 38. IV. Si ob solam voluptatem, etc. V. Si mente adulterà, etc. VI. Si modo indebito 39. Si conjux se retrahat à seminatione 40. VII. Si in loco indebito. VIII. Si tempore indebito, scilicet prægnationis. Si conjux sit impeditus ob votum, aut incestum 41. An tactus, et delectationes morosæ conjugibus permittantur 42.*

35. — **U**sus Matrimonii per se loquendo licitus est, sed ob plures causas quandoque fit illicitus, et I. Si Matrimonium est certè nullum, quo casu nunquàm licet parti id scienti nec petere, nec red-

---

(a) *L. 6. n. 896.* — (b) *Ibid. v. Utrum.*

dere debitum alteri ignoranti (a). II. Si Matrimonium est dubium. Sed hìc dubitatur 1. An liceat inire Matrimonium cum dubio impedimenti? Communiter docent DD. *Sanch Suar Castrop. Carden. Croix, Boss. Halzm. Viva etc.* quòd post adhibitam diligentiam, licet contrahere Matrimonium cum opinione probabili de carentiâ impedimenti. Nec obstat quòd in confectione Sacramentorum non est licitum uti opinione probabili: nam in Sacramento Matrimonii, ut diximus *Tom. I. Tract. I. n. 27.* et tradunt AA. communiter, stante opinione probabili, ex inveteratâ consuetudine censetur Ecclesia dispensare in impedimento, si fortè adsit (b). Attamen notandum 1. quòd id currit, si opinio est probabilis de jure (nempè ex auctoritate DD.), non autem tantùm de facto, ut ajunt *Card. Viva, Croix, Aversa, etc.* contrà *Bon. et Tamb.*, quia probabilitas facti non constituit veram probabilitatem, sed tantùm conjecturam, quâ non licet uti ad contrahendum Matrimonium; nisi pro carentiâ impedimenti talis fortè urgeret præsumptio, quæ certitudinem quamdam moralem exhiberet (c). Notandum. 2. id procedere tantùm in impedimentis de jure Ecclesiastico, non autem in aliis de jure naturali, in quibus Ecclesia nequit dispensare, undè si dubium sit de morte prioris conjugis, illicitum est novum inire conjugium, nisi de illius morte certè moraliter constet, ut habetur ex *c. Dominus de secund. nupt.* Tantùm excipitur aliquis rarissimus casus, in quo Pontifex, tanquàm Divinæ Legis interpres, ob urgentissimam causam declaret Matrimonium, non obstante tali dubio, posse contrahi, prout refert *Cardenàs Urbanum VIII.* in quodam casu declarasse (d). An autem in impedimentis de jure Ecclesiastico, quandò dubia sunt, possit Episcopus dispensare? Plures graves DD. communissimè, et probabiliter id admittunt, *Castr. Cabass. Barb. Roncagl. Holzm. Bon. Salm. et Elb.* juxta dicenda *Tom. III. Tract. XX. de Privil. num. 57. (e).*

---

(a) *L. 6. n. 900.* — (b) *Ibid. n. 901.* — (c) *n. 902. Qu. III.* — (d) *L. 6. n. 902. Qu. II.* — (e) *cit. n. 902. v. Cæterum.*

36. — Dubitatur 2. Quandonam, inito jam Matrimonio, et urgente dubio de ipsius valore, liceat petere, aut reddere? Manente dubio, conjux dubitans ne potest quidem petere antè diligentiam adhibitam ad dubium vincendum; sed tenetur reddere alteri petenti in bonâ fide, ut patet ex cit. *cap. Dominus, sed secund. nupt. (n)*. Ratio, quia alter adhuc possidet jus petendi: intellige verò post bimestre ab inito conjugio, et modò ipse non sit à petendo impeditus ob incestus, vel adulterii crimen *(b)*. Diximus, antè diligentiam, quia si dubitans contraxit in bonâ fide, et post diligentiam non potuit dubium vincere, probabilissimum et communissimum est posse etiam petere, ob possessionem petendi jam acquisitam, *Sotus, Wigandt, Hab. Castr. Suarez, Less. Lugo, Laym. Ronc. Sanch. Salm. etc.* (contrà *Navar. et. Conc.*) Quapropter, tradunt *Sanch. Anacl. Carden. Henriq. et alii*, quòd conjux ille post diligentiam licitè potest petere, semper ac certus non sit de impedimento, non obstante quacumque probabilitate in contrarium *(c)*.

37. — Dubitatur 3. Quid si Matrimonium sit contractum cum dubiâ fide; an tunc conjux dubitans possit post diligentiam adhibitam petere, adhuc dubio perseverante? Alii negant, quia non licet uti re quæ incœpta est possideri cum dubiâ fide; et hæc sententia est quidem communior cum *Sanch. Castr. Salm. Ronc. etc.* Attamen *Holzm. et Elbel* non improbabiliter id affirmant, quia tametsi dubitans nequeat deponere dubium ex titulo possessionis, potest tamen ex alio principio, nempe quod in dubio standum est pro valore actûs, præsertim Matrimonii, in cujus favorem in foro tam externo, quàm interno semper in dubio judicandum. Excipitur tamen casus, quo dubium adsit de morte prioris conjugis, ut vidimus ex cit. *cap. Dominus*. Dico *dubium*, nam si habeatur firma probabilitas de valore Matrimonii, tunc communiter docent DD. *Sanch. Bon. Boss. Ronc. Salm. Spor. Croix, etc.* tali dubitanti licitum esse post diligentiam non so-

---

(a) n. 903. — (b) n. 905. *in fin.* — (c) n. 904. *et* 905.

hunc reddere, sed etiam petere, cum textus præfatus in casu dubii, non autem probabilitatis, loquatur; et cum probabiliter dubitatur de vitâ prioris conjugis, probabiliter dubitatur etiam de ipsius conjugis possessione (a). Quando autem debeat quis vel non dubitare de valore Matrimonii; tres dantur regulæ: Prima, quod coniux ordinariè loquendo non tenetur credere alteri asserenti fictè consensisse, licet asserat eum juramento, *Bonac. Sanch. Sotus, Salm. etc. ex c. Cum à nobis, de Testib.* Secunda, quod si quis audiat adesse impedimentum à personis non fide dignis, vel ex famâ à nullo auctore certo exortâ, nec tenetur credere. Tertia, quod si audiat à fide digno, aut per famam ex certo auctore, tenetur veritatem inquirere, et interim abstinere à nuptiis, aut à petendo; sed tenetur reddere, si unus tantum adsit testis; ut *Nav. Silv. Salm. etc. (b)*. Cæterum in dubio semper judicandum pro Matrimonio, *Sanch. Pontius*, et alii communiter (c).

38. — III. Non est licitus usus Matrimonii, si adsit grave periculum sanitatis, nec obsit periculum incontinentiæ. Probabiliter autem licet, si morbus sit diuturnus, ut lepra, phthisis, morbus gallicus, et similia; modò non sit talis, ut proximè tendat ad mortem; et modò adsit aliqua justa causa, itâ *Sanch. Cajet. Ponc. Laym. Boss. Bus. Bon. etc.* Cæterum tali morbo laborans tenetur illum manifestare alteri nescienti, si petat, et etiamsi velit reddere; nam si nolit, potest licitè debitum negare, cum non teneatur morbum suum, (v. g. gallicum) cum suâ infamiâ patefacere, ut *Tamb. cum Soto. (d)*. Non licet petere statim à balneo, vel à sectione venæ, aut cum feбри; *Sanc. Bonac. Boss. etc.* Licet verò petere ab uxore quæ laborat seminis fluxu, seu gonorrhæâ, si fluxus sit perpetuus; secus si sit maleficus, et non adsit in alterutro proximum periculum incontinentiæ (e). Coitus post prandium probabiliter non affert grave damnum; qua-

---

(a) num. 106. — (b) num. 908. — (c) num. 907. — (d) n. 909. — (e) n. 910.

propter tunc uxor non excusatur à reddendo, dùm tenetur reddere etiam cum modico incommodo (a). An autem licitus sit usus tempore lactationis? Negat *Poncius*, si prudens sit timor de gravi nocumento prolis; sed admittit *Sanch.* (b). An tempore menstrui? Licet, si menstruus sit extraordinarius, et diuturnus; non verò si naturalis, sed tunc probabilius non erit nisi venialiter illicitus, ut communissimè *S. Antonin. Nav. Conc. Ponc. Sanch.* Et idem dicitur de usu in purgatione puerperæ; modò non fiat eâdem die, vel sequenti partûs (c).

39. — IV. Usus est illicitus (sed non plus quàm venialiter) si adhibeatur ob solam voluptatem, nisi voluptas intendatur ad bonum generationis, vel ut reddatur vir aptus ad reddendum, ut rectè ajunt *Croix et Viva* (d). V. si exerceatur mente adulterâ. Se excitare ad usum respiciendo ad imagines sacras, gravis esset irreverentia. Periculosum autem se delectando de pulchritudine alterius personæ, et maxime de coitu alieno inter quasdam cognitatas personas (e). VI. Si fiat modo indebito, nempe extra vas naturale, quod sinè dubio erit mortale, et gravius si in vase præpostero, etiamsi ibi tantum copula inchoetur, ut veriùs dicendum cum *Sanch. Pont. Castrop. Bon. Tamb. Spor. Boss.* et communi, contrà *Navar. et Ang.* (f). Vel si fiat in vase naturali, sed indebito modo, sivè situ, prout stando, sedendo, vel more pecudum, aut viro succumbente. Hoc tamen est tantum veniale juxtà communem DD. sententiam. *S. Antonini, Nav. Petrocor. Alb. M. Gers. Cajet. Soti, Castrop. Sanch. Tol. Ronc. Salm. Croix* etc. ex *D. Thomâ*, quia mutatio sitûs minimè impedit generationem, dùm matrix foeminæ ex se attrahit semen viri. Adduntque AA. citati cum *Concina* id nullum esse peccatum, si fiat ex aliquâ justâ causâ (g). An autem sit mortale mutare situm, si propter id casu aliquid seminis effunditur? affirmant *Salmanticenses*, sed communius ne-

---

(a) *Ibid. v. Videtur.* — (b) *L. 6. n. 911.* — (c) *num. 925.* — (d) *n. 912.* — (e) *n. 913. et 914.* — (f) *L. 6. n. 916.* — (g) *n. 917.*



gant *Sanch. Pont. Castr. Boss. Perez, Hutard. et Aversa* (a).

40. — Hic autem dubitatur 1. An peccent graviter conjuges, si coëptâ copulâ se retrahunt à seminatione? Negant communiter *Sanch. S. Antonin. Laym. Pont. Cajet. Less. Salm.* etc. si hoc fiat ex consensu, et sinè effundendi seminis periculo: quod tamen, ut ait *Sanchez*, ordinariè adest (b). Si autem uxor jam seminarit, vel proxima sit ad seminandum, graviter quidem peccat vir se retrahens; nisi fortè faciat ad vitandam mortem, aut scandalum aliorum; iidem AA. etiam communiter (c). Si tamen contrà vir seminavit, alii ut *Sanch. Pont. Salm.* etc. excusant à mortali uxorem, si se retrahat. Alii verò, ut *D. Bonav. Cajet. Abul. Major, Aversa, Hurtad.* etc. non excusant, dicentes cum *Suarez* semen mulieris simpliciter esse necessarium ad generationem; Et quoniam horum opinio satis videtur probabilis, hæc sequenda est, cum non liceat sequi oppositam cum probabili damno prolis, sivè generationis (d). Dubitatur 2. An viro se retrahente, liceat uxori statim post seminationem viri tactibus se excitare, ut seminet? Negant *Diana, et Rodriquez*. Sed communissimè affirmant *Wigandt, Less. Sanchez, Bonac. Filiuc. Salm. Spor. Boss. Elbel*, et alii plures, nec reprobant *P. Concina*; idque ob eandem rationem mox suprâ allatam, quia semen mulieris est necessarium, vel saltem valdè confert ad generationem; nihil enim in naturâ frustraneum (e).

41. — VII. Si usus habeatur in loco indebito, puta publico, vel sacro. An autem copula conjugalis etiam occulta vetita sit in Ecclesiâ? Vide dicta *Tom. 1. Tract. IX. de sexto Præcepto n. 21. VIII.* Si habeatur tempore indebito. Plura hîc notanda; 1. Petere antè Communionem est veniale (nisi petatur ad incontinentiam vitandam); nullum verò peccatum reddere, aut petere post communionem; vide dicta *Tract. XV. n. 57.* Pariter nequaquam

(a) *Ibid. v. Dicunt.* — (b) n. 918. — (c) *Ibid. v. Si verò.* — (d) *Lib. 6. n. 9: 8. v. Si autem.* — (e) num. 919.

peccant conjuges, ut communiter DD. dicunt, si reddant in diebus festivis; et etiam si petant, communius docent *S. Bonav. Sotus, Cajet. Pont., Sanchez, Azor. Castr. Bonac. Salmant. Valent. Conin.* etc. quia nullo jure id vetatur, et si aliquis SS. Patrum videtur id vetare, eloquitur de consilio, non de præcepto, ut probat *Sanchez (a)*. Saltem, ut ait Benedict. XIV. *de Synodo*, si olim id erat de præcepto, nunc certè non est nisi de consilio. 2. Tempore prægnationis usus, ut communiter docetur, non est nisi veniale (modo absit abortus periculum, quod ordinariè non adest); et nullum, si periculum adsit incontinentiæ, vel alia justa causa (*b*). 3. Conjux prohibitus à petendo ob votum, aut impedimentum affinitatis post Matrimonium ab eo contractum, potest, imò tenetur reddere, si alter sit in periculo incontinentiæ, vel si interpretativè petat, nempe quando *mulier* (ait *D. Thomas*) *verecunda est* (particulari modo quàm aliæ mulieres), et *vir sentit ejus voluntatem de debiti redditione*; et ità communiter alii. Præterea, si ipse impeditus (intellige ratione affinitatis tantum, non autem voti) sit in proximo periculo incontinentiæ, et periculum sit in morâ, potest etiam petere, ità *Viguer. et Quintanad.* Et quidem probabiliter si dispensatio brevi obtineri nequeat (*c*). 4. Certè licet conjugum petere ab altero excommunicato; et juxtâ veriorē sententiam id licet etiam excommunicato, si existat in periculo incontinentiæ; ità *Suar. Bon. Sanch. Boss. etc.* communiter (*d*).

42. — Quæres hîc, an tactus, delectationes morosæ conjugibus permittantur? Resp. 1. Tactus etiam impudici, si ad copulam ordinantur, sinè dubio conjugibus permittuntur; si verò, non ordinantur, ut communiter et verius docent *Sotus, Caj. Tok. Vasq. Less. Laym. Sanch. Castrop. Abul. Armil. Bon. Salm. Conc. Sa, etc.* (contrà quosdam) sunt tantum veniales, quia status conjugalis excusat eos

---

(a) num. 923. — (b) num. 924. — (c) Lib. 6. num. 930. — (d) n. 931.

à mortali (a). Excipe nisi conjux petens sit ligatus voto castitatis ; vel nisi prævideatur pollutio (quamvis involuntaria) in se, vel in altero, ut ajunt, *Sotus, Castrop. Cajet. Boss. Salm. etc.* Tunc tantum autem poterit petens excusari, si tactum impudicum habeat, ut se aptet ad copulam, secluso periculo consensûs in pollutionem ; ità *Sanch. Filliuc. Spor. Escob. Elbel, etc.* Et si periculum proximi pollutionis sit ex tactu pudico, tactus neque potest adhiberi, etiam secluso periculo consensûs, nisi fiat ex gravi causâ, putà ad fovendum mutuum amorem etc. Hoc de petente ; sed reddens in hujusmodi tactibus videtur semper excusari, cum alter habeat jus ad illos, nisi adeò sint impudici, ut videantur quasi inchoata pollutio ; (b) vide dicenda in *Puncto seq. n. 48.* Resp. 2. Probabilius peccat graviter conjux seipsum turpiter tangens ob delectationem, tum propter periculum pollutionis, tum quia conjuges nullum habent jus ad seipsos tangendos, nisi tantum ad se aptandos ad copulam ; ità *Laym. Diana, Spor. Salmant. etc.* contrà *Sanch. Castrop. Boss. etc.* (c). Resp. 3. Quoad delectationes, hortandi sunt conjuges, ut abstineant à delectatione morosâ de copulâ habitâ vel habendâ, si alter absit ; sed non damnandi de mortali, ut communius dicunt *Sanch. S. Antonin. Bonac. Suar. Gers. Cajet. Fill. Croix etc.* cum *D. Thomâ (d)*. Excipe nisi delectatio habeatur cum aliquâ, non solum carnali, sed etiam venereâ voluptate (e).

---

(a) n. 933. — (b) n. 934. — (c) *Lib. 6. n. 936.* — (d) *De Malo q. 15. a. 2. ad 17.* — (e) *Vide n. 937.*

## PUNCTUM III.

## De usu præcepto Matrimonii.

*Quando conjux tenetur petere 43. Si neget semel aut bis 44. Si plures nascuntur filii 45. Si alter petat in mortali 46. Si velit vir seminare extra vas 47. Si petat cum veniali 48. Si petat amens, vel ebrius. De impedimento petendi ob incestum. Si immineat damnum sanitatis, aut prolis 49. Si conjux cohibeat seminationem. Si uxor surgit, aut mingit. An puella oppressa possit semen expellere. Si senex sæpè effundit extra vas 50. De cohabitatione, et de alimentis uxori debitis 51.*

43. — **D**ISTINGUERE hìc oportet petitionem à redditione. In quantum ad petitionem spectat, per se loquendo, neuter conjugum tenetur petere, nisi prævideat in se, vel in altero periculum incontinentiæ. Sufficit tamen ut uxor tacitè petat, ut vir teneatur ad eam accedere; ita omnes cum *D. Thomà* (a) qui ait: *Quando vir percipit per aliqua signa, quodd vellet debitum, tenetur reddere.* Contra verò dicunt *Sanch. Sot.* etc. ex eod. *D. Thomà*, uxorem non teneri còpulam præstare, nisi vir expressè petat. Excipe 1. cum *Sanch. S. Antonin. Nav.* etc. si potius erubescencia esset ex parte viri, putà si mulier esset feræ conditionis, vel magnæ auctoritatis (b). Excipe 2. si vir esset in periculo incontinentiæ, ut diximus; sed quia tunc probabilius, juxtà *Sanch. Coninch. Palud.* etc. ex solâ caritate uxor petere teneretur, facilè posset excusari, si in petendo magnam pateretur verecundiam (c).

44. — In quantum autem ad redditionem, conjux negans alteri debitum ordinariè graviter peccat. Sed dubitatur 1. An sit mortale, semel vel bis debitum negare? Si alter remissè petat, vel facilè ce-

---

(a) 3. p. q. 44. a. 2. — (b) *Lib. 6. n. 928.* — (c) *n. 929.*

dat precibus negantis, ex communi sententiâ non est mortale (et ne veniale quidem, si adsit causa), nisi alter sit in periculo incontinentiæ, nec contrâ adsit gravis causa negandi. Si tamen ille seriò et instanter petat, *Castr. Tamb. Boss. Croix*, etc. putant gravem esse materiam, nisi petat immoderatè, puta quater in eâdem nocte. Alii verò levem, ut *Pontius, Sanch. Sa, Bonac. Hurtad. Ledesm.* etc. et non videtur omninò improbable, si alter non sit in periculo incontinentiæ. Sic etiam *Pontius, Sanch.* et alii communissimè excusant à mortali conjugem qui differt reddere à die ad noctem, vel à nocte ad manè (a).

45. — Dubitatur 2. An sit causa justa negandi debitum, si plures nascentur filii quàm ali possint? Alii negant, *Laym. Ronc. et Spor.*, quia procreatio prolis spectat ad præcipuum finem conjugii. Affirmant verò *Sanchez, Pontius, Bonac. Bossius*, etc. quia in omnibus debitis magna difficultas excusat à solutione. Excipiunt tamen nisi in petente sit periculum incontinentiæ; hinc quia periculum hoc vix poterit abesse, primæ sententiæ magis puto adhærendum (b).

46. — Dubitatur 3. An conjux tenetur, aut possit reddere alteri petenti cum peccato gravi. Hic distinguendum. Si culpa se tenet ex parte actûs, putà si vir petat in loco sacro, vel cum periculo abortûs, scandali, aut sanitatis alterutrius, tenetur uxor negare sub gravi; tunc enim vir non habet jus ad petendum; ità communiter *Sanch. Pont. Conc. Bonac. Salm.* etc. cum *D. Thomâ* (c). Si verò culpa se tenet ex parte petentis, putà si habeat votum, aut petat ob pravum finem, prima sententia cum *Pon. La-Croix*, et aliis paucis tenet non licere ei reddere, nisi sit in potestate petentis se à culpâ eximere, putà si peteret ob voluptatè, aut alium malum finem. Sed communis et probabilior sententia cum *Suar. Lugo, Tourn. Conc. Laym. Bonac. Salm. Castr.* etc. docet posse et teneri ad reddendum, quia vovens retinet jus ad peten-

(a) *Lib. 6. n. 940.* — (b) *n. 941.* — (c) *n. 943. v. Certum.*

dum (a). Tenetur tamen reddens, ut advertunt *Sanch. Boss. Coninch.* etc. ex caritate alterum monere ut desistat; at si desistere nolit, expedit ut ipse petitionem anticipet; sed meritò ait *Sanch.* uxores ad id rarò teneri (b). Si verò petat conjux incestuosus qui jam privatus est jure petendi, alter non tenetur quidem, sed bene potest ei reddere, cum ipsi semper competat jus tam petendi quàm reddendi; ità *Sanch. Castr. Bonac. Laym. S. Anton. Salm.* etc. (c).

47. — Dubitatur 4. An liceat uxori petere vel reddere viro volenti seminare extrà vas post copulam inceptam? Alii negant, quia tenetur impedire peccatum viri. Alii affirmant, quia ipsa dat operam rei licitæ. Sed puto distinguendum inter petitionem, et redditionem: In reddendo, etsi probabile est cum *Ronc. et Elbel*, quòd uxor possit negare debitum, et etiam teneatur, si potest sinè suo gravi incommodo juxtà primam sententiam; quia vir, cum sit abusurus re debità, non habet jus ad illam; tamen probabilius est cum *Sanchez*, quòd post monitionem teneatur reddere, cum culpa se teneat non ex parte actûs, sed personæ, ut suprà mox diximus. In petendo verò, dicimus cum *Ronc. et Elbel*, uxorem non posse petere ab hujusmodi viro, quia tenetur ex caritate illius peccatum impedire. Excipe nisi gravem haberet causam petendi, nempe si esset in periculo incontinentiæ, vel si alioquin perpetuò abstinere debèret à suo jure petendi; caritas enim cum tanto onere non obligat; undè non videtur teneri ad abstinendum, nisi per paucas vices (d); vide dicta in simili casu *Tom. I. Tract. IV. n. 28.*

48. — Dubitatur 5. An conjux teneatur reddere petenti cum culpâ veniali? Alii affirmant, alii negant; sed pariter ut suprà distinguendum puto: Si copula est illicita ex parte petentis, nempe si petat ob voluptatem, vel manè antè Communionem, tenetur alter reddere. Si vero ex parte actûs, putà si  
petit

---

(a) n. 944. — (b) *Lib. 6. n. 944.* — (c) n. 945. — (d) n. 947.

petit situ innaturali, vel tempore menstrui, aut puerperii, etc. tunc alter potest quidem reddere, si aliqua adsit causa, v. g. ne incurrat illius indignationem; non tamen tenetur, nisi petens justam habeat causam petendi tali modo, aut tempore (a).

49. — Deinde plura hîc sunt notanda. Notandum 1. quòd juxtà communissimam sententiam non est obligatiò reddendi debitum amentibus, vel ebriis, cùm hi sint incapaces jure dominii, excipe nisi sint in periculo prodigendi semen, vel si non sint universè amentes, aut omninò ebrii; ità probabilius *Sanch. Castrop. Bonac. Conc. Layman, Soto, Croix, Busemb. Con.* etc. contrà *Navarr. et Sylv.* Ceterum communiter admittitur posse istis reddi, si absit periculum scandalì, aut abortûs, putà cùm uxor esset furiosa (b). Notandum 2. quòd si vir rem habuit cum consanguineâ alterius in primo vel secundo gradu, tenetur reddere, sed amittit ipse jus petendi ex *cap. Si quis, De eo qui cogn.* etc. et sic contrà (c). Ut autem quis contrahat hoc impedimentum petendi, requiritur, ut sciat legem, non tantum divinam, sed etiam Ecclesiasticam vetantem incestum: et probabiliter, ut sciat etiam hujusmodi pœnam, ut dicunt *Bon. Wigandt, Castrop. Boss. Elb. Con. Sanch. Laym.* etc. (d). Notandum 3. quòd si conjux timeat damnum tantum leve sanitatis ex redditione, tenetur reddere; et hoc est certum apud omnes. Si verò timet grave damnum, nec tenetur, nec potest, nisi ipse vel petens sit in proximo periculo incontinentiæ; aut nisi aliàs magna formidet dissidia, modò morbus quo inficiari veretur, non sit proximè tendens ad mortem; ità *Pontius, Sanch. Laym.* et alii passim. Dixi potest, sed non tenetur, quia caritas eo casu excusat si reddat, sed non obligat (e). Solum autem periculum prolis nascituræ, nempe quòd ex tali coitu defectuosa nascatur, non excusat ab obligatione

---

(a) *Ibid.* n. 946. — (b) n. 948. — (c) n. 949. et 1070. — (d) n. 1074. — (e) *Lib. 6. n. 950.*

reddendi, ut veriùs docet *D. Thomas* (a) cum aliis, quia (ut ait) *melius est proli sic esse, quàm penitus non esse* (b). Notandum 4. quòd non tenetur conjux reddere, si laborat febri; *Bon. Sanch. Per. Bus.* etc. (c). Neque uxor si experta sit non posse parere sinè mortis periculo, ut communiter docetur (d). An autem possit reddere, si experta sit filios parere mortuos? Affirmat, *Layman*, sed communiùs negant *Bonac. Bossius, Rodriq. Victor*, etc. nisi adsit periculum incontinentiæ, ut addunt *Bon. et Sanchez*: quòd periculum (ait *Sanchez*) maximè aderit, si ob hanc causam perpetuò deberent abstinere conjuges ab usu Matrimonii (-).

5o. — Notandum 5. peccare mortaliter conjugem, si cohibeat seminationem, altero seminante: vel si post suam seminationem se retrahat, antequàm alter seminet, quia hoc modo impeditur generatio. Tantùm poterit permitti copulam interrumpere, cùm immineat scandalum aliorum, aut mortis periculum (f); vide dicta num. 4o. Sic pariter peccat uxor si statim post copulam surgit, aut mingit, animo impediendi generationem, nisi hoc faciat ut suprà ad scandalum, aut mortem vitandam. Dixi *statim*, quia non tenetur diù immota manere; ità *Sanch. Pont. Salm. Bonac. Boss.* etc. contrà *Tambur.* (g). Puella autem oppressa extrà Matrimonium non potest sinè peccato semen viri expellere, postquàm illud jam recepit in matricem; tantùm ipsa poterit impedire ne immitatur ut rectiùs *Pontius, Tamb. Escob. et Leander* (contrà *Sanchez, et Boss.*); quia numquàm potest semen receptum in matricem ejici sinè injurià generationi humanæ (h). An autem liceat viro copulari, si ob senectutem, aut aliam infirmitatem sæpè extrà vas semen effundat? Licet, ut dicunt communissimè *Sanch. Laym. Bonac. Bossius, La-Croix*, etc. semper ac adest probabilis spes effundendi intrà, quia tunc adhuc possidet jus ad copulam (i).

---

(a) in 4. *D. 32. q. un. a. 1. ad 4.* — (b) n. 951. — (c) n. 952. — (d) n. 953. — (e) *ibid.* — (f) n. 918. et 954. — (g) n. 954. v. *Dicunt* — (h) *Lib. 6. n. 954. Dub. hic. 1.* — (i) *ibid. d. 2.*



51. — Notandum 6. quòd conjuges ratione debiti reddendi tenentur cohabitare, non solùm quoad domum, sed etiam quoad torum; nisi separentur ex consensu, absitque tunc periculum incontinentiæ, et damnum educationis. Vir autem licitè potest suscipere aliquam brevem peregrinationem ex causâ devotionis, vel aliâ honestâ, etiam invitâ uxore: sed non uxor, invito viro. Potest imò vir etiam diù abesse, si id oporteat ad bonum publicum, vel familiæ, ità communiter *Sanch. Castrop. Boss. Laym.* etc. Dicit autem *Boss.* cum *Tolet. Sayro*, quòd vir tenetur tunc secum ducere uxorem, si commodè possit (a). Quandò verò uxor teneatur sequi virum, et vir eam ducere, vide *dica de quarto Præcepto Tom. 1. Tr. VII. n. 13.* Notandum 7. quòd ob dotem non solutam nequit vir negare debitum, aut cohabitationem; sed non tenetur uxorem alere, si dos non solvatur culpâ promittentis (et idem currit si uxor renuat cohabitare) nisi nulla extiterit promissio facta dotis; vel nisi uxor non habeat undè ali, et sinè suâ culpâ dos non solvatur, aut nisi omittat cohabitare absquè suâ culpâ (b). Casu verò quo vir deprehenderit uxorem fuisse adulteratam, benè poterit ei alimenta denegare, modò negare possit sinè illius infamiâ, putà si crimen jam est notorium; ità communius et probabiliùs *Sanch. Soto, Salm. Trull.* etc. Idem dicunt *Salm.* cum aliis, si uxor admiserit oscula ab alio notoria, et etiam occulta, si fuerint nimis lasciva, vel si ipsa sit nobilis (c).

---

(a) n. 939. — (b) num. 939. dub. 1. et 2. (c) *Ibid.* dub. 3.

## PUNCTUM IV.

De impedimentis impedientibus.

*Quænam sint impedimenta 52. I. Vetitum. II. Tempus feriarum. An tempore feriarum vetetur consummatio. De benedictione Sacerdotis. III. Catechismus IV. Crimen. V. Sponsalia 53. VI. Votum. An Episcopus possit dispensare à voto castitatis 54. De clandestinitate, et proclamationibus 55. De obligatione denunciandi impedimenta, et quandò denunciatio impedit 56. An sufficiat fama. Si sponsi interrogati etc. Si Parochus sciat impedimentum 57. Quandonam Episcopus possit et debeat dispensare à proclamationibus 58. An possit Vicarius, aut Parochus dispensare aut declarare 59.*

52. — **D**uo sunt impedimentorum Matrimonii genera, altera impedientia, nempe quæ reddunt illud illicitum, aut impediunt illius usum. Altera dirimentia, quæ illud reddunt omninò nullum; et est certum, imò de fide est utraque impedimenta posse ab Ecclesiâ constitui, prout declaravit Trident. *Sess. 24. Can. 4.* quia licet Ecclesia non possit irrita reddere Sacramenta, cum debita existunt requisita, nihilominus, quia Sacramentum Matrimonii subsistit in contractu, ideòque benè potest Ecclesia, iustis existentibus causis, invalidare contractum, et cum desit contractus, nec Sacramentum adesse potest (a). In *Punct.* sequenti loquemur de impedimentis dirimentibus, in hoc agemus de impedientibus dumtaxat. Præter peccatum mortale, et excommunicationem, quæ reddunt Matrimonium

---

(a) *Lib. 6. n. 979.*

**Cap. 2. Punct. 4. De impedimentis impedi. 341**

illicitum, adsunt sex alia impedimenta, quæ his comprehenduntur versibus :

53. — I. *Ecclesiæ vetitum*, II. *nec non tempus feriarum*,

III. *Atque Catechismus*, IV. *Crimen*, V. *Sponsalia*, VI. *Votum*

*Impediunt fieri, permittunt facta teneri.*

I. *Vetitum*, nempe Episcopi, aut Parochi prohibitio, ob dubium, an fortè adsit impedimentum, aut inhabilitas ad contrahendum (a). II. *Tempus feriarum*. Feriæ sunt ab Adventu ad Epiphaniam, et à die Cinerum ad octavam Paschæ. Sed hìc advertendum, quòd talibus temporibus vetatur benedicere nuptiis, instruere convivium solemniora, non quidem Matrimonium contrahere, nec sponsam in domum conducere, si hoc fiat sinè solemnitate, nec prohibitum est Matrimonium consummare, ut rectè dicunt *Bellarmin. Sanch. Ponc.* et fusè id confirmat *Lambertini*, qui postea *Benedictus XIV.* (b), cum *Pignatelli. Fill. Croix*, etc. ac cum *Declarat. S. C.* dicens Canones allatos à Canonistis esse de consilio, non de præcepto (c). Et licèt dicant aliqui peccari (sed tantum venialiter, ut communiter dicunt *Sanch. Boss. Sol. Sa, Escob.* etc. (d), contra *Concinam*, qui contendit esse mortale) omninò omittere benedictionem quæ datur à Parocho, aut à Sacerdote de ejus licentiâ in Missâ pro hac re peculiariter designatâ pro primis Nuptiis, nam secundæ non benedicuntur, ut præcepit *Benedict. XIV.* in Bullâ *Etsi Pastoralis*, §. 8. n. 4. editâ anno 1742. nihilominus communiùs et probabiliùs dicunt *Navar. Ponc. Laym. Sanch. Bellarm. Castrop. Salm. Viva* etc. cum *Lambert.* loco cit. Matrimonium consummare antè benedictionem omni culpâ vacare, et probatur ex Trident. *Sess. 24. cap. 1.* et ex Rituali, ubi hoc non solùm insinuat, sed etiam præcipitur, et clariùs ex *Can. Nostrates*, 30. qu. 5. ubi dicitur : *Sicque demum benedictionem, et velamen*

---

(a) n. 982. — (b) *Notif.* 89. n. 17. — (c) *L'ib.* 6. n. 984. — (d) n. 988. v. *Secundum.*

*cæleste suscipiunt; peccatum autem esse, si hæc cuncta in nuptiali fœdere non interveniant, non dicimus* (a). III. *Catechismus*. Quid Catechismi nomine veniat, alii dicunt esse fidei professionem, quæ nomine baptizandi fit, alii aliter explicant. Cæterum hoc impedimentum cessavit per Tridentinum, ut dicunt *Sanch. Coninch. Castrop. Salm.* etc. cum quâdam Declaratione S. C. (b). IV. *Crimen*; sub hoc nomine olim comprehendebantur quædam delicta, nempe incestus cum propriâ matre, raptus alienæ sponsæ; etc.; sed hoc impedimentum etiam desuetudine exolevit (c). V. *Sponsalia*, nempe sponsalia cum aliâ personâ inita, sed non dissoluta, de quibus jam *Puncto* antecedenti sermo factus est.

54. — VI. *Votum*, nempe simplex castitatis, aut Religionis, aut non nubendi. Hic notandum est quod Episcopus antè nuptias contrahendas non potest dispensare in voto castitatis (cùm votum est absolutum; secùs si est pœnale, aut conditionatum, juxtà dicta *Tom. I. Tract. V. n. 49.*); excepto, si non dispensaretur, adesset periculum incontinentiæ, aut alterius damni gravis ob moram, nec posset citiùs adire Papam, ut dicunt communiter *Sanch. Suar. Less. Nav. Sot. Silv. Salm.* etc. (d), reservationes etiam ad ædificationem, non ad destructionem institutæ sunt. Initis autem nuptiis, benè potest dispensare Episcopus (et ut dicunt *Salm.* etiam Vicarius Generalis, ex concessione generali, quæ ei collata est omnium casuum Episcopaliū) in voto castitatis post Matrimonium edito, aut etiam antè illud, ut communiùs et probabiliùs dicunt *Sotus, Sanchez, S. Anton. Conc. Nav.* etc. ex *S. Thomâ* (e). Et eâdem facultate fruuntur etiam Mendicantes, ut communiter dicunt *Castrop. Wigandt, Sanch. Suar. Tourn. Salmant.* etc. vigore suorum privilegiorum (f). Votum tamen castitatis à conjugibus emissum communi consensu solus Pontifex potest dispensare, ut dicunt cum communiore *Sanch. Spor.*

---

(a) n. 984. dub. 2. — (b) n. 985. — (c) *Ibid.* — (d) n. 987. dub. 3. — (e) n. 987. dub. 2. — (f) *Ibid. v. An autem.*

*Anacl.* etc. apud *Ferraris* (a). Ceterum Episcopus, exceptis voto castitatis, et sponsalibus cum aliâ personâ initis, potest dispensare in omnibus impedimentis impediētibz, et in omnibus aliis, quæ post Matrimonium suboriuntur; *Custrop. Bon. Salmant. Croix*, etc.

55. — Præter allata adest impedimentum clandestinitatis, nempe cum Matrimonium sit prætermisissis tribus proclamationibus præscriptis à Trident. *sess. 24. cap. 5.* Hæc ut fiant modo debito, oportet 1. ut fiant à proprio Parocho, aut ab alio Sacerdote de ejus licentiâ. (b) 2. Ut fiant in Ecclesiâ populo ad Divina congregato, ut præscribit Tridentinum; licet probabiliter dicant *Sanch. Barbosa, et Ronc.* posse eas fieri etiam tempore Concionis aut Processionis; imò admittunt etiam *Wigandt, Sanch. Laym. Barbos. Boss. Escob. Fill.* etc. (contrà *Pont.* et alios) extrâ Ecclesiam in loco magni concursus, quia sic jam finis Concilii obtinetur (c). 3. Ut fiant in loco originis, ut pluries declaravit S. C. (d). Unde si sponsi sunt diversarum Parochiarum, oportet in utrâque Ecclesiâ fiant proclamationes; nisi esset (ut dicunt *Laym. Boss. Salm.* etc.) quod Parochiæ essent inter se valde propinquæ. Et in casu quo alter sponsorum per breve tempus actualiter alibi moraretur, non satis est, quod ibi fiant proclamationes, sed oportet ut illæ fiant ibi etiam undè profectus est, ut valde probabiliter dicunt (contrà *Pontium*) *Sanchez, Coninch. Barbos. Ronc.* et cum Declarat. S. C. Præterea notandum hic, quod si alter sponsorum est externus, Parochus non debet ad proclamationes procedere, nisi prius coram ordinario fide autenticâ de ejus statu libero constiterit, ut habeat ex instructione S. C. (e). 4. Tres præfatæ proclamationes debent fieri tribus diebus festivis continuis, ut dicit Trident. *sess. 24. Cap. 1.* non autem immediatis, ut dicunt *Sanch Ronc. Pont.* etc. licet etiam probabiliter teneant *Trull. Salm. Hurtad. Regin.* etc. nihil

---

(a) *Ferr. Bibl. v. Debitum conjug. n. 4.* — (b) *Ibid. dub. 3. in fin.* — (c) *Lib. 6. n. 991.* (d) *Ut refert. Zach. Annot. ad Croix l. 6. p. 3. n. 477.* — (e) *Lib. 6. n. 991. dub. 3.*

obstare esse immediatos, dum Concilium aliud non præscribit, quàm *tribus diebus festivis*, et non addit ne sint immediati. Permittit etiam *Salm.* cum *Aver.* et aliis posse fieri proclamationes tribus diebus festivis non continuis, modò non intercedant plures dies festivi, sed hoc rectè *Sanch. Castrop. Bonac. Escob.* etc. non excusant saltem à culpâ veniali (a). Hic advertendum, quòd si factis proclamationibus, Matrimonium non celebratur intrà duos menses; præcipit Rituale (*tit. de Sacr. Matr.*) ut illæ denuò fiant, modò aliud Episcopo non videatur.

56. — Itaque proclamationibus jam absolutis, quæritur, an quilibet impedimenti conscius, teneatur ad illud denunciandum, licèt illud non posset probare? Negant *Ponti Diana* etc. Sed sententia verior, et communissima affirmat cum *Sanch. Cast. Coninc. Escob. Laym. Bon. Barb.* etc. et ut probatur ex *cap. 12. De sponsal.* et ex *cap. 22. de Testib.* ubi dicitur: *Matre asseverante ipsos esse consanguineos, non debent conjungi.* Et ità sufficit ad impediendas nuptias fama impedimenti, licèt illud sciret sub secreto naturali, etiam cum juramento, ut dicunt *Sanch. Escob. Boss. Barb. Salmant.* etc. cum *S. Thomà* (b), qui docet secreti juramentum non obligare, ubi agitur de impediendo damno communi, aut tertii (c). Hoc tamen intelligatur quoties denunciatio potest commodè fieri, quia contra non tenetur testis denunciare cum gravi suo damno, aut cum gravi aliorum scandalo (d). Intelligitur item, factâ monitione, quia antequàm Episcopo, aut Parocho impedimentum deferat, tenetur sponso admonere (si admonitio est profutura) ut ab hujusmodi Matrimonio desistant (e). Ad hoc autem, ut Matrimonium impediatur ob testis denunciationem, requiritur 1. ut ille non solum denunciet, sed etiam deponat impedimentum, licèt ceteroquin spontè ad deponendum se offerat, ut dicunt *Sanch. Boss. Gutt.* etc. modò ille non probasset famam impedimenti, quia tunc sufficit ut

---

(a) n. 992. — (b) 2. 2. q. 70. a. 1. ad 1. — (c) L. 6. n. 964. v. *Certum.* — (d) n. 995. in fin. — (e) n. 994.

*Cap. 2. Punct. 4. De Impedimentis imped. 545*

denunciet, ut habetur ex *Cap. Non in duo, de sponsal.* 2. Requiritur ut deponat, aut denunciet cum juramento. 3. Ex certâ sententiâ, non autem auditu, excepto si impedimentum esset consanguinitatis, aut affinitatis, quia tunc sufficit, si illud sciverit à personis certis, et fide dignis. 4. Requiritur ut testis non sit vilis conditionis, modò factum non sit adeò occultum, ut probari non possit aliter; nam ubi deficit potentia probandi, admittitur etiam probatio, quæ ex se non esset sufficiens; ita communiter DD. (a).

57. — Præterea super hanc materiâ multa advertenda sunt. Advertendum 1. quòd fama impedimenti sufficit ad impediendas nuptias, ut superius dictum est; sed hoc non currit cum consanguinei sponsorum, ut dicunt *Sanch. Castrop. Guttier. etc. ex C. Cum in tua, de spons.* aut ipsi sponsi, ut addit *Sanch.* jurarent non adesse impedimentum (b). Advertendum 2. quòd contrahentes cum sunt legitimè interrogati, tenentur aut fateri impedimentum, aut à nuptiis abstinere, licet impedimentum non sit probatum; nisi tamen occultè obtinuissent dispensationem; tunc enim non tenentur patefacere impedimentum, cum illud non sit aliundè probatum; ita *Silv. Laym. Sanch. Ronc. Boss.* et alii communiter (c). Advertendum 3. quòd Parochus, Episcopus, aut alius Judex, si ipse tantum habuisset notitiam impedimenti, modò id non sciat sub sigillo Confessionis, tenetur impedire Matrimonium. Nec obstat dicere quòd peccatori occulto non potest negari Sacramentum, cum ille publicè petit; hoc enim currit cum aliud non evenit malum, quàm sacrilega perceptio Sacramenti; secùs autem cum interveniunt alia gravia damna, quæ plerumque accidunt ex Matrimoniiis invalidis; ita rectè docent *Sanch. Castr. Boss. Coninc. Ronc. Escob. etc. contra Poncium* (d). Et hic advertendum Parochum teneri sub gravi, cum aliquod celebrandum est Matrimonium, investiga-

---

(a) n. 997. — (b) *L.* 6, n. 999. — (c) *num.* 1000. — (d) *L.* 6. *num.* 1002.

re diligenter utrùm aliquod subsit impedimentum (a).

58. — Advertendum 4. quod Episcopus, juxta Trident. *Sess. 24. c. 1*, potest ex tribus duas proclamationes dispensare, ut unica tantum, et etiam ut nulla fiat, cum justa intervenit causa, ut cum suspicio probabilis habetur Matrimonium malitiosè impediri, ut dicitur in textu Concilii; et etiam ob alias causas, ut dicunt *Sanch. Barbos. Ponc. Cabass. Bonac. Boss. Salm.* etc., nimirum si nuptiæ celebrandæ essent inter primarios homines, aut inter senes, aut inter personas valdè dispares conditione, ætate, divitiis, aut aliâ qualitate: aut si moraliter certum esset nullum subesse impedimentum: aliter Episcopus, si dispensat, semper se certum saltem aliundè facere debet impedimentum non adesse (b). Et cum dispensatio necessaria esset ad evitandum grave damnum spirituale aut temporale, aut ad auferendum aliquod impedimentum alicujus notabilis boni, etiam privati, tunc (ut dicunt *Ronc. Sanch. Barb. Castrop. Bonac. Filliuc. Boss. Conin.* etc.) Episcopus tenetur ad dispensandum, ut esset 1. si probabilis timor haberetur, ne Matrimonium injustè impediretur. 2. Si Matrimonium necessarium esset ad evitandam infamiam sponsi, aut prolis, verb. gr. præcessisset defloratio, et sponsus jamjam moriturus esset, aut discessurus in longinquam Regionem, aut timeretur ne mutaret voluntatem. 3. Si parentes cogerent filium ad ducendam indignam. 4. Si timeretur aliquod periculum spirituale aut temporale. 5. Si immineret tempus Adventûs, aut Quadragesimæ, ut addit *Roncaglia*, et ita pariter ob quamcumque aliam rationabilem causam, juxta prudentum judicium (c). Dicit tamen *Boss.* (d) quòd si fortè Episcopus his stantibus causis injustè negaret dispensationem, ipsi recurrere debent ad Judicem superiorem; non possunt tamen contrahere, nisi cum periculum esset in morâ, et ad superiorem adeundi non suppeteret facultas. Ad-

---

(a) n. 54 v. *Certum.* — (b) n. 100. — (c) n. 1006. — (d) *Boss. tom. 1. c. 7. n. 34, de Matr.*



*Cap. 2. Punct. 4. De Impedimentis imped. 347*

vertendum hìc ex Concilio præcipi quòd cùm dispensetur proclamationibus , *antè consummationem fiant denuntiationes in Ecclesià , nisi Ordinarius judicaverit , ut remittantur.* Insuper advertendum id quòd mandat observari Bened. XIV. in Bullà *Nimiam licentiam* ( edità 18. Maji 1743. ) ubi vetat, ne Episcopi aliì Sacerdoti quàm Parocho licentiam assistendi Matrimoniiis dent, nec dispensent denuntiationibus, nisi *urgente legitimà , gravissimà et ineluctabili* causà, cùm apertissimè intelligant ex Trident. facultatem effrænata[m] ac immoderatam dispensandi sibi non adesse. Et ne committant facultatem contrahendi coràm alio Sacerdote, quàm Parocho, priùs quàm ex diligentissimis adhibitis sibi tutò constiterit nullum interponi impedimentum.

59. — Quæritur hìc tandem, an Vicarius Generalis, et etiam Parochus possint denuntiationibus dispensare? Quoad Vicarium Generalem probabilius est, quòd possit, dùm ipse cum Episcopo unum efficit tribunal; ità communissimè *Sanch. Castr. Bon. Wig. Elbel, Barb. Nav. Ronc. Fill.* contrà *Pontium*, et *Dianam* (a). Parochus contrà non potest, quia ille nullà potitur jurisdictione. Undè si præsumat assistere ad Matrimonium sinè denuntiationibus, incurrit suspensionem ab officio tribus annis, sed hæc est *ferendæ sententiæ*, ut habetur ex *cap. Cùm inhibito*, §. *Sanè* de clandest. desp. Probabiliter tamen dicunt *Sanc. Laym. Croix, Ronc. Gob. et Elbel*, quòd in casibus, in quibus Episcopus tenetur dispensare, et non possit ad eum confugere, et contrà periculum dilationem non pateretur, in eo casu Parochus non potest quidem dispensare, sed potest (modò ei constet non subesse impedimentum) declarare tunc non obligare præceptum denuntiationum. Imò addunt *Ponc. Castr. Boss. Salm. Busemb. Sanc. Conc. Sot. Escob.* etc. ipsosmet sponso, si certi sunt nullum adesse impedimentum, posse, omissis denuntiationibus, contrahere (b).

---

(a) *num. 1007. Dub. 1.* — (b) *Ibid. Dub. 2.*

## PUNCTUM V.

### De impedimentis dirimentibus.

*Innuuntur impedimenta dirimentia* 60. I. *De impedimento erroris circà personam, et circà qualitatem* 61. II. *De conditionis*. III. *De voti*. IV. *De cognationis*. 62. V. *De criminis*. 63. VI *De imp. disparitatis cultûs*. VII. *De violentiâ, et metu* 64. VIII. *De ordinis*. IX. *De impedimento ligaminis*. X. *Publicæ honestatis* 65. XI. *Ætatis* 66. XII. *Affinitatis* 67. *De impedimento ad petendum* 68. *Quinam dispensare potest in hoc impedimento* 69. XIII. *De clandestinitate, et de assistentiâ testium*. *De Parochi assistentiâ* 70. et 71. *De vagis, et externis* 72. *Quenam assistentia Parochi requiratur* 73. XIV. *De impotentiâ* 74. et 75. XV. *De raptu* 76.

60. — **I**MPEDIMENTA dirimentia (præter defectum consensus) sunt sequentia :

I. *Error*, II. *Conditio*. III. *Votum*, IV. *Cognatio*, V. *Crimen*, VI. *Cultûs disparitas*, VII. *Vis*, VIII. *Ordo*, IX. *Ligamen*, X. *Honestas*, XI. *Ætas*, XII. *Affinis*, XIII. *Si clandestinus* XIV. *et impos*, XV. *Raptave sit mulier, nec parti reddita tutæ*. *Hæc socianda vetant connubia, facta retractant.*

61. — Sermo sit de singulis sigillatim. I. *Error*. Error circà personam lege naturæ irritat Matrimonium, licèt sit vincibilis, et etiamsi concomitans, qui causam non dedit contractui, adeo ut etiam cognito errore, pariter nuptiæ contractæ fuissent (a). Error contrà circà personæ qualitatem, v. gr.

(a) *L. 6. num. 1010.*

si illa iudicata fuerit nobilis, virgo, aut dives, et talis non reperiatur, certè non irritat Matrimonium; et hoc currit juxtà communem sententiam, et veriore cum *Sanch. Mol. Laym. Nav. Conc. Hab. Ronc. Less. Gon. Salm.* etc. cum *S. Thomá. (a)*, contrà *Poncium*, et alios paucos etiamsi error dederit causam contractui; nam intercessit jam consensus circà substantiam Matrimonii, quæ consistit in verificatione personæ; alioquin si verificandæ essent omnes qualitates à sponsis apprehensæ, innumerabilia Matrimonia restarent dubia, et litibus obnoxia (b). Qualitas tamen si redundaret in substantiam, communiter dicunt DD. tunc errorem circà qualitatem irritare Matrimonium. Tres dantur regulæ quibus dignosci possit quandò error circà qualitatem redundet in substantiam. *Prima*, cum quis actu intendit, aut priùs, voluntate numquam mutata, intellexit non contrahere, nisi sub illius qualitatis conditione, ità *Sanc. Pont. Castr. Salm.* et alii communiter (c). *Secunda*, cum qualitas est propria et individualis alicujus certæ personæ, v. gr. si quis intendit contrahere cum primogenitâ Regis Galliæ; ità *Castr. Petrocor. Habert. Laym. Holzm.* et *Spor.* Secùs autem si intenderit contrahere cum unâ filiarum Regis, quia tunc qualitas non est individualis, sed communis aliis filiabus, et tantò minùs si intenderet contrahere cum filiâ Regis; nisi esset quòd principaliter intenderet non contrahere, nisi cum personâ regali (d). ut dicemus mox infra in tertiâ regulâ. *Tertia* cum contrahens principaliter intendit qualitatem, et minùs principaliter personam, ut si diceret: *Volo ducere nobilem, qualem puto esse N. N.* Secùs autem esset; si diceret: *Volo ducere N. N. quam puto esse Nobilem*; ità *Sotus, Silv. Abul. Holzm. Cabass.* et alii cum *S. Thomá (e)*.

62. — II. *Conditio*: Per conditionem intelligitur servilis; undè si ex ignorantia cum servâ con-

---

(a) *Suppl. q. 51. in cor. et ad 3.* — (b) *L. 6. n. 1011. et 1012.* — (c) *num. 1013. et 1014.* — (d) *num. 1015.* — (e) *num. 1016.*

trahitur, Matrimonium nullum est (a), et hoc etiamsi ignorantia esset crassa, ut probabilius dicunt *Sanchez, Conin. Salm. etc.* contrà *Sotum* (b). Secùs autem si jam sciret illam esse servam, tunc enim validè contraheret, fieret tamen irregularis ex *Can. Si quis, Dicast. 34.* (c). Sicut etiam esset validum Matrimonium, si ipse esset servus, uti probabilius tenent cum *S. Thomà (d) Sanch. Salmant. Bonac. etc.* (\*). Idem currit, prout probabilius dicunt *Sanch. Salm. Bon. etc.* contrà *Castropalaum* (e), si serva ob Matrimonium fieret libera, ut evenit cum dominus ipsemet chirographum dota'e dat servæ, aut eam in uxorem dat alteri ignoranti esse servam.

III. *Votum*, intelligitur solemne castitatis vel ob ordinis sacri susceptionem: vel ob Religiosam professionem spontaneam: dicitur *spontaneam*, nam illa emissa metu, nulla est (f). An autem Papa possit dispensare in voto in professione emisso, probabilissimum est posse, cum *S. Thomà (g), S. Antonin. Suar. Castr. Less. Sanch. Cajet. Ponc. etc.* (h). Et idem dicitur de voto sacri ordinis (i). IV. *Cognatio*. Triplex est cognatio: *Legalis*, quæ oritur ex adoptione perfectâ, nempè factâ Principis Supremi Rescripto; et hæc dirimit Matrimonium inter adoptantem et adoptatum; et inter uxorem et descendentes adoptati, et inter uxorem adoptantis, ac inter ejus consanguineos in primo gradu; ità ex *C. Per adoptionem, 3. q. 3.* et ex *Can. Diligere, 30. qu. 3.* (k). *Spiritualis* est illa quæ oritur ex Bap'tismo, aut ex Confirmatione; et hæc dirimit Matrimonium inter baptizantem et baptizatum, inter patrum et baptizatum, et parentes baptizati, ut ex *c. 1. de Cognat. Spir. in 6.* et ex *Trident. sess. 24. C. 2.* (l). Vide dicta *Tract. XIV. num. 33. et 53.* Tertia deniquè est *Carnalis*, quæ provenit ex consanguinitate personarum quæ ex eodem stipite descendunt: et

---

(a) num. 1017; --- (b) num. 1019. --- (c) num. 1018. -- (d) *Sup. q. 52. a. 1. ad 1.* (\*) *L. 6. n. 1018. v. Si verò.* --- (e) n. 1022. --- (f) *L. 6. n. 1024.* --- (g) *In 4. D. 38. q. 1. q. 4. q. 1. ad 3.* --- (h) *l. 3. n. 256.* --- (i) *Ibid. et l. 6. n. 1059.* -- (k) *L. 6. n. 1027.* --- (l) num. 1028.

hæc in lineâ transversali lege Ecclesiasticâ Matrimonium dirimit usquè ad quartum gradum ; sed in lineâ rectâ semper (a). An autem in lineâ rectâ hoc sit lege naturæ , an Ecclesiæ , quæstio est : cæterum probabile est in primo dumtaxat gradu lege naturæ prohibitum esse Matrimonium in lineâ rectâ , adeò ut in reliquis gradibus possit Papa dispensare ; ità Less. Lugo , Sanch. Salm. Ronc. etc. Vide dicta Tom. 1. Tract. IX. n. 18. Ad distinguendos gradus consanguinitatis , hæ traduntur regulæ : I. In lineâ rectâ tot sunt gradus , quot sunt personæ , dempto stipite , qui nunquàm in numero computatur. II. In lineâ transversali æquali quot gradus sponsus distat à communi stipite sponsæ , tot gradibus distant inter se. III. In lineâ transversali inæquali quot gradibus consanguineus remotior distat à stipite , tot gradibus distant inter se (b). An autem debeat in dispensatione exprimi gradus proximior , vide n. 86.

63. — V. Crimen. Crimina Matrimonium dirimentia sunt homicidium , adulterium et raptus. De raptu dicetur infrà numer. 76. Loquendo igitur hic de homicidio , et adulterio , hoc impedimentum tribus in casibus incurritur , nimirum , 1. Utroque patrante (Tò patrante respicit solum homicidium , non verò adulterium). 2. Uno patrante. 3. Nemine patrante. Et I. utroque patrante intelligitur cùm ambo sponsi conspirarunt (sed sinè adulterio) in conjugis mortem , quo alter eorum Matrimonio ligatus erat , sine Matrimonii ineundi cum eo (c) ; saltem cùm alter sponsorum talem habuit finem et complici comunicavit , ut probabiliùs tenent Ponc. Vasq. Peyr. Diana , Salm. etc. contrà Sanch. et Castrop. qui affirmant impedimentum incurri , etiamsi finis prædictus Matrimonii parti alteri participatus non fuerit. Cæterum ego puto sufficere , seu saltem requiri ut indiciis sufficientibus manifestatus sit , v. gr. donis , literis amatoriis , aut aliis signis amoris et familiaritatis quæ inter partes intercesserunt (d). II. Uno patrante , cùm altera pars tantum , alterâ insciâ ,

---

(a) num. 1029. — (b) ibid. v. Prima. — (c) n. 1033. v. Ex I.  
— (d) L. 6. n. 1034.

conjugem suum dedit morti; sed ampliùs adulterium commisit cum parte cui nubere cupit, ut ex *can. Si quis*, 31. q. 1. et *Cap. Propositum*, de eo qui ducit etc. Sed ad incurrendum hoc impedimentum requiritur 1. ut adulterium præcedat homicidium. 2. Ut adulterium sit perfectè consummatum cum seminatione intrà vas non tantum ex parte viri, sed etiam mulieris, juxtà sententiam *S. Bonav. Innoc. Hostiens. Viguer. et P. Concina*, qui tradit eam ut communem; et meritò probabilem vocant *Sanchez, Castrop. Ronc. Salm.* etc. Ratio, quia hoc impedimentum habet rationem pœnæ, et quævis pœna non incurritur, nisi crimen sit perfectè consummatum in suo genere; ut autem adulterium sit perfectè consummatum, requiritur ut adulteri fiant una caro per utriusque seminationem mixtionemque seminum; ait enim *D. Thomas.* (cujus verba proferemus infrà num. 68. in fin.) quòd tantum per mixtionem seminum vir et fœmina efficiuntur una caro (a). Requiritur 3. ut uterque adulter sint conscii prioris Matrimonii; quare probabiliter (ut dicunt *Sanch. Rebell. Aversa, Busemb. et Salm.*) excusat ignorantia etiam culpabilis, si non sit affectata (b). Requiritur 4. Ut occisio sit patrata eo fine, ut ducere possit adulteram, et talis finis sit ei manifestatus (saltem signis suprà narratis); ità *Sanch. Ponc. Vasq. Salm. Perez*, etc. (c). III. Neutro patrante, intelligitur cùm non intercessit homicidium, sed tantum adulterium cum Matrimonii promissione, ut habetur ex *cap. fin. de Eo qui duxit etc.* Ad incurrendum hoc impedimentum requiritur primò ut adulterium et promissio intercesserit vivente conjugē. Secundò ut promissio non sit revocata antè adulterium. Tertio ut promissio sit acceptata. Hæc certa apud omnes habentur (d). Alia sunt dubia, quocirca dicimus 1. probabile esse cum *Sanchez, Castrop. Gutt.* (contrà *Ponc.* etc.) ad acceptationem non sufficere solam adulteræ taciturnitatem (e). Di-

---

(a) n. 1036. v. *Hinc autem.* — (b) *Ibid.* v. *Requir.* V. — (c) *Ibid.* v. *Req.* VI. — (d) *L. 6. n.* 1037. — (e) n. 1038.

cimus 2. probabilius et communius esse cum *Laym. Bonac. Salm. Holzm. Croix, Spor. etc.* (contrà *Sanch. Castrop. etc.*) non sufficere promissionem fictam, dùm textus citatus requirit promissionem, qualis non est promissio ficta (a). Dicimus 3. Non sufficere conditionatam promissionem; cùm enim agatur de pœnâ, pro promissione à textu allatâ, debet intelligi absoluta, et probabilius etiam dicunt *Laym. Conin. Perez, Holzm. contrà Sanch. Tourns etc.* Dicimus 4. contrà probabilius; et communius esse cum *Sanch. Bonac. Castrop. Sot. Coninc. Silv. etc.* adversùs *Bellarm. Laym. Holzm. Elbel, etc.* non requiri mutuam promissionem; nam in c. 1. et 6. de *Eo qui duxit etc.* nulla mentio fit repromissionis, sed tantùm fidei datæ (b). Præterea notandum est ad tria illa crimina addendum esse quartum, ex quo etiam oritur impedimentum, et est adulterium cum *Matrimonio attentato*, nempe cùm vir vivente uxore aliam cognoscit, ac intentat cum illâ contrahere: hoc Matrimonium est nullum, sive copula præcesserit, sive sequatur attentatum, ut habetur ex c. 2. 4. 5. et 9. de *Eo qui duxit etc.* (c). Qui autem, vivente uxore, daret fidem ducendi aliam, sed sinè adulterio, et sinè Matrimonio attentato, non incurreret hoc impedimentum, sed non excusaretur à culpâ gravi, ut communiter dicunt *Sanch. Laym. Bon. Castrop. Elbel, etc.* et deducitur ex c. fin. de *Eo qui duxit* (d).

64. — VI. *Disparitas cultûs*, intelligitur disparitas religionis. Hæc dirimit Matrimonium inter baptizatum, et non baptizatam, sed inter baptizatos, nempe inter catholicum, et hæreticam disparitas non dirimit, sed tantùm impedit Matrimonium, et reddit illicitum, nisi Papa dispenset, ut ex c. 1. de *Divort.* et ex Bullâ Bened. XIV. *Matrimonia* datâ 4. Nov. 1741. (e). VII. *Vis*, intelligitur non solùm vis propriè dicta, sed etiam metus, qui dirimit Matrimonium tam lege Ecclesiasticâ, c. *Significavit*, c. *Veniens*, de *Eo qui ducit etc.* quàm lege naturali (f).

(a) n. 1039. — (b) n. 1041. — (c) n. 1042. — (d) num. 1043. — (e) Lib. 6. n. 56. et 1044. — (f) n. 1054.

Et dirimit, licet juramento sit firmatum, modò juramentum non sit præstitum ad liberum præbendum consensum; quia tunc certè obligat, ut ait *P. Viva*, (a). Sed ad hoc ut metus irritet Matrimonium, 1. debet esse gravis, quia levis satis non est, ut tenendum est cum sententiâ communissimâ *Ponc. Gastr. Sanc. Sot. Tamb. Boss. Vivæ* (contra *Lugo*, et *Nav.*) cum *S. Tho.* (b); qui dicit: *Coactio metus, quæ cadit in constantem virum, tollit Matrimonium, et non alia.* Ratio est, quia neque lege naturæ, nec positivâ habetur quòd metus levis tollat Matrimonium (c). Pro metu gravi intelligitur periculum mortis, exilii, carceris, infamiæ, aut amissionis gravis bonorum, aut excommunicationis, aut alius damni gravis, quod contrahens timeret sibi, aut sibi conjunctis usquè ad quartum gradum: ità communiter DD. (d). Solus metus reverentialis ergà parentes, avos, dominos, Prælatos, et tutores (addunt *Ronc. Sanch. Boss.* etc. etiam ergà patruos, et fratres natu majores) dicimus cum sententiâ communi *Less. Sot. Sanch. Suar. Mol. Laym. Conc. Ponc.* etc. cum quâdam Decisione Rotæ Rom. contra aliquos Canonistas, quòd non satis sit ad irritandum Matrimonium, nisi cum additur timor gravis mali, ut diuturni odii, aut indignationis, aut verberum, etc.; nam, ut rectè ait *Ponc.*, metus merè reverentialis non est propriè metus, sed simplex reverentia quæ secum nullius mali affert timorem, sed solam quandam erubescentiam, quæ potiùs ab intrinseco quàm ab extrinseco ortum habet, sicut mox infra explicabitur (e). 2. Metus iste debet esse ab extrinseco incussus, nempè ab alio: et non sufficit, ut sit ab intrinseco, ut si quis contraheret, ut ab aliquo liberetur damno, à nemine incusso, sed à seipso apprehenso; ità communiter *Sanch. Ponc. Sot. Ronc. Salm.* (f). 3. Debet esse injustè incussus; undè si fortè sponsus factâ Matrimonii promissione ex timore carceris, quam ei justè minitatus est Judex, contrahat, aut timore ne sponsa eum accu-

---

(a) n. 1045. — (b) *Suppl. qu. 47. art. 3.* --- (c) *L. 6. n. 1055.*  
 — (d) n. 1047. et 1048. --- (e) n. 1056. --- (f) n. 1049.



set , tunc Matrimonium est validum. 4 Debet incuti metus ad finem contrahendi matrimonii ; quare si stuprator ducit corruptam incussus timore minarum illius conjunctorum , Matrimonium est nullum ; secus verò , si parentes minantur ei mortem ob violationem puellæ et ille ut periculo liberetur , Matrimonium contrahit : ità communiter *Sanchez* , *Bonac. Ronc.* et alii (a). Dubitatur autem an irrito facto Matrimonio metûs causâ , libera restet etiam pars quæ metum incussit ? Affirmant probabiliter *Sanch. Sol. Castrop. Busemb. Hurtad.* etc. Sed probabilior videtur opposita *Poncii* , *Nav. Conin. Salm.* etc. uti deducitur ex c. 1. de *Eo qui duxit* , quia nemini commodum de suo facinore comparandum est. Imò dicimus cum *Castrop.* eum , qui metum incussit , omninò teneri mulierem ducere , cum non posset alio medio illius honori consulere (b).

65. — VIII. Ordo intelligitur sacer , quo dirimitur Matrimonium , non quidem lege divinâ , uti volunt nonnulli , sed Ecclesiasticâ , sicut probabilius docent *Sanch. Ponc. Suar. Bellarm.* etc. cum *S. Bonav.* et *S. Thomâ* (c) qui dicit : *Sed quòd (Ordo) impediât Matrimonium , ex constitutione Ecclesiæ habet ;* quia votum simplex castitatis ex se non irritat certè Matrimonium ; si igitur irritat , est quia est solemne , sed talis solemnitas dumtaxat provenit ex lege Ecclesiæ : ideoque benè potest Papa in eo dispensare (d). IX. *Ligamen* , intelligitur de eo qui alio Matrimonio ligatus est , propter quod cum nemine alio contrahere potest , nisi certè constet de prioris conjugis morte : qui si comparet , tenetur , qui aliud contraxit Matrimonium , ad priora redire vota (e). X. *Honestas* , nempè publica honestas , quâ nullum redditur Matrimonium illius , qui sponsalibus celebratis cum unâ , Matrimonium contrahit cum consanguineâ illius in primo gradu , sicut novissimè statuit Tridentinum , quia jure antiquo tale impedimentum extendebatur usquè ad quartum gradum (f). Hic no-

---

(a) *Cit. n. 1049. ad 1053 ubi alii casus discutuntur.* -- (b) *num. 1057.* -- (c) *in 4. Dist. 37. qu. 1. art. 1.* -- (d) *L. 7. n. 1058. et 1059.* -- (e) *num. 1060.* -- (f) *n. 1061.*

tandum 1. tale impedimentum non oriri ex sponsalibus cum personâ incertâ initis (v. g. cum una ex filiabus Petri), uti constat ex *c. uno de sponsal. in 6.* neque ex sponsalibus conditionatis, si adhuc conditioni non fuerit eventus, ut dicunt communiter *Sanch. Castropal. Bon. Salmant.* et certum est ex declaratione Bonif. VIII. apud *Tournely.* Notandum 2. ex Matrimonio rato oriri impedimentum publicæ honestatis usque ad quartum gradum, licet Matrimonium fuerit nullum, modò nullitas non provenierit ex defectu consensûs, quia in hoc jus antiquum correctum non est à Concilio; ita communiter *Sanchez, Ponc. Castrop. Salmant.* Sed hic quæritur, an adsit impedimentum, cum nullitas oritur ex defectu consensûs? Affirmant *Sanchez, Ponc.* et alii, quoties defectus est occultus (et idem dicunt de sponsalibus nullis ob quemcumque defectum occultum, cum valida sunt in foro externo). Sed probabilius negant *Castr. Bon. Tourn. Conc. Salm. Coninc.* etc., quia in textu citato universaliter dicitur quod ex Matrimonio nullo defectu consensûs, non oritur impedimentum; et ita refert *Barbosa* declarasse S. C. Quoad autem sponsalia, indistinctè dixit Trident. *sess. 24. c. 3.* ubi *Sponsalia quâcumque ratione valida non erunt, sancta Synodus prorsus tollit* (impedimentum). (a). Notandum 3. Sponsalia licet mutuo consensu soluta, aut aliâ ex iustâ causâ, parere impedimentum, uti rectè dicunt *Sanch. Tourn. Conc. Sot. Laym. Bonac. Salm.* etc. (contrà *Ponc. Castr.*). Ratio est quia ex sponsalibus validis, juxta Trid. jam oritur impedimentum; undè hoc non potest deinde tolli sponsorum voluntate, aut aliâ causâ superveniente: et hæc sententia (uti rectè ait *La-Croix*) est omnino tenenda ex approbatione S. C. approbatâ ab Alex. VII. die 6. Julii 1668. ubi prohibitum fuit, ne hoc deinceps ampliùs in dubium revocaretur. (b). Notandum 4. ex Matrimonio nullo, ex eo quod fuit clandestinum, etiam oritur, impedimentum publicæ honestatis, ut rectè dicunt *Ponc. Castrop. Pign. Ronc. Tourn. Conc. Laym.* etc. (contrà *Sanch.*

---

(a) *L. 6. n. 1062.* — (b) *n. 1063.*

*Nav. et Coninc.*) Et ità declaravit S. C. (a) Insuper hic advertendum Matrimonium ratum cum unâ sorore, sed invalidum ob publicam honestatem, non inducere impedimentum in alterius sororis, cum quâ contracta sunt sponsalia, præjudicium, uti ex *cit. c. un. de spons. in 6. (b)*.

66. — XI. *Ætas*, intelligitur, si sponsus sit minor natus quàm 14. annos completos, et sponsa 12. matrimonium est nullum, uti habetur ex *c. 7. 10. et 14. de Despons. impub.* modò malitia non suppleat ætatem, ut excipitur ex *c. De illis 9. eod. tit.*, sed hoc intelligitur pro illis impuberibus qui pubertatem jam attingunt; et præterea intelligitur de illis qui non solùm potentes sunt ad generationem, sed etiam sunt capaces ad intelligendas consequentias conjugalis vinculi, ad quod contrahendum perfecto opus est rationis usu, ut dicunt *Sanch. Sotus*, et alii cum *S. Thomá (c)*. Quæritur hìc, an Matrimonium sit nullum, si pueri etiam completâ ætate coire nequeant? Alii affirmant, sed communiter negatur cum *Navar. Castr. Sanch. Silvest. etc.*; nam nullâ lege cavetur quòd Matrimonium inter puberes pueros sit nullum, si adhuc potentia generandi careant; dùm impotentia tunc potiùs judicanda est temporalis, quàm perpetua. Itaque tunc, ut communius dicunt *Castr. Ponc. Sanch. Silvest. Escob. etc.* quoad marem expectanda est ætas usquè ad annum 18. quoad mulierem saltem usque ad 14. (d). Notandum hic Matrimonium senum ætatis decrepitæ etiam esse validum, modò coire possint arte medicâ, ità communiter *Sanch. Salm.* et alii cum *S. Thomá (e)*.

67. — XII. *Affinis*. Affinitas est illa quæ oritur ex copulâ habitâ ab uno sponzorum cum consanguineis alterius. Hæc dirimit Matrimonium usquè ad quartum gradum, si ex copulâ licitâ nata est: usquè ad secundum, si ex illicitâ; ità ex *Trid. sess. 24. c. 4.* Notandum hìc quòd affinitas non parit affinitatem, undè duo fratres possunt ducere duas sorores; et vitricus potest ducere uxorem sui privigni,

---

(a) n. 1064. — (b) *Ibid. v. Notandum*, — (c) n. 1065. — (d) n. 1066. — (e) *Ibid. v. Matrim.*

ut declaravit S. C. (a). Insuper notandum quòd si quis cognoscit sororem sponsæ suæ, neutram sinè dispensatione ducere potest; sed obtentâ dispensatione, si iterùm eandem sororem sponsæ cognoscit, novâ dispensatione non indiget; et hoc etiamsi dispensatio executioni data sit, ut dicunt probabiliùs *Sanch. Tourn. Anacl. Guttier. etc. contrà Habert et Elbel*) cum Declaratione S. C. quia illa affinitas jam per dispensationem sublata est, ad effectum contrahendi Matrimonium. Et ità reverà respondit S. Pœnitentiaria 21. Sept. 1752. cuidam rescripto quod authenticum ego vidi. Advertit autem *Lambertini* (b) cum *Fil. Cleric. et Tamb.*; quòd si postea impedimentum, super quo in foro conscientiae dispensatum est, detegatur in foro externo, et conjuges non possent ad probandam dispensationem aliquam probationem adducere, tunc Episcopus aut Parochus debet quiescere, si Confessarius testetur de obtentâ dispensatione (c).

68. — Præterea notandum præfatum affinitatis impedimentum tunc dirimere Matrimonium, cùm illud præcessit, sed si post Matrimonium conjux rem habet cum consanguineo alterius in primo aut secundo gradu, ille privatur jure petendi debitum, ut habetur ex c. *Si quis 1. de Ho qui duxit etc.* et ex Declaratione Gregorii XIII. (d) Advertendum autem ab hoc impedimento 1. excusat metus, v. g. si uxor metu gravi coacta cognoscitur à consanguineo viri; ità communiter et probabiliùs *Nav. Bonac. Rebel. Elb. cum Laym. Sot. Castr. et Salm.* qui hoc probabile vocant, quia sicut metus gravis à lege humanâ, ità etiam excusat à poenâ (-). 2. Excusat ignorantia. Hæc ignorantia potest esse aut facti, aut juris, aut poenæ. Si est facti; nempè si conjux ignorat illam personam, cùm quâ copulam habet, esse consanguineam sui conjugis, ab omnibus excusatur, licèt ignorantia esset crassa, ut dicunt *Sanc Ponc. Nav. Castr. etc.* cùm illa poena sit imposita, ut legitur in textu citato, *scienter peccantibus*

---

(a) n. 1067. — (b) *Notif.* 87. n. 51. — (c) *Lib.* 6. n. 1140. — (d) n. 1070. — (e) *Lib.* 6. n. 1071.

(a). Nec incurritur ab eo qui ignorat legem Ecclesiasticam; quæ præter Divinam id prohibet; dùm non potest incurri pœna illius legis, cujus nulla habetur notitia; ità communissimè *Suar. Navar. Bon. Wigandt, Pont. Salm.* etc. contrà pauciores. (b). Et est etiam probabile non incurri ab eo, qui licèt sciat legem Ecclesiasticam, ignorat tamen pœnam; ità tenent *Bon. Wigandt, Castrop. Boss. Coninc.* et alii; quia hoc impedimentum (ut dicunt) habet veræ pœnæ rationem; aliàs etiam incurreretur ab eo qui citrà culpam committeret incestum; et cùm sit pœna extraordinaria, ei non subicitur ignorans, uti dicitur *Tract. XIX. n. 8* loquendo de *Censuris* (c). 3. Non incurritur præfatum impedimentum, nisi copula sit ex utrâque parte consummata cum seminatione, ut probabiliter dicunt *Castrop. Silv. Sanch. Bonao. Salm.* et alii cum *S. Bonav. et S. Thom.* (d), qui dicit: *Vir et fœmina efficiuntur una caro per mixtionem seminum: undè nisi mixtio seminum sequatur, non contrahitur affinitas.* Advertendum tamen, quòd in dubio semper præsumenda est copula fuisse perfecta, et consummata ab utrâque parte (e).

69. — Huic impedimento, communis est sententia cum *Merbes. Castr. Laym. Punc. Sanch. Boss. Wig. Anacl.* etc. contrà aliquos pauciores, posse dispensare Episcopos ex potestate suâ ordinaria, aut saltem ex consuetudine jam introductâ (f). Et possunt delegare etiam aliis facultatem dispensandi, cùm ipsa annexa sit dignitati Episcopali; ità etiam communiter *Barbosa, Pont. Sanch. Castrop. Salm. Bon.* etc. (g). Item possunt dispensare omnes Confessarii Mendicantes ratione Privilegiorum suorum, ut referunt *Sanc. Ponc. Spor. Salm.* etc. contrà *Concinam* (h). Ad hoc autem ut Regulares Confessarii possint super hoc impedimento dispensare, alii volunt, ut illi habeant licentiam suorum Generalium, aut Provincialium; alii absolutè id negant; ceterum rectè dicunt *Salm.* cum aliis non requiri, sed sufficere

---

(a) n. 1073. — (b) n. 1072. — (c) n. 1074. — (d) *In 4. dist. 41. q. 7. a. 1. add.* — (e) n. 1705. — (f) n. 1076. — (g) n. 1125. — (h) n. 1127.

360 *Tract. 18. De Sacramento Matrimonii.*

licentiam Superioris localis, dùm Privilegium concessum Benedictinis Vallisolanis à Martino V. et à Julio II. concessum fuit Priori Monasterii (a).

70. — XIII. *Si Clandestinus.* Advertendum Clandestinitatem, loquendo de Matrimonio, bifariam accipi posse; Primò cùm fiunt nuptiæ omissis denunciationibus, et de hâc jam actum est num. 55. Secundò, cùm celebratur Matrimonium sinè Parochi, et testium assistentiâ, et de hâc est sermo, Trid. sess. 24. c. 1. declaravit nullum fore Matrimonium, nisi contrahatur coram Parocho, aut alio Sacerdote de ejus licentiâ, et coràm duobus saltem testibus; et hoc currit (si in loc's ubi Trident. receptum est, versatur) etiamsi aliqua urgeat necessitas quæ oppositum expostularet, et etiamsi Matrimonium sit contractum ex ignorantia; ità communiter DD. (quicquid dicant aliqui cum *Soto*), dùm Concilium declaravit *omnino inhabiles* eos qui aliter contrahunt (b). Quoad testes, notandum, quòd quilibet testes in hoc sufficiunt, etiam mulieres, pueri (modò sint rationis capaces), infideles, infames, parentes, servi, et etiam illi qui casu illàc transeunt, aut vi detinentur; ità communiter *Sanch. Barb. Castrop. Laym. Bonac.* etc. (c),

71. — Quoad Parochum autem, plura notanda sunt. Notandum 1. nomine Parochi intelligi non solum Episcopum, et Vicarium capitularem sede vacante, sed etiam Abbatem jurisdictionem quasi Episcopalem habentem, Vicarium generalem Episcopi, licèt ei hoc Episcopus prohibuisset, cùm non possit hic impedire quominus Parochus, aut Vicarius suus generalis Matrimoniis assistat, ut pluries declaravit S. C. (d). Peccaret tamen graviter Parochus, si assisteret postquàm ei ab Episcopo jurisdictio vetita sit, ut communiter dicunt DD. Notandum 2. Parochum etiam irregularem, aut suspensum, aut excommunicatum, licèt vitandum, validè assistere, ut

---

(a) n. 1128. — (b) n. 1079. — (c) n. 1085. — (d) *Vide P. Zac. ap. Croix l. 6. p. 3. n. 725.*

ut dicunt communiter *Sanch. Ponc. Salmant.* etc. et *Fagn.* cum Decreto S. C.; ibi enim non exercet jurisdictionem, sed tantum uti testis assistit (a). Licet, assistente vitando, non excusarentur à culpâ gravi nec ipse nec sponsi; modò casus non accideret quo gravissima causa urgeret, ut citius Matrimonium contraheretur; et non suppetaret tempus Episcopum adeundi, ut dicunt probabilius *Coninc. Ponc. Suar. Vasq. Bonac.* etc. contrà *Sanch. Boss. etc.* (b). Contrà probabilius dicunt *Sanch. Castr. Barb. Ponc. Bonac. Cajet. Salm.* etc. (contrà *Laym.* et alios) Parochum vitandum rectè dare posse alteri Sacerdoti licentiam assistendi; nam licentiam dare non est actus jurisdictionis, sed potestatis sibi à Concilio concessæ, non uti Parocho, sed uti testi, cum facultate delegandi alium Sacerdotem (c). Benè potest etiam assistere, aut licentiam dare Parochus non Sacerdos infra annum, quo Sacerdotio initian-  
 dus est; et etiam post annum (saltem validè) sicut declaravit S. C. (d). Et ità pariter Sacerdos qui titulo colorato Parochus haberetur (e); aut errore communi, juxtà dicta *Tract. XVI. n. 90.* Notandum 3. sufficere licentiam Parochi etiam tacitam, modò sit præsumpta de consensu præsentis; non jam rati-  
 habitione futurâ, ut dicunt communiter *Sanch. Ponc. Bonac. Salm.* etc. Et sufficit etiam dolo aut timore extorta, et oretenus tantum data, ut addunt iidem AA. citati (f).

Notandum 4. Assistere debere Matrimonio Parochum illius Parochiæ, in quâ sponsi domicilium habent; sed si domicilium in duabus Parochiis haberent, communissimè docent *Sanch. Ponc. Bonac. Coninc. Ronc. Salm.* etc. posse contrahere cum Parocho alterutrius; modò in utrâque (moraliter loquendo) æquè incoluerint (g). Sed advertit P. *Zacharia* pluries declarasse S. C. quod si sponsi fictè in aliam Parochiam domicilium transferrent, ibi contrahendo, invalidè contraherent. Sed contrà

---

(a) *Lib. 6. n. 1082.* — (b) *n. 1083.* — (c) *Lib. 6. n. 1084.* ---  
 (d) *n. 1081.* --- (e) *Ibid.* --- (f) *n. 1088.* -- (g) *n. 1086.*

validum esset Matrimonium, si eò reverà domicilium transferrent, licèt in fraudem Parochi primi domicilii, ità *Croix* cùm *Fagnano*, *Barb. Sanch. Silv. Bos.* et aliis (a). Notandum 5. ad Matrimonii valorem sufficere assistentiam Parochi alterutrius sponsi, etiam extrà Parochiam, et Dioecesim; quare valet Matrimonium, si in Parochiâ sponsæ assistit. Parochus sponsi, ut declaravit multoties S. C. accedente etiam Pontificis approbatione (b). An autem peccet Parochus assistendo extrà Parochiam? alii affirmant, sed communiùs eum excusant *Sanch. Castr. Salm. Barb. Coninc. Boss.* etc. dicendo (ut suprà) assistere non esse actum jurisdictionis (c). Quæritur an in aliam Parochiam proficiscens non animo eòdem transferendi domicilium, nec ex transitu, sed ut ibi majorem anni partem moretur, possit ibi contrahere nuptias? Alii probabiliter negant; sed probabiliùs affirmant *Sanch. Ponc. Bon. Silv. Castrop. et Salm.* Imò dicit *Lambertini* cùm *Laym.* et *Nav.* sufficere ut ibi moretur aliquam notabilem anni partem occasione alicujus occupationis, ut Medici, Judicis, Servi, Cauponis etc. (d); vide dicta *Tract. XIV. n. 17.*

72. — Notandum 6. Vagos posse contrahere coram quocumque Parocho, licèt tantum alter sponсорum sit vagus. Tenetur tamen tunc Parochus investigare diligenter, an alibi contraxissent; et istis assistere non debet sinè speciali Episcopi licentiâ, ut docent *Sanch. Barb. Salm.* etc. Quoad exteros, hi non possunt Matrimonio conjungi extrà patriam, nisi ostendant fidem authenticam Ordinarii proprii de statu eorum libero, uti constat ex instructione S. C. (e). Sed ut declaravit etiam S. C. exteri in carceribus detenti non possunt ibi contrahere. Et idem docet *Lambertini* dicendum (juxtà instructionem S. C.) de exteris infirmis in Xenodochiis, excepto casu præcisæ necessitatis, in quâ possunt cæteroquin contrahere, etiam sinè attestatu de statu li-

---

(a) *Croix* l. 6. p. 3. n. 717. — (b) *Lib.* 6. n. 1087. -- (c) *Ibid.* -- (d) n. 115. et 1091. -- (e) n. 1089. in fin.



bero; sed antequàm de eo constet, non possunt Matrimonium consummare. Puellæ verò expositæ, quæ in conservatoriis versantur, contrahere debent coram Parocho ipsiusmet loci, uti declaravit S. C. Et idem dicit *Lambertini* ex antiquâ consuetudine, quæ adest, de illis puellis quæ vivunt in conservatoriis, à quibus aluntur, et dotantur; sed illæ quæ ibi educantur debent contrahere coram Parocho domicilii paterni, materni, aut fraterni, si adest, alioquin coram Parocho loci conservatorii; et idem dicunt de famulis qui domi dominorum vivunt (a). Præterea circa Matrimonia militum adsunt multæ Decis. S. C. (b), nempè quòd non possunt contrahere sinè Pontificis licentiâ coram Capellano castrorum, sive in præsidiis, sive in stationibus hyemalibus, aut æstivis, et ne in castris quidem, licèt in oppositum inveniam apud *Pittonium* (c) quoddam Decretum S. C. ubi dicitur quod ipsi Capellani possunt assistere Matrimoniis militum, cùm hi in actuali expeditione reperiuntur. Sed cùm sunt exteri semper opus habent fide suorum Ordinariorum de statu libero (d).

73. — Notandum 7. ad hoc, ut Matrimonium sit validum, requiritur præsentia non tantum materialis, sed etiam moralis Parochi et testium, aded ut ipsi testari possint tam de personis contrahentibus, quàm de Matrimonio contracto; quare rectè ait *Pontius* (contrà *Sanch.*) apud *Croix* (e), quòd si Parochus non benè intelligeret consensum sponzorum, quia fortè alterius sunt idiomatis, non sufficit unus interpret qui affirmet. Contrà sufficit si Parochus intelligit eorum consensum, licèt eos non videat (modò eorum voces dignoscat), et licèt nihil ipse præferat, ut decisum affert *Fagnanus* à S. C. et ut communiter dicunt DD., imò etiamsi vi defensus sit et contradicat, ut communiter etiam dicunt *Sanc. Bon. Filliuc. Conc. Busemb.* etc. (f), et juxtà

---

(a) n. 1091. — (b) ap. *P. Zac. ad Croix* L. 6. p. 3. n. 751. — (c) *Pitton. tr. de Matr.* n. 2117. — (d) *Vide opus nostr. l. 6. n. 1090.* — (e) *Lib. 6. p. 3. n. 750.* — (f) *Lib. 6. n. 1092.*

plures Decis. S. C. (a). Sed in hoc non excusarentur sponsi à mortali, et in aliquibus Diœcesibus incurrerent excommunicationem; nisi esset casus, uti dicunt *Castrop. Con. Salm.* etc. quo Parochus injustè renueret assistere, et contrà adest necessitas contrahendi (b). Parochus verò tenetur sciscitari consensum à sponsis, et proferre verba: *Ego vos conjungo in nomine Patris, et Filii, et Spiritûs Sancti.* Licèt probabilius dicunt *Sanc. Coninc. Ponc. Castrop. Salm. Bon.* etc., quòd si ea verba non proferret, peccaret tantùm venialiter, quoties factus esset certus de consensu manifestato, sed fortè probabilius *Boss. Rebell. Barb.* et alii non excusant eum à peccato mortali, cùm defectus sit circà materiam gravem (c).

74. — XIV. *Impos.* Hoc impedimentum est frigiditas Sponsorum, aut impotentia habendi copulam per se aptam ad generandum. Impotentia hæc, si est perpetua, et antecedit nuptias, nec auferri possit nisi per miraculum, aut peccatum, aut cum periculo mortis, de jure naturæ illas irritat, ex *cap. Fraternitatis, de Frigid. et malef.* Impotentia autem oriri potest 1. ex maleficio: et tunc, si maleficium intrà triennium nequit removeri sinè peccato, dirimitur matrimonium ex *cap. fin. eod. tit.* Oriri potest 2. ex frigidityte: et tunc pariter, si intrà triennium nequit inter conjuges perfici copula idonea ad generationem, matrimonium irritum est. Idem docet *D. Thomas* (d) casu quo vir talem habeat ergà mulierem abominationem, ut nullo modo possit per triennium cum eâ copulari, sicque pariter sentiunt *Albert. M. Sanch. Silvest Ang. Tab. Turrecr. contrà Sotum.* (e). Oriri potest 3. ex improportione membrorum, nempe si fœmina haberet vas nimis arcum; et tunc, si ipsa nequeat apta fieri, nisi per incisionem cum periculo mortis, vel gravis morbi (in quo moraliter semper inest mortis periculum,

---

(a) apud *P. Zac. ad Croix* l. 6. p. 3. n. 790. -- (b) *Lib. 6. n. 1093.*  
 -- (c) n. 1094. -- (d) *Sup. q. 58. a. 1. ad 5.* -- (e) n. 1096.

ut rectè apud *Sanch. et Roncaglia* ), Matrimonium est invalidum ex *cit. cap. Fraternitatis*, ubi dicitur tùm Matrimonium esse nullum, cùm nequit haberi copula, nisi per incisionem, aut alio modo violentia sibi inferatur, . . . . foris tam gravis, ut ex eà mortis periculum timeatur (a).

75. — Hinc autem insuper tria sunt notanda. Notandum 1. quòd mulier eo casu, quamvis non teneatur incisionem pati cum periculo gravis morbi, ut rectè tenent (contrà aliquos) communiter *Ponc. Castr. Tournely, Pontas, Sanch. Ronc. Salm. Bonac. Soto, Croix* etc., quia nunquam censetur ipsa ad tantum periculum se voluisse obstringere: tenetur tamen illam pati cum aliquà gravi molestià et dolore, ut communissimè et probabilius tenent *Sanchez, Bonac. Ronc. Spor. Salm. Croix, Soto, Escob.* etc. (contrà *Pontium, Castr. et Tourn.*) quia ad id videtur obligari ex contractu inito, cùm id sit necessarium, ad servandum viro jus ad copulam (b). Verumtamen, si incisio non posset fieri nisi per manum Chirurgi, non videntur improbabilius dicere *Coninch. Tourn.* cum *Pontas*, quòd mulier non tenetur eam perferre cum tantà verecundià, quod esset onus moraliter intolerabile (c). Quòd si vir debilis sit ad scindendum virginale claustrum, an tunc mulier teneatur pati fractionem per aliquod instrumentum? Negant *Pontius Castrop.* et alii, quia cùm defectus sit ex parte viri, uxor non tenetur nisi ad tradendum corpus suum modo ordinario et naturali, non extraordinario scindendum. Sed probabilius affirmant *Sanchez, Vega, Anglès* etc., quia hujusmodi molestia, licet non sit modo naturali in eo casu perferenda, tamen non debet dici extraordinaria, cùm ex unâ parte sit ipsa omnibus nuptis ordinaria, et ex alia videtur necessario toleranda, cùm desit aliàs modus ut mulier apta fiat ad tradendum usum sui corporis, cujus dominium jam in virum transtulit (d). Notandum 2. quòd soluto Matrimonio ob arctitudinem fœminæ, si ipsa cum

(a) *Ibid. v. III.* — (b) n. 1099. — (c) *Ibid. in fin.* — (d) *L. 6. n. 1100.*

alio nuptias iniret, non ex eo quòd per usum conjugii apta facta sit primo viro, ideò primum Matrimonium validum est reputandum, sed id conjiciendum à similitudine secundi viri cum primo; ità (quicquid alii dicant) rectè docent *D. Antonin. Sanch. Silv. Ang. Turrecr. Durand.* etc. Idque clarè colligitur ex *d. cap. Fraternitatis*, ubi dictum fuit ideò teneri mulierem redire ad primum virum, *cùm pateat* (verba textus) *ex post facto quòd cognoscibilis erat illi, cujus simili commiscetur* (a). Notandum 3. quòd cùm impotentia est certa, non est jam expectandum triennium; tunc enim statim potest altera pars ab impedità liberè discedere (imò tenetur, si adsit periculum incontinentiæ), et ad alias nuptias transire, etiam ex propriâ auctoritate, si non adsit scandalum; si verò adsit, ut communiter accidit, debet omninò ad Judicem Ecclesiasticum recurrere, et impedimentum probare (b): Quandò autem impotentia est dubia, tunc si dubium antecessit nuptias, pars dubitans de suâ potentiâ (intellige positivè ex aliquo indicio probabili, non autem negativè, cùm ordinariè quisque habilis præsimitur) nequit contrahere, nisi dubium alteri parti manifestet, et sit saltem probabiliter potens, ut dicunt *Dicast. Elbel, Card. et Viva*, (c). Si autem dubium superveniat Matrimonio, tunc datur triennalis experientia (quæ incipit à copulâ intentatâ), et experientia permittitur, licèt conjuges semen (sed præter intentionem) extrà vas effundant, ut communiter docent *Sanch. Castrop. Soto Tourn. Salm.* etc. ex *D. Thomà* (d). Et in dubio, an impotentia nuptias antecesserit, vel supervenerit, probabiliùs dicunt *Bon. Sylv. Tourn. Salm.* etc. (contrà *Sanch. Castr. Mazz.* etc.) judicandum quòd antecessit, nisi fortè post Matrimonium aliquis supervenerit morbus, ex quo impotentia præsumatursuccessisse (e). Quod autem ad forum externum pertinet, observa quæ in

---

(a) n. 1098. — (b) *Lib. 6. n. 1101.* — (c) n. 1102. — (d) n. 1103. — (e) n. 1104.

*Cap. 2. Punct. 5. De Impedimentis dirim. 367*

Opere adnotantur (a). Ibique etiam vide quæ dicuntur de Matrimoniis, quæ contrahuntur inter hæreticos, vel cum hæreticis (b).

76. — XV. *Rapta*. Raptui etiam à Tridentino (*sess. 24. c. 6.*) impositum est impedimentum. Ad contrahendum hoc impedimentum requiritur 1. ut mulier rapta sit ab uno ad alium locum exportata, vel saltem ab unâ ad aliam domum aliquos passus dissitam (sed non sufficit ab uno ad aliud ejusdem domûs cubiculum), ubi illa manet sub raptoris potestate, licèt ibi illa ab eo cognita non sit; ità communiter *Sanch. Salm. Concina*, etc. (c). 2. Ut raptus sit patratu solo fine Matrimonii; undè, uti probabiliùs tenent *Sanch. Coninc. Holzm. Castrop. Salm.* etc. (cōtrà *Bonac. Busemb.* etc.) non contrahit hoc impedimentum, qui alio fine eam rape-ret, etiamsi ad libidinem explendam; nam Concilium hoc impedimento nihil aliud intellexit, quàm Matrimonii libertati favere (d). 3. Ut raptus fiat dissistente muliere; secùs est si dissidentibus propinquis, mulier assentiatur, raptor licèt incursum sit alias pœnas in raptores latas, non autem impedimentum, uti communiter docent *Sanch. Cast. Conc. Holzm. Coninc. Aversa, Salmant.* etc. (e). Et idem constat ex *cap. penult. de Rector.* ubi dicitur: *Iste raptus dici non debet, cùm habuerit mulieris assensum, et priùs eam desponsaverit, quàm cognoverit, licèt parentes reclamarent.* Notandum hìc r. quòd juxtà Tridentinum præter hoc impedimentum, raptor, et ceteri omnes qui ad id auxilium suum præstant, incurrunt excommunicationem ipso facto; reliquæ verò pœnæ impositæ à Concilio non incurruntur, nisi post sententiam; *Castropal. Sanch. Salm.* etc. (f). 2. Quòd raptor mulieris invitæ incurrit impedimentum, et pœnas, licèt cum illâ priùs contraxerit sponsalia, uti rectè docent *Castropal. Escob. Sa, Sanch. Conc. Corn. Salm.* etc. (cōtrà aliquos), cùm constet ex Concilio incurri impedimentum, quoties mulier invita rapitur (g). Dubium:

(a) n. 1103. — (b) n. 1105. — (c) n. 1107. — (d) *Ibid. v. Requir. 2.* — (e) *Ibid. v. Requir. 3.* — (f) *Lib. 6. n. 1107 v. Notæ* — (g) *Lambert. Notif. 87. n. 45. in fin.*

fit autem, an in casu raptus etiam sponsalia invalidentur? Affirmant *Bonac. Pont. Sanch. Dicast. Salm.* et alii communius. Verum opposita, quam tenent *La-Croix*, et *Holzm.* (a) cum *Perez*, *Pichler*, *Kirner*, et aliis, mihi probabilior videtur; quamvis enim leges poenales extendantur ad casus in quibus eadem currit adæquata ratio; prout dictum est *Tom. I. Tract. II. n. 78*; in nostro tamen casu non eadem ratio militat, nam Matrimonium non est rescindibile sicut sponsalia sunt.

## PUNCTUM VI.

### De Matrimonii irriti revalidatione.

*Quando nam impedimentum dicendum est occultum 77. Quid si Parochus, et testes conscii erant impedi- menti etc. 78. Qui fictè contraxit, an teneatur ve- rum præstare consensum 79. An qui contraxit ex metu, aut fictè, teneatur patefacere nullitatem 80. An ablato impedimento debeat pateferi nullitas ignorantis. 81. Quomodo exigi debeat consensus ab ignorante 82.*

77. — **H**ic prænotandum 1. Matrimonium probabiliter validum, habendum esse certè validum, quia præsumitur Ecclesia certè dispensare in impedimento, quoties adest vera probabilitas de Matrimonii valore, ut dictum fuit *Tom. I. Tractat. I. num. 27*. Prænotandum 2. (uti dictum est hic *num. 29*) ad revalidandum Matrimonium nullum ex defectu occulto, sufficere consensum solum externum sponsorum, omissâ assistentiâ Parochi, et testium, illa enim jam adfuit. Itaque hic notandum impedimentum tunc dici occultum, juxtà *Fagnanum*, cum non est notum nisi 4. aut 5. personis loci: sed *Lambertini* (b), cum *Tiburt. Narraus*, *The-saur.* et *Syro*, dicit esse occultum, licet sit cogni-

(a) *La Croix l. 6. p. 3. n. 54. Holzm. de Matr. t. 7. n. 271.*  
 — (b) *Card. Lamb. Notif. 87. n. 45. in fin.*

tum 7. aut 8. personis. Cæterum dicunt *Næv. Sanc. Azor. Avil. Salmant. Reginald. Molin. Tournel. Bonac. Castr. Tolet.* etc. communissimè, delictum aut factum tunc dici occultum, cum non est notum nisi majori parti Religionis, Parochiæ, aut viciniæ, ubi morantur saltem 10. personæ; et mihi constat S. Pœnitentiarium dispensasse in quodam casu quo impedimentum erat cognitum 10. personis. Hoc tamen intelligi debet, quoties prudens non adsit timor, ne impedimentum fiat publicum, quia tunc non potest dispensari impedimento ut occulto, licet esset notum tantum duabus personis, uti dicunt *Layman, Sporer, Croix, Hurtad.* Et idem dicit *Fagnanus* observandum, cum in clausulâ S. Pœnitentiariæ dicitur, *omnino occultum*, ut poni solet in impedimento *criminis*. Contrà dicunt *Sanch. et Lambert.* cum *Bonac. de Leone Girib. Tiburt. Navar.* et pluribus aliis, quod aliquandò factum est publicum materialiter, quia jam viciniæ cognitum est; sed formaliter est occultum, quia ignoratur tale impedimentum; et tunc potest etiam ad Pœnitentiarium pro dispensatione concurrere, tanquam occultum (a).

78 — His positis queritur 1. An revalidandum sit Matrimonium coram Parochò et testibus, cum tempore quo contractum fuit conjuges erant conscii impedimenti? affirmant *Sanchez, Ledesma*, et *Croix*, et alii probabiliter, quia tunc illi non fuerunt testes de valore Matrimonii, sed potius nullitatis. Sed probabilius negant *Coninch. Tambur. Gobat.* et alii, quia eorum assistentia à Tridentino non præscripta fuit ad testificandam Matrimonii validitatem, sed ad ejus celebrationem, ne quis (ut exprimit Concilium) fraudulenter plura Matrimonia ineat; imò hic est stylus Sacræ pœnit. (b).

79. — Queritur 2. An qui fecte contraxit, teneatur ad revalidandum Matrimonium per verum consensum? Affirmant *Castrop. Roncagl. Concina, Salmant.* etc. dicendo quod cum una pars jam corpus suum tradiderit per consensum, tenetur al-

---

(a) *Lib. 6. num. 1111* — (b) *num. 1112.*

- tera pars, ut æqualitatem servet tradere etiam corpus suum per verum consensum. Sed probabilius *Sanch. Navar. Henriq. Arag. Hurtad. Gutt.* etc. negant (modò Matrimonii revalidatio non requireretur ad reparanda damna ex dolo illata); ratio est; quia deficiente consensu alterius, contractus fuit nullus, et per consequens nulla intercessit alterius partis traditio, adeò ut eadem pars remaneat in eo casu libera, non, secùs ac nunquàm consensum dedisset (a).

80. — Quæritur 3. An qui fictè, aut metu contraxit (quo casu Matrimonium est nullum, ut diximus *numer. 64.*), si velit Matrimonium revalidare, verum præstando consensum, teneatur alteri parti manifestare Matrimonii nullitatem? Negat sententia communior cum *Sanchez, Lessio, Navar. Laym. Tournely, Roncaglia, Bonac. Salmant.* et aliis pluribus cum *S. Antonino*, et *S. Thomà* (b), qui loquendo de Matrimonio metu inito, dicit: *Ex consensu libero illius qui primo coactus est, non fit Matrimonium, nisi in quantum consensus præcedens in altero adhuc manet in suo vigore; undè si dissentiret, non fieret Matrimonium.* Igitur si metum passus consensum præstat jam Matrimonium revalidatur. Ratio est, quia in contractu Matrimoniali non est necessaria simultas physica consensuum, sed sufficit moralis, nempe ut una pars consensum suum præstet, dum alterius partis consensus semel præstitus adhuc perseverat in aliquo effectui, nimirum per copulam materialem, aut per cohabitationem. Idem tenet *P. Cuniliati* (c) cum *S. Bonaventurà, Paludano*, et *Soto*; atque non obstando timorem quòd si requireretur pars de novo consensu, fortè non daret; nam hic dissensus interpretativus non est verus dissensus, et interim perseverat consensus semel præstitus. Id quod fortius urget pro hac sententia, sunt duo Cánones, qui pro eà adducuntur: Primus est in *cap. Insuper 4. Qui matrim. accus. etc.* ubi in Argumento sic habetur:

---

(a) *num. 1113.* — (b) *S. Thom. Supplem. quæst. 47. n. 4. ad 2.* — (c) *Cuniliat. de Matrim. §. 29. num. 2. et 3.*



*Invita desponsata postea spontè cognita contrà Matrimonium non audiat.* Secundus est in cap. *Ad id. 21. de Sponsalib.* ubi dicitur: *Quamvis ab initio invita fuisset ei tradita, tamen, quia postmodum per annum sibi cohabitans consensisse videtur, ad ipsum est cogenda redire.* Itaque juxtà hos textus spontanea copula, vel cohabitatio æquivalet libero consensui. Advertendum verò cum *Sanch.*, *Navar. Tournely* etc. ad hoc ut pars liberum ponat consensum, oportet ut sciat nullum fuisse Matrimonium (a). Secunda autem sententia absolutè tenet, quod ad revalidandum Matrimonium manifestanda est alteri parti ejus nullitas; ità dicunt *Cdstropalaus*, et *Hurtadus* apud *Salmanticenses*, et præsertim *Pontius* cum *Comitolo* (b), qui refert super hoc quandam Declarationem Clementis VIII. qui consultus in simili casu, sic respondit. Ratio, quia consensus partis, qui liberè eum præstitit, ab initio fuit nullus, cum ceciderit super materiam inhabilem; undè cum materia postmodum habilis facta fuerit, ad Matrimonium reconvalidandum novus requiritur consensus sensibilibus signis præstandus, quando quidem primus, cum fuerit invalidus, perseverare non potuit. *Cardinalis Lambertini* (c) sentit, quod cum agatur hic de valore Sacramenti, omninò hæc secunda sententia tenenda est tanquàm tutior; tanto magis quòd idem *P. Sanchez* (ut ait) qui oppositam tuetur, probabiliorem vocat. Ratio cæterum suprà adducta videtur equidem satis fundata. Sed contrà non video, quomodò responderi possit textibus suprà relatis, et præsertim secundo in cap. *Ad id. de Sponsal.* ubi casus fuit, quod puella quædam priùs invita nupsit, deindè judicans Matrimonium nullum ad secundas transierit nuptias; at quia per annum cohabitaverat cum primo viro, præcipit Pontifex, ut ad eum rediret, urgente præsumptione quòd suâ longâ cohabitatione jam consensum præstiterit: *Quamvis ab initio* (repeto verba textûs) *invita fuisset ei tradita, tamen, quia postea*

(a) *Lib. 6. num. 1114.* — (b) *Ibid.* — (c) *Lambertini. Notif. 87. num. 69.*

*per annum ibi cohabitans consensisse videtur, ad ipsum est cogenda redire.* Papa igitur non habuit pro verâ rationem *Pontii*, quòd consensus libere præstitus à viro eo casu per se nullus esset, tanquàm cadens super materiam inhabilem; sed potius ut verum habuit, quòd ille mariti consensus, moraliter perseverans, et se conjungens cum consensu postmodum præstito à muliere per suam cohabitationem, jam primùm conjugium revalidaverant, et ideò præcepit, ut mulier ad ipsum redire teneretur. Quod autem ad Declarationem Clementis in contrarium adductam, respondet *Roncaglia* vel de eâ non satis constare, vel Pontificem eo casu ut privatam Doctorem fuisse locutum.

81. — Quæritur 4. An cùm Matrimonium est nullum ob aliquod impedimentum, ut revalidetur novo consensu, sublato impedimento per dispensationem, utraque pars conscia esse debeat nullitatis? Affirmant *Poncius, Less. et Castrop. cum Guttier. Hurt. Comit. et aliis*, quia prior consensus præstitus à parte quæ ignorabat impedimentum, fuit nullus: posterior verò ejusdem partis etiam nullus est, siquidem cùm ignoret nullitatem Matrimonii, licet præstet consensum, eriat ideò in substantiam, dùm intendit consentire in conjugem jam suum. Contrà *Sotus, Palud. Ledes. Rodrig. Ang. Salmant. etc.* dicunt non esse necessariam scientiam nullitatis Matrimonii, sed sufficere simplicem consensum præstitum à parte insciâ, aut expressè, aut saltem signis externis; quia licet prior consensus fuerit nullus ob impedimentum ab Ecclesiâ appositum, attamen fuit validus lege naturæ; quare sublato impedimento, sufficit prior consensus qui jam perseverat in effectu per copulam conjugalem, aut per cohabitationem, aut per alia signa externa. Et reverà *Lambert.* (postmodum *Benedictus XIV.*) (a) refert quoddam Breve Clementis XI. 1701. 2. April. ubi Papa revalidavit quædam Matrimonia aliquarum Nationum quæ nominabantur *Procueles, et Quartarones* nulli-

---

(a) *Notif. 87. num. 80.*

ter contracta, quin novum exquisierit consensum. Super hoc puncto quidquid dictum sit in Opere Morali (a), nunc dicimus, quòd stante declaratione Benedict. XIV. edità die 27. Septemb. 1755, novissimè à me inspectà in Tom. 4. Bullar. nuperrimè typis dato, pag. 346, ubi dicitur, facto casu quòd quidam vir contraxit nulliter Matrimonium ob impedimentum consanguinitatis, sed bonà fide, et conabatur illud roborare in scia uxore ob scandalum quod timebatur separationis, pontifex dispensasse, et simul etiam declarasse (*vide ibid.* §. 7.), quòd cùm non agatur de impedimento orto jure divino vel naturali, ut cùm datur consensus vivente altero conjuge, aut si est servus ignotus, aut erratur in personà; sed jure Ecclesiastico, in eo casu posse quidem Papam Matrimonium roborare dispensando à novo consensu præstando à parte ignorante impedimentum, pro valido habendo consensum quem illa in principio dedit, qui consensus lege naturæ erat validus; tunc enim Papa aufert impedimentum in radice Matrimonii, retrotrahendo contractum, ac si principio nullum adfuisset impedimentum: Juvat hic verba Benedicti adnotare: *Porro gratia concessa importat dispensationem in radicem Matrimonii, quæ à Romanis Pontificibus concedi consuevit, urgente magnà causà, et quando agitur de impedimento Matrimonii ortum habente non à jure Divino, aut naturali, sed à jure Ecclesiastico; et per eam non fit, ut Matrimonium nulliter contractum non ità fuerit contractum, sed effectus de medio tollantur, qui ob hujusmodi Matrimonii nullitatem antè indultam dispensationem, atque etiam in ipso Matrimonii contrahendi actu producti sunt.* Ceterum cùm hæc specialis Papæ dispensatio non intercedit, non est recedendum in praxi à primâ sententiâ, potissimum quia S. Pœnitentia in concedendis dispensationibus pro revalidandis Matrimoniis nulliter contractis, expressè apponit Clausulam: *Ut dictà muliere (aut viro) de nullitate prioris con-*

---

(a) Lib. 6. n. 2115.

374 *Tract. 18. De Sacramento Matrimonii.*

*sensûs certioratâ, uterque inter se de novo secretè contrahere valeant.* Et hæc, ut probabiliùs ait *Lamb. (a)*, est conditio positiva, non autem simplex instructio, uti contendebant *Sanch. Bonac.* etc.; nam juxtâ juris peritos ablativum absolutum importat veram conditionem, sicut habetur ex *L. A testatore, ff. de Condit.* etc. *(b)*. Hoc tamen intelligitur extrâ casum urgentis necessitatis, quia in casu quo si patefactâ nullitate Matrimonii, timeretur periculum mortis, aut infamiæ, aut scandali ob separationem, tunc observetur quod dicitur *Tom. III. Tract. XX. n. 57.* ubi dicitur in eo casu posse Episcopum dispensare, et cum necessitas non pateretur moram, juxtâ id quod dicunt plures DD. potest Confessarius declarare legem impedimenti tunc non obligare, aded ut possit Matrimonium contrahi, omisâ dispensatione.

82. — Quæritur 5. Si exigendus est consensus à parte insciâ (juxta primam sententiam præcedentis quæsitæ), quomodò exigendus est? Communis est sententia cum *Sanc. Card. Holz.* sufficere parti consciæ impedimenti, eo per dispensationem sublato, sic dicere: *Tempore quo contraxi tecum, ego verum consensum non præstiti, eum nunc præsto, vis etiam tu eum præstare?* quia consensus datus à parte insciâ in hoc casu jam non penderet à primo; et rectè potest dici quod consensus nullus, cum contractus sit nullus, non est verus consensus. Ità pariter puto cum *Bus. Salm. Caj. Nav. et Trull.* sufficere si dicatur: *Ego dubito de valore Matrimonii nostri, renovemus consensum:* quia eò casu consensus renovatus jam esset independens à primo. Admittunt etiam multi DD. dicere: *Dic mihi, si Matrimonium nostrum fuisset nullum, intendis nunc denuò mecum contrahere?* Hunc modum ego non admitterem, nisi tantum cum pars ignara ob talem interrogationem de nullitate Matrimonii in suspensionem veniret; aliter consensus illius dependeret à primo, et non esset sufficienter validus, juxtâ in superiori quæsitæ dicta.

Alii autem admittunt, etiamsi diceret: *Si non me accepisses, acciperes nunc?* Aut: *Pro mea consolatione de novo consensum præstemus nostro Matrimonio.* Sed istis modis ego penitus non assentior, dum in ipsis consensus certò non facit, ne dependeat à priori. Et tantò minùs admittere possum quod tenent aliqui, sufficere solam copulam maritali affectu præstitam. Hoc duntaxat admittunt *Sanch. Tourn. Bon. Sot. Cajet. Coninch. Salm. Ronc. Instruct. pro Confess. Tyronibus*, et alii communiter in solo casu necessitatis, nempè cùm alii modi adhiberi nequeunt sinè periculo gravis damni, ut dictum est suprà num. præced. Nec obstat tunc clausula *certioratâ parte* requisita à S. Pœnitentiariâ, quia in tali casu necessitatis præsumitur, ut sentit *Lambertini cum Tiburt. Navar.* loc. cit. Ecclesiam velle omitti talem conditionem uti moraliter impossibilem; cùm contrà sit valdè fundata sententia quòd sufficiat ad revalidandum Matrimonium nulliter contractum sola copula, aut cohabitatio voluntaria, uti habetur ex *cap. Ad id, de sponsal. cap. Insuper qui Matrim. accus. etc.* et ex *Cap. significavit, de eo qui dux.* et ubi dicitur quòd per cohabitationem, aut copulam conjugalem spontaneam subsequentem Matrimonium nulliter contractum ob vim aut metum, roboratum esse intelligitur (a). Vide n. 80.

---

(a) *Lib. 6. n. 1117.*



## PUNCTUM VII.

De dispensatione super impedimentis Matrimonii.

*In quibus impedimentis potest Papa dispensare 83. (et in quibus Episcopus; remissivè ad Tom. III. Tract. XX. num. 54. et seq.) De causis justis ad dispensandum: an omnia impedimenta explicanda sint 84. An omnes circumstantiæ, præcipuè incestus 85. An omnes gradus 86. De clausulis S. Pœnitentiariæ 87. De formulis supplicationum 88. De formulâ exequendi dispensationem 89.*

83. — **H**IC priùs sermo erit de iis qui dispensare possunt. Et I. loquendo de iis qui super impedimentis dispensare possunt, certum est Papam posse dispensare in omnibus tam impredientibus, quàm dirimentibus à jure Ecclesiastico ortum habentibus; secùs autem in iis quæ sunt juris divini aut naturalis, ut suprà dictum est *n. 81.*; nam juxtà sententiam probabiliorem, et communiorem *Suar. Pont. Castrop. Sylvest. Salas. etc.*, Papa licèt possit dispensare in iis, in quibus jus divinum oritur à voluntate humanâ, ut in votis et juramentis, non autem in his quorum jus ex solâ Divinâ voluntate pendet. Et huic sententiæ favet *S. Thomas (a)*, qui dicit: *In præceptis juris Divini, quæ sunt à Deo, nullus potest dispensare, nisi Deus, vel is cui specialiter committeret.* Hæc autem specialis commissio, ait *Castrop.*, non habetur pro datâ Pontifici per illa verba: *Quodcumque ligaveris* etc. aut per illa alia: *Pasce oves meas*, quia hæc important generalem, sed non specialem commissionem. Dicimus dumtaxat cum *Suar. Sot. Nav. Conin. Valen.* et aliis, Pontificem in aliquo particulari casu posse tanquàm doc-

---

(a) 1. 2. q. 97. a. 4.

torem universalem Ecclesiæ, et supremum voluntatis divinæ interpretem declarare legem divinam tunc non obligare (a); Vide dicta *Tom. I. Tract. II. n. 56.* Quoad potestatem quam habent Episcopi ad dispensandum super impedimentis Matrimonii, vide fusiùs dicenda in *Tom. III. Tract. XX. De Privilegiis ex n. 54. et sequentibus.*

84. — II. Loquendo de causis justis ad obtinendam dispensationem super impedimentis dirimentibus, assignantur à DD. sequentes. 1. Extinctio magnæ litis, vel odii, vel scandali inter agnatos. 2. Inæqualitas Matrimonii, nisi inter consanguineos nubatur ob defectum dotis, aut alterius. 3. Conservatio facultatum in eâdem cognatione. 4. Merita petentis dispensationem. 5. Ætas excedens 24. annos in muliere. 6. Subministratio pecuniæ, quæ à Papâ in pietatis opera impenditur, ut communiter admittunt DD. et praxis docet; et aliæ causæ id genus (b).

85. — Notandum hîc 1. ad hoc ne dispensatio sit subreptitia, in supplicatione explicanda sunt 1. omnia impedimenta consanguinitatis vel affinitatis, quæ subsunt, licet sint ejusdem gradûs, ut si cognovisset duas sorores suæ sponsæ, sicut communiùs dicunt *Sanct. Pont. Anacl. Castropal. Escob. Conc. Salm. cum Rotâ, Ronc.* (contrà alios), quia licet talia impedimenta non sint specie diversa, tamen sunt numero distincta, idèdque reddunt dispensationem difficiliorem. Nec ampliùs de hoc dubitandum est, nam Benedict. XIV. die 30. Septemb. 1755. in quodam Brevi, cujus initium, *Etsi Matrimonialis*, in *Bull. tom. 4. pag. 346. et est 50. in ord.* declaravit, et statuit irritum fuisse et fore quoddam Matrimonium celebratum cum impedimento duplicis gradûs consanguinitatis, licet super uno gradu, qui tantum in notitiam pervenerat, à Clemente XII. dispensatum fuisset. Et ità pariter eâdem ratione quandò impedimenta sunt plura, et disparata, v. g. voti, et consanguinitatis; sed sunt hujusmodi ut

---

(a) n. 1119. et 1120. — (b) n. 1129. et 1130.

copulata difficiliorem reddant dispensationem, ut si quis vellet ducere consanguineam, cum cujus sorore copulam habuerit, tunc non sufficit sejunctim, sed conjunctim oportet petere dispensationem; ita probabilius *Salm.* cum aliis cum *Salas, Rodriq.* etc. Excipiunt *Coninch.* et *Aversa*, si impedimentum contractum ob copulam cum sorore habitam est occultum, et illud patefacere esset infamiæ, quia tunc, dicunt, potest separatim obtinere dispensationes, nempe illam cognationis à Datariâ, et illam affinitatis ob copulam à Pœnitentiariâ. Sed nos dicimus, quod saltem in supplicatione ad Pœnitentiariam, debet exponi utrumque impedimentum (a). Si quis autem obtentâ dispensatione in affinitate ob copulam cum sponsæ sorore habitam, iterum illam cognosceret, non indiget novâ dispensatione, licet prima jam sit executioni mandata (b), et sicut diximus n. 67.

Debent 2. in supplicatione exponi omnes circumstantiæ quæ accidunt, et quæ reddere possunt dispensationem difficiliorem, et præcipuè si intercesserit copula inter cognatos qui Matrimonio jungi cupiunt. Et hoc non tantum si illa habita est ut facilius dispensatio obtineatur, uti certum est, sed etiam si hic finis non fuerit præhabitus, uti dicunt *Sanch. Laym. Coninch. Castrop.* etc. (contrà *Pontium, Salmant.* etc.) Et de hoc hodiè dubium omne cessat, dum declaratum est à Bened. XIV. in Bullâ *Pastor Bonus*, §. 41. ubi irritum pronunciatur Matrimonium inter consanguineos celebratum ex dispensatione obtentâ, tacito incestu (c). Item si quis obtentâ dispensatione super gradu prohibito antequàm executioni detur rem habet cum sponsâ, indiget novâ dispensatione, ut rectè dicunt *Sanchez, Guttier. Gallego*, etc. contrà aliquos, et ita declaravit S. C. mense Maji 1635; nam ex stylo Curiae, manifestato novo incestu, Pontifex solet imponere majorem pœnitentiam, et ampliorem pecuniæ com-

---

(a) *Lib. 6. n. 1138.* — (b) *n. 1140.* — (c) *n. 1134. et 1135.*



positionem exigit (a). Secùs verò si rem habet post dispensationis executionem, ut probabiliter dicunt *Lugo*, *Sanchez*, *Cajet. Arm.* et *Vega*, quia tunc executà dispensatione, et ablatà prohibitione Matrimonii, cessat etiam malitia incestus. Item si quis petit secundam dispensationem, postquam obtinuerit primam super eodem delicto, debet exprimere primam; secùs verò, si impedimentum non provenit ex aliquo crimine, vel ex crimine diverso; uti communiter *Coninc. Aver. Salm.* et *Conc.* (b).

86. — Explicandi sunt 3. omnes gradus consanguinitatis, aut affinitatis, quibus sponsi conjuncti sunt, tam gradus proximior quàm remotior : v. g. si conjuncti essent in secundo, et tertio, aut in tertio et quarto, ut communiter dicunt *Ponc. Silv. Salm. Tourn.* etc.; nam etsi dispensatio tantum requiritur pro gradu remotiore, attamen S. Pius V. in suo motu proprio *Sanctissimus* declaravit, quòd obtentà dispensatione super gradu remotiore, nullà mentione factà proximioris, impetrandæ sunt literæ declaratoriæ super proximioris. Hæ tamen literæ si non expédiantur, Matrimonium erit utiquè validum, sed illicitum (uti declaravit Benedictus XIV. in Brevi allato n. 85. *Etsi Matrimonialis*, cum inserto decreto, *Cum super*, §. 6. referens etiam sic decissum fuisse à S. C. 18. Martii 1722.), modò conjuncti non sint in primo et secundo consanguinitatis aut affinitatis gradu, in quo, sicut refert ibidem Benedictus, protestatus fuit S. Pius, se nolle dispensare, nisi expressus sit etiam primus gradus. Item notandum, quòd si fortè causa dispensationis cesset, antè ejus expeditionem, aut executionem, cessat etiam dispensatio. Secùs autem si cessat post executionem, licèt nuptiæ adhuc celebratæ non sint, quia tunc jam sublatum est impedimentum. Ità satis probabiliter *Ponc. Suar. Cast. Salm. Silv.* etc. contrà *Sanch.* et *Dicast.* qui tamen hoc uti probabile etiam admittunt (c).

---

(a) n. 1141. — (b) n. 1137. — (c) *Ibi d.*

87. — Præterea notandæ sunt Clausulæ quæ solent apponi in dispensatione S. Pœnitentiariæ. I. *Si ita est* : in quo fides habenda est postulanti, nisi constet de opposito, ut dicunt *Sanch. et Cabass.* Sed hic advertendum 1. Benedictum XIV. in Bullâ Apostolica sub die 20. Mart. 1742. declarasse expressionem et verificationem causarum ad dispensationis valorem spectare. Si autem sponsi falsò exposuissent pauperes esse, et propterea dispensatio concederetur *in formâ pauperum*, dispensatio etiam est valida; uti declaravit S. C. Conc. 9. Septemb. 1679. apud *Monacelli* (a). Advertendum 2. ad dispensandum super voto castitatis non sufficere simplicem tentationem, sed requiri vehementem incontinentiæ : etiamsi periculum sit unitus lapsus, uti rectè dicunt *Tournely*, et *Pontas* (b). II. *Auditâ prius Sacramentali Confessione* ; juxta igitur hanc clausulam necesse est, ut Confessio præcedat ut dispensationi detur executio, ut dicunt *Tourn.* et *Sanch.* III. *Sublatâ occasione peccandi*, intelligitur si occasio est voluntaria, quia si esset necessaria, sufficit (ut ait *Tourn.*) ut media eligantur, quibus ex proximâ fiat remota. IV. *Dummodò impedimentum sit occultum* : quandò autem impedimentum putandum est esse occultum, jam dictum est n. 75. V. *Injunctâ ei gravi pœnitentiâ* ; intellige juxta vires pœnitentis, ut rectè notat *Tournely*, cum *Tiburtio*, *Nav.* qui dicit posse imponi, ut per sex menses semel jejundet, aut ter Rosarium recitet quâlibet hebdomadâ, aut frequentet Confessionem (quam puto satis esse semel in mense), et hujusmodi. Quòd si unquam, addit *Tournely*, pœnitens jam debitam pro suo peccato pœnitentiam egisset, potest tunc pœnitentia moderari, modò illa non sit injuncta à Pœnitentiariâ, tanquam commutatio. VI. *Præsentibus laceratis, sub pœnâ excommunicationis latæ sententiæ*. Hæ literæ statim lacerandæ sunt, sed intellige moraliter, nempe intrâ tres dies postquàm executioni demandatæ sunt ; et intellige si Matrimonium jam contractum erat ; secùs si

---

(a) *Monac. tom. 2. tit. 16. form. 2. n. 33.* — (b) *n. 1143.*

adhuc contrahendum est, tunc enim dispensatio occultè asservanda est à Parocho, aut saltem adnotari in aliquo libro, qui à nemine alio aspici possit, ad hoc ut si opus erit (nempe si fortè impedimentum fieret publicum) possit de dispensatione impetratâ fidem facere (a).

88. — Maximè huc refert adnotare formulas ad obtinendam dispensationem à Pœnitentiariâ super præfatis impedimentis, aut votis, aut irregularitatibus.

Si petatur dispensatio super impedimentis Matrimonii, intus à parte superiori: *Eminentissime, et Reverendissime Domine*. Circa medium:

*N. N. cum carnaliter cognovisset quamdam mulierem, dedit fidem de Matrimonio contrahendo N. N. ejus sorori. Et quoniam impedimentum est occultum, et Matrimonium si cum præfatâ sorore non contraheretur, magnum eveniret scandalum, quapropter suppliciter orat Em. V. ut ei dispensationem benignè indulgeat. Responsum dignetur mittere Neapolim, (aut Neapoli Salernum), ad Rev. . . (hic exprimitur nomen et cognomen) Confessarium approbatum. Et id pro gratiâ habebit, etc.* Si verò Matrimonium est jam contractum, poterit sic scribere: *N. N. ignarus (aut conscius) impedimenti, contraxit cum muliere, matrem (sive sororem) cujus jam antea carnaliter cognoverat; sed cum impedimentum sit occultum, ideòque cum nequeat sinè scandalo separari, supplicat Em. V. pro absolutione, et dispensatione. Responsum etc.*

Circa vota castitatis aut Religionis: *N. N. cum castitatis voto sit obstrictus, et cum in gravi versetur periculo incontinentiæ, suppliciter orat Em. V. ut dignetur oratori à præfato voto dispensationem indulgere, quo Matrimonium contrahere possit etc.*

Circa irregularitates: *N. N. Sacerdos incurrit irregularitatem ob homicidium (aut abortum, aut violationem censuræ) etc.; et cum ei immineat periculum infamiæ, si à celebrando se abstinet, ideò supplicat etc.*

---

(a) Lib. 6. n. 1143.

382 *Tract. 18. De Sacramento Matrimonii.*

Foris verò in superscriptione : *Eminentissimo ac Reverendiss. Domino , Domino Colendiss.*

*Domino Cardinali Pœnitentiario Majori ,  
Romam.*

89. — Confessarius verò cui commissa est dispensationis executio, in dispensando, absolutione Sacramentali impertitâ , hâc formulâ uti poterit : *Et insuper auctoritate Apostolicâ mihi concessâ dispenso tecum super impedimento primi (seu secundi ; seu primi-et secundi ) gradûs , proveniente ex copulâ illicitâ à te habitâ cum sorore mulieris , cum quâ contraxisti ( aut contrahere intendis ) , ut Matrimonium cum illâ rursûs contrahere possis , renovato consensu , et prolem , si quam suscipies ( vel suscepisti ) legitimam declaro , in nomine Patris etc.* Sed si dispensatio est à voto castitatis dicet : *Insuper votum castitatis , quod emisisti , ut valeas Matrimonium contrahere et illo uti , in opera quæ tibi præscripti dispensando commuto , in nomine etc.* Si autem non obstante voto castitatis , aliquis jam Matrimonium contraxisset , dicet : *Item non obstante castitatis voto quod emisisti , in matrimonio remanere , et debitum conjugale exigere possis , auctoritate Apostolicâ tecum dispenso , in nomine etc.*

Si quis autem scire cupiat quibus facultatibus S. Pœnitentia gaudeat in dispensando ab impedimentis Matrimonii , in casibus Papalibus , censuris , irregularitatibus , votis , juramentis , restitutionibus incertis , vid. *Tract. XIX. n. 148.*

mmmm

# CAPUT III.

## De Divortio.

*De Divortio quoad vinculum 90. Quoad torum ; et quot causis potest fieri Divortium. I. Causa delicti. II. Morbi III. Consensus 91. IV. Timoris damni. V. Adulterii 92. Sed 1. requiritur adulterium re-  
fectum , et certum. 2. An teneatur conjux se sepa-  
rare 93. Casus in quibus non potest separari ab  
adultera 94. De jure revocandi adulterum 95. An  
possit propria auctoritate 96. Facto Divortio quis  
conjugum potest Religionem ingredi 97.*

90. — **D**IVORTIUM bifarium esse potest, quoad vinculum , et quoad torum. Divortium quoad vinculum tribus tantum casibus dari potest. 1. Si alter conjugum moritur. 2. Si duorum conjugum infidelium , alter ad fidem convertitur , saltem si infidelis sine Creatoris injuria pacifice cohabitare renuit. 3. Si antequam consummetur Matrimonium , intra primum bimestre ad hunc finem à lege concessum , alter ingrederetur Religionem. Itaque inter infideles Matrimonium licet sit validum, non tamen est indissolubile, tunc indissolubile fit, cum uterque conjux ad fidem convertitur; modo illud consumment post conversionem , aliter Papa in aliquo ( sed urgentissimo ) casu etiam illud potest dissolvere. Quod si tantum alter convertitur , hic non potest ad alias nuptias transire, nisi in casu ( ut dictum est ) quo alter non conversus velit inducere eum in peccatum , et renuit cohabitare sine contumelia Divini Nominis , ut exprimitur in *cap. Quanto , de Divort.* Hoc ita erat primævis temporibus, sicut scripsit Apostolus 1. *Cor.* 7. ex eo quia tunc temporis ob miracula quæ sæpe sæpius fideles operabantur , multi infideles ad fidem veniebant , sed hodiè , jam cessatis miraculis ita frequentioribus , rectè dicunt *Sancti. Ponc. Tourn. Conc. Salm.* etc. cum communiori , non licere amplius cum conjuge infideli cohabitare , ob pervers-

sionis periculum; quare hâc nostrâ tempestate, si conjux infidelis admonitus converti recusat; fidelis potest et debet eum derelinquere, et potest ad alias transire nuptias, ut habetur ex instructionibus Gregorii XIII., et Sancti Pii V. (a). Loquendo autem de Matrimonio inter fideles, illud certè est indissolubile, usquè dùm vivunt, nisi esset quòd alter eorum antè consummationem Religionem profiteretur. Ideòque conjugibus conceduntur duo menses à Matrimonii celebrat one, in quibus non tenentur reddere debitum conjugale, ut habetur ex *cap. Si quis Conjug. 25. quæst. 7.* et ex Trident. *sess. 24. can. 6.* Quòd si quis in Religionem se reciperet elapso bimestri, professio esset illicita, sed non invalida, ut dicunt communiter *Sanch. Ponc. Salm. Trullench.* etc. (b). Hoc tamen intelligitur, modò Matrimonium non sit necessarium ad legitimandam prolem, vel ad reparandum scandalum, aut sponsæ infamiam; nam tunc non posset sponsus eam derelinquere, nec Religionem quidem ingrediendo (c). Quæstio autem est, an Papa possit dispensatione suâ Matrimonium ratum solvere. Duplex adest sententia. Negant *Ponc. Gonet., S. Bonav. Scotus, Castrop. Sot.* etc. dicentes Matrimonium ratum ejusdem esse naturæ ac consummatum, undè lege Divinâ indissolubile est. Sed affirmant *Bellarm. Sanch. Cajet. Navar. Vasq. Conino. Salm.* etc. dicendo quòd Papa tanquàm Vicarius Christi potest dispensare in aliquibus, quæ sunt de jure Divino, sed humanos actus concernunt, urgente tamen magnâ causâ, ut esset in casu v. g. si superveniret impotentia conjugum, aut scandalum imminens, aut bonum publicum. Addunt etiam si adsit disparitas conditionis, morbus contagiosus, dissensiones perversæ, mutuus conjugum consensus, sed meritò has quatuor causas non admittit *P. Concina*, saltem si non urgeat necessitas boni publici; nam aliàs istis admissis pauca Matrimonia rata et firma restarent (d).

---

(a) *Lib. 6. num. 957.* — (b) *num. 958.* — (c) *Vide Opus nost. Edit. Venet. Lib. 6. n. 870. in fin. et alibi n. 958.* — (d) *num. 959.*

91. — Quoad Divortium *Tori*, et cohabitationis, firmo remanente vinculo conjugali, sex causis potest hoc Divortium fieri. I. Si alter conjugum aliquod committeret delictum alteri perniciosum; ut si conaretur eum in peccatum inducere, aut si à fide deficeretur; tunc enim innocens potest, imò debet eum derelinquere, si est in periculo perversionis; et si delictum est publicum, et si Divortium factum est ex Ecclesiæ sententiâ, tunc potest etiam fieri Religiosus, ut habetur ex *Can. De illâ, de Divort.* (a). II. Si alter conjugum leprâ sit fœdatus, aut alio morbo contagioso laborat, aut si sit amens, furiosus, aut maleficus, aut obsessus; dùm recte tunc potest alter separari, si manet in gravi periculo alicujusdamni (b). In casu tamen lepræ, ait *S. Th.* (c). quòd sanus tenetur reddere debitum, sed non cohabitare. III. Si conjuges ex communi consensu separantur, quod ceteroquin permitti non solet, si ambo non ingrediuntur Religionem, aut saltem nisi muliere Religionem profitentè, vir sacris inietur. Attamen si uxor 60. annos esset nata, aut etiam 50. et castitatem voveret, dicunt *Sancti. Bon. Barb. Viva*, etc. etiamsi ipsa in sæculo remaneret, posset vir ingredi Religionem, aut Sacerdotio initiari (d). Si autem conjux qui in sæculo manet nesciebat se in tali casu teneri ad vovendam castitatem, inquit *Sancti*. et alii contrà *Anacletum* apud *Ferraris* (e), quòd etiam post datum consensum; revocare potest conjugem, qui jam professus est.

92. — IV. Justa etiam causa est Divortii conjugis *sævitia*, cap. ex *transmissâ, de Rest. spol.* et hoc licèt conjux justâ indignatione sit arreptus, nempe ob aliquod delictum ipsius, uti habetur ex *c. De Benedicto 33. q. 1.* Dicunt etiam *Sancti. Salm.* et alii communiter, sufficere ad Divortium, si conjux malum grave timeret sibi, aut filiis, aut suis propinquis ab altero conjuge, aut ab ejus conjunctis; et pro malo gravi non tantum intelliguntur minæ mor-

(a) num. 973. et 974. — (b) *Lib. 6. n. 963. v. IV.* — (c) *Suppl. q. 64. a. 1. ad 4.* — (d) *Lib. 6. n. 973.* — (e) *Ferrar. Bibl. v. Conjux, n. 23.*

tis, aut gravis vulneris, cùm conjux solet eas exequi, sed etiam convicia crebra, et gravia pro personæ qualitate, v. gr. si est nobilis (a). Quæritur autem an sola verbera sufficiant ad Divortium? Dicunt communissimè *Ponc. Ronc. Sanc. Silv. Arm.* etc. licere viro aliquandò uxorem verberare, modò id frequenter non faciat, nec severè; quare dicit *Sanch.* non posse uxorem separari, cùm verbera sunt levia (excipiunt *Salm.* si uxor sit nobilis) Addunt *Ronc. Bonac. Castr.* cum eodem *Sanch.* licèt verberationes fuissent graves, sed semel illa sic vapulavit, nec timeretur probabiliter ne replicarentur (b). Advertendum tamen cum *Sanch. Salm. Castrop. Anal.* etc. talem separationem ob sevitiā non posse fieri sinè Judicis auctoritate, nisi esset quòd damni periculum moram non pateretur, aut nisi quia conjux timens damnum non posset litigare, aut judicem adire, aut non posset faciliter probare periculum (c). V. Si alter conjugum adulteraretur, uti habetur ex *Matth. c. 5. v. 32. et 19. 9. Quicumque dimiserit uxorem, nisi ob fornicationem, ... mæchatur*, et ex c. *Ex literis*, et ex c. *Significasti, de Divort.*

93. — Sed super hanc V. causā adulterii, plura notanda hie sunt. Notandum 1. ad faciendum Divortium requiri adulterium perfectum cum effusione seminis, ut dicunt probabiliter *Sanch. Fill. Bonac. Salm. Escob. Led.* etc. contrā *Sotum, Silv. Conc.* etc., quia nomine fornicationis intelligitur consummata per seminationem, quā fit carnis divisio (d). Et non sufficit de hoc aliquam habere probabilitatem, sed requiritur, ut talis adsit præsumptio, ut fundet moralem certitudinem, sicut communiter dicunt *Sotus, Sà, Viva*, cum *S. Bonav. S. Antonin. et S. Th.* (e), ut esset, si testes asserant vidisse solum cum solā, nudum cum nudā in eodem lecto jacentem, sicut dicitur in c. *Litteris*, 12. de *Præsumpt.* Et præfatæ circumstantiæ intelliguntur conjunctæ (dum non sufficit, ut sit inventus solus cum solā)

---

(a) n. 970. — (b) n. 972. — (c) *Lib. 6. n. 971.* — (d) n. 962. *Qu. II.* — (e) *In 4. D. 35. q. un. a. 3. ad 3.*



ut dicunt *Sanch. et Navar.* Nec per se sufficiunt soli tactus, amplexus, et oscula, ut dicunt *Ponc. Viva, Sanch. Palud. Barb. Nav. Castrop.* Contrà dicunt idem *Sanch. Viva, Castrop.* cum aliis sufficere pro foro conscientiae, si unus fidei integræ testetur adulterium, aut aliquod vehemens dat indicium. Et sufficit etiam (ut dicit *Castrop.* cum *Menoch.*) epistola uxoris in quâ confitetur suum adulterium. Et ità etiam puto sufficere, si aspiciatur solus cum solâ in eodem lecto (a). An autem liceat facere divortium ob sodomiam aut bestialitatem à conjugē commissam? Negant *Innoc. Abul.* etc. quia hæc crimina non sunt fornicationes. Affirmant verò communiter *Sanch. Sot. Castrop. Salmant. Conc.* etc. quia, ut ajunt, jam ille fidem conjugalem lædit carnem cum alio dividendo. Cæterum rectè ait *Poncius*, quòd hæc sententia licèt sit communis, attamen ratione non probatur, quia semper responderi potest, quòd sinè copulâ naturali caro non dividitur (b).

94. — Notandum 1. quòd ratione adulterii non tenetur vir separari ab adulterâ, dumtaxat possit ad id teneri, ut illa corrigatur, si alius non suppetet modus, ut dicunt *S. Thomas (c), S. Bonav. Cajet. Salm.* etc. Sed modò (intelligitur) ex separatione grave non esset passurus incommodum, ut communiter dicunt *S. Antonin. Ponc. Castrop. Sot. Sanch. Salm. Bon.* etc. (d). Potest teneri etiam, ut vitet scandalum, nempè ne videatur ipse peccatò uxoris consentire, uti dicunt *S. Th.* loco cit., *Sanch. Ponc. Salm.* etc. et exprimitur c. *Si vir, de Adult. et c. Non solùm*, 6. caus. 28. q. 1. Sed hoc intelligitur 1. ut dicunt *Ponc. Sanch. Salm. S. Antonin.* etc. si adulterium est publicum. 2. Ut communiter dicunt *Laym. Bonac. Tolet. Cajet.* etc. si nullus alius subest modus, quo scandalum repareretur, et modò vir justam non habeat causam ne dividatur, ut si ipse remaneret in periculo incontinentiæ, aut alterius damni gravis, aut si putaret, quòd si illam à se dimitteret,

(a) n. 961. — (b) n. 962. — (c) *Suppl. q. 62. a. 2. ad 1.*  
— (d) n. 963.

deterior fieret; undè concludit *S. Antonin. Ergò vir cum detrimento juris sui, et periculo, non tenetur (uxorem) expellere.* Imò probabiliter subjungunt *Castrop. Laym. etc. cum eodem S. Antonin.* quòd si vir jam præbuerit sufficientia indicia, quòd ipse ægrè ferat mulieris adulterium, ad nihil aliud tenetur; quia tunc scandalum aliorum esset pharisaicum (a). Ità etiam uxor tenetur diverti à viro, cùm hoc esset necessarium, non ut auferatur scandalum, quia nunquàm supponitur uxor consentire viri adulterio, sed ut ipse resipiscat. Cæterùm difficulter, dicunt *Suar. Castropal. Salm. et alii*, mulier ad hoc tenebitur; etenim difficulter uxor potest cum fructu virum corripere, et ipsa rarissimè à viro discedere potest sinè gravi incommodo; Et ità pariter difficulter ob correctionem tenentur uxores negare debitum viris; ità *S. Antonin. Bonac. Sanch. Fill. (b).* Si autem conjux adulter esset jam emendatus, et esset in periculo incontinentiæ, congruens esset ut innocens sibi reconciliaret jam emendatum, si commodè potest, ut dicunt *Salm.* Sed ego non aude- rem illam obligare ad id sub gravi (uti volunt *Bus. Conc. etc.*), dùm ex unà parte Dominus jam eam liberavit à cohabitatione; et ex alià videtur caritas non obligare cum tanto onere ad vivendum cum eo qui sibi fidem fregit. Nec obstat quod dicitur in *cap. Si quis, de adult. debet, sed non sæpè, recipere peccatricem*; dùm rectè Tò debet explicat *Glossa: Debet debito honestatis, non necessitatis (c).*

95 — Notandum 3. in quatuor casibus non potest fieri Divortium ab altero adultero, nempe 1. Si etiam ipse est adulterii reus. Est probabile tamen cum *Sanch. Conin. Bon. Salmant. Viva, etc.* quòd emendatus possit diverti ab obfirmato in adulterio, licèt sententia opposita *Poncii, Dicast. Led. Hurtad. etc.* etiam probabilis sit (d). 2. Si alter consentit adulterio alterius, uti habetur ex *c. Discretionem, de Eo qui cogn. etc.* Sed non sufficit ad præsumendum

---

(a) n. 963. v. *Quod.* — (b) n. 964. — (c) n. 965. — (d) n. 966.

talem consensum occasio, quam præbuisset vir uxori adulterandi, eam relinquendo, aut eam duriter habendo, sicut dicit textus; nec sufficit dissimulatio ejusdem, quod ille non potuisset sinè suo gravi incommodo impedire uxoris delictum, ità communiter *Sanch. Bon. Conin. Peyr. Salm.* etc. ex *S. Thomà (a)*. 3. Si uxor adulterata fuisset sinè suà culpâ, nimirum si vi oppressa fuisset (secùs verò si consensisset metu gravi, ut advertit *Sanch.*), aut si adulterium evenisset ex errore inculpabili; ità communiter DD. cum *S. Thomà (b)*. Dicit tamen *Dicast.* quod si vir crederet uxorem jam mortuam, et aliam cognosceret, non potest eum uxor respuere; sed non è converso (c). 4. Si injuria jam remissa est sivè antè, sivè post Divortium, ut præsumitur, si innocens conscius adulterii spontè coierit cum adultero, aut manet in eâdem domo, mensâ, et toro, maximè si accedant amplexus, tactus, et oscula; ità *S. Thomas (d)*, *Sanch. Salmant. Dicast. Trull.* etc. Advertunt tamen *Sanch. Filliuc. Salm. Aver. Villal.* etc. quod si reverà conjux per dictos actus non intendit remittere injuriam, in conscientiâ potest semper separari (e).

96. — Notandum 4. quod licèt Divortium factum sit ex Judicis sententiâ, conjux innocens semper habet jus ad se revocandi adulterum, sicut docent communiter (contrà *Sotum*) *Sanch. Silv. Sà, Cast. Pònc. Bon. Salmant. Gutt.* etc. cum *S. Thomà (f)* qui dicit: *Cùm divortium sit inductum in favorem viri, non aufert ei jus revocandi uxorem, undè uxor tenetur ei reddere, et ad eum redire, si fuerit revocata.* Et ad hoc non opus est (ut rectè dicit *Sanch.*) novâ Judicis sententiâ. Ceterum scitè animadvertit *Castrop.* cum *Guttier.* quod difficulter mulier adultera poterit obligari ad redeundum ad virum, quia semper potest rationabiliter timere periculum mortis, aut ne crudeliter tractetur, nisi adsint argu-

---

(a) *Lib. 6. n. 966. v. Secundus.* — (b) *Suppl. q. 73. a. 1.* — (c) *n. 966. v. Tertius.* — (d) *in 4. D. 35. q. un. a. 1.* — (e) *Cit. n. 966. v. Quartus.* — (f) *In 4. D. 35. q. un. a. 6. ad 3.*

menta probabilia in contrarium (a). Sed fit 1. dubium, an quandò conjux innocens etiam ipse in adulterium laberetur, sed facto jam divortio per sententiam, teneatur redire ad adulteram quæ eum ad se revocat? Affirmant *Ponc. S. Antonin. S. Bon. Conc. Sot.* etc. Sed probabiliùs negant *Sanc. Bon. Fill. Salm. Regin.* et alii cum *S. Thomâ* (b). Ratio est, quia primus adulter ex sententiâ jam omninò spoliatus fuit omni jure super innocentem. In eo casu tamen dicit *S. Thomas* cum aliis communiter, quòd potest Judex cogere secundum adulterum, ut iterum uniatur, ad hoc ut ita consulatur tùm illius animæ, cùm etiam scandalo aliorum (c). Fit 2. dubium an possit fieri divortium propriâ auctoritate innocentis? Tres adsunt sententiæ probabiles. *Prima* cum *Bellar. Aver. et Conc.* cum *S. Thomâ* absolute negat. *Secunda* cum *Laym. Ponc. S. Antoin. Salm.* etc. distinguit: affirmat si adulterium est notorium, sed negat si est occultum, quia tunc injustè patefieret infamia adulteri. *Tertia* cum *Sanch. Sot. Abb. Bon. Sa, Fill. Led. Reg.* etc. absolute affirmat, sive adulterium sit publicum, sive occultum. Si est publicum probatur ex *cap. Ex parte, 9. de spons.* ubi dicitur: *Nemini licet uxorem suam sine manifestâ causâ fornicationis dimittere.* Ergò licet, si fornicatio est manifesta. Si autem est occultum, probatur ex *cap. Dicit Dominus, 32. q. 1.* ubi hæc habentur: *ubicumque fornicatio est, vel fornicationis suspicio* (intelligitur suspicio illa vehemens quæ fundat certitudinem moralem, ut dictum est *num. 93.*) *liberè dimittitur uxor.* Dicitur *liberè*, ergò non requiritur nec sententia, nec licentia; nam Dominus absolute concessit eonjugi ab adultero diverti. Et hanc sententiam puto probabiliorē, saltem quandò adulterium, est ex parte uxoris; nam valdè durum esset viro in judicium adducere mulieris infidelitatem, quod esset sibi perpetuo probro. Quod si fortè Judex eum obligaret ad cohabitandum, scitè ait *Bonac.* quòd tunc ille teneretur tantum ad cohabitandum, sed non ad reddendum debitum (d).

(a) *Lib. 6. n. 967.* — (b) *Loc. cit. ad 4.* — (c) *Lib. 6. n. 967. Dub. 2.* — (d) *n. 968.*

97. — Denique notandum quòd factâ separatione per sententiam, conjux innocens potest Religionem ingredi, ut ex *cap. Agatosa*, 27. q. 2. et potest etiam Sacris initiari, ut dicunt communiter DD.; contrà adulter nequit fieri nec Religiosus nec Sacerdos, nisi de alterius licentiâ, aut nisi alter jam statum irrevocabilem assumpsisset. Aliàs etiam Religionem professus potest revocari ab innocente et teneretur reddere. Dictum est, *nisi de licentiâ alterius*, sed sufficit etiam tacita, v. gr. si alter cognoscens adulterum velle statum mutare, ipse cùm commodè possit id facere, illum non impedit. Et sufficit etiam, ut dicunt *Sanch. Conin. Bon. Salm.* et alii ex *cap. Gaudemus, de convers. conjug.* si alter requisitus pro reconciliatione, neget; imo addunt *Ponc. Sanch. Castrop.* etc. sufficere, si adulter per biennium non sit revocatus, ut disponitur in *Auth. Sed hodiè, C. ad l. Jul. de Adult. (a)*. Notandum hìc tandem quòd facto juridicè Divortio, filii educandi sunt apud conjugem innocentem; et in quantum ad expensas, si Divortium evenit patris culpâ, ejus expensis filii alendi sunt, ut exprimitur in *Auth. Si Pater, c. Divort. facto etc.* Et idem currit si Divortium factum sit matris culpâ, ut dicunt communiter *Laym. Castrop. Sanch. Silv. Pal.* etc. contrà pauciores. Advertit tamen *Sanch.* cum communi quòd ut ad has expensas teneatur, requiritur Judicis sententia (b).

---

(a) n. 969. — (b) *Lib. 6. n. 976.*

## TRACTATUS XIX.

### DE CENSURIS, ET IRREGULARITATIBUS.

#### CAPUT I.

##### *De censuris in genere.*

#### PUNCTUM I.

##### De censurarum emanatione.

*Quid et quotuplex sit censura 1. Quandò dicitur lata, et quandò ferendæ sententiæ 2. Quis potest ferre censuras? De censurâ metu inflictâ 3. Quid requiritur, ut subditus censurâ feriat etc. An Episcopi, aut Reges etc. An Communitas etc. 4. An Prælati possit extrâ Diocesim existens censuras ferre in subditos, et quid si subditus fuerit extrâ Diocesim 5. An possit censurari peregrinus 6. Quale peccatum requiritur, ut imponatur censura. De mandante, consulente etc. 7. An excuset ignorantia et metus; et an censura potest imponi pro delictis præteritis 8. De solemnitate ad censurarum promulgationem requisitâ 9. Quid si causa est falsa aut dubia 10.*

I. — **C**ENSURA definitur: *Est poena spiritualis et medicinalis, quâ delinquenti et contumaci aufertur usus quorundam spiritualium bonorum.* Censura trifariam dividitur. I. In excommunicationem, suspensionem, et interdictum. II. In inflictam à Jure, nempe à lege generali permanente, et in eam quæ est ab

*Homine*, nempè à Prælato per sententiam generalem (sivè statutum) in eos qui aliquod committunt delictum. Sententia generalis; sivè statutum respicit locum et peccata futura; quare si subditus extrà locum illum delinquit, non incurrit censuram cap. 2. de Constit. in 6. ubi sic dicitur: *Statuto Episcopi... subditi qui futurum extrà Diocesim illius committunt, minimè ligari noscantur, cùm extrà territorium jus dicenti non pareatur impunè*. Sententia autem particularis emanari solet ob præterita delicta, et in personas determinatas; ideòque hæc cùm afficiat personam, benè potest ferri in subditum etiam exemptum, citando eum per Edictum. III. In eam quæ dicitur *latæ sententiæ*, quæ statim incurritur; et *ferendæ sententiæ*, quæ non incurritur, nisi post sententiam (a).

2. — Ad dignoscendum quandonam censura est *latæ*, et quandò *ferendæ sententiæ*, dicunt DD. quòd cùm verba includunt actionem ab altero faciendam, sunt *ferendæ*: quandò aliter, sunt *latæ*; undè dicunt esse *latæ sententiæ*, quando dicitur *Ipso jure, Ipso facto, aut sinè aliâ sententiâ*; aut si verba sint præteriti aut præsentis temporis, v. gr. *excommunicamus, excommunicatus est, excommunicantur, jubemus esse excommunicatum, etc.* Contrà sunt *ferendæ sententiæ*, si verba sunt de tempore futuro, *excommunicabitur*, aut si sunt comminativæ, *sub pœnâ excommunicationis, sub interminatione anathematis* (modo ex contextu aliorum verborum oppositum non arguatur): item si dicitur: *volumus excommunicari*, aut *excommunicetur*; hoc tamen intelligi debet, quandò à jure imponitur Episcopo præceptum excommunicandi; sed quandò absolutè dicitur, *excommunicetur, suspendatur etc.*, intelligitur *latæ sententiæ*, ut communiter dicunt Bonac. Silvest. Suar. Vasq. etc. (b). Cùm autem dicitur *excommunicatus*, aut *anathema sit*, volunt Suar. et Tournely esse *latæ sententiæ*; sed Sanch. Laym. Dicast. volunt esse *ferendæ*, modò non sit

---

(a) Lib. 7. a. n. 1. ad 6. — (b) Lib. 7. n. 7. et 8.

### 394 *Tract. 19. De censuris, et irregularitatibus*

adversus aliquem errorem hæresis; utraque sententia est probabilis (a). Si autem dicatur; *maneas excommunicatus*, aut *sensus*, volunt *Nav. Silv. Henrig.* etc. neutram incurri censuram; sed *Sayrus, Bon. Salm. Con.* etc. tenent tunc dari optionem reo ad eligendam quam malit (b).

3. — Quæritur 1. Quis ferre potest censuras? Resp. Papa, Episcopi, et etiam eorum Vicarii, ut rectè dicunt *Busemb. Fagn. Suar. Sanch. Tourn.* etc. contra *Sayrum*, etc. Vicarii Capitulares, Concilia Provincialia, Prælati Regulares, et eorum Capitula, et cæteri omnes quibus concessa est facultas. Sed non Parochi, et tantò minùs Laici, et mulieres, licèt sint Abbatisæ; nam illæ non sunt capaces jurisdictionis Ecclesiasticæ (c). Quare qui censuram ferre potest, saltem sit Tonsuratus, et habeat jurisdictionem expeditam, quoad usum; adeoque Episcopus excommunicatus, suspensus, hæreticus, aut schismaticus non potest ligare aliquem censurâ, *C. Exceptionem, de Except.* Nec ejus Vicarius, c. 1. *de Offic. Vicar. in 6.* Sed excommunicatus, aut hæreticus occultus validè (licèt illicitè) censuras fert, ut communiter *Suar. Sot. Salm.* etc. imò idipsum dicunt *Bonac. Dian. Avil.* etc. de publico excommunicato, si nominatim non est denunciatus (d). Hic notandum censuram ex coactione, sive metu gravi esse validam; ità *Suar. Bon. Castr. Tourn. Salm.* etc. contra alios, sicut contra invalida est absolutio metu injusto extorta, *cap. Verbum, de Pœnitent.* (e).

4. — Quæritur 2. Quid requiritur ut quis censurâ ligari possit? Requiritur 1. ut sit baptizatus. 2. Ut usu rationis polleat; advertendum tamen hic censuras latas à jure, aut ab homine sententiâ generali non incurri ab impuberibus, nisi expressum sit in lege, ut est expressum de pueris, qui monasteria Monialium ingrediuntur, *Trid. sess. 25, c. 5.* aut qui percutiunt Clericos c. *fin. de sent. excom.* (f).

---

(a) n. 8. in *fin.* — (b) n. 62. — (c) n. 9. 10. et 11. —  
 (d) *Lib. 7. n. 12. et v. Requ. K.* — (e) n. 12. *Requ. V.* —  
 (f) n. 13. ad 15.



3. Ut sit subditus, undè probabiliùs cum *Lugo*, et aliis, ut dictum est *Tract. XVI. n. 138*. Episcopus non potest ferre censuras in peregrinos, si illi iterum post monitionem non deliquerint. Item notandum Episcopos non incurrere censuras, nisi sint speciatim nominati; c. *Quia periculosum, de sententia excommunicationis in 6*, sed hoc communiter dicunt intelligi de suspensione, et interdicto, quia de ipsis tantum fit mentio in textu (a). Reges et Reginae tantum à Papa possunt censurari, ut etiam communiter DD. (b). 4. Ut feratur in personam determinatam; hoc intelligitur tantum de excommunicatione, quia tota communitas potest quidem suspensioni, aut interdicto subjici; non autem excommunicationi, ut communiter *Castr. Bon. Salm. etc.* cum *S. Thomà (c)*; imò neque excommunicari potest per modum sententiæ aliquis incertus alicujus communitatis, loquendo de delicto jam patrato, *Ronc. Salm. etc.* Sed si prohibetur aliquod delictum in futurum sub poenâ excommunicationis, certum est omnes delinquentes illam incurrere (d). Advertendum hìc, quòd si Papa reperiret omnes communitatis reos, utique posset illos excommunicare; sed si hoc faceret Prælatus, esset illicitum; c. *Romana, de sent. excomm. in 6*, sed non invalidum, ut dicunt *Avila, Ledesma, Salm. etc.* Et *Hostiens. Jo. Monac. Archid. et Franciscus Philippus Probus, Felin.* cum *Ricc. et Rotà* (apud *Fagn. in c. Responso, de sent. excomm. ex n. 93.*) dicunt etiam hoc esse irritum, dum in cit. c. *Romana* dicitur, *Omninò prohibemus*, ac si dixisset auferimus potestatem ita excommunicandi: et *Fagn.* ipse, qui priori sententiæ adhæret, dicit ideò primam sequendam esse, quia cum hæc sit probabilis, tenenda est uti tutior. Quare Episcopus debet quemlibet reum nominatim excommunicare (e).

5. — Prælatus Regularis potest censurâ ligare suos subditos ubicumque isti reperiantur. *Suar. Avila, Tourn. Croix, Salm. etc. commun.* Sed Epis-

---

(a) n. 15. — (b) n. 16. — (c) 3. p. q. 22. art. 5. ad 2. —  
 (d) *Lib. 7. n. 18.* — (e) *Ibid.*

396 *Tract. 19. De censuris et irregularitatibus.*

copus non potest censuram ferre, dùm extrà Diocēsim moratur, ex *Clement. Quamvis, de Foro comp.* Excepto si subditi contumacia sit adēdō manifesta, ut non indigeat cognitione causæ, *can. Manifesta, 2. q. 1.* Excipitur etiam, si censura lata sit per modum præcepti, aut statuti, ad evitanda delicta communia (a). Contrà Episcopus in Diocēsi existens rectē potest per sententiam subditum alibi morantem censurā ligare, ut dicunt communiter *Bon. Coninch. Tourn. Conc. Dian. Salm.* etc. contrà *Poncium* etc. Et tunc pro citatione satis erit (ut dicunt *Salm.*) si citetur aut domi, aut in loco publico proprii territorii per *Edictum*, ut statuit *Trid.* Sed hoc intelligitur tantūm pro delictis in proprio territorio, non autem extrà illud, patris, ut dicunt *Suar. Bonae. Salm.* etc. (contrà *Sayr.* etc.) ex c. 2. *de Const. in 6. (b).* Quod si ab Episcopo lata censura fuerit in aliquem per præceptum particulare, v. g. si tale crimen committet, probabilius est eam incurrere delinquentem, licet extrà Diocēsim deliquerit, quia præceptum afficit personam, idēdque eam ligat ubicumque reperiatur, ad differentiam statuti, quod afficit locum; itā probabiliter *Suar. Laym. Bonac. Croix, Spor.* contrà *Tourn. Ronc. Avil. Holzm.* etc. quorum sententia etiam est probabilis (c).

6. — Episcopus utique potest ligare censurā peregrinum in Diocēsi suā delinquentem, *cap. fin. de Foro comp.*; semper tamen hoc intelligitur, modō reus sit factus contumax, ut dictum fuit *Tract. XVI. n. 138. in fin.* et modō Episcopus citaverit reum antequā hic profectus sit ab ejus Territorio (d). Peregrinus modō alicubi moretur animo majorem anni partem ibi morandi, incurrit censuram per modum Statuti generalis latam pro futuris criminibus, v. g. adversus furantes in Ecclesiā; secūs verò, si peregrē ibi moratur, aut si censura est per modum præcepti in casu particulari, putā adversus non revelantes latrones: itā *Suar. Silv. Sayr. Salm.* etc. (e)

(a) n. 20. et 21. — (b) n. 22. — (c) n. 23. — (d) n. 26. — (e) *Lib. 7. n. 27.*

7. — Quæritur 3. Quænam requirantur ad incurrendam censuram gravem, putà excommunicationem majorem, aut suspensionem ab omni usu, et ad longum tempus? Requiritur 1. peccatum grave, nempe quòd materia importet culpam gravem (a). Sed in dubio gravitatis materiæ obligat præceptum Superioris, quia in dubio possidet potestas ejus, ut rectè dicunt *Salm.* et *Cornejo* (b). Et cùm præceptum est impositum sub censurâ, *latæ sententiæ* jam obligat sub gravi, licèt materia non esset ex se gravis, sed esset talis, ut valdè conduceret ad finem intentum. Secùs autem si materia non esset de se gravis, et censura esset *ferendæ sententiæ*; ità *Sot. Avil. Ronc. Salm.* etc. (c). 2. Requiritur actus externus, qui posset ab aliis externè cognosci; undè si quis diceret, *ità est*, intelligendo ità hæresim confirmare, non incurrit excommunicationem, ut comm. dicunt *Suar. Fourn. Conin. Sayr. Salm.* Et debet item esse graviter externus, proindè non est excommunicatus, qui leviter percutit Clericum, licèt illi sit animus eum occidendi; ità iidem AA. (d). 3. Requiritur actus peccati consummatus, nisi aliter lex exprimat: ità etiam communiter *Sanch. Suar. Castr. Bonac. Salm. Bon. Busemb.* etc. (e). Sed hìc quæritur 1. an censura imposita mandantibus, aut consilium dantibus aliquod crimen committi, incuratur ab ipsis, quando crimen non est in effectum perductum? Resp. quòd si censura principaliter sit lata in eos, utique incurritur quoties mandatum, aut consilium est jam ab ipsis præstitum. Secùs si censura est imposita ob delictum quòd principaliter est vetitum, licèt à mandato sit proveniens; quare non incurrit mandans percussorem Clerici, si illa non evenit, *Bonac. Busemb. Salm. Croix* etc., et ità pariter excusant *Nav. Salmant. Croix* etc. eum qui dedit mandatum aut consilium ei, qui jam paratus erat delicto patrando (f). Quæritur 2. An incurrat censuram qui dubitat an suum mandatum aut consilium influxum dederit?

---

(a) n. 29. ad 31. — (b) n. 32. — (c) n. 33. — (d) n. 34. — (e) n. 36. — (f) n. 37. et 38.

### 398 *Tract. 19. De censuris, et irregularitatibus.*

Negant *Salm.* et alii, quia poena non incurritur nisi constet de delicto, et de effectu secuto : Sed affirmant *Sanch. Croix, Dicast.* etc. quia in dubio possidet delictum. Utraque sententia est probabilis, juxta dicta *Tom. 1. Tract. X. n. 45. (a)*. Quæritur 3. An incurrat censuram consilium dans, cum consilium revocat, antequam executioni detur? Affirmant *Navar. Bonac.* etc. cum *P. Concina*, qui cæteroquin oppositum docuit circa restitutionem, uti vidimus in dicto *Tom. 1. Tract. X. num. 48.* ubi nos dissensimus à *P. Concina*; sed hic etiam ab eo dissentimus cum *Suar. Castropal. Laym. Avil. Salm. Viva*, et aliis communius, quia Ecclesia non potest ligare censuris, nisi contumaces usque ad criminis executionem (b), ut in simili dicemus de irregularitate, an incurrat qui propinat venenum Clerico.

8. — Requiritur 4. ad incurrendam censuram contumacia, quæ importat contemptum censuræ. Et ex hoc 1. infertur, quod ad incurrendas censuras non sufficit scientia legis Ecclesiasticæ (et etiamsi delictum sit prohibitum lege Divinâ), sed requiritur amplius scientia ipsius censuræ; quare communiter dicunt *Suar. Cajet. Castr. Fill. Bonac.* et alii, excusare à censura ignorantiam, non solum antecedentem, sed etiam concomitantem : *concomitans* esset si quis occideret Clericum ignorans esse Clericum, sed eo animo paratus, quod si scivisset etiam occidisset (c). Excusat etiam ignorantia crassa, cum censura est lata in *audentes*, aut *præsumentes*, aut *consulib*, aut *temere peccantes*; ita *Sanchez, Escob.* etc. Imò tunc admittunt *Bon. Ronc. Sanch. Salm. Silv.* etc. (contrà sententiam *Suar. Castr. Tourn. Conc.* etc. quæ cæteroquin est communior) quod excuset etiam ignorantia affectata; et reapse id nequit dici improbable, quia in ipsâ (loquendo in rigore) non adest dolus formalis, qui inducit verum contemptum censuræ (d). Infertur 2. valde probabiliter cum *Suar. Castr. Bon. Salm. Conin.* etc. quod metus

---

(a) n. 39. — (b) n. 40. — (c) n. 43. — (d) n. 48.

gravis etiam excuset à censurâ, licèt crimen super quod inflicta est sit vetitum lege Divinâ (modò non peccetur in contemptum legis) : nam metus excusat à lege humanâ, uti humanâ acceptâ. Infertur 3. quòd censura licèt possit ferri ob crimina futura, ut communiter et valdè probabiliter dicunt *Laym. Coninc. Abbas, Spor. Viva* etc. (adversùs *Tourn.*) et uti jam practicatur ad ea vitanda; nihilominùs non potest imponi ob peccata merè præterita, et quæ non habent tractum successivum, ubi non præcesserit rei admonitio; quia aliàs deest contumacia. Hoc tamen intelligitur tantùm pro excommunicatione, dùm suspensio et interdictum possunt infligi pro delictis præteritis per modum puræ pœnæ; ut dicunt *Castr. Bon. Salm. Coninch.* etc. (a). 4. Infertur necessariam esse monitionem canonicam, cum intervallo sex dierum, aut minùs, nisi sit justa causa tempus abbreviandi. Hoc intelligitur pro licitudine, quia pro validitate censuræ sufficit, ut intercesserit monitio; ideoque aliquandò sufficit una. Item intelligitur pro censuris ab homine per sententiam particularem, nam pro aliis à Jure latæ sententiæ eadem lex est illa quæ monet, sicut probabilius dicunt *Bon. Sanch. Filliuc. Boss. Avit.* (contrà *Suar. Castr. Laym. et Salm.*); et idem valet pro censuris ferendæ sententiæ, quia in illis jam habetur monitio, et contumacia; modò reus sit citatus antè censuræ declarationem quando delictum non est omninò notorium, ut rectè advertunt *Tol. Bon.* et alii (b).

9. — Ad hoc autem, ut licitè feratur censura, debet Judex eam scripto ferre, adnotatis ibi distinctè personâ, censurâ, et causâ in specie, exhibitâ copiâ censurando, si fortè ille eam exquisiverit. Dictum est *licitè*, quia si feratur posthabitis solemnitatibus, censura erit valida, sed Judex peccati gravis fiet reus, ac erit per mensem suspensus à Divinis, et ab ingressu Ecclesiæ, c. 1. *de sent. exc. in 6.* Hoc tamen intelligitur de censuris latis per modum sententiæ præviâ citatione, et causâ cog-

---

(a) n. 51. et 52. — (b) *Lib. 7. n. 53. 54. et 55.*

400 *Tract. 19. De censuris, et irregularitatibus.*

nitâ; secûs autem de aliis, quæ feruntur per leges naturales, aut etiam per præceptum particulare, minando alicui, v. g. si aliquid tale agat. Item non comprehenduntur in hoc Judices illi, qui aliquâ urgente causâ, et dilationem non patiente, præfatas solemnitates omitterent, aut si id facerent ex ignorantia licet culpabili; dùm in textu dicitur, *Si quis temerarius*, temeritas scientiam supponit (a). Item sententia censuræ non est ferenda die festo, nisi contumacia esset adeò evidens, ut cognitione causæ opus non esset, c. *Evidentia de accusat.* (b).

10. — Notandum deniquè quòd si quis reapse esset innocens, sed contrà ex probatis justè esset censuratus, hic licet in conscientia non ligaretur censurâ, nec fieret irregularis administrando in *Sacris*, attamen in externo se gerere debet, tanquàm censuratum, ad evitandum scandalum; ità communiter *Suar. Castr. Coninch. Salm. et Croix*. Et idem est, cùm certè est censura contracta, et dubitatur de justitiâ illius, aut de absolutione ab illâ, quia tunc possidet potestas Judicis, undè reus se tenere debet uti censuratum, ut commun. *Castr. Croix, Suar. Salm. Sanch.* etc. (c). Secûs autem, cùm dubitatur an incurrerit nec ne censuram, sive dubium sit *facti*, v. g. utrùm percussio fuerit nec ne graviter injuriosa Clerico; sive *juris*, v. g. utrùm censura sit *latæ*, aut *ferendæ* sententiæ; ità pariter commun. *Sanch. Bon. Holzm. Ronc. Salmant. ex S. Thomâ* (d). Sed si Judex decerneret, v. g. aliquam solutionem sub pœnâ censuræ, reus licet pro se haberet probabilem opinionem se non teneri, tenetur tamen intrâ tempus à Judice præscriptum (aut prorogatum à creditore, qui alioquin, juxtà quod probabilius docent *Suar. Castr. Tourn. Coninc.* etc. (e), potest semper prorogare terminum). At si postea certus fieret de suâ justitiâ, tunc non tenetur nec ad solutionem, nec ad observandam censuram, ut dicunt *Avila*, et *Salm.*; peccaret tamen (ut dictum est) in publico, non remoto scandalo, si censuræ non pareret (f).

---

(a) n. 59. ad 61. --- (b) n. 65. --- (c) n. 67. et 68. (d) n. 67. --- (e) n. 64. --- (f) n. 68.

## PUNCTUM II.

### De absolutione à censuris.

*Qui potest absolvere à censuris* 11. *De censuris per sententiam generalem. An Episcopus existens extrà etc. Alia notabilia* 12. *An requiratur formula, et an præsentia censurati etc. De absolutione conditionatâ, et an extrà Confessionem* 13. *De requisitis ad absolutionem* 14.

11. — **S**I censura lata est per modum sententiæ particularis, plerumque ille tantum potest absolvere, qui tulit, aut ejus Superior, aut successor, aut Delegatus. Sed si imposita est à jure communi, tunc ab illâ potest absolvere quilibet Confessarius, uti commun. *Tournely, Sot. Coninch. Castr. Conc. Ronc. Salm.* etc. cum *S. Th. (a)*. Et hoc habetur ex *c. Nuper, 39. de sent. excomm.* ubi, cum sermo fiat de excommunicatione non reservatâ (et idem intelligitur comm. à DD. de suspensione, et interdicto personali, *Castrop. Sot. Vasq. et Salm.* cum *S. Thomâ*), dicitur à suo Episcopo, vel à proprio Sacerdote poterit absolutionis beneficium obtineri. Sub nomine à proprio Sacerdote venit quivis Confessarius approbatus, juxtâ sententiam communem (b), et uti ostensum est *Tract. XVI. num. 96. in fin.* Dictum est approbatus, quia simplices Sacerdotes ne possunt quidem ab excommunicatione minori, quicquid aliqui dicant (c). Sed hîc notanda sunt multa.

12. — Notandum 1. hujusmodi absolutionem valere pro foro tam interno, quàm externo; undè dicunt *Roncaglia, Conin. Castr. Suar. Spor. Salm.* etc. posse dari absolutionem etiam extrà Confessionem (d). Notandum 2. quemlibet Confessarium posse pariter absolvere ab omnibus censuris latis ab homine per sententiam; non jam particularem, sed

---

(a) *Supp. q. 24. art. 1.* --- (b) *Lib. 7. n. 70.* --- (c) *n. 70. et 171.*  
(d) *cit. n. 70.*

generalem : quia illæ æquiparantur censuris latis à jure, ut probabilius dicunt *Castr. Ronc. Laym. Conc. Salm. Holzm. Coninc. Bon. Croix* etc. communissimè contrà *Suar. et Filliæ. (a)*. Notandum 3. Episcopum, extrà Diocesim licèt moretur, posse absolvere subditum à censuris, cùm causæ cognitione opus non est; *Silv. Salm. Avil. etc.* Sed secùs, si quis extrà Diocesim delinquit, et per sententiam particularem excommunicatus est ab Episcopo illius loci; tunc enim non potest à proprio Episcopo absolvi, nisi de Episcopi licentiâ, *Coninc. Turrian. Diana, Salm. etc. (b)*. Notandum 4. quòd qui facultatem habet absolvendi à casibus Papalibus, non ideò potest absolvere à casibus *Bullæ Cænæ*; *Bon. Dian. Buss. (c)* Ità pariter qui potest absolvere à censuris *Bullæ Cænæ*, non ideò potest absolvere ab hæresi, ut declaravit Benedictus XIV. in Bullâ *Convocatis (d)* : ità pariter facultas data ab Episcopo pro reservatis non intelligitur pro illis quibus annexa est censura reservata, ut ait *Tamb.* Secùs autem si concessio est facta à Papâ, dùm casus Papales plerumque sunt reservati cum censurâ et propter censuram; *La-Croix, etc.* Et ità pariter facultas concessa in Jubilæo absolvendi ab omnibus censuris reservatis, intelliguntur ex communi usu etiam reservatæ ab Episcopis *(e)*.

13. — Notandum 5. Ad absolvendum à censurâ in foro interno non requiri verborum determinatam formulam, sed sufficere quodlibet externum signum (cùm cæteroquin satis non sit sola voluntas); *Suar. Castrop. Salm. etc. (f)*. Non requiritur præsentia censurati, quia certè etiam absens absolvi potest, ut habetur ex *c. De Manifesta 2. q. 1.* Sed notant *Sanch. Salm. etc.* hoc non esse faciendum, nisi ex urgente causâ; et si absolutio obtinetur per procuratorem, hic speciale debet habere censurati mandatum ad absolutionem obtinendam. Potest absolvi etiam invitus, sed communiter hoc non licet *(g)*. Notandum 6. absolutionem metu gravi, et injusto

---

(a) *Lib. 7. 72. et 73. --- (b) n. 72. --- (c) n. 110. et 111. --- (d) n. 113. (e) n. 111. --- (f) n. 116. et 117. --- (g) n. 117.*



extortam irritam esse, et metum incutientem nova excommunicatione ligari, *c. un. de His quæ vi etc.* (a). Notandum 7. absolutionem datam non satisfactâ parte, si ab ordinario concessa est, esse validam, licet certè illicitam, ut dictum fuit *Tract. XVI. n. 71.* Sed si est data à Delegato, ut probabiliùs dicunt *Suar. Spor. Vasq. etc.*, est etiam invalida, si in delegatione apposita est clausula *satisfactâ parte*; licet opinio opposita *Sanch. Castrop. Bonac. Ronc. Salm.* etiam sit probabilis, quoties in concessione non exprimitur clausula irritans absolutionem (b). Notandum 8. valere absolutionem conditionatam de futuro, sed illicitam justâ causâ non existente; *Suar. Coninch. Salmant. Ronc. etc.*, et tunc conditione verificatâ, censura aufertur (c). Contrà licetè datur absolutio cum *reincidentiâ*, nempè quòd si absolutus intrâ tempus præfixum suæ obligationi non satisfaciat, in eandem censuram reincidat. Sed tunc juxtâ probabiliorem sententiam *Laym. Coninc. Castrop. Ronc. Tourn. Salm. etc.* contrà *Suarez, Bon. etc.* requiritur nova culpa, quâ deficiente, non potest renasci illa censura quæ semel sublata est; nam non possunt censuræ sinè Pontificis auctoritate suspendi. Et idem dicunt *Laym. Coninc. Salmant. etc.* tenendum esse quandò Papa absolvit *ad omnem effectum*, licet cùm *reincidentiâ* (d). Notandum 9. probabile esse cum *Sanch. Coninc. Salmant. Ugolin. Buss. etc.* contrà *Suar. et Navarr.* quòd qui facultatem habet absolvendi à censuris in foro conscientiæ, potest absolvere etiam extrâ Confessionem (e). Sed excipiendi sunt casus Papales occulti, qui ab Episcopis non possunt absolvi, nisi in Confessione, juxtâ Declarationem Gregorii XIII. ut dicetur *Tom. III. Tract. XX. n. 32.*

14. — Notanda deniquè sunt requisita ad absolutionem. Hæc sunt I. satisfactio præcedens parti offensæ, nisi illa remiserit, aut justam recusaret satisfactionem, aut nisi reus esset impotens; quòd si tunc sinè gravi incommodo satisfacere nequiret,

---

(a) n. 119. — (b) n. 120. et 121. — (c) n. 123. — (d) n. 125. — (e) n. 126.

sufficiet cautionem præstare si potest, aut saltem juramentum satisfaciendi, *cap. Odoardus, de Solut. et cap. 23. de Verb. sign.* modò intelligitur, creditor idem incommodum non pateretur; *Navar. Coninc. Salm. etc. (a).* II. Juramentum in idem crimen de non reincidendo; *cap. De cætero, et c. Ex tenore, de sent. excomm.* Sed hoc intelligitur quandò delictum est enorme, ut percussio Clerici, usura publicè exercita; ità communiter *Suar. Castrop. Conin. etc. (b).* III. Petitio absolutionis, *c. Per tuas, de Sent. excomm.* Licèt dicat *S. Thomas (c)* quem secuti sunt *Castrop. Coninch. Salm. etc.* quòd si reus jam emendatus fuisset, Confessarius potest eum absolvere, etiam licèt invitum, cùm privilegium est concessum Confessario non pœnitenti, eum textus non dicit *non potest*, sed tantum *non debet*. An si pœnitens, contingente casu, quòd confitetur habenti facultatem, obliviscatur se accusare de reservato, remanet ab eo absolutus? communissima est sententia affirmativa; nihilominùs mihi probabilior videtur opposita, ut diximus *Tract. XVI. num. 140. (d).* Quòd si absolutio data fuisset ex causâ falsâ, tunc videndum est an talis causa sit principalis, quia si esset principalis, irrita esset, modò Judex non esset certè conscius falsitatis; ità communiter *Suar. Bon. Tournet. Castrop. Sayr. Salmant. Avila, etc. (e).*

---

(a) n. 127. 128. — (b) n. 129. — (c) 3. p. qu. 24. art. 2. — (d) *Lib. 7. n. 130. 131.* — (e) n. 132.

## CAPUT II.

### De censuris in specie.

#### PUNCTUM I.

##### De excommunicatione majore.

*De communicatione cum toleratis, et vitandis* 15. *Cum percussoribus Clericorum* 16. *De effectibus. I. Privat usu passivo Sacramentorum* 17. *II. De suffragiis etc. et an possit orari etc.* 111. *De usu activo. Sacramentorum.* IV. *De usu Divinorum officiorum, de Sacramentalibus, etc.* 18. *V. De Beneficiis, de dignitatibus, et pensionibus* 19. *VI. De communicatione forensi.* VII. *De jurisdictione.* VIII. *De sepulturâ.* IX. *De communicatione civili* (de quâ in Puncto sequenti) 20.

15. — **E**XCOMMUNICATIO, generaliter loquendo, definitur : *Censura quâ quis privatur communione Ecclesiæ.* Sed hîc distinguere oportet excommunicationem minorem à majori ; minor (de quâ loquimur in Puncto II.) privat tantum communione passivâ, sive susceptione Sacramentorum ; major (de quâ hîc est sermo, et de quâ intelligitur cum absolute fit mentio excommunicationis) privat etiam activâ, et omni genere communicationis, spiritualis et temporalis. Excommunicati autem excommunicatione majori alii dicuntur *tolerati*, alii *vitandi* ; sciendum tamen est, quod antiquitus omnes excommunicati erant vitandi, sed Concilium Constant. declaravit nominatim excommunicatos et denunciatos, et publicos percussores Clericorum aut Regularium vitandos dumtaxat habendos esse, non verò alios (a). Igitur non adest obligatio vitandi

---

(a) n. 135.

excommunicatos etiam notorios, licet hæreticos, nisi isti sint nominatim excommunicati, expressis nomine et circumstantiis personæ, atque amplius nisi sint publicè denunciati, nempe declarati excommunicati, in loco publico, aut scripto, aut voce. Sed advertendum est, quòd Concilium declaravit hanc ratione velle prospicere tantum bono fidelium, non autem excommunicatorum; undè isti semper peccant cum communicant cum aliis, tam in *Divinis*, quàm in *Civilibus*. Alii autem non peccant communicando cum toleratis etiam in *Divinis*. Et licet aliqui dicant peccatum esse communicare cum toleratis sinè causâ, saltem quia (ut dicunt aliqui) inducitur tunc excommunicatus ad actum illicitum; alii tamen communius cum *Sanch. Bon. Castrop. Sot. Sayr. Cornejo, Hurtad. Salmant.* etc., et valdè probabilius dicunt licere communicare cum illis indifferenter; quia cum toleratus est requisitus à fidelibus ad communicandum, v. gr. ad ministranda eis Sacramenta, nec ille quidem peccat: nam si peccaret, esset inutilis, aut saltem non esset generalis illa licentia data fidelibus, ut possint cum ipsis communicare, dum saltem indirectè ratione caritatis esset aliis vetita illa communicatio. Undè fit quòd Concilium dando universè facultatem fidelibus communicandi cum toleratis, indirectè concedit etiam toleratis potestatem communicandi cum aliis, cum ab ipsis requisiti sunt (a). Et quod dicitur de excommunicatis, idem dicitur à communi DD. de suspensis, et interdictis non vitandis, cum Concilium loquitur de omni censurâ. Et idem dicit *Avila* etiam de irregularibus, qui si denunciati non sunt, non sunt vitandi (b).

16. — Percussores autem Clericorum ut sint vitandi, debent esse publici, et notorii, adeò, ut dicit Constantiense, *sententiam latam à canone adeò notoriè constiterit* (eos) incurrisse, quòd factum non possit aliquâ tergiversatione celari, nec aliquo suffragio excusari (c). Itaque requiritur notorietas facti,

---

(a) *Lib. 7. n. 139.* — (b) *n. 140.* — (c) *Lib. 7. n. 135.*

nempè quòd percussio sit nota majori parti regionis vel viciniae, aut Monasterii, ubi factum accidit, aut magno numero personarum si regio est magna; cùm ceteroquin ad hoc sufficiat, ut dicunt *Castrop. Bonac. Salm. Sàyr.* etc. fama communis quæ ortum habuit à personis fide dignis; modò (ut advertunt *Viva, Ayila, et Dicastillus*) fama non sit tantùm de percussione, sed de percussione publicè patrata. Adeò ut cùm delictum est occultum, non tenetur ad vitandum percussorem qui scientiâ privatâ id cognoscit. Quæritur autem, an præter notorietatem facti requiratur etiam notorietas juris? Et est probabile eam requiri cum *Pignatel. Covar. Avil. Ronc. Salmantic. Viva,* etc. dùm Concilium dicit, ad vitandum percussorem omninò requiri certitudinem non tantùm, quòd ille Clericum percussit, sed etiam quod excommunicationem incurrit, ità ut *factum non possit aliquâ tergiversatione celari*: et insuper, *nec aliquo suffragio excusari*. Hinc fit, quòd cùm reus non est confessus in judicio, aut non est condemnatus, aut saltem crimen non est probatum, rarò accidet quòd sit vitandus; quia communiter loquendo quasi semper ille se defendere potest non incurrisse censuram, asserendo v. g. aut se ad suâ defensionem percussisse, aut tunc suâ compotem non fuisse etc.; ità ut possit aliquo suffragio excusari (a). Si quis autem est publicus percussor, aut excommunicatus denunciatus alicubi, non est vitandus alibi, ubi est occultus (modò eò notitia brevè non perventura sit), et probabiliùs dicunt *Castrop. Sanch. et Salm.* contrà alios; quia reverà factum publicum in unâ regione, in alia ubi non est notum, scandalo non est, quod præcipuè voluit Concilium vitare (b).

17. — Effectus excommunicationis majoris, alii sunt remoti et alii proximi. Remoti sunt duo. 1. irregularitas, quam incurrit excommunicatus si actum ordinis sacri exercet; 2. est quòd si excommunicatus per annum pertinaciter in excommunica-

---

(a) *L'ib. 7. n. 141. et 154.* — (b) *n. 145.*

tionem, aut aliâ censurâ perdurat, fit suspectus de hæresi, et ut talis debet privari Beneficiis; ita communiter Doctores ex Trident. *Sess. 25. cap. 3.* (a). Effectus autem proximi sunt novem, et I. Excommunicatio privat usu passivo, nempe potentiâ Sacramenta suscipiendi: modò non excuset timor gravis damni, et non sit in contemptum censuræ, communiter *Bonac. Laym. Fill. Salmant.* etc. (b). Communissima autem est sententia, et est verior cum *Cajet. Castrop. Bon. Coninch. Salm. Croix* etc. contrà aliquos, validè posse absolvi Sacramentaliter antequam absolvatur à censura, cum omnia requisita concurrunt (c). Hic notandum quòd minister conferens Sacramentum excommunicato tolerato, peccaret contrà jus divinum, ministrando Sacramentum indigno, non autem contrà Ecclesiæ præceptum juxtà dicta *num. 15*, cum per se licitum sit communicare cum toleratis etiam in divinis. Ex quo probabiliter infertur licere ministrare Sacramentum excommunicato, quandò iste esset in bonâ fide. Item dicunt *Suar. Navar. Castrop. Bon. Salmant. Croix, Coninch.* etc. quod in dubio an quis nec ne sit absolutus ab excommunicatione, potest illi Sacramentum ministrare si petat; maximè si affirmat se fuisse absolutum, quia in dubio nemo præsumitur mendax. (d).

18. — II. Privat posse lucrari Indulgentias, participatione suffragiorum communium, et orationum publicarum Ecclesiæ, sed non privatarum: hinc potest orari privatim pro excommunicato, etiam à Sacerdote in Missâ: modò iste oret, non tanquàm Ecclesiæ minister, sed ut persona privata: *S. Thomas* et alii communiter (e). Quæritur an possit orari nomine Ecclesiæ pro toleratis? Negant *Bellarmin. Suar.* etc., sed affirmant *Nav. Castrop. Salm. Conc.* etc. ex concessione factâ à Constantiensi, ut indistinctè communicari possit cum toleratis. Utraque sententia est probabilis (f). Contrà non puto probabilem

---

(a) *n. 157.* — (b) *n. 158.* — (c) *n. 159.* — (d) *n. 160.* —  
(e) *n. 162.* — (f) *n. 164.*

babilem opinionem aliquorum quòd possit publicè orari pro vitandis qui sunt in statu gratiæ, cum per ipsos non stet, quominus absolvantur (a). III. Privat usu activo Sacramentorum, sive administratione eorum. Hoc intelligitur de administratione licita, nam de valida certum est excommunicatum validè administrare Sacramenta, ac assistere Matrimonio, sicut diximus *Tract. XVIII. n. 71.* præter Sacramentum Pœnitentiæ, quia excommunicatus vitandus omni jurisdictione privatur, *Cap. omnis de Pœnit. et rem.* Et hoc etiam in morte, ut diximus *Tract. XVI. n. 92.* Dico vitandus, quia toleratus non privatur jurisdictione, *Salmant. Croix*, cum aliis communiter (b). Quoad autem administrationem licitam, toleratus quoties est requisitus, licitè Sacramenta ministrat, hinc probabiliter dicit *Cast.* quòd occurrente die festivo, si alter desit Sacerdos, potest toleratus celebrare, modò absit scandalum; dùm juremeritò tunc præsumitur populus petere ab eo Missam (c). Excommunicatus contra qui illicitè administrat Sacramenta fit irregularis, *Cap. ult. de Cler. excom. ministr.* Et idem currit si benedicit nuptias, aut solemniter baptizat; secùs verò si privatim. Dubium fit inter DD. an vitandus administrando Pœnitentiam fiat irregularis? Alii negant; sed nos affirmamus cum sententiâ communissimâ; ex *Can. Si quis, 11. q. 3. (d).* Similiter fit irregularis sacerdos excommunicatus, qui coram se celebrare alium facit, ex *Cap. Tanta, de Excess. Præl. (e).* Qui recipit Sacramentum à vitando peccat graviter, et incurrit excommunicationem minorem, et qui recipit Ordinem incurrit etiam suspensionem ab Ordine recepto, *Cap. Cùm illorum §. fin. de sent. excomm. IV.* Privat usu divinorum officiorum, ideoque excommunicatus non solùm privatur fructu illorum, sed nec potest quidem illis adesse sinè peccato gravi; et dicit *S. Thomas (f)*, quòd, si fortè incepisset Sacerum, et non adhuc consecrasset, teneatur illud deserere; modò non excusaretur à neces-

---

(a) n. 163. — (b) *Lib. 7. n. 166. ad 168.* — n. (c) n. 169.  
 — (d) n. 171. — (e) n. 175. in fin. — (f) 3. p. q. 83. a. 6. ad 2.  
*Tom. 11.* S

sitate evitandi scandalum, aut ab aliâ justâ causâ, ut addunt *Suar. Bonac.* etc. (a). Ceterum excommunicato non vêtatur usus Sacramentalium, non jam ut ab illis fructum capiat, sed ut illa veneretur. Potest etiam dùm recitantur Divina officia Ecclesiam ingredi ex aliquâ justâ causâ, verb. gr. ut satellitum aufugiat manus, et tunc potest, privatim tamen, orare, sicut probabiliter dicunt *Caj. Palud. Turr. Coninc. Salm. et Bonac.*, quia orando privatim, jam non dicitur communicare cum aliis, et tunc non tenentur Sacerdotes cessare à Divinis, nec eum foràs expellere (b). Excommunicatus tamen si omninò vellet adesse sacro, aut aliis publicis functionibus, proculdubio peccat graviter, et si monitus nolit exire, incurrit excommunicationem Papalem, *Cap. Eos, de sent. exc.* Et idem valet de interdicto, et de omnibus iis qui impediunt excommunicatum aut interdictum ne discedant: *Castr. Bon. et Salm. ex cap. Gravis, eod. tit.* (c). Item advertendum, quòd si excommunicatus tenetur ad horas Canonicas, licet ex solo titulo Beneficii, et ob excommunicationem nequit exigere fructus, non excusatur ab illis, quia hoc culpâ suâ evenit; *Suar. Cast. Nav. Laym. Croix, et Salm.* qui notant unâ cum *Avila*, et *Covarr.* quòd si ille omninò sit privatus Beneficio, tunc non tenetur ad horas Canonicas, et excommunicatus recitando officium, non potest dicere, *Dominus vobiscum*, sed dicere debet, *Domine, exaudi orationem meam*, secùs peccaret, licet non nisi venialiter, uti communiter volunt *Bonac. Salm. Tournel. Gonet, Cornejo,* etc. Imò *Avila*, et *Nav.* excusant ab omni culpâ, si illud recitaret sinè socio (d).

19. — V. Irritat omnem collationem, et electionem excommunicati ad Beneficia; c. *Postulastis, de Cler. Excom. min.* Et hic notandum 1. quòd non solum peccat graviter qui Beneficium recipit, sed etiam ille qui ei illud confert, et hic præter excommunicationem minorem, incurrit suspensionem à collatione,

---

(a) *Lib. 7. n. 173.* — (b) *n. 174.* — (c) *n. 176.* — (d) *n. 178.*



*Cap. 2. Punct. i. De Excommunicatione M. 411*

*cap. cit.* Notandum 2. hoc intelligi cùm tempore præsentationis, aut electionis Beneficii electus erat jam excommunicatus; aliàs validè acceptat Beneficium, et possessionem capit, licèt tempore acceptationis reperiatur excommunicatus, quia acceptatio et possessio non sunt actus jurisdictionis; ità *Cast. Av. Bonac. Covar. Salm.* (contra *Suar.*). Contrà collatio facta excommunicato est irrita, licèt tempore acceptationis reperiatur absolutus ex sententiâ communi; undè tunc requiritur nova collatio, aut saltem (ut dicunt *Less. Nav. Salm.* etc.) ut collator perseveret in primâ intentione. Notandum 3. Excommunicatum teneri ad restituendos omnes fructus perceptos ex Beneficio, licèt postea absolutus sit, et iterum obtineat idem Beneficium, quod prius suscepit in malâ fide. Si tamen jam satisfecisset per se aut per alium officio illi adnexo, dicunt *Coninch. Salmant. Bonac.* etc. posse sibi retinere fructus perceptos tanquàm vacantes, et debitos successorì in Beneficium; sed hoc intelligitur pro locis ubi non viget lex spoliì. Notandum 4. quòd quæ dicta sunt de Beneficio, intelliguntur etiam de dignitatibus Ecclesiasticis, Episcopatibus, Prioratibus, et similibus; *Suar. Castrop. Bonac. et Salmant.* An autem idem currat pro dignitatibus secularibus affirmant *Bon. Salm.* etc. Sed probabiliter etiam negant *Castrop. Filliuc. Henriq. et Coninch.*, quia reverà non adest lex quâ declarentur invalidæ pensiones Ecclesiasticæ, quæ dantur ob aliquod officium Ecclesiasticum, verb. gr. Vicario, aut coadjutori Episcopi; *Suar. Castropal. Salmant.* communiter (a). Notandum 5. non solùm vitandos, sed etiam toleratos esse inhabiles ad beneficia, dignitates, et pensiones juxtà allata superiùs, sicut rectè dicunt *Suar. Tourn. Av. Castr. Coninch. Salm.* etc. contrà *Nav. Less. Giball. Hurt.* etc. dùm verum est quòd per Constantiense est concessum aliis communicare eum excommunicatis toleratis, sed ipsi excommunicati semper sunt incapaces, non enim per se possunt suo muneri satisfacere. Ego exciperem casum dumtaxat si illud munus esset exercendum in com-

(a) n. 180.

modum collatoris; undè rectè animadvertunt *Salmanticenses*, quòd per ipsummet Concilium sublata sit su pensio imposita ex cit. *Cap. Postulastis*, conferenti Beneficium tolerato (a). Notandum 6. irritam esse collationem factam excommunicato, licèt ille invincibiliter ignorasset excommunicationem, quàm innodatus erat, aut crederet jam esse absolutum; *Sanch. Less. Suar. etc.* Probabiliter tamen tenent *Cabass. Fab. Salm. etc.* validam esse collationem hujusmodi excommunicato factam à superiore cum absolutione ad cautelam *ad effectum præsentis collationis* (b). Notandum deniquè quòd ille qui excommunicatus fuit post collationem, non tenetur ad restituendos fructus Beneficii antè judicis sententiam, quoties ipse per se, aut per alios adimplevit onera: ità probabilius *Sanch. Tourn. Laym. Bon. Castrop. Coninc. Salm. Av. etc.* contrà *Suar. Concin. etc.* ex generali ratione, quòd poenæ quæ requirunt actionem aliquam rei indigent semper sententiâ, saltem declaratoriâ; vide dicta *Tom. 1. Tract. 11. num. 25.* et dicenda in *Appendice III. de Exam. etc. num. 64.* Contrà certum est, quòd post sententiam tenetur ad fructuum restitutionem donec absolvatur; modò paupertate non laboraret, et eos applicasset sibi; hoc potest sibi prodesse duntaxat in casu quo per se non staret, quominus absolvatur, *Laym. Sylvest. Castr. Salm. Av. etc.*

20. — VI. Privat communicatione forensi. Quare excommunicatus nequit esse Judex, Scriba, Testis, Advocatus, Procurator, nec potest agere in judicio; et licèt toleratus etiam possit repelli, attamen hìc validè agit, *Cap. Pia, de Sent. exc. in 6.* Cæterùm etiam vitandus semper potest defendi ex se ipso, et etiam actorem convenire in jus. Imò ut dicunt *Avila, Castrop. et Salmantic.* toleratus potest defendere etiam alios. Sententia Judicis vitandi, non tantùm est illicita, sed etiam invalida. Testificatio tamen vitandi non est irrita, sed potest repelli. Excommunicatus nec potest esse tutor, nec curator,

---

(a) n. 181. — (b) n. 182.

**Cap. 2. Punct. 1. De Excommunicatione M. 413**

nec executor testamentarius (si repellitur) nec licitè potest inire contractus, nec testari, licèt contractus et testamentum sint valida (a). VII. Privat jurisdictione : quare excommunicatus (intellige vitandus) non potest nec legem ferre, nec sententiam, nec præsentationem, aut electionem ad Beneficia ; quia hæc sunt omnino irrita. Dico *Vitandus*, quia actus tolerati sunt validi, sed illiciti, nisi eos excuset necessitas (b). VIII. Privat sepulturâ Ecclesiasticâ, adeò ut cadavera excommunicatorum dehumanda sint à sepulturis (quoties certò secerni possunt) ; et ubi sepultum est cadaver vitandi (non autem tolerati, licèt hæretici, sed non nominatim denunciati) non potest celebrari, nisi prius reconcilietur Ecclesia, *Cap. Sacris, de sepult.* Quòd si excommunicatus non toleratus decessisset cum signis poenitentiae, ejus cadaver absolvendum est à censurâ, et sepulturæ postea mandandum ; *Castropal. Salm. et Cornejo*. Qui sepelit excommunicatum, incurrit excommunicationem majorem, ex *Clement. 1. de Sepult.* Illi verò qui funus associantur, aut cantant preces, et probabiliter etiam illi qui curant sepeliendum, ut dicunt *Cajet. Bonac. Av. Salmant.* etc. peccant quidem graviter, sed non incurrunt censuram (c). IX. Privat denique excommunicatio etiam communicatione civili cum fidelibus, sed de hac loquemur Puncto sequenti.

---

(a) *Lib. 7. n. 184* — (b) *n. 185.* — (c) *n. 186.*

## PUNCTUM II.

De excommunicatione minori, et ejus effectibus,

*Actus, quibus incurritur excommunicatio minor, sunt : I. Os. II. Orare. De expellendis vitandis. III. Vale. De resolutione, et rescriptione IV. Communio. V. Mensa 21. Quale peccatum sit communicare cum vitando, et quandò est grave 22. Pro quibus causis potest quis communicare cum vitando. I. Causa utilitatis. II. Matrimonii 23. III. Subjectionis 24. IV. Ignorantiæ 25. V. Causa necessitatis 26. De effectibus excommunicationis minoris; et an vetet Sacramenta ministrare, et Beneficia recipere 27.*

21. — **E**XCOMMUNICATIO minor ob unicam causam incurritur, nempe ob communicationem cum excommunicato vitando in actibus comprehensis in versu sequenti, declaratis jam in *Canon. Excommunicato* 11. quæst. 3.

I. *Os*, II. *Orare*, III. *Vale*, IV. *Communio*, V. *Mensa negatur*.

I. *Os*, intelligitur omne colloquium, aut per literas communicatio; et quodlibet aliud benevolentiae signum, ut est dona mittere, aut recipere, etc. ita D D. (a). II. *Orare*, intelligitur quaecunque communicatio in *Divinis*, ut est assistere publicis functionibus Missarum, Processionum, Benedictionum, Horarum Canoniarum, etc. Hinc est quòd Clerici in eo casu, cùm celebrantur Divina officia; aut functiones publicæ fiunt, tenentur illum expellere, si possunt, sin minùs, debent cessare à *Divinis*, et Sacerdos Missam interrompere, nisi incoeperit canonem; sed si illum incoepisset, probabile est quòd possit proseguire, sicut dicunt *Suar. Henriq. et Busemb.* licet posset Missam inter-

---

(a) n. 189.

rumpere, sicut volunt *Bonac.* et *Cornejo*: quòd si jam consecrasset, certum est debere Sacerdotem Missam prosecui, sed tantum usquè ad Communionem. Aliàs præfati Ecclesiastici incurrunt excommunicationem minorem, et peccant graviter (a). Recitare tamen officium cum excommunicato vitando privatim, probabiliter *Suar. Bon. Coninch. Busemb. Salm.* etc. excusant à mortali. An autem seculares, qui intersunt Missæ cui assistit excommunicatus vitandus peccent graviter; affirmant *Bon. Salm. Avila*, et *Dian.* et excusant tantum ob parvitatem materiæ, si v. gr. assistentia esset usquè ad Evangelium; Sed universaliter eos excusant à gravi *Suar. Castr. Salm. Filliuc. Sayr. Henriq.* etc. dicendo talem communicationem esse remotam, et accidentalem: modò ipsi non sint causa cur excommunicatus ibi assistat. Nemo tamen eos excusat à veniali, et ab excommunicatione minori (b). Contrà communiter *Bon. Fill. Henriq. Suar. Coninc.* etc. excusant ab omni culpâ eum qui oraret in Ecclesiâ in loco separato, aut alii assisteret Sacro ab illo cui assistit excommunicatus (c). III. *Vale*, intelligitur quælibet salutatio, aut honoris significatio, sed communissimè *S. Antonin. Nav. Maj. Fill. Sot. Avila, Sayr. Bonac. Castr. Salm. Escob.* etc. admittunt probabile esse licere certa signa urbanitatis exhibere ergà excommunicatum; quia hujusmodi actus non exhibentur, ut ei honor præstetur, sed ut inurbanitatis, et contumeliæ nota vitetur; maximè si excommunicatus est superior, aut persona publica, putà Episcopus, Prætor, etc. (d). An autem liceat rescribere, aut resalutare excommunicatum; affirmant *Fill. Henriq. Bus. Castr.* etc., quia hi actus (uti dicunt) sunt potiùs debiti solutio, quàm honoris significatio; sed saltem quoad rescriptionem videntur probabilius negare *Avila, Bonac. Holzm. et Salm.*, quia excommunicato non ampliùs debentur hi convenientiæ actus in pœnam sui criminis. Dixi *saltem quoad rescriptionem*, quia quoad resalutationem non auderem damnare con-

(a) n. 176. et 177. — (b) Lib. 7. n. 176. — (c) n. 173. — (d) n. 192.

trariam uti improbabilem, dùm resolutio illa non videtur propriè actus honoris, et contrà negatio illius videtur actus inurbanitatis et contemptus: rescribere verò videtur vera communicatio (a). IV.

*Communio* comprehendit omnem contractum, societatem, et cohabitationem; sed cohabitatio intelligitur per modum societatis; quia sub eodem tecto dormire, et etiam in eodem lecto, tantùm ad quiescendum, non est vera communicatio, nec vetitum, ut probabiliter dicunt *Suar. Bonac. Castr. et Salm.* (b). V. *Mensa*, intelligitur, cùm invitatus ad mensam ab excommunicato, ejus domum adit, licèt in diverso cubiculo accumbat; *Suar. Bonac. Salm.* secùs verò si casu in hospitio, domo, aut itinere accideret ut cum excommunicato accumberet, etiam in eadem mensa, uti probabiliter dicunt *Suar. Layman, Sayr. Spor. Caströp. Holzman.* etc. (c).

Quæritur 1. quale peccatum committit, et qualem excommunicationem incurrit qui communicat cum excommunicato vitando? Respondetur generaliter loquendo, quoad peccatum, peccat tantùm venialiter. Sed hic notandum quòd sufficit peccatum veniale ad incurrendam excommunicationem minorem; sed quandò veniale non est plenè deliberatum, illa non incurritur; nam nulla pœna incutitur propter illos actus, qui non sunt perfecti in genere suo (d). Item notandum quòd licèt in Confessione possit omitti veniale, attamen non potest omitti illud ob quod incursa est excommunicatio, quia cum illà non potest Sacramentum suscipi (e). Tribus casibus autem cum excommunicato communicans peccat graviter, ut dicit *S. Thomas* (f) cum aliis communiter.

1. Si communicat in contemptum prohibitionis Ecclesiæ. 2. Si communicat in *Divinis* in materiâ gravi, ut diximus num. 22. ad Verbum II. *Orare*. 3. Si communicat in crimine criminoso; nempe si communicat cum excommunicato in eodem crimine ob quod fuit ille excommunicatus; undè peccat graviter concubina quæ denuò rem habet cum illo qui fuit excommu-

---

(a) n. 193. — (b) n. 194. — (c) n. 195. — (d) n. 153. — (e) n. 154. — (f) 3. p. q. 23. a. 3.

nicatus ob concubinatum, aut consilium, vel favorem ei præbet, ne ab illâ se removeat; ita communiter *Bonac. Suar. Salm. etc. ex Cap. Nuper de sent. exc.* An autem peccet graviter qui communicaret cum excommunicato frequenter in civilibus; probabiliter negant *Nav. Castr. Sayr. Avila*, etc., quia communicatio in civilibus est tantum veniale, et venialia quantumvis multiplicentur ad mortale non attingunt. Sed probabilius affirmant *Suar. Bonac. Holzm. Filliuc. Coninc. Spor. Salmantic. etc.*, quia etiam frequens communicatio in civilibus non judicanda est res levis, dum in *cap. 7. de Except.* dicitur quod qui communicat in civilibus cum excommunicato, *in periculum Animæ suæ communicat.* Animadvertunt tamen præfati AA. cum *Tournely*, quod ad peccandum graviter in hoc, non sufficit, ut aliquis frequenter, etiam per longum tempus, sed se junctim communicet cum excommunicato; sed amplius requiritur ut habeat propositum virtuale saltem sæpius communicandi cum eo (a). Ità etiam quoad excommunicationem, generaliter loquendo, qui communicat cum vitando incurrit solam excommunicationem minorem. Sed tribus in casibus incurrit majorem: 1. Si Clericus scienter communicat in *Divinis* cum excommunicato nominatim à Papâ, et denunciato, c. *Significavit de sent. excomm.* 2. Quando excommunicatio est imposita alicui, et una simul in participantes, quia tunc qui communicat cum illo post mentionem incurrit excommunicationem majorem; *S. Thomas, Castr. Salm. Avila* etc. communiter. 3. Si communicat in *crimine criminoso*, ut paulò antè explicatum est, et in hujusmodi casibus, non potest absolvi, nisi ab illo à quo absolvendus est principalis (b).

23. — Quæritur 2. Quibus de causis liceat in civilibus communicare cum vitando? Resp. ob 5. causas contentas in sequenti versu:

I. *Utile*, II. *Lex*, III. *Humile*, IV. *Res ignorata*, V. *Necesse*.

(a) *Lib. 7. n. 198.* — (b) *Lib. 7. n. 199.*

418 *Tract. 19. De Censuris, et Irregularitatibus.*

Et I. *Utile* intelligitur utilitas aut ipsius excommunicati, ut resipiscat, aut ut aliud spirituale subsidium recipiat (quâ ratione licet præmittere alia verba aut signa benevolentiae, ideoque licet sine dubio prædicare eo præsentem); aut utilitas aliorum, ut ab excommunicato recipiant aliquod utile spirituale, aut temporale; quare licet audire ab eo confessionem, aut exposcere consilium (si alius idoneus non extat), aut eleemosynam, aut medicinam, et ita etiam cum eo societatem antea initam continuare, non verò novos cum illo instituere contractus; *Suar. Castr. Av. Bonac. Salm. Con. etc. (a)*. II. *Lex* intelligitur Matrimonialis propter quam conjuges (sed non sponsi) possunt ad invicem communicare, adhuc quoad petendum, aut reddendum debitum; *S. Thom. et alii communiter ex cap. Inter alia, 31. de sent. excomm.* Sed hic notandum quòd non licet communicare cum conjuge excommunicato, si factum sit divortium, et si excommunicatio est lata ob hæresim, aut ob dubium de Matrimonii valore; ita commun. DD. (b). Præterea non licet communicare in *Divinis*, dum *Innoc. III.* in cit. cap. 31. declarando textum *Greg. VII. in. c. Quoniam, 11. q. 3.* ubi dispositum erat, quòd uxores, filii, et servi possent communicare in iis, in quibus solebant communicare, dixit, hoc intelligi dumtaxat, in quantum hoc necessarium est ad præstandum obsequium ei debitum; sed communicare in *Divinis*, non est obsequium debitum; ita rectè *Cajet. Bon. Arm. et Concin.* contra *Sanch. Salm. etc. (c)*. Dubitatur autem, an conjux qui scienter nupsit cum excommunicato, possit postea communicare? negant probabiliter *Castr. Tourn. Salm. Cone. cum S. Thomâ (d)* ex præfato cap. 31. de sent. excomm. ubi dicitur quòd personæ subjectæ possunt communicare cum excommunicato eodem modo ac prius, ergò non possunt, si subiectio contrahitur post excommunicationem. Nec obstat textus *Innocentii*; nam *Innoc.* tantum respondit ad id quod ab eo quæsitum fuit, nempe, an

---

(a) num. 201. — (b) n. 202. — (c) n. 202. *Dub. 1.* — (d) *Suppl. q. 23. a. 1.*



teneretur communicare, vel an tantum possent, si velint; Pontifex respondit quod tenebantur, sicut tenebantur ante excommunicationem; nihil autem locutus fuit de iis qui tempore excommunicationis in servitium ingressi sunt. At pro his facit textus Gregorii, qui concedit subditis communicationem, propter debitam subjectionem, unde nihil refert, an ista contracta sit ante vel post excommunicationem (a).

24. — III. *Humile*, intelligitur subjectio debita filiis, licet emancipatis, ut probabiliter dicunt *Suar. Bon. Castr. Salm.* etc. contra *Sotum*. Et idem dicunt de nepotibus, et pronepotibus, et etiam de affinibus in eodem genere, ut sunt nurus, privignus, etc. Idem currit de Religiosis cum Prælato in iis rebus, quorum nequeunt evitare communicationem. Idem de militibus cum suo Duce, et de servis cum suo domino; ita communiter DD. Sed hic notandum 1. peccare servos qui malâ fide in excommunicati famulatum se ingerunt, nisi excuset necessitas; *Suar. Castr. Salmant.* etc. 2. Quod ipsi communicare nequeunt in iis quæ ad debitum famulatum non conducunt; quare peccant, si communicant in *Divinis*, modò ad hoc non teneantur ob debitum ipsius famulatus, prout eos commitari ad Ecclesiam, aut ex pacto speciali; v. gr. inserviendi sacro, coadjuvandi eos in Officii recitatione, etc. ita *Suar. et Salm.* 3. Notandum, quod servi excommunicati ejusdem domini non possunt ad invicem communicare, nisi in quantum necesse est ad communem cohabitationem; et hoc in solo casu quod non possent commodè invenire alium dominum; *Nav. Suar. et Conc.* 4. Notandum quod sicut filii, uxores, servi etc. possunt communicare cum excommunicato; ita parentes, viri, et domini possunt communicare cum subditis excommunicatis; *Sotus, Castr.* et alii cum *S. Thomâ* (b).

25. — IV. *Res ignorata*, intelligitur ignorantia, sive inadvertentia, vel legis, vel facti; *Can. Quo-*

---

(a) n. 202. v. *Dub.* 2. — (b) *Lib.* 7. n. 202. et 203.

niam II. q. 3. An autem excuset ignorantia crassa, negant. *Bonac.* et *Salm.* Sed probabiliter; et communius affirmant *Suar Conin.* *Hurt.* et *Holzman*, primò, cum excusentur ignorantes à citato textu, intelliguntur etiam culpabiles; dùm qui inculpabiliter ignorant procul dubio excusantur ex se. Secundò, quia in textu cum dicantur excusari ignorantes: *Quoniam multos pro causâ excommunicationis perire quotidie cernimus*, etc. ergò Papa intendit excusare etiam culpabiles, quia qui ignorant inculpabiliter, nec peccant, nec perire possunt. (a).

26. — V. *Necesse*, intelligitur quæcumque necessitas gravis, sive spiritualis, sive temporalis, tam communicantis, quam excommunicati, aut aliorum; *Avila*, *Say.* *Lex. Bon. Castr. Salm.* etc. communiter ex cit. can. *Quoniam*, et ex cap. 34. de sent. excomm. Et ita pariter (ut rectè subjungunt *Salm.*) excusat necessitas per coactionem metus gravis injustè in-  
eussi (b), juxta dicta *Tom. I. Tract. II. n. 44.* Denique hic animadvertendum, non esse obligationem vitandi excommunicatos; nisi constet eos, esse vitandos saltem ob publicam famam, aut per duos testes fide dignos, *Sanch. Nav. Bonac. Castr. Salm.* etc. cum *Tournely*; qui contrà se itè animadvertit, quòd in dubio, an Confessarius sit nee ne vitandus, non licet apud illum confiteri, ob periculum, ne invalidè absolvatur. Cæterum dicunt AA. citati, quòd licitè possumus communicare cum eo qui excommunicatus fuit, quoties unus testis fide dignus, imò si ipsemet excommunicatus (si cæteroquin est fide dignus) asserat fuisse absolutum (c).

27. — Loquendo tandem de effectibus excommunicationis minoris, hi duo sunt, alter directus, indirectus alter; *Directus* est privare sub gravi usu passivo, nempe receptione Sacramentorum. Sed hic adnotare oportet, quòd licet (ut à principio dictum est) excommunicatio minor jure dumtaxat incurratur ob communicationem cum excommunicato vitando, nihilominus hoc non, impedit

---

(a) *Léb. 7. n. 205.* — (b) *num. 206.* — (c) *num. 207.*

(ait *Layman*), quominùs Episcopus ob alias justas causas interdicit alicui usum Sacramentorum. Quæritur autem, an peccat qui cum excommunicatione minore confert Sacramenta? Commune est non esse mortale. Dubium fit, an sit veniale? Affirmant *Sayr. Conin. Castrop. etc. ex cap. Si celebrat. de Cler. excom. etc.* ubi dicitur: *Peccat autem conferendo Sacramenta.* Sed probabiliter negant *Suar. Vill. Navar. Bonac. Salm. Busemb. et alii multi*, dùm in eodem textu alibi dicitur: *Cùm non videtur à collatione, sed à perceptione Sacramentorum remotus.* Et verba antecedentia, *peccat, etc.* ut concilietur textus dicunt DD. intelligi, quandò minister ad conferendum aliquod Sacramentum antè illud debet aliud Sacramentum suscipere, prout Episcopo, si confert Ordines, aut Sacerdoti, si in Missâ Eucharistiam ministrat, opus est priùs celebrare, aut Eucharistiam suscipere; tantò magis quòd de hoc casu loquitur textus (a). Alter effectus indirectus, est privari, etiam sub gravi posse Beneficia recipere, uti habetur ex eodem textu c. *Si celebrat.* Et licet textus tantùm loquatur de receptione per electionem, nihilominùs communiter DD. intelligunt etiam de eâ quæ fit per collationem, et præsentationem, *Laym. Castr. Suar. Bonac. Salm. Croix etc.* Sed notandum talem electionem non esse ex se irritam, sed tantùm irritandam, modò scienter eligatur excommunicatus, ut ibi dicitur: *Si scienter excommunicatus electus fuerit, ejus electio est irritanda.* Sed ex quâ parte requiritur hæc scientia? Alii volunt ex parte Electoris; alii ex parte utriusque; alii tamen, ut *Laym. Castrop. et Croix*, fortè probabiliùs tenent requiri ex parte electi, nempè quòd eum ei confertur Beneficiùm, ille recordatur se esse excommunicatum, quia illud scienter verosimiliùs refertur ad electus potius, quam ad excommunicatus (b). Notandum hìc denique, quòd excommunicatio minor potest absolvi à quovis Confessario, sed non à Sacerdote simplici (c).

---

(a) num. 149. — (b) n. 150. — (c) n. 155.

### PUNCTUM III.

#### De excommunicationibus non reservatis.

- I. *De excommunicationibus non reservatis* 28. *De excommunic. in cogentes puellas ingredi Monasteria etc.* 29. II. *De excommunicationibus reservatis* Papæ 30. *De censuris circa quæstionem Conceptionis B. Virginis* 31. et 32. *In frangentes clausuram Monialium. In ingredientes ad malum finem, prætextu facultatum* 33. *An licentia debeat esse in scriptis; et an specialis* 34. *A quo petenda est* 35. *Ob quam causam* 36. *De confessario* 37. *De Medico, et aliis* 38. *Si statim non egreditur. Et qui ingreditur ad malum finem, sed cum licentiâ* 39. *De prohibitione colloquendi cum Monialibus, præsertim Regularibus* 40. *De casu reservato; de parvâ materiâ; de conjunctis, et impuberibus* 41. *An cum Abbatissâ etc.* 42. *An Regulares incurrant censuram ab Episcopo* 43. *An Peregrini etc.* 44. *An Episcopi etc.* 45. *De Monialibus frangentibus clausuram* 46. *De clausurâ Regularium* 47. *In percussores Clericorum* 48. *De mandantibus, ratihabentibus, aut non impredientibus percussionem* 49. *Qui veniat nomine Clerici, aut Monachi* 50. *Ob quas actiones incurratur* 51. *Ob quas non incurratur* 52. III. *De excommunicationibus Bullæ Cœnæ. In Hæreticos* 53. *In fautores* 54. *In tegentes, aut retinentes libros etc.* 55. *Requisita ad incurrendam istam censuram librorum etc.* I. *Ut scienter etc.* II. *Ut Auctor sit Hæreticus* 56. III. *Ut liber agat de Religione, et contineat hæresim* 57. IV. *Materia gravis* 58. *Qui audit legere, aut qui legit literas aut manuscriptum?* 59. *De libris prohibitis in Indice* 60. et 61. *Qui retinet libros etc.* 62. *De cæteris casibus Bullæ* 63.

#### I. *De excommunicationibus non reservatis.*

28. — **N**OTANDÆ hîc aliquæ excommunicationes magis usitatæ. I. In extorquentes vi absolutionem

à censuris. 2. In sepelientes publicos usurarios. 3. In contrahentes intra gradus prohibitos. 4. In imprimentes libros sine superiorum permissu; et juxta Tridentinum (*Sess. 4. in Decr. de Edit. lib. etc.*) in imprimentes, aut imprimere facientes aut vendentes, aut retinentes libros de rebus sacris agentes sine nomine Auctoris, nisi habeat licentiam ab Ordinario. 5. In profitentes aliquam scientiam, qui fidei professionem non emittunt. 6. In potestatem usuris faventem. 7. In occupantes bona Ecclesiae vacantis. 8. In mandantes occisionem alicujus Christiani. 9. In impediennes sequestrum ab Episcopo preceptum. 10. In non denunciantes Episcopos haereticos, et Confessarios sollicitantes. 11. In eos qui servare faciunt statuta contra libertatem Ecclesiasticam. 12. In Clericos in dignitate constitutos, aut Sacerdotes qui docent Legem aut Medicinam. 13. In Sacerdotes qui praefecturas laicales suscipiunt. 14. In Clericos qui locant domos usurariis. 15. Aut bona Ecclesiae alienant, aut ultra triennium ea locant. 16. In concionatores qui impugnant montes pietatis. 17. In eos qui fictè renunciant aut permutant Beneficia. 18. In praesumentes absolvere à Casibus Bullae Cœnæ. 19. In eos qui in aliquod officium se ingerunt sine licentiâ Episcopi. 20. In raptos mulierum, et in cooperantes in raptu. 21. In ingredientes Monasteria (cujuscunque sexus sint) Monialium sine licentiâ superioris: sed de hac loquimur n. 33. et seq. Aliæ excommunicationes minus usitatae sunt in Opere adnotatae (a).

29.—Insuper in Trident. *Sess. 25. Cap. 18.* sunt excommunicati *quicumque coegerint aliquam virginem, vel viduam aut aliam quamcumque mulierem invitam (præterquam in casibus in jure expressis) ad ingrediendum Monasterium, vel ad suscipiendum habitum cujuscunque Religionis, vel ad emittendam professionem.* Hic fit dubium 1. An incurrat excommunicationem qui cogit mulierem ad ingrediendum Monasterium tantum, ut ibi benè educetur? Negat.

---

(a) Lib. 7. num. 209. ad 212.

*Sanch.* dicendo quòd Concilium solùm damnat eos qui cogunt ad ingrediendum, ut ibi professionem emittant, aut ut habitum suscipiant. Sed nos oppositum tenemus cum *Suar. Nav. Bon. et Fill.* dùm Concilium apertè postea explicat, etiam incurrere eum qui tantùm cogit ingredi, licèt absit finis efficiendi, ut profiteatur, aut habitum suscipiat; nam subjungit censuram etiam incurrere eos, qui *scientes eam non spontè ingredi Monasterium, aut habitum suscipere, aut professionem emittere... consensum, vel auctoritatem interposuerint.* Igitur si excommunicantur, qui tantùm consenserint, ut puella ingrediatur invita, tantò magis principales qui eam ingredi fecerint. Cæterùm, cùm Concilium excipiat casus expressos *in jure*, probabiliter dicunt *Suar. Fill. et Bon.* posse compelli ad ingrediendum illam puellam, quæ à rectâ morum viâ errat, ne in similes errores cadat, et ut cautior ad majores fiat (a). Imò tenent *Sanch. et Bon.* quòd licèt potest cogi ad ingrediendum ob cautelam suæ pudicitiae; sed hoc intelligendum cùm adsit prudens suspicio quòd illa in sæculo manens pravis imbuatur moribus, ut cùm videretur nimis procliva ad conversandum cum maribus, aut si domi essent qui eam pervertere possent; quia tunc videtur cessare finis Concilii, non tantùm adæquatè, sed etiam contrariè (b), juxta dicta *Tom. I. Tr. II. n. 69.* Dubitatur. An incurrant excommunicationem parentes qui inducunt filias ad ingrediendum ob metum reverentialem, manifestando eis suam voluntatem? Affirmat *P. de Alexandro*; sed communius et probabilius negant *Rodrig. Barb. Tamb. Portella*, etc. cum quâdam Decisione, et hoc etiamsi adjunctæ sunt preces, ut dicunt *Barb. et Rodr.* modò hæ non sint vehementes, et sæpius repetitæ (c). Advertendum præfatam excommunicationem dumtaxat afficere cogentes ingredi feminas, non verò mares, ut communè dicunt *Suar. Barb. Sanch. Bon. Nav. Buss.* etc. licèt cæteroquin hi non exeusarentur à mortali (d). Præ-

---

(a) num. 212. v. *Quoad.* — (b) *Ibid.* v. *Dub. 2.* — (c) *Ibidem.* — (d) *Ibid.* *Dub. 3.*

terea à Trid. in eodem Cap. 18. excommunicantur, qui sanctam mulierum voluntatem veli accipiendi, vel voti emittendi, quoquo modo sinè justa causa impedierint. Nomine veli intelligitur professio quæ editur velum suscipiendo. Nomine voti, intelligitur professio, sed sinè velo, ita comm. DD. *Impedire* autem intelligitur quando fit dolo, sed non solis precibus, *Sanch. Bon. et Salm.* Denique dubitatur, an incurrat excommunicationem qui impedit mulierem ingredi Monasterium? Negant *Sanch. Buss. et Castropal.* Sed probabilius affirmant *Suar. Bon. et Fill.* dùm qui impedit ingredi, impediat pariter profiteri (a).

## II. De excommunicationibus Papæ reservatis extrà Bullam Cœnæ.

30. — De excommunicationibus reservatis Episcopo loquemur *Tract. XX. de privilegiis Tom. III. n. 46.* Nunc tantùm loquamur de excommunicationibus reservatis Papæ extrà Bullam Cœnæ, et loquendo de magis consuetis, hæ sunt 1. In incendiarios, modò sint excommunicati ab homine, et denunciati. 2. In frangentes et expoliantes Ecclesias. 3. In communicantes in eodem crimine cum excommunicato à Papâ. 4. In vexantes eos qui ferunt censuras. 5. In dantes, aut recipientes, ut admittatur aliquis in Religionem. 6. In committentes simoniam realem, aut confidentialem circà Ordinem, aut Beneficia. 7. In dantes, aut recipientes aliquid, ut obtineatur aliqua gratia, aut justitia apud Sedem Apostolicam. 8. In duellum committentes, et in eorum patrinos, consultores, et fautores, et etiam in spectatores *datâ operâ*, qui suâ assistentiâ incitant eos ad pugnam (vide dicta *Tom. I. Tr. VIII. n. 28.*) 9. In usurpantes, aut occupantes bona Ecclesiarum aut aliorum locorum piorum. 10. In exigentes tributa ab Ecclesiasticis. 11. In violantes interdictum. 12. In publicantes falsas Indulgentias. 13. In retinentes fructus

---

(a) *Lib. 7. n. 212. Dub. 3.*

## 426 *Tract. 19. De Censuris, et Irregularitatibus.*

Beneficii vacantis, aut impediētes possessionem ei qui non *præstat dulciaria*. 14. In docentes, aut sustinentes opiniones damnatas. 15. In concionantes de tempore Judicii novissimi contrā sensum Patrum. 16. In Parochos qui non observant juramentum residentię. 17. In regulares qui sinē privilegio particulari præsumunt ministrare laicis Viaticum, et Extremam-Uctionem. 18. In Regulares qui prætextu privilegiorum absolvunt à casibus reservatis ab Episcopis. 19. In defendentes praxim de interrogando de nomine complices in Confessione (juxtā Bullam, *Ubi primum*, Benedicti XIV. de quā locuti sumus *Tract. XVI. n. 41.*) 20. In Confessarios qui absolvunt complices peccati turpis contrā sextum præceptum, juxtā aliam Bullam *Sacramentum*, ejusdem Pontificis, de quā in eodem *Tract. XVI. n. 95.* Cæteræ excommunicationes Papales quæ adsunt, videri possunt in Opere (a). Sed oportet hic seorsim loqui de tribus aliis censuris quæ speciali indigent animadversione, nempe I. In eos qui alterutram damnant opinionem circā Immaculatam Conceptionem B. Virginis. II. In Violantes Clausuram Regularium Monasteriorum. III. In Percussorem Clericorum. \*

31. — Et I. loquendo de Conceptione Divinæ Matris, juvat hic meminisse, quinque Bullas circā hoc punctum emanatas. 1. Sixtus IV. in *Extrav. Grave nimis, de Rel. et ven. SS.* anno 1480. imposuit ipso facto excommunicationem reservatam in eum qui damnat hæresis, aut peccati mortalis alterutram sententiam, quæ asserit, aut negat B. Virginem conceptam fuisse sinē culpā originali; et etiam in eum qui pro veris habet, aut ut veros legit libros, qui affirmant SS. Virginem in peccato conceptam fuisse: et contrā præcepit, ut in Festo Conceptionis B. V. recitaretur Officium Nativitatis suæ, mutato verbo *Nativitatis* in *Conceptionis*. 2. S. Pius V. in Bullā 114. *Super speculam* ann. 1570. prohibuit disputare palam, ubi adsunt viri, et mu-

---

(a) *Lib. 7. num. 218.*



lieres, aut scribere vernaculâ linguâ de tali quæstione, sub pœnâ suspensionis à *Divinis*, reservatæ *ipso jure etc.* Dumtaxat permisit doctis disputare in Academiis, quin uti erroneam alterutram damnerent sententiam. 3. Paulus V. in Bullâ 97. ann. 1616. prohibuit sub iisdem pœnis à S. Pio latis affirmare in aliquo publico Actu Beatam Virginem fuisse in peccato conceptam. Contrâ sub iisdem censuris et pœnis prohibuit defendentibus sententiam piam impugnare, et tractare de oppositâ opinione, dicendo: *Aliam opinionem non impugnent, nec de eâ aliquo modo agant seu tractent.* 4. Gregorius XV. in Bullâ 20. ann. 1622. prohibuit quominus tam publicè, quàm privatim assereretur Conceptio Mariæ fuisse facta in peccato; Concessit tantum DD. ordinis Prædicatorum, ut privatim colloquia inter se habere possent, de tali materiâ disserendo. 5. Deniquè Alexander VII. an 1661. in Bullâ *Sollicitudo* primò declarat piam sententiam de Conceptione sinè labe à primo instanti Mariæ, latè longèque promulgatam fuisse, adeò ut *accedentibus quoque plerisque celebrioribus Academiis ad hanc sententiam, jam ferè omnes Catholici eam complectantur*; deindè sub iisdem censuris et pœnis renovat decreta prædecessorum, et præcipit, ut illa observentur in favorem Festi, et cultûs Conceptionis B. Virginis juxtâ piam sententiam. Et præter pœnas latas à Sixto IV. privat facultate concionandi, docendi, voce activâ, et passivâ, qui in dubium revocaret, aut in alio sensu interpretaretur, sive voce, sive in scriptis (declarando damnatos esse omnes eorum libros ubi de hoc actum fuisset) favorem piæ sententiæ, et cultui concessum, asserendo aliquid adversùs piam sententiam, aut afferendo argumenta contrâ ipsam, et relinquendo insoluta (a).

32. — Ex his omnibus infertur 1. cum *Bonar.* (qui distinctè agit de hâc materiâ) quòd incurrit pœnas 1. qui diceret posse defendi sententiam oppositam Immaculatæ Conceptioni Mariæ, aut qui

---

(a) *Lib. 7. n. 244.*

adduceret rationes illius, modò id non ageret, nisi ut eas oppugnaret. 2. Qui asserit Festum Conceptionis celebrari, quia B. V. sanctificata fuit in utero Matris, dùm ita apertè se piæ sententiæ refragantem præberet. 3. Qui transcribit sententiam oppositam, adèò ut videretur eam amplecti (a). 4. Transgressores ipso facto suspenduntur à Divinis; et probabiliùs, ut tenet *Bonac.* etiam incurrunt inhabilitatem ad officia; sed quoad privationem vocis, et Dignitatum, etc. requiritur sententia. 5. Præfatæ poenæ incurruntur tam ab Ecclesiasticis, quàm à laicis, sicut habetur ex Bullâ Pauli V. et Gregor. XV. 6. Ab ipsis poenis solus Papa absolvere potest, aut Episcopus, cum peccatum est occultum, quoad autem fautores sententiæ piæ, certè his vetitum est sub poenâ excommunicationis asserere hoc esse dogma irrefragabile fidei, oppositam censurâ aliquâ notando, non autem eam rationibus, et auctoritate defendere; quia quamvis in Bullâ Pauli V. vetitum sit publicè eam oppugnare, et etiam de illâ tractare questione: nihilominus aliqui dicunt, præfatam Bullam in tali puncto non esse usu receptam: aut intelligi de iis qui piam defendunt sententiam, ut fidei dogma, sicut reapse loquitur Bulla S. Pii; sed responsio certior et clarior est, quòd præfata Bulla fuit moderata à novissimâ Alexandri VII. ubi conceditur apertè refellere argumenta oppositæ sententiæ, dùm ibi damnatur prædicare, loqui, aut tractare adversus piam sententiam, *contrà eam argumenta afferendo, et insoluta relinquendo.* Ergò concedit Papa evidenter adducere argumenta opposita, et ea confutare; ergò concedit tractare de sententiâ piâ, et eam defendere (b). In Opere autem (c) adest defensio piæ sententiæ; et etiam sententiæ quòd liceat vitam effundere pro tali piâ sententiâ, cum talis cultus ergà Mariam Ss. sit actus Religionis; nam dicit S. *Thomas* (d) quòd potest acceptari martyrism pro defendendâ quâlibet virtute: et Bened. XIV. (e) dicit ab Ecclesiâ pro martyre haberi illum,

---

(a) n. 245. ad 247. — (d) n. 248. — (c) n. 249. — (d) 2. 2. q. 134. a. 5. — (e) de *Canoniz. SS. Lib. 1. cap. 14. n. 13.*

qui vitam fundit pro defendendâ aliquâ piâ sententiâ , aut ne omittat aliquem virtutis actum.

33. — II. Loquendo de Clausurâ Monasteriorum , et primo Monialium , notandum 1. quamcumque personam cujuscunque sexûs , quæ ingreditur in Monasterium Monialium sinè licentiâ in *scriptis* Episcopi , aut Superioris , incurrere excommunicationem ipso facto ex Trid. *Sess.* 25. c. 5. Multi DD. *Suarez* , *Azor.* *Bonac.* *Barb.* etc. dixerunt licere ingredi facere infantem , nam prohibitio principaliter afficit ingredientes ; undè infantes non ligantur præcepto , nec illo ligantur Moniales ; sed S. C. pluries declaravit oppositum. Tantò magis debet ingressum prohiberi amentibus , à quibus majus scandalum timeri potest (a). Ex Bullâ Gregor. XIII. *Dubius* , 1581. vetitum est Episcopis , extrâ casum necessitatis , sub poenâ suspensionis à *Divinis* pro secundâ vice , et excommunicationis pro tertiâ , et Prælati Regularibus sub poenâ privationis cujuscunque Officii , et etiam excommunicationis pro primâ vice , ut vult *Sanch.* ; sed *Bon.* et *Lamas* volunt pariter pro tertiâ. In casu autem necessitatis , aut visitationis possunt ingredi prædicti Prælati ; sed Prælati Regulares non possunt ingredi nisi semel quolibet anno causâ visitationis , et sinè assistentiâ Episcopi , aut alterius personæ Ecclesiasticæ ab ipso designatæ , juxtâ Bullam 156. *Felici* Alex. VII. Episcopi verò debent ingredi sociati , sed à *paucis* , et *senioribus ac Religiosis Personis* , ut loquitur Bulla Gregorii ; *pauci* intelliguntur quatuor , aut quinque , ut dicunt *Victorelli* , et *Tamb.* ac *de Alexand.* , secùs incurrunt pro primâ vice Interdictum ab ingressu Ecclesiæ , in secundâ suspensionem à *Divinis* , et Pontificalibus , in tertiâ excommunicationem ipso facto , ut habetur ex citatâ Bullâ Gregorii XIII. Probat id et *Fagnan.* in c. *Nuper* 29. de *Sentent.* n. 38. Quoad autem Prælatos Regulares , si ingreditur Generalis , potest secum conducere duos sui Ordinis probatæ vitæ , et ætatis maturæ ; si alius Prælatus inferior , tantùm unum (b). Notandum 2. præfatas excommunicationes non esse

---

(a) *Lib.* 7. n. 226. — (b) n. 221.

reservatas, sed adest excommunicatio reservata imposita ex mandato Clementis VIII. ann. 1602. in eos qui ingrediuntur Monasteria ad malum finem. *Malus finis* censetur à *Mazzotta* quivis finis pravus; sed meliùs *Pelliz.* intelligit finem turpem, dùm hic est finis Clausuræ, nempe custodire castitatem Virginitatis (a); idèdque prohibetur accessus, et collocutio, quæ etiam pertinent ad Clausuram, ut mox dicemus *num. 40.* Notandum 3. adesse aliam excommunicationem reservatam à Gregor. XIII. in Bullâ *Ubi gratia*, an. 1577. in quoscumque, etiam mulieres, qui ingrediuntur Clausuram Monialium (et in mulieres quæ ingrediuntur Clausuram Religiosorum); sed hoc intelligitur tantùm de iis qui ingrediuntur prætextu facultatum, sicut dicunt comm. *Sanchez, Suar. Fagnanus, Bon.* etc. contrâ *Navar. et Azor.* dùm in præfatâ Bullâ expressè dicitur, *prætextu facultatum* (b). Et tunc incurrunt eam excommunicationem omnes Superiores *quocumque nomine vocentur*, intelliguntur, ut dicunt *Sanch. Manuel. Diana*, et alii (c), Priores, Guardiani, Correctores, etc. qui alicui permittunt ingredi, aut morari, qui ita ingressus est, juxtâ Bullam Pauli V. *Monialium*. Sed advertendum quòd in ipsis duabus Bullis non comprehenduntur Prælati, qui ingrediuntur sinè causâ (d).

34 — Quæritur 1. An licentia ingrediendi in Monasteria Monialium necesse sit ut sit in scriptis? Affirmant *Sanch. Suar. et Castrop.* Sed negant *Innoc. Abb. Felin. Homob.* etc. dicentes scripturam solum valere pro foro externo, juxtâ dicta *Tom. I. Tract. VII. n. 20.* Saltem dicunt *Barbos. Vill. Rodrig.* etc. non requiri licentiam in scriptis in casibus ordinariis, ut cum ingressuri sunt Medicus, Confessarius, aut operarij, quorum operâ jugiter opus habent Moniales (e). Non est autem dubitandum, quin præfata licentia ingrediendi Monasteria Monialium debeat esse specialis pro personâ designatâ, cùm dicatur in cap. *Periculoso, de Stat. Regul.* in 6. *Nisi speciali licentiâ etc.* (f). Cæterùm rectè potest Prælatus committere Abbatisæ, aut alii personæ prudenti con-

---

(a) *Ibid. v. Excomm.* — (b) *Lib. 7. n. 222.* — (c) *Ibid. v. Dub. 2. --* (d) *n. 221. v. Adest. --* (e) *n. 223. --* (f) *Ibid. dub. 4.*

cedere præfatam licentiam ; *Nav. Bonac. Graff. Barbos.* etc. contra *Suar.* (a).

35. — Quæritur 2. Quis debeat concedere licentiam ? Respondetur : Episcopus pro Monasteriis sibi subjectis , et etiam pro subjectis Sedi Apostolicæ , dando eam tunc tanquàm Delegatus Sedis Apostolicæ. *Trid. Sess. 25. c. 5.* Possunt eam præbere etiam Vicarii Capitulares , et etiam ( juxtà quod dicunt *Sanch. Bonac.* etc. ) Prælati qui gaudent jurisdictione quasi Episcopali ; et probabiliter etiam Vicarii Generales Episcoporum , quoad Monasteria Episcopis subjecta ; ità *Sanch. Navar. et Lamas* , dùm in motu proprio S. Pii V. *Decori* , dicitur *Episcopum , aut alium loci Ordinarium* , et sub nomine Ordinarii ( ut probat *Sanch.* ) comprehenditur etiam Vicarius Episcopi ; tantò magis ut probat *Fagnanus* (b) , Vicarius potest totum id quod potest Episcopus in iis quæ sunt ordinariæ jurisdictionis (c). In Monasteriis autem subjectis Regularibus licentia danda est à Præfato Regulari *Bonac. Barbos. Castr. et Fagnan.* cum *Decr. S. C.* dùm *Trid.* dicit : *Sine Episcopi , vel Superioris licentiâ.* Et *Sanch.* assert hoc fuisse declaratum à S. Pio V. Sed hoc non intelligitur pro Diocesisibus ubi contraria viget consuetudo , juxtà Declarationem S. C. approbatam ab Urbano VIII. (d).

36. — Quæritur 3. Quænam causa requiritur , ut detur præfata licentia ? Resp. quòd juxtà *Trid. Sess. 25. c. 5.* requiritur necessitas , cùm dicatur ibi : *Dare autem licentiam . . . . debet in casibus necessariis.* Et hæc necessitas debet esse ex parte Monasterii ; quare non sufficit , ut sit ex parte exteriorum , nisi esset quòd lex naturalis suaderet oppositum ; ità *Bon. et de Alexand.* cum communi , et cum *Decis. S. C.* . Ideòque non licet in Monasterio collocare uxorem , ut à furore viri liberetur , aut ne iterùm illi rumpat fidem , sicut pluries decrevit S. C. Potest tamen ( ut dicit S. C. ) Episcopus ibi collocare puellam de quâ controversia est , donec lis finiatur (e). Loquendo autem de præfata necessitate ex parte Monasterii , debet intelligi moraliter , cùm

(a) n. 224. v. *Abbat.* — (b) *Lib. I. Cap. Quoniam , de Officiis de leg.* — (c) n. 224. — (d) *Ibid. v. Major.* — (e) *Lib. 7. n. 225.*

sufficiat, ut dicunt *Sanchez*, *Bonac. Barb. de Alex. Miranda* etc. si adsit causa probabiliter justa; minor causa autem requiritur, ut dicit *Barbosa*, ad ingrediendas mulieres, quàm mares: ad ingressum diurnum, quàm nocturnum: ad primas aedes, quàm ad intimas. Quandò autem accidit necessitasurgens incendii, mortis, violentiæ, et hujusmodi, tunc non requiritur licentia, quia in hujusmodi periculis lex humana non obligat, *Sanch. Navar. Graff. de Alex.* etc. comm. undè in casu mortis subitanæ quilibet Sacerdos potest ingredi ad dandam absolutionem, et etiam Viaticum, et Extrem. Uctionem, ut dicunt plures DD. (a).

37. — Cæterum Confessarius ordinarius potest ingredi (sed cum licentiâ) non solum ad præstanda ultima Sacramenta, sed etiam ad præbendam solitam Communionem Moniali decumbenti; *Bon. Barb. Sanch. Rodrig.* etc. cum communi, et cum Declar. S. C. Insuper ait *de Alexand.* (b) quòd Confessarius postquàm audivit Confessionem Monialis decumbentis potest benedicere novum aliquod ædificium Monasterii recenter exstructum, et etiam afferre alteri Moniali infirmæ aliquam Reliquiam, erga quam illa devotione afficitur; et id simile; sic quoque ex justâ causâ potest in Monasterio manere ad breve tempus videndi Officinas, aut loquendi causâ de aliquo temporali negotio. Dicunt probabiliter etiam plures DD. quòd Confessarius extraordinarius, qui ingreditur cum licentiâ pro unâ vice, si causâ infirmitatis non potest Confessionem excipere, potest iterum ingredi sinè licentiâ: et ita pariter, si infirma revocat Confessarium statim ac egressus est, ut ei exponat aliquod peccatum oblitum. Confessarius autem ingredi debet indutus cottâ, et stolâ: et ingredi debet quin ad alias Monasterii partes divertat, ne causâ quidem invisendi infirmam, quæ Sacramento muniri non indiget; *Barbos. et de Alexandr.* Confessarius sæcularis ingredi debet solus, ut declaravit S. C. Sed Regularis sociatus ab aliquo

(a) *Ibid. v. Talis.* — (b) *De Alexandr. de Monial. cap. 7. §. 6. quæst. 9.*

maturæ ætatis , et probatæ vitæ , ut dicit Bulla Alexandr. VIII. Dùm autem Confessarius audit Confessionem , comitatrices ad januam assistere debent adeò ut eum videre possint. Potest etiam Confessarius pernoctare in Monasterio , si Monialis laboret in extremis. Potest etiam ingredi ad benedicendum Monasterium à spiritibus infestatum ; ut declaravit S. C. Sed si Monialis est obsessa , vetavit S. C. ingredi posse Sacerdotem , ut ipsam exorcizet , et dixit potiùs impetrandam esse ab ipsâ Sacr. Congr. licentiam , ut exorcizetur in Ecclesiâ exteriori Monasterii (a).

38. — Quoad medicum autem , loquendo de ordinario , hic debet licentiam renovare quolibet trimestri juxtà Decr. Sac. Congr. 17. Martii 1588. Debet associari à duabus Monialibus ex senioribus ; et debet ingredi solus , nisi infirmitas expostularet etiam alios. Medicus autem extraordinarius tantum potest ingredi in defectu ordinarii , et quando Collegium tenendum est. Potest etiam ingredi Chirurgus ad secandam venam , et etiam Pharmacopola ad docendum , si opus est , quomodò paranda sit medicina. Possunt etiam ingredi Factores , Notarii , et hujusmodi , aut ad judicandum de ruinâ imminente , aut ad inveniendam scripturam necessariam in Archivio , aut ad conficiendum testamentum aliqujus puellæ. Ità etiam possunt ingredi cum licentiâ fabri , hortulani , cœmentarii , pistores , bajuli , et alii id genus. Sed hìc advertendum cum *Sanch.* et *de Alex.* quòd si licentia est data pro uno bajulo determinato , eo deficiente , non potest suffici alius. Rectè dicunt *Bon.* et *Castropal.* (contrà *Sanch.*) non licere sartori ingredi ad benè aptandas vestes. Si autem licentia data esset discipulo comitari cum magistro , dicit *de Alex.* cum aliis probabile esse , posse ingredi discipulum , aut ibi sistere sinè magistro (b).

39. — Quæritur 4. An ingressus cum licentiâ incurrat excommunicationem , aut peccet , cùm functus jam est suo munere , si statim non egreditur.

---

(a) *Lib. 7. n. 227.* — (b) *num. 226.*  
*Tom. II.*

Resp. quòd in quantum ad censuram eam non incurrit, licèt diutius ibi moretur; quia tunc tantum violatur censura, quando quis ingreditur sinè licentiâ; ità *Sanch. Bon. Zerola, Bord. etc.* Qui verò ingrederetur cum licentiâ, sed ibi sisteret ad malum finem, dicit *Sanch.* ne illum quidem incurrere censuram; sed animadvertit *Bonac.* quòd licèt iste non incurreret excommunicationem latam à Concilio, incurrit tamen illam latam à Clemente VIII. in eos qui violant clausuram ad malum finem, Sed posset aliquis huic opponere quod censura Clementis cum sit poena, debet strictè intelligi, sicut intelligitur Concilium (a). Cæterum hâc ratione dicunt probabiliter *Rodrig. Zerola, et de Alex.* quòd non incurrant præfatam excommunicationem qui ingrediuntur ad malum finem, sed cum licentiâ; et probabilem eam vocant *Bon. et Sanch. (b).* Hoc quoad censuram; quoad peccatum verò, dicimus quòd quando quis ingreditur cum licentiâ, et immoratur, si mora est longa, peccat mortaliter; si brevis, venialiter; ità *Bon. Barb. et alii communiter.* Imò dicunt *Sanch. Rodr. Mol. et Mirand.* quòd quando mora est valdè brevis, excusetur etiam à veniali, dùm hoc usu etiam piorum receptum est. Putant autem *Villal. et Diana,* spatium horæ quadrantis esse modicam moram (c).

40. — Ad hanc materiam Clausuræ spectat etiam prohibitio colloquendi cum Monialibus. In hoc oportet scire quòd in *cap. Monasteria, de Vitâ, et hon. Cler.* imposita fuit excommunicatio (sed ferendæ sententiæ ab Episcopo) in laicos, et suspensio in Clericos, qui præsumunt frequentare Monasteria Monialium. Doctores autem censent tunc constitui hanc frequentiam; cum per tres vices tribus diebus continuis, aut semel singulis mensibus anni, aut quater in unâ hebdomadâ adeant Monasterium (d). Hæc prohibitio postea rigorosiùs injecta fuit Religiosis, tam in *c. Definimus 21. caus. 18. q. 2.* quàm in Decreto edito ex mandato Sixti V. ubi fuit

---

(a) *num. 228.* — (b) *Ibid. dub. 3.* — (c) *n. 226. Resp. 2.* — (d) *n. 232.*



eis vetitum non solum ne colloquerentur cum Monialibus, sed etiam cum quâlibet muliere in Monasterio moram faciente. Dumtaxat concessum fuit Ordinariis per Decretum S. C. Concilii editum de mandato Urbani VIII. 10. Nov. 1623. posse dare licentiam Regularibus colloquendi cum Monialibus in primo, aut secundo gradu, ad summum quater in anno : exceptis diebus festis, Adventûs, Quadragesimæ, Feriâ VI. et Sabbato, et Vigiliis; sed cum conditione quòd licentia debeat dari in scriptis, et debeat adnotari in Curiâ ab Episcopo, et postea tradenda Monasterii Confessario, qui debeat eam asservare; ac eos associare cum Auscultatricibus, et non aliis, dum Religiosus colloquitur cum Moniali; declarando amplius quòd si Episcopi aliter agant, Pontificis intentionis sunt transgressores, et quòd Regulares incurrunt easdem pœnas impositas à Sixto V, nempe privationem *ipso facto* officii, et vocis activæ et passivæ (a). Verumtamen apud Bened. XIV. ( *de Synod. l. 9. c. 15. n. 7.* ) et apud Monacelli ( *tom. 1. in Append. pag. 436.* ) reperio Sacram Congr. die 26. Nov. cum ab eâ quæsitum fuisset : *An Regulares accedentes ad colloquendum cum Monialibus sinè licentiâ Episcopi ; proceunt mortaliter ; respondisse Affirmativè, etiam ex rationabili causâ, quandò non adest licentia.* Idem Bened. XIV. refert in Bullâ *Gravissimo* ; editâ die 31. Octobris 1749. per S. C. statutum esse non licere Regularibus *injussu Episcopi liberè adire sibi addicta Monialium claustra.* Ex quibus inferri perspicuè videtur, quòd accedente licentiâ Episcopi Regulares, quin S. C. adeant, possint colloqui cum Monialibus. Hic etiam adnotandum aliud Decretum ejusdem S. C. die 21. Maji, apud Bened. ( sub 12. apud Monac. fortè errore postpositionis numeri ) 1678. quòd declaratum fuit iisdem pœnis affici Regulares, qui habitâ ad Moniales concione, cum iisdem sinè licentiâ Episcopi etiam de rebus spiritualibus colloquuntur. Et ex alio consimili Decreto

---

(a). *Lib. 7. n. 332. v. Hæc.*

436 *Tract. 19. De Censuris, et Irregularitatibus.*

dicit Auctor, qui apponit additiones in *Biblioth. P. Ferraris tom. 5. verb. Moniales*, post n. 59. ibi q. 1. cum *P. Gaudenzio de Visit.* hanc sententiam hodiè amplectendam esse, attentâ hodiernâ praxi, nam ubiquè (ait) *ferè locorum Ordinarii licentias hasce alloquendi Moniales concedunt Regularibus.* Et ipse *P. Ferrar.* idem sentit *verb. Moniales*, n. 15. et 19.

41. — Hæc sunt lege communi statuta; sed ferè in omnibus Diocesisibus, et præcipuè in illâ Neapoli, adest casus reservatus cum excommunicatione in viros, qui non petitâ licentiâ colloquuntur cum quâvis muliere, quæ versatur in Monasteriis, aut in Conservatoriis, exceptis conjunctis in primo vel secundo gradu; declarando quòd qui facultatem obtinuit, *non potest datâ operâ, et ex professo*, colloqui cum aliis. Hic plura notanda sunt. Notandum 1. quòd ex sententiâ probabiliori *P. de Alex. de Januariüs*, et *Jordan.* intelligitur prohibitus, non solus accessus, ut volunt *Sanch.* et *Bonac.*, sed accessus formalis, nempe cum effectu colloctionis, sicut deducitur ex cit. text. *Definimus*, ubi prohibetur aditus ad colloctionem; et in Decretis præfatis semper fit mentio accessûs cum colloctione. Ex quo probabiliter etiam dicunt *Lezana*, *Tamb. de Alex. Bon. Graff.* etc. quòd prohibitio (ex se loquendo) non comprehendit eum, qui cum Moniali colloqueretur ex domo contiguâ, quia tunc deest accessus: nec qui scribit, aut loquitur per nuncium, ut dicunt etiam *Bon. Barb. Mazz.* etc. Dictum est, *ex se loquendo*, quia in casu Neapolitano comprehenduntur expressè illi, qui *de rebus obscænis agerent per litteras, vel internuncium.* Notandum 2. quòd juxtâ casum reservatum peccat mortaliter etiam qui loquitur cum Moniali semel tantum, modò non excuset parvitas materiæ: parvitatem materiæ in hoc alii putant esse spatium unius *Miserere*, ut *Diana*, et *Mazzotta*; alii horæ quadrantem, ut *Quarti*, et *Verricell.* Sed in quodam Decreto approbato à Clemente IX. die 1. Martii 1699. prohibitum fuit Regularibus, sub poenâ peccati mortalis, et excommunicationis colloqui cum Monialibus *per quodcumque modicum*

*temporis spatium*. Hoc non obstante dicit *Ciera* non esse per tale Decretum reprobata opinionem *Quarti*, quòd horæ quadrans sit parva materia; cùm in Decreto non damnetur nisi opinio sesqui-quadrantis horæ, *Pretendentes non esse interdictum per breve tempus, etiam usquè ad quadrantem horæ cum dimidio*. Quare contendunt isti Propositionem esse damnatam copulativè. De hâc opinione Doctis committo judicandum, sed ego non audeo eam probare, propter alia verba quæ adjunguntur illi prohibitioni, *per quodcumque modicum temporis spatium*. Advertendum quòd si quis loqueretur per multos dies cum Moniali, licèt per spatium non notabile; etiam posset peccare mortaliter; quia hujusmodi colloquia si non uniuntur physicè, saltem uniuntur moraliter (a). Notandum 3. quòd nullâ de causâ etiam spiritali licet colloqui cum Moniali sinè licentiâ, ut rectè tenet *Ciera* contrâ *Lezana*, *Peyr. Bord.* etc., quia in hoc nunquàm cessat finis adæquatus prohibitionis, nempe periculum animi adhæSIONIS, ne consuetudo ex spiritali fiat carnalis; qua de re declaravit S. C. quòd ex nullâ causâ etiam honestâ, et rationabili permittitur Regularibus colloqui cum Monialibus, vid. n. 40. in fin. (b). Notandum 4. quòd excipiuntur à prohibitione 1. conjuncti in primo et secundo gradu consanguinitatis. Eximit *Ciera* etiam conjunctos in secundo et tertio, quia cùm petitur dispensatio ad contrahendum inter propinquos in secundo et tertio, debet exprimi etiam secundus, et major impensa requiritur; ergò signum est quòd hic gradus mixtus non potest dici in rigore tertius, sed participans de utroque, ac propterea dicitur secundus et tertius, proindèque tali gradu conjunctus gaudere debet tali privilegio; et cùm in odiosis leges sint restringendæ, sequitur quòd nisi Religiosus sit conjunctus Moniali in tertio simpliciter, non intelligitur comprehendi in prohibitione; sed oppositum ego sentio, cùm conjuncti in secundo et tertio,

---

(a) n. 236. — (b) n. 237.

438 *Tract. 19. De Censuris, et Irregularitatibus.*

non possunt dici quòd reverà sint in secundo. 2. Qui colloquuntur cum Monialibus gravi metu incussi, quia hoc currit juxtà regulam legum positivarum. 3. Mendicantes publici, ratione usùs, aut tacitæ licentiæ, quæ adest; ità pariter servi, qui afferunt dona, et citò se expediunt; *Pelliz. de Alex. et Mazz.* (a). Notandum 5. quòd impuberes, licèt excusati non sint à culpâ gravi, si colloquuntur cum Monialibus, attamen non incurrunt excommunicationem, ut rectè dicunt *Bon. de Alex. Dian.* et alii (contrà de *Graffis*) *exc. Pueris, de Delict. puer.* ubi dicitur quòd pueri non sunt puniendi sicut puberes, et in Diocesi Neapolitanâ expressè eximuntur à reservatione pueri, qui 14. annos non sunt nati (b).

42. — Quæritur 1. An liceat loqui cum Abbatissâ sinè licentiâ? Negant *Ciera, Megalla, de Alex. Graff.* etc. dicendo quòd in Decr. Sixti V. prohibitum est loqui non solùm cum Monialibus, sed etiam cum quâcumque personâ Monasterii; et item Alexander VII. in Constit. *Sacrosancti*, prohibuit colloqui etiam cum Abbatissis. Sed affirmant *Lezan. Pelliz. Tamb. Januar. Mazz. Diana, et Potestas*, quia sub nomine Monialium in odiosis non comprehenditur Abbatissa, juxtà *Panormit. Glossam*, etc. Et ad Bullam Alexand. respondet *Potestas*, quòd illa edita fuit pro Urbe Româ.

43. — Quæritur 2. An Regulares loquendo cum Monialibus incurrant excommunicationem reservatam ab Episcopo latam? Quicquid dicant alii, affirmamus cum sententiâ communissimâ *Sanch Barb. Bon. Fagnan. et de Alexand.* cum Decr. S. C. Idque valet etiam respectu Regularium habentium speciale Privilegium, ne Episcopus possit eos excommunicare, ut fertur habere Mendicantes, ac Jesuitæ à Paulo III. (c) Nam Episcopi in Monasteriis, etiam subjectis Regularibus, sunt Delegati Sedis Apostolicæ ut dicitur in Bullâ *Inscrutabilis* Greg. XV. quæ fuit declarativa Trid. ut refert Benedictus XIV. lib. 7. de

---

(a) n. 239. — (b) *Lib. 7. n. 240.* — (c) n. 241.

Synod. c. 15 n. 6 et juxtà dicenda *Tom. III. Tr. XX. de Privil. n. 80. infra n. 5.*

44. — Quæritur<sup>3</sup>. An Peregrini qui alicubi morantur per aliquod tempus, colloquendo cum Monialibus incurrant excommunicationem ibi reservatam ab ordinario? Tres adsunt sententiæ. 1. Negat cum *Pelliz. Diana*, etc. dicendo ex unâ parte, quòd Peregrini non tenentur legibus loci: ex aliâ parte dicunt quòd Episcopi sunt destinati à Concilio Delegati Apostolici, sed tantum circà restitutionem, et conservationem Clausuræ, ad quod non spectat collocutio. Sed hæc sententia non est satis probabilis, nam ut rectè dicunt *Fagnanus*, et de *Januar.* collocutio ex communi sensu DD. utique spectat ad Clausuræ conservationem, etenim in *cap. Periculoso, de Statu Reg.* dicitur: *Nullique ingressus, vel accessus pateat ad easdem* (Moniales), *ut sic à mundanis aspectibus separatæ, omninò servire Deo valeant.* Igitur prohibitio tam ingressus, quàm accessus ad Clausuræ spectant finem, qui est ut Moniales ab humanis distractionibus alienæ conserventur. 2. Sententia dicit (generaliter loquendo), quòd Peregrini, licèt per tempus breve alibi morentur, incurrunt excommunicationem. 3. Sententia *Donati*, et de *Januar.* distinguit: incurrunt, si Monasterium est exemptum, quia ibi Episcopus (ut dictum est) procedit tanquàm Delegatus Apostolicus, undè ille jurisdictionem habet etiam in Peregrinos; secus verò si Monasterium est subjectum Episcopo ordinariâ jurisdictione, cui non subduntur Peregrini per breve tempus ibi commorantes, juxtà probabiliorē sententiam allatam *Tom. I. Tr. II. n. 41 (a)*. Sed videtur dicendum eos talem excommunicationem non incurrere, etiamsi cum exemptis loquantur, propter id quod num. seq. referemus. Nam Bened. XIV. in referendâ Bullâ *Gravissimo*. §. 3. postquàm asseruerit Episcopos jure ordinario in sibi subjectis, delegato in exemptis procedere, §. 5. declarat Episcopos, et alios externos non incurrere pœnas ex eo, quia non subsunt jurisdictioni ordinariæ Episcopi.

---

(a) n. 242.

Et licèt Episcopi in exemptis procedant jure delegato à Sede Apostolicâ, jurisdictio tamen quâ procedunt est ipsis ordinaria, utpotè Episcopali officio perpetuò annexa à Canone.

45. — Quæritur 4. An Episcopi colloquendo cum Monialibus alterius Diœcesis peccent, et incurrant excommunicationem ab Ordinario latam? Quoad peccatum, videntur non posse excusari, dùm in præfato *c. Periculoso*, prohibitio est generalis, et afficit omnes, *Nullique ingressus, vel accessus pateat*. Nec locus reperitur in quo legatur, quod Episcopi eximantur à legibus communibus, ut dicit *Bon.* cum *Rot. Rom.* Quoad censuram verò, tenent *Mazzot. Dian. et Graff.* non incurrere ex *c. Cùm inferior, de Major. et obed.*, ex quo videtur deduci, quòd æqualis non possit ligare æqualem. Sed affirmat *P. de Alex.* dicendo ex *Panormit. et Hostiens.* quòd Episcopus in alienâ Diœcesi censendus est ut privata persona (a). Sed his non obstantibus nunc pro certo dicendum hujusmodi Episcopos peccare quidem, sed non incurrere excommunicationem. Nam *Bened. XIV.* in Bullâ *Gravissimo*, editâ die 31. Octob. 1749. §. 2, refert per S. C. statutum esse, ne Gubernatores, vel Præsules, vel Episcopi, aut in civitate, aut oppida alterius Episcopi juri subjecta venientes, aut inibi commorantes, adeant Monialium Monasteria, §. 5. hæc habet: *Jam dictum est hosce homines directivæ Episcoporum auctoritati, eorumque Constitutionibus subjacere (nempè quoad peccatum), quæ omninò vetant accessum ad Monialium Claustra sinè debitâ facultate. Cùm verò iidem Ordinariæ Episcoporum jurisdictioni minimè subsint, ideòque sunt immunes à vi coactivâ, id est à pœnis in transgressores statutis, uti patet ex cap. A nobis 21. de sent. etc.*

46. — Præterea adest excommunicatio Papalis in easdem Moniales, quæ à Clausurâ egrediuntur ex Bullâ *S. Pii V. Decori*, 1569. Et excommunicatio incurritur etiamsi Monialis egrediatur à Monasterio unius tantum pedis spatio, ut probabiliùs dicunt

---

(a) n. 243.

*Sanch.* et *Bonac.* cum *Graff.* et *Croix*; modò exeat tota persona. Eandem incurreret excommunicationem qui permetteret Monialem egredi, aut ei comitetur, aut eam recipiat postquàm egressa est. Excusatur tantùm egressus causâ *magni incendii, vel lepræ, aut epidemiæ*. Notandum 1. hoc intelligi cùm non vacat tempus petendi licentiam, saltem ab Episcopo, vel à Prælato Regulari. 2. Sub nomine *incendii*, venit etiã inundatio fluminis; Militum incursio, domûs ruina, et omne aliud simile periculum, ut dicunt *Sanchez, Bon. Nav. Barbos.* etc. 3. Sub nomine *Epidemiæ* S. C. declaravit intelligendum de verâ peste, contrâ *Nav. Sanch. Bon. Holzm.* etc. qui dicunt intelligi de quocumque morbo ita contagioso, ut infirma nequeat curari in Monasterio, nisi cum periculo inficiendi alias, et inferunt ex eodem *c. Periculoso*, ubi prohibetur Monialibus exire, modò aliqua illarum *non possit cum aliis sinè gravi periculo, seu scandalo commorari*. Contrâ rectè dicunt *Bon. Barb.* et alii (contrâ *Suar. Nav.* etc.) non sufficere ad egrediendum quamcumque infirmitatem gravem, sed non afferentem periculum inficiendi alias. Notandum 4. cum *Sanch.* et *Bonac.* quòd Monialis quæ egressa est, statim ubi convaluit, debet reingredi: hoc statim intelligitur moraliter, nempè elapso uno vel altero die (a).

47. — Hactenùs de censuris circà Monialium Clausuram. De aliâ censurâ occurrit loqui latâ in mulieres quæ violant clausuram Monasteriorum Religiosorum; ex Bullâ *Regularium* S. Pii V. 1566. et alterâ *Ubi gratia*, Greg. XIII. 1575. Et hanc excommunicationem incurrunt non tantùm mulieres quæ Monasteria virorum ingrediuntur, aut Monasteria mulierum sub prætextu facultatum, ut dictum fuit *num. 33*, sed etiã illæ quæ ingrediuntur sinè tali prætextu, ut declaravit idem S. Pius V. in aliâ Bullâ *Romanum*, sicut id intelligunt communissimè *Castropal. Suar. Bonac. Sanch.* et *Salm.* quicquid dicant alii (b). Ex hujusmodi prohibitione tamen excipitur casus, quo mulier ingrederetur clausuram

---

(a) *Lib. 7. n. 229.* — (b) *n. 230.*

ad evitandam mortem imminentem. Item excipiuntur Reginae, Electrices, et hujusmodi, ut communiter dicunt *Suar. Sanch. Bonac.* etc. Excipiunt etiam DD. Fundatrices, et mulieres familiares Fundatorum. Sed Benedict. XIV. in suâ Bullâ *Regularis*, 1742. declaravit has non posse ingredi sinè speciali Indulto Apostolico; item vetavit præcipuè, ne mulieres sub quocumque prætextu etiam pietatis ingrederentur septa Religiosorum, ex quo revocatum est, quòd à S. Pio V. in Bullâ *Decet*, permittebatur mulieribus, nempè posse ingredi ad associandam Processionem, aut ad audiendum Sacrum, aut ad Concionem (a). Dicunt *Bonac. Barb.* etc. quòd Sacrarium Regularium etiam est Clausura; sed *P. Ferrar.* (b). asserit praxim ferè ubique gentium esse contrariam.

48. — III. Loquemur de excommunicatione in percussores Clericorum. Hæc habetur in *Can. 17. q. 4.* ubi dicitur: *Si quis suadente Diabolo, in Clericum, vel Monachum violentas manus injecerit anathematis vinculo subiaceat; et nullus Episcoporum præsumat illum absolvere, nisi mortis urgente periculo, donec Apostolico conspectui præsentetur, et ejus mandata recipiat.* Explicabimus textum. Dicitur 1. *Si quis*, intelligitur quæcumque persona cujusvis sexûs, aut ætatis, modò sit rationis compos ut habetur ex *c. Pueris, de Sent. excom.* (c).

49. — Incurrunt etiam præfatam excommunicationem omnes efficaciter mandantes, aut consentientes in percussione, uti habetur ex *c. Quantæ, et ex c. Mulieres, de Sent. excom.* Dicitur *efficaciter*; dùm ad hoc ut hi incurrant excommunicationem; requiritur, ut percussio fiat causâ eorum, et ut influxus eorum sit gravis; ità *Suar. Nav. Bon. Silv. Salm.* etc. cum comm. Dicunt etiam communiter *Coninch. Av. Diana, Salm. Croix,* etc. ex *c. ultimo de Homic. in 6.* quòd si quis diceret: *Cupio vindictam sumere in talem Clericum*; prævidendo quòd alii jam ejus locutione moverentur ad vin-

---

(a) n. 231. — (b) *Ferrar. Bibl. v. Conventus* n. 14. — (c) n. 264. et 265.



dictam, hic jam incurreret excommunicationem, si percussio eveniret (a). Incurrunt etiam illi, qui *ratihabent* percussione factam, uti habetur ex *cap. Cùm quis, de Sent. excom.* Sed in hoc requiritur 1. ut percussio facta sit nomine, aut in gratiam illius. 2. Ut *ratihabitio* patefiat aliis externè. 3. Ut cùm accidit percussio, ille fuerit aptus mandato, aut consilio, saltem habitualiter, v. g. si fuerit ebrius, vel dormiens, secùs si fuerit amens; *Suar. Sayr. Bonac. Castrop. Conc. Salm. Croix, etc.* (b). Incurrunt etiam illi qui non impediunt percussione, et impedire tenentur ex justitiâ, ut Principes, Prælati, Judices, Parentes, Tutores, Domini, Magistri, Parochi, etc. uti habetur ex *cap. Quantæ*, ubi dicitur: *Eos delinquentibus favere, qui, cùm possint, facinori desinunt obviare.* Secùs verò illi qui tenentur impedire tantùm ex caritate, licet omitterent impedire ex odio, ità *Nav. Bon. Laym. Conc. Castrop. Mol. Salm. etc.* cum *Glossâ* in dicto *Cap. v. Interpretamus* (contrà *Suar. et Cajet.*); et merito, nam illi tantùm censentur favere percussioni, qui suâ auctoritate eam impedire possunt, et non impediunt, adedque non impediendo, videntur quòd ipsi ob taciturnitatem concurrant ad eam approbandam (c).

50. — II. Dicitur *Clericum*, vel *Monachum*. Nomine *Clerici* intelligitur etiam Tonsuratus, licèt excommunicatus, suspensus, aut interdictus; excepto si iste dimiserit habitum, et post tres admonitiones nec reassumpsisset, ut habetur in *cap. Contingit, 45. de Sent. excom.* et juxtà communem DD. (d) Nomine *Monachi* intelligitur quilibet Religiosus, sivè Conversus, aut Novitius, utriusque sexûs, et etiam Tertiarii S. Francisci, aut S. Dominici, qui gestant habitum, et vivunt in communitate sub obedientiâ Prælati; *Suar. Nav. Bonac. etc.* communiter. Idem dicit *Fagnanus* currere pro mulieribus quæ vivunt in Conservatoriis, licèt non approbatis à Papâ. Idem dicit *Renzi* currere pro Seminaristis,

---

(a) n. 266. — (b) num. 267. — (c) Lib. 7. num. 268. et 269. — (d) n. 270.

et pueris Collegiorum, ut sunt Neapoli pueri Pietatis, S. Honuphrii, etc. Idem dicunt *Suar. Fagn. Tourn. et Ronc.* de Eremitis qui voto, aut pacto se adscribunt servitio alicujus loci sacri sub Episcopi subjectione, aut (ut dicit *Castrop.*) qui vivunt sub aliquâ regulâ cum voto obedientiæ. Cæterum communiter DD. dicunt Eremitas vagos non gaudere tali privilegio, licet ex Episcopi licentiâ alicui Ecclesiæ deservirent (a).

51. — Dicitur IV. *Manus injecerit.* Intelligitur quælibet percussio realis, et externè gravis cum peccato mortali facta, sive manibus, sive baculo etc. Sed rectè animadvertunt *Suar. Castrop. Bon.* etc. quòd quoties injuria censetur gravis ratione reverentiæ Clerico debitæ, sufficit qualiscumque percussio etiam levis ad incurrendam censuram, cum in hoc Canone debeat interpretatio largè sumi, ut favorabilis statui Ecclesiastico (b). Quapropter dicunt DD. incurrere hanc censuram. 1. Eum qui expuit in faciem Clerici, aut eum coinquinat luto, aut aquam in eum infundit, aut vestem scindit, capillos evellit, aut aliquid aliud de personâ illius, ut pileum, pallium etc. 2. Qui eum in carcerem conjicit, aut in alium locum, undè egredi nequit sinè dedecore. 3. Qui eum insequitur, ut in foveam cadat, aut excutiat ab equo; imò probabile est etiam incurrere eum, qui illum insequitur etiam sinè ullo fine, si accidit ut Clericus cadat dum fugit; licet alii etiam probabiliter id negant. 4. Qui violenter ferit, aut percutit equum, cui Clericus insidet, aut habenis eum retinet, *Suar. Castr. Bon. Laym. Salm.* etc. communiter. 5. Qui aliquâ injuriosâ actione Clericum afficit, etiam eo consentiente, *Suar. Bon. Coninch. et Salm. ex cap. Contingit, de Sent. excom.* Sed advertunt *Bon. et Cröix*, quòd tunc censura non esset *latæ sententiæ*, sed *ferendæ*, dum in eodem textu dicitur, loquendo de tali casu, *Excommunicetur.* Et item dicunt *Coninc. et Salm.* quòd non currit quandò consensus Clerici auferret ab actione esse injuriosam. An autem sit

---

(a) n. 271. — (b) n. 272. et 273.

excommunicatus Clericus, qui se ipsum percutit ita perculsus; affirmant *Laym. Navar. Suar.*, sed probabiliter negant *Castrop. Tol. Barbosa, Croix, Tourn.* etc., quia revera Canon videtur loqui tantum de diversâ personâ, quæ Clericum lædit (a).

52. — Non incurritur autem excommunicatio, si percussio gravem non irrogat injuriam; hinc non incurrit, 1. Fur qui furatur clam crumenam, aut vestem Clerico; secus si vi hoc faciat, ut dicunt DD. cum communi. 2. Non incurrit qui percutit joco, aut sinè culpâ gravi; *Nec Clerici* (excommunicantur), *si sint plenæ ætatis, et non ex odio, vel invidiâ, vel indignatione, sed levitate jocosa, se ad invicem percutere contingat.* Idem dicunt *Bonac. Fill. Laym. Mol. Salm. Castrop.* etc. currere de pueris Tonsurâ, aut Minoribus Ordinibus initiatis, qui se invicem pugnis percutiunt, licet sanguis è naribus emanet; quia tales percussiones non reputantur graviter injuriosæ, licet (addit *Sotus*) percussio esset gravis; sed hoc intelligendum, modò illa non fuerit deliberata. Idem valet si esset casualis, aut ob propriam defensionem, aut proximè conjunctorum, aut bonorum. 3. Non incurrit excommunicationem, qui in percutiendo non peccat graviter defectu advertentiæ, aut consensûs, ob iram subitanæ, ut communiter dicunt *Suar. Bonac. Laym. Castrop. Con. et Salm.* Sed hinc quæritur, an incurrat qui percutit ignorans percussum esse Clericum, sed animo paratus eum percutiendi etiamsi cognovisset? Alii affirmant, sed communissimè et rectè negant *Suarez, Vasq. Bon.* et alii; quia ad incurrendam censuram non sufficit voluntas interpretativa, sed requiritur actualis. Secus verò si percussor jam dubitaret quòd ille sit Clericus, aut si eum percuteret animo afficiendi eum injuriâ, sive sit Clericus, sive Laicus. Si verò ignorantia est crassa, dicimus cum *Sanch. Covar. Croix*, etc. non excusari percutientem; Tò enim *suadente diabolo*, non requirit jam dolum, uti volunt *Silv. Felin.*

---

(a) n. 274.

etc., sed importat tantum, ut adsit peccatum mortale. Incurrit etiam qui percutit Clericum, quem putaret esse alium Clericum quem lædere intendit; quia jam irrogat injuriam statui Clericali (a), ut diximus *Tom. I. Tract. X. num. 85*. Non incurrit 4. Prælati, Magister, aut Pater qui percutit (sed moderatè) Clericum qui Minoribus Ordinibus initiatus est; et idem dicunt rationabiliter *Salm. de fratre majore ætate*, cui curæ esset Clericus, ut infertur ex *cap. Cum voluntate*, 54. §. *Si quis, de Sent. exc.* ubi conceditur id omnibus, qui aliquos de familiâ suâ, vel propinquos inferiorum graduum duxerint corrigendos. Ità etiam permittunt DD. Prælati, et Magistris Ecclesiasticis corripere etiam Clericos in sacris, modò correptio sit moderata. Sed fit dubium, an ità possint etiam parentes? Negant *Laym. Mol. Castr. etc.* Sed probabilius affirmant *Suar. Tourn. Conc. Val. Av. Bonac. Salm. Conc. etc.* dùm in *cap. 1. de Sent. excom.* excusatur jam Magister, si scholarem jam Clericum (quamvis sit plenæ ætatis, ut priùs ibi dicitur) intuitu disciplinæ, vel correctionis percusserit. Igitur si potest Magister percutere Clericum perfectæ ætatis, quâ de re intelligitur etiam Clericus in sacris, non solum intuitu disciplinæ, sed etiam correctionis, tantò magis poterit pater, cujus principaliter est filios corripere (b). 5. Excusatur, ut dicitur *c. Si verò, 3. de Sent. exc.* Qui in Clericum cum uxore, matre, sorore, vel filiâ propriâ turpiter (agentem) inventum manus injecerit violentas; secus si persona non est ità ei conjuncta; notant tamen *Nav. Tourn. Concin. Croix etc.* quòd hujusmodi percussor tunc tantum excusatur à censurâ, cum percutit eodem actu, aut paulò post. Præterea rectè dicunt *Laym. et Nav.* non excusari virum qui ex proposito etiam expectat Clericum, et postea eum in adulterio deprehensum percutit: nam tunc non verificatur quòd deprehendit eum in delicto, dùm eum expectat ad delictum. Contrà rationabiliter *Suar. Sayr. Sylv. Salmant. etc.* excusant mulierem, quæ percutit

---

(a) *Lib. 7. n. 275.* — (b) *Ibid. v. ad V.*

Clericum qui eam sollicitat, cùm illa non potest aliâ viâ se liberare, etiamsi ille eam tentasset solis pravis verbis; sed hoc intelligendum est, quandò mulier pro tali sollicitatione reperiretur in periculo labendi (a). Circà verò absolutionem à tali excommunicatione quandò possit concedi ab Episcopo, et quandò à Papâ, vide dicenda in *Tract. XX. de Privil. T. III. n. 46. 47. et 48.*

III. De excommunicationibus reservatis Papæ in Bullâ Cœnæ.

53. — Principalis excommunicatio in hâc Bullâ est in hæreticos, in eorum fautores, in eorum libros legentes. Primo igitur loco incurrunt præfatam excommunicationem hæretici; sed ad eam incurrendam 1. requiritur ut hæresis sit formalis; nempè ex errore intellectûs, et cum pertinaciâ, itâ ut quis velit eam amplecti opinionem, non obstante quòd sciat illam esse oppositam Ecclesiæ doctrinæ, ut docet *S. Thomas* (b) cum communi. Dictum est, non obstante quòd sciat, quia ignorantia licet supina excusat ab hâc censurâ; quia tunc deest hæc pertinacia, quæ hæresim formalem constituit. Imò, ut dicunt probabiliter *Suarez, Azor. Castr. Salm. Bann. Sayr.* etc. excusat etiam affectata; dùm non contradicit Ecclesiæ, qui nescit se Ecclesiæ contradicere, quâcumque ignorantia id nesciat (c). Si quis autem dubitat de rebus Fidei positivè judicando dubium esse aliquod dogma, certè hic incurrit censuram tanquàm hæreticus; prout communiter dicunt *Sanch. Vasq. Bon. Salm.* etc. ex c. 1. de *Hæret.* Qui autem dubitaret negativè, non jam judicando, sed suspendendo iudicium, peccaret quidem, sed non incurreret censuram, quia tunc non adest electio pertinax contra id quod sentit Ecclesia, itâ *Canus, Sari. Becanus, Salm. Tanner.* etc. (d). Requiritur 2. ut error sit externatus verbis aut signis, per se aut per circumstantias hæresim manifestantibus; undè

---

(a) *Ibid. v. Si percutiatur.* — (b) 1. part. quæst. 52. n. 4. — (c) n. 301. — (d) n. 302.

dicunt *Laym.* et *Salm.* non incurrere censuram, qui diceret : *Non est Deus*, tacendo Jesus-Christus (a). Requiritur 3. ut manifestatio sit per se peccaminosa, undè non incurrit qui manifestat errorem suum consilium exposcendi fine. Requiritur 4. ut ipse manifestet suam hæresim animo eam profitendi; secùs tam in hoc quàm in aliis casibus in quibus non incurritur censura, potest absolvi hæresis à quolibet Confessario (b). Cæterum ad incurrendam excommunicationem, sufficit errorem esse externè manifestatum, licèt aliis non fiat notum; *Azor. Avil. Corn.* etc. cum comm. (c). Et constat ex praxi aliquarum facultatum quas Pontifex solet concedere Missionariis; nam solet concedere facultatem absolvendi ab hæresi, modò complicem non habeat, quæ utique aliàs non est hæresis externata et nemini nota.

54. — Secundo loco incurrunt hanc excommunicationem, ut exprimitur in Bullâ, *Credentes, Fautores, Receptatores, et Defensores*. Illi dicuntur *Credentes* qui externè ostendunt se consentire erroribus, dicendo v. g. *Ego credo quod credit Calvinus*; aut *Calvinus fuit vir sanctus*. *Fautores* sunt qui laudant hæreticum, aut ei auxilium præstant ad fugiendum; aut cum possint eum capere, aut punire omittunt, cum teneantur id facere ex officio. *Receptatores* sunt qui domi excipiunt, aut occultant hæreticum, ne puniatur. *Defensores*, qui impediunt judicem, quominus capiat, aut puniat hæreticum, aut qui defendunt eorum errores, licèt internè aliud sentiant, et credant (d). Dicunt autem *Tolet. Castr.* etc. hujusmodi fautores incurrere excommunicationem, licèt id non agant animo favendi hæresi, sed ut opitulentur conjuncto, aut amico. Sed probabiliter id negant *Sot. Azor. Laym. Salm. Arriag. et Sanch.* cum *S. Bonov.*, quia Ecclesia ideò damnat præfatos *Fautores* in quantum favent hæretico, uti hæretico, non autem ut propinquo, aut amico (e). Quòd si fautor jam cum affectu opitularetur hæretico, ut

---

(a) n. 304. — (b) n. 305. — (c) n. 305. — (d) *Lib. 7. num. 306.*  
— (e) n. 308. — (f) n. 308.

Cap. 2. Punct. 3. De Excomm. non reserv. 449

eum à Judicis manibus subtrahat , licèt ille postea capiatur , non excusatur à censurâ , ut rectè dicunt Sayr. Graff. Castrop. et alii ( contrà Sanch et Suar. ) quia jam verificatur quòd cum affectu faveat hæresi (a).

55. — Tertio loco incurrunt excommunicationem , uti dicitur in Bullâ , *scienter retinentes , legentes , imprimentes , et defendentes libros hæreticorum , de Religione tractantes , vel hæresim continentes , ex quavis causâ publicâ vel occultâ , quovis ingenio , vel colore.* Et idem dicunt Salm. currere ( juxtâ Decreta Pontificia ) de illis qui vendunt , emunt , aut transferunt dictos libros , aut impediunt quominus tradantur Episcopo (b). Hic quæritur , an Episcopi legere possint libros prohibitos? Videbatur posse , cum omnes Episcopi , ubi non adest formale Tribunal S. Officii , sunt Inquisitores nati , qui procedere valent viâ ordinariâ adversus delinquentes in materiâ Fidei. Sed negandum cum Sylvio , Barbos. et Bonac. (\*) ex Bullis Julii III. *Cum meditatio* , Pauli IV. *Quia in futurorum* , et Pii IV. *Cum pro munere* , relatas ab Auctoribus præfatis , ubi inhihetur tam Episcopis , quàm Inquisitoribus lectio librorum vetitorum. *Præterquam* ( excipitur ) *Senioribus , et Commissariis hæreticæ pravitatis.* Tò *Commissariis* intelligitur de iis Inquisitoribus , quibus , cum committitur aliqua particularis causa , legere indulgetur libros ad illam materiam concernentes , sed tantum pro eo tempore quo permanet commissio , ut Bonacina loco citato explicat dicens : *Exceptis Inquisitoribus , Commissariisque pro tempore deputatis , durante illâ deputatione.* Et hic transeunter advertatur , quòd in laudatâ Bullâ , *Cum pro munere* , Pii IV. præscribitur libros prohibitos non tantum retineri non posse , sed nec etiam lacerari ab aliquo , aut comburi , sed deferendos esse ad Inquisitores , vel Episcopos , ubi Tribunal S. Officii non manet.

---

(a) n. 308. — (b) n. 297. (\*) Sylvius tom. 3. q. 11. a. 3. Concl. 2. in fin. Barbosa de Pot. Ep. p. 3. Alleg. 90. 8. Bonac. t. 3. D. 1. sect. 2. p. 4. n. 10.

56. — Ad incurrendam tamen hanc censuram, quatuor requiruntur conditiones : I. ut scienter legantur aut retineantur illi libri : undè excusat ignorantia etiam crassa , et affectata , ut dictum est *n. 8.* Sed non excusatur ille qui legeret , etc. librum , sciens famâ , aut dicto unius testis fide digni , quòd liber sit prohibitus, ut dicunt communiter *Lug. Sanch. Bonac. Croix* , etc. (a). II. Requiritur , ut Auctor sit hæreticus , undè non sufficit quòd sit infidelis , *Suar. Sanch. Castr. Salm.* etc. Libri tamen *Thalmud* , et alii Hebræorum sunt prohibiti per Bullas S. Pii V. et Clementis VIII. Dicit autem rectè *Holzman* , inter hæreticos habendos esse etiam illos , qui ex professo agunt de hæresi , licèt tacito nomine circumferantur ; nam eorum Auctoresupponendus est certè hæreticus(b).

57. — III. Requiritur , ut liber hæretici aut tractet de Religione , aut contineat aliquam hæresim : adeoque ut ille sit prohibitus , sufficit , ut contineat unum tantum errorem adversus fidem , licèt non tractet de Religione , ut rectè dicunt *Sanch. Castr. Salm. et Bonac.* (quicquid dicat *Busemb.* cum aliis) (c) , aut tractet ex professo de Religione , aut de dogmatibus , aut de Canonibus , aut Ritibus , aut de materiâ spirituali. Dicit autem *Croix* cum *Pignat.* excusari qui raderet errorem à libro , et legeret reliquum ; quia liber non ampliùs contineret hæresim. Sed huic se opponunt *Suar. Bon. et Sanch.* dicentes , quòd illa abrasio particularis non tollit communem prohibitionem libri. In hoc mihi arridet distinctio *P. Sporer.* Si liber tractat ex professo de Religione , abrasione non obstante , etiam prohibitus remanet liber , juxtà Bullam , quæ prohibet omnes libros hæreticorum de Religione tractantes. Secus verò si liber ageret de rebus indifferentibus , prout de Philosophiâ , aut de Historiâ , exceptâ Historiâ Centuriatorum , aut hujusmodi , quæ in substantiâ agit etiam de Religione. Communissimè ceteroquin dicunt *Suar. Tol. Castr. Croix* , etc. quòd incurrit censuram qui legit sinè licentiâ tales libros prohi-

---

(a) *n. 296.* — (b) *n. 282.* — (c) *n. 287.*



bitos, etiam ad confutandos errores, et licet sine periculo perversionis, dum in Bullâ vetantur legi ex quâvis causâ, vel calore, excipiunt tamen *Laym. Dicast. Holzm. Elbel*, etc. si quis doctus legeret, ut convinceret, aut converteret aliquem hæreticum particularem, et necessitas non pateretur moram, cum tempus non suppetat quo possit obtineri licentia (a). Hæc licentia obtinenda est aut à Papâ, aut à S. C. Indicis, aut Concilii, dumtaxat in casu magnæ necessitatis, ait *P. Viva*, potest eam concedere Episcopus (b).

58. — IV. Requiritur, ut lectio sit in materiâ notabili, nam communiter in hoc admittunt DD. parvitatem materiæ. Hanc parvitatem autem dicunt *Sanch. Vivald. Sa* etc. esse etiam unam paginam; sed hæc opinio est nimis laxa. Alii contrâ, ut *Graff. et Reginal.* dicunt esse tres aut quatuor versus. Alii denique, ut *Marchant. Holzm. Spor. Elb. Croix*, meliùs distinguunt, habitâ ratione finis prohibitionis, et dicunt quòd si in aperiendo libro occurrit hæresis, potest incurri censura etiam legendo paucos versus, cum possit ibi adesse periculum perversionis: Secùs autem, si ibi agitur de aliâ materiâ sine ullo errore (c). Cæterum potest incurri censura in legendo solo præmio, aut indice, aut præfatione, cum legitur in quantitate notabili; *Laym. Bonac. et Busemb.* (d).

59. — Quæritur hic 1. An incurrat censuram qui sentit alium legentem suo jussu? Affirmant *Azor. Silv. Pignat.* etc. Sed probabiliter id negant *Navar. Coninc. Sanch. Castr. Filliuc. Croix*, et *Viva*; et *Sporer, Sousa*, et *Stephanus* excusant etiam à peccato, si illi qui audit non adest periculum perversionis (e). Quæritur 2. An incurrat qui legit epistolam, aut concionem seorsim impressam. Affirmant *Suar.* Sed communiùs et probabiliùs negant *Laym. Sanch. Busemb. Holzm. Marchant. Salmant. Bonac. Castr.* et *Lugo*, nam talis scriptura non potest dici liber; et cum agatur de re odiosâ, nempe

(a) n. 283. — (b) n. 299. in fin. — (c) 299. — (d) *Lib. 7. n. 297.*  
— (e) *Ibid.*

452 *Tract. 19. De Censuris, et Irregularitatibus.*

de poenâ, strictè interpretandum (a). Quæritur 3. an incurrat excommunicationem qui legit manuscripta hæreticorum? Negant *Azor. Viva, Spor. etc.* cum *Silvio*, qui refert etiam Declarationem S. C. Sed constanter affirmant *Suar. Pignat. Sanch. Croix, Holzm. Dicast.* et alii, dicentes quod manuscripta etiam veniunt sub nomine librorum, prout antè inventionem artis typographicæ libri dicebantur, et nunc libri, ubi adnotantur Baptizati, Confirmati, etc. à Rituali libri dicuntur, sicut etiam appellantur libri acceptorum, et datorum, libri regestorum, etc. Et respondetur ad Decr. S. C. non satis constare, sicut dicit *Croix* et *Salmanic.*; ceteroquin advertit in expurgatorio Romano prohiberi generaliter sub poenâ excommunicationis omnes scripturas hæreticorum, usquè dum non approbentur ab Episcopis (b). Advertendum tamen quòd Bened. XIV. quotquot libros prohibuit, etiam manuscripta comprehendit, ut videre est in suis Bullariis. Item cum edita esset quædam Dissertatio manuscripta adversus Bullam ab eodem editam super Bullam *Unigenitus*, ipse etiam illam prohibuit. Item declaravit quòd prohibitio libro in uno idiomate, intelligitur ille prohibitus, in quocumque alio sit translatus.

— 60. Contrà non sunt prohibiti 1. libri Catholicorum qui referunt verba alicujus hæretici, ad eum confutandum, *Suar. Laym. Nav. Azor. Sanch.* etc. communiter (c). 2. Libri Catholicorum, ubi adsunt notæ alicujus hæretici: modo (rectè limitant *P. Suar. Pignat.* etc.) tales adnotationes, sive Scholia, non essent adeò copiosa, ut potiùs ex iis constaret liber, quàm ex Auctoris scripto (d). 3. Libri hæreticorum Philosophici, aut alterius materiæ, sed ab erroribus immunes, nam (ut diximus n. 57.) etiamsi sit ibi scriptus aliquis error incidenter, jam ille prohibitus est, quicquid dicat *Busemb.* cum aliis.

---

(a) n. 293. — (b) *Ibid.* — (c) n. 285. — (d) n. 286.

61. — Refert hìc aliquam dare notitiam de Indice librorum prohibitorum ex mandato Pauli IV. edito; et approbato etiam à Clemente VIII. Hic Index tres librorum classes constituit. Prima constat ex libris Hæreticorum, qui continent (ut dictum est) hæresim, aut tractant de Religione. Secunda ex libris Catholicis, sed continentibus aliquem errorem aut contrà fidem, aut contrà bonos mores; sed hi non sunt prohibiti, donec adnotentur in Indice, ut dicit doctissimus *Lupo*; modò non sint illi qui generaliter sunt prohibiti ab indice. Tertia ex libris, qui circumferuntur tacito Auctore, et hi, ait idem *Lupo*, nec prohibiti sunt, nisi aliquam contineant doctrinam pravam: et tantò minùs si produntur cum approbatione Ordinarii, ut hodiè communiter videtur adolevisse usus. Prætereà sunt prohibiti omnes libri Hæresiarcharum, licèt non tractent de Religione: Item libri hæreticorum (ut superiùs innuimus) donec non permittantur ab Episcopis: Biblia vulgaria, et libri qui in linguà vernacula loquuntur de quæstionibus cum hæreticis: libri magici, et obsceni ex *professo*, et etiam de Astrologià judiciarià, in quam Sixtus V. inflixit excommunicationem reservatam. Et item prohibita sunt in Indice omnia scripta damnata tanquàm suspecta de hæresi, aut de falso dogmate, sub excommunicatione, sed non reservatà, ut dicunt *Pignat.* et *Suar.* (a). Licet referant *Salm.* S. Pium V. talem excommunicationem sibi reservasse.

62. In Bullæ vigore incurrit excommunicationem non tantùm qui legit, sed etiam qui retinet præfatos libros hæreticorum. Qui fortè eos haberet, tenetur ad eos consignandos aut Episcopo, aut Inquisitoribus, juxtà præceptum Julii III. et Pii IV. Et loquendo de locis ubi Inquisitio erecta est, dicit *P. Suar.* cum aliis, quòd incurreret censuram qui eos igni daret; sed eum excusant *Sanch. Pignat. Salm. Croix*, dicendo quòd qui librum cremat, non potest dici quòd librum teneat (b). Et reverà *Bened.*

---

(a) n. 283. — (b) n. 299.

XIV. cùm damnasset aliquos libros, præcepit aut consignandos, aut cremandos. Cæterùm non excusatur qui retinet librum alterius nomine, sivè pig-nori, sivè commodato, sivè deposito; aut qui eum apud alium teneret; quia cùm ipse retineat domi-nium, etiam dicitur quòd ipse retineat, cum possit pro libitu eum repetere; *Suar. Sanch.* et alii com-muniter. Et hìc notetur *Propositio 45. ex damnatis ab Alex. VII. quæ dicebat: Libri prohibiti, donec expurgentur, possunt retineri etc.*; dicit tamen *Croix* cum aliis quòd excusaretur qui librum reponeret in loco sequestrato, qui in quolibet Monasterio assignari solet. Et qui consignaret librum alicui, ha-benti licentiam, cum pacto non ampliùs eum repe-tendi, nisi post expurgationem, aut post licentiam obtentam, ego nescirem eum damnare; et tantò minùs si librum ei donaret cum pacto repetendi tantùm cum licentiam obtinuerit (a). Excusaretur etiam qui librum paulùm temporis retinet, verb. gr. unum vel alterum diem; ità *Laym. Sanch. Sayr. Bon.* et alii communiter. Et admittunt hoc *Cast.* et *Viva*, in quantùm ad excusandum eum à cen-surâ, licèt ille in illo modico tempore animum ha-beret illum semper retinendi; dùm ut dicunt, deest tunc materia gravis facti. Præterea, *Laym. Pignat. Sayr. Sanch. Graf.* etc. etiam excusant eum, si diutiùs librum retineat, expectans tempus oppor-tunum quo tradat superiori vel alteri habenti licen-tiam (b).

— 63. Multi alii autem (ultrà præfatum casum hæresis) sunt casus Bullæ Cœnæ, quibus annexa est excommunicatio. Expedit hìc principaliores ad-notare. Et sunt in eos qui surripiunt bona Christi-fidelium naufragantium, licèt in littore inventa, modò non habeantur ut derelicta. In dominos qui in terris suis sinè privilegio imponunt tributa: Tale privilegium habent Reges, Respublicæ, et etiam universitates, cùm id ad subveniendum civium ne-cessitatibus expediens est; ità *Vasq. Dicast. Salm.*

---

(a) *Lib. 7. n. 298.* — (b) *n. 295.*

*Viva*, etc. In piratas deprædantes Christianos in mari Ecclesiastico. In falsificatores literarum Apostolicarum. Qui à Judicibus Ecclesiasticis avocat causas spirituales, aut trabunt Clericum ad Tribunal Laicale. In usurpantes jurisdictionem, aut fructus Beneficiales. In vexantes Romipetas, aut eum qui illinc regreditur ob negotia ad Sedem Apostolicam spectantia. Alii casus minùs usuales videri possunt in Opere (a); sed hic tandem notandum quòd Clemens VIII. imposuit excommunicationem reservatam in absolventes à casibus *Bullæ Cænæ* sinè facultate (b).

## PUNCTUM IV.

De suspensione, degradatione sivè depositione, de interdicto, et cessatione à divinis.

I. De suspensione 64. 65. et 66. II. De depositione, et degradatione 67. III. De interdicta 68. 69. et 70. IV. De cessatione à divinis 71.

64. — **E**T I. de Suspensione. Suspendio est censura quâ Clericus functiones aliquas Ecclesiasticas exercere prohibetur. Certum est peccare graviter Clericum exercentem functionem aliquam sibi ob suspensionem vetitam, nisi excusetur, aut quia exercet Ordinem non Sacerum, aut Sacrum, sed non solemniter, ut docent. *S. Anton. Habert, Tourn. Salm.* etc. contra *Suar. et Navar.*, aut quia exercet illum ex ignorantia aut metu gravi, aut in parvâ materia; *Bonac. Tourn. Salm.* etc. (c). Hic quæritur I. An incurrat irregularitatem Clericus exercens actum à quo suspensus est? Multæ adsunt sententiæ; sed illa quæ mihi magis arridet cum *Ronc.* et aliis, sic distinguit: Si suspensio imposita est per modum statuti, aut præcepti ob delictum futurum, aut etiam præteritum, sed habens tractum successivum, tunc reus incurrit, juxta *Cap. 1. de Sent. et*

---

(a) n. 311. — (b) n. 111. — (c) n. 312. v. *Est, certum.*

456 *Tract. 19. De Censuris, et Irregularitatibus.*

*re jud. in 6.* Secùs autem si suspensio lata est per sententiam in punitionem delicti omninò præteriti, quia tunc suspensio habet rationem meræ poenæ, non jam censuræ; nam censura non potest imponi ob delicta omninò præterita (a) sicut diximus *num.*

8. Quæritur 2. An Episcopus suspensus à Pontificalibus incurrat irregularitatem, si ea exercet? Negant *Silv. Innoc. Abbas*, etc. dicentes quòd tunc Episcopus non exercet Ordinem Sacrum; innitentes illâ sententiâ quòd Episcopatus non sit Ordo, licèt opposita sit valdè probabilis cum *Bell. Sanch. Tourn.* et aliis (vide *Tom. III. Append. III. de Exam. cap. 11. n. 27. in fin.*). Nihilominus negari non potest quin tale exercitium sit actus Ordinis Sacri, sin distinctus, saltem extensus. Quòd si Episcopus suspensus celebraret Missam solemnem cum Pontificalibus, dicimus quòd peccaret, sed non incurreret irregularitatem, quia celebrando non exercet actum substantialem Ordinis Episcopalis, sed solius Sacerdotalis, à quò non est suspensus (b).

65. — Suspensus non toleratus invalidè exercet jurisdictionem. Toleratus verò exercet validè, sed illicitè, si requisitus non est ab aliis: *Busemb. Salm.* etc. (c). Alii autem, etiamsi Clericus esset nominatim suspensus, probabiliter dicunt ut *Suar. Castrop. Holzm.* et *Salm.* non teneri sub culpa gravi ad eum vitandum, et subjungunt esse omninò illicitum fidelibus audire Missam Sacerdotis suspensi (d).

66. — Suspensio alia fertur ad tempus, alia in perpetuum. Alia est à Beneficio, aut ab aliquâ functione ipsius: alia ab Officio, quæ comprehendit tam suspensionem ab ordine, quàm à jurisdictione. Notandum 1. quòd suspensus absolutè, intelligitur suspensus tam à Beneficio, quàm ab ordine; *Laym. Busemb.* etc. Adeò ut suspenso tunc interdictum est quodlibet exercitium ordinis, et jurisdictionis. Sed notandum cum *S. Thomà* (e), quòd  
suspensus

---

(a) n. 314. — (b) n. 314. *Dub. 2.* — (c) n. 313. — (d) *Ibid.*  
— (e) 3. p. q. 2. a. 3.

suspensus ab ordine, non proinde est suspensus à jurisdictione; et ità etiam dicunt cum communi *Suar. Nav. Tourn. Fagnan. etc.* quòd suspensus ab officio, non idè est suspensus à Beneficio, modò supplere faciat per alios functionibus officio debitibus. Excipitur tamen si delictum sit enorme, *Cap. 10. de Purg. Canon.* aut si reus permaneret per annum suspensus, *cap. Cùm bonæ, de Ætat. etc.* Notandum 2. quòd suspensus à Beneficio non est suspensus ab officio. Quare tenetur ad horas Canonicas, et ad alia onera officii, licèt privatus sit fructibus. Hoc tamen non intelligitur, quandò suspensio est ob delictum omninò præteritum, sed quandò est imposita ob contumaciam, à quâ suspensus possit libenter liberari; *Suar. Fill. Coninc. etc.* communiter. Imò dicunt *Tourn. Avil. Renzi, etc.* quòd si Beneficiatus est occultè suspensus, et adimplet onera, potest sibi retinere illam partem fructuum, quæ spectaret ad substitutum (a). Suspensus autem à Beneficio à proprio Episcopo, non intelligitur suspensus ab aliis Beneficiis quæ extrà Diocesim haberet, modò Episcopus non exprimeret, quia tunc, licèt illa Beneficia non subdantur Episcopo, est tamen subjecta persona suspensi; *Tournely, Pont. et Renzi (b).* Dicimus præterea, cum sententiâ probabiliori *Suar. Laym. Antoine, etc.* contrà *Bonac.* quòd si suspensus acquirit novum Beneficium, collatio potest rectè irritari, sed non est nulla ex se, cùm id non sit expressum in lege, imò ex *Cap. Cùm bonæ, de Ætat. etc.* oppositum deducitur (c). Notandum 3. quòd suspensus à Beneficio non est interdictum præsentare, et conferre alia Beneficia, licèt jus ei competat ratione ipsius Beneficii; *Busemb. etc. (d).* Notandum 4. quòd, suspensâ communitate, non intelliguntur suspensæ personæ illius; sed sola communitas, quoad Officia, et Beneficia, quæ in communi illa possidet; *Bonac. Salm. etc.* cum *S. Thomà, etc.* commun.

---

(a) *Lib. 7. n. 316.* — (b) *Ibid. Dub. 2.* — (c) *Ibid. dub. 3.*  
 — (d) *Ibid. n. 317.*  
*Tom. II.*

458 *Tract. 19. De Censuris, et Irregularitatibus.*

Et si particulares exercerent functiones Communitati vetitas, peccarent utique, sed non incurrerent irregularitatem, nam talis prohibitio non esset propriè censura, *Suar. Castr. Ronc. Salm.* etc. Quòd si suspensio est imposita tam communitati, quàm personis, tunc non incurrunt innocentes, *Cap. 2. de Constit.* (a) Notandum 5. cum *Nav. Bon. Salm. Busemb.* etc. quòd si Prælatus diceret oretenùs, *Ego te suspendo*, hæc potiùs dicenda esset prohibitio quàm suspensio; nam non præsumitur velle in hoc ille peccare, cùm vetitum sit Prælatis suspendere sinè scripturâ (b). Notandum 6. quòd ex veriori, et communissimâ sententiâ *Suar. Sot. Laym. Sanch. Salm.* etc. (contrâ *Nav.*) suspensio totalis, nempe ab omni usu Officii, aut ab aliquo illorùm ad tempus notabile, non incurritur, nisi per peccatum mortale; secùs autem, si suspensio esset partialis, aut totalis ad breve tempus, v. gr. per aliquot dies, aut per hebdomadam, aut esset ferendæ sententiæ (c). Notandum deniquè quod Episcopi, et omnes Confessarii possunt absolvere à suspensione impositâ ad tempus, aut conditionatè; tempore illo elapso, aut verificatâ conditione, ipsa ex se cessat (d). Qui verò desideraret scire suspensiones in particulari quæ in ordinandos latæ sunt, videat in *Append. III. de Examine, etc. num. 84.* Suspensiones autem generales in *Jure* adnotatæ sunt in *Opere* (e).

67. — II. De *Depositione, et Degradatione.* Depositiò, et Degradatio non sunt censuræ, sed sunt suspensioni similes; hæc differentia tamen, quòd illæ auferunt jus radicale ad Beneficia, et prohibent usum Ordinis in perpetuum, quod quidem non efficit suspensio. *Depositiò* alia est verbalis; et hæc propriè dicitur depositio, quæ relinquit privilegium Canonis, et Fori: alia est realis, et hæc propriè dicitur *Degradatio*, quæ privat exercitio Officiorum; et privat Beneficiis, et privilegio Canonis, et Fori, cum certâ solemnitate, et ad semper, sinè spe res-

---

(a) *ad 10.* — (b) *nm. 317.* — (c) *num. 321.* — (d) *num. 322.*  
 — (e) *n. 318.*



titutionis. Dictum est, *exercitio*, quia Ordo non potest tolli; Unde degradatus tenetur ad votum castitatis jam emissum, et ad horas Canonicas, et invalidè contraheret Matrimonium (a). Degradatio non potest celebrari nisi ab Episcopo, sed depositio potest fieri etiam ab ejus Vicario: in depositione potest dispensare Episcopus, sed in degradatione solus Papa. Depositio non potest fieri nisi in casibus expressis in jure, et in delictis atrocioribus; Degradatio autem fit tantum in criminibus gravissimis, nempe hæresis manifestæ, calumniæ in proprium Episcopum, sodomix frequentatæ (b), et similium.

68. — III. De *Interdicto*. Interdictum est *censura quæ prohibetur usus Divinorum officiorum, aliquorum Sacramentorum, et Sepulturæ Ecclesiasticæ*. Dividitur interdictum in locale, personale, et mixtum. Per locale prohibentur Divina officia in loco dumtaxat: per personale certis personis aut communitati prohibentur: mixtum denique afficit immediatè et locum et personas. Dividitur etiam interdictum in generale, et particulare. Quandò interdictum est generale, interdictâ civitate, interdicuntur etiam suburbia, et etiam Ecclesiæ exemptæ Regularium, et tunc omnes tenentur illud servare, etiam Episcopus, qui illud tulit, excepto Pontifice. Licitum est tamen civibus, qui causam non dederunt interdicto, aliò ire ad assistendum Divinis Officiis. Interdictâ Parochiâ, interdictæ intelliguntur omnes Capellæ, et Cæmeterium contiguum; *cap. Si licitas, de Sent. excomm. (c)*. Interdicto populo, non interdicti intelliguntur Clerici, peregrini, studentes, quia isti non sunt partes populi, DD. cum communi. Contrà interdicto Clero, non intelliguntur interdicti Laici, *cap. Si sententia, de Sent. excomm. in 6.* nec Religiosi, nisi haberent officium, aut Beneficium in illo populo, nec alii Clerici qui ibi nullum habent officium. Ab interdicto Generali personali eximuntur 1. Episcopi (qui exempti sunt etiam à suspensione generali). 2. Infantes, et Amentes rationis

---

(a) n. 323. et 324. — (b) n. 326. et 327. — (c) *Lib. 7. n. 330.*

expertes; sed hi etiam privantur sepulturâ. 3. Innocentes, sed tunc cùm domicilium alibi collocant. 4. Exteri, licèt ibi diutius incolant (a).

69. — Effectus interdicti sunt I. Prohibitio Divinorum Officiorum (intelliguntur illa quæ à Clericis tantum exerceri possunt, et in loco deputato), quibus assistere nequeunt nec interdicti ob culpam aliorum. Clerici tamen qui non sunt interdicti possunt celebrare, sed clausis valvis, sinè sonitu campanarum, et expulsis interdictis (modò denunciati sint), *cap. Alma Mater, de Sent. excom. in 6.* Et si interdicti nolunt exire, debet cessari à celebratione sub pœnâ irregularitatis; sed advertunt *Suarez, Holzm. et Mazzot.* hoc currere quandò celebratur in loco interdicto. Permittitur autem celebrare Festis Natalis, Paschæ, Pentecostes, Assumptionis Mariæ, et in Octavâ Corporis Domini (b). II. Prohibitio administrandi Sacramenta, exceptis Baptismo (qui potest dari etiam solemniter), Confirmatione, et Pœnitentiâ, quæ omnibus permittuntur, præter eos qui dederunt causam aut favorem interdicto. Eucharistia autem potest præberi moribundis, et etiam Extrema Unctio, ut dicunt *Suarez, Croix, et Dicastill.* contrà *Salm. et Sanchez.* Item *Coninch. et Laym.* permittunt etiam Matrimonium, et hoc est probabilius (contrà *Suarez*); ex c. *Capellanus; de Feriis*, ubi dicitur quòd Matrimonium possit contrahi quovis tempore (c). III. prohibitio sepulturæ; sed Clerici, modò non sint nominatim interdicti, possunt sepeliri in Ecclesiâ, etiam cum Missâ; si autem Ecclesia esset specialiter interdicta, possunt etiam in illâ sepeliri, sed sinè Missâ. Sed Laici non possunt sepeliri in Ecclesiâ, et si fortè ibi sepulti sunt, exhumari debent (d). IV. Clerici qui violant interdictum in materiâ gravi, peccant graviter, et exercendo ordinem incurrunt irregularitatem. Ità etiam Religiosi, qui incurrunt etiam excommunicationem ipso facto. Laici verò peccant mortaliter, si recipiant Sacramenta contrà interdictum personale;

---

(a) n. 331. — (b) n. 333. — (c) n. 334. — (d) n. 335. v. III.

sed si violant tantum locale, v. g. assistendo Divinis Officiis, probabilius dicunt *Laym. Bus. Sot. Silvest.* etc. quod peccant tantum venialiter, modò ipsi non sint specialiter interdicti (a).

70. — Possunt interdictum ferre omnes Superiores, qui possunt excommunicare. Ad interdicendum locum aut communitatem, requiritur peccatum nimis atrox, commissum à capite, vel à principalibus illius. Interdictum tamen ad breve tempus, et in ordine ad unum, vel alterum usum, potest incurri etiam ob peccatum veniale (b). Interdicta localia, et personalia in generali à Jure communi lata, et non reservata possunt auferri ab Episcopis. Alia verò ab Episcopis lata, tantum possunt ab ipsis, vel à Papà auferri. Ab interdictis autem de Jure personalibus, et particularibus non reservatis possunt absolvere quilibet Confessarii approbati (c). Hic denique notandum, quòd cessandum est à divinis in Ecclesià, et pro interdictà ipsamet habenda est, cum ibi permittatur afferri stratum cuicumque personæ, quæ non sit Regià dignitate fulcitus, juxta Decretum quod retulimus *Tom. I. Tract. IV. n. 39.*

71. — IV. De Cessatione à Divinis. Hæc definitur *Prohibitio Clericis facta, ut abstineant ab Officiis Divinis, et ab Ecclesiasticà sepultura.* Putant autem *Suar. et Fil.* posse Episcopum unum prohibere effectum, et non alium. Hæc cessatio non est interdictum, nec Censura, nec imponitur per modum medicinæ ad removendam contumaciam, sed solum in signum mœroris, aut ad reparandam aliquam gravissimam injuriam Deo, aut Ecclesiæ irrogatam: et tenentur illud servare omnes cives illius loci, cui imponitur. Et dicunt communiùs *Sanch. Bonac. Salm.* et alii, quòd tempore talis cessationis Clerici privantur privilegio ipsis concesso tempore interdicti, conceduntur tamen illa Sacramenta, quæ permittuntur tempore interdicti. Cessatio imponitur

---

(a) n. 336. — (b) n. 337. — (c) n. 338 et 339.

462 *Tract. 19. De Censuris, et Irregularitatibus.*  
ab eo qui potest imponere censuras, præcedente monitione : et ab ipsomet potest tolli, aut suspendi per aliquod tempus (a).

### CAPUT III.

#### *De Irregularitate.*

#### PUNCTUM I.

Quid et quotuplex sit irregularitas.

*Definitio 72. An irregularitas sit censura 73.*  
*Divisiones irregularitatis 74.*

72. — **I**RRREGULARITAS, licèt non esset censura, quia tamen cum eâ valdè assimilatur, ei propterea annectitur ; et definitur : *Est impedimentum Canonicum susceptionem Ordinum sacrorum, et susceptorum usum impediens.* Itaque irregularis non potest nec ordinem suscipere, nec susceptum exercere.

73. — Quæritur an irregularitas sit censura ? affirmant *Sot. Bon. Covar.* et multi alii, dicentes essentiam censuræ, nempe esse poenam Ecclesiasticam, æquè competere censuræ, et irregularitati. Alii autem communiùs, et probabiliùs, ut *Suar. Bonac. Castrop. et Salm.* cum aliis apud ipsos id negant, dicendo esse illam impedimentum, sive inhabilitatem ; et probant ex *cap. Quærenti, de Verbor. signif.* ubi interrogatus Innoc. III. quid intelligendum nomine censuræ ? Respondit ; *Quòd per eam non solum interdicti, sed etiam suspensionis, et excommunicationis sententia valeat intelligi :* Igitur præter has tres, nulla alia poena dici potest censura (b). Et licèt sit poena, non est tamen medicinalis, nempe ad impedienda peccata futura ; nam hæc imponi-

---

(a) n. 340. — (b) *Lib. 7. n. 341.*

tur ob peccata præterita, et est pœna merè punitiva.

74. — Dividitur irregularitas in eam quæ provenit ex *Delicto*, et eam quæ provenit ex *Defectu*. Idem in *Totalem*, quæ omni Ordine suscipiendo, et suscepti exercitio privat; et *Partialem*, quæ tantum aliquo Ordinis ministerio, vel solo ascensu ad Ordines superiores privat; v. g. si Sacerdos esset manu carens, vel cœcus, esset inhabilis ad celebrandum, sed posset excipere Confessiones.

## PUNCTUM II.

### Effectus irregularitatis.

*Effectus* 75. *An irregularis possit acceptare Beneficia*

76. *An possit accepta retinere* 77.

75. — **I**RRREGULARITAS I. inhabilem reddit ad suscipiendos Ordines, etiam primam Tonsuram, ut communiter DD. II. Impedit exercitium jam susceptorum, *Cap. fin. de Tempor. Ord.* ideoque irregularis illicitè, sed validè absolveret etc. III. Impedit à recipiendis Beneficiis.

76. — Sed quoad Beneficia, quæritur 1. An nullà sit collatio Beneficii facta irregulari, qui est inhabilis ad functiones ipsius Beneficii? Sententia communior, et probabilior affirmat, et probatur ex *cap. 5. de Cleric. non ord. ministr.* et præsertim ex Trident. *Sess. 22. cap. 4. de ref.* ubi dicitur: *Nec aliis in posterum fiat provisio, nisi iis, qui jam ætatem, et cæteras habilitates integrè habere dignoscantur; aliter irrita sit provisio.* Et ratio est quia Beneficium datur propter officium, et qui est inhabilis ad Ordinis jam suscepti exercitium, debet judicari etiam inhabilis ad Beneficium; ita dicunt *Suar. Bonac. Tourn. Cabass. Salm.* cum aliis multis. Oppositam sententiam defendunt *Innoc. Silv. Laym. Viva, Elbel, Ronc. Diana, et Salm.* cum *Felin. Anchar. Giball.* et idem *Suar.*, sicut etiam *Busemb.* rectè

eam vocant probabilem : quia non est imponenda poena, ubi nulla lex expressa habetur, et cum nullus adsit textus evidens qui declarat irregularem incapacem Beneficiorum, ideoque dicunt *Suarez, Tourn. Bon. (a)*, quod licet peccet graviter in recipiendis, aut in retinendis illis sine dispensatione, tamen si per alios satisfecit Beneficii oneribus, non tenetur ad restitutionem. Et respondent ad Canones, quod ipsi illicitam declarant Beneficii collationem irregularibus, non autem invalidam, et ad Tridentinum respondent dicendo, quod ibi invalida declaratur collatio facta inhabilibus, sed tales non reputantur irregulares quoad validitatem. Sed hic advertendum quod licet hæc sententia sit probabilis, tamen quia prima etiam est probabilior, stante communiori sensu DD. qui, ut ait *Laym.*, est optimus interpret Legum, qui ita interpretati sunt textus supracitados, non potest idem in Beneficii possessionem se intromittere, quia nemo cum probabili potest in possessionem alterius rei se ingerere *(b)*. Sed contra si bona fide Beneficium accepisset, obtenta dispensatione, potest illud retinere, quin in dispensationis petitionem mentio facta esset de Beneficio *(c)*.

77. — Quæritur 2. An irregularis juxta præfatam sententiam possit sibi retinere Beneficium? Quoad Beneficia prius obtenta, nulli dubium est, quin possit; nec debet eis à Judice privari, si irregularitas provenit ex infirmitate, uti habetur ex *c. Ex parte, de Cler. argrot.* Sed si irregularitas proveniret ex delicto, debet privari à Judice; sed interim, nisi dispensationem obtineat, debet aut illud renunciare, aut resignare saltem in favorem tertii; quia qui non potest licite Beneficii oneribus satisfacere, nec potest licite illud sibi retinere; ita *Suar. Castropal. Salm.* cum multis aliis *(d)*.

---

(a) n. 342. v. *Quær.* — (b) *Lib. 3. n. 761.* — (c) *Lib. 7. n. 342. et 343.* — (d) *Lib. 7. n. 342. v. Quær.*

### PUNCTUM III.

#### Quomodo incurritur irregularitas.

*Irregularitas debet esse expressa in jure* 78. *Qui dubitat, an sit irregularis* 79. *Qui dubitat, an sit homicida* 80. *Quid requiritur ad irregularitatem ex delicto* 81. *Si delictum est omnino occultum* 82. *An requiratur scientia legis* 83. *An scientia irregularitatis* 84. *Quomodo tollenda est irregularitas in genere* 85. *De dispensatione* 86. *Quomodo tollitur irregularitas ex defectu* 87.

78. — **I**RRREGULARITAS non incurritur, nisi expressa sit in jure. *cap. 1s, de Sent. excomm. in 6.* ubi dicitur: *Cum id non sit in jure expressum etc.* Ideoque non debet extendi ultra casus expressos. Nomine *Juris*, intelligitur tantum jus Pontificium, aut Concilia approbata à Papâ. Hinc infertur quòd in materiâ irregularitatis non valet argumentum à simili, nec à majori ad minus, ut communiter advertunt DD. Advertit tamen *Laym.* quòd in dubio an aliqua irregularitas sit nec ne expressa in jure, in hoc standum est communi sensui DD. et consuetudini (a).

79. — Quæritur 1. An habendus sit irregularis qui dubitat esse talem? Nomine dubii hîc intelligitur negativum, quia in positivo, antè diligentiam, quisque se debet existimare irregularem, *Sanchez, Suar. Castrop. et Salman. cum Coninc. ex cap. 11-lud, de Cleric. excomm.*, modo (dicunt *Salm.* cum aliis DD. cit.) non adsit aliqua gravis eturgens necessitas, v. gr. initiandi Ordinibus, aut Beneficium suscipiendi: adhibitâ sufficienti diligentia, potest teneri pro non irregulari: *Suar. Castrop. et Salm.* cum aliis. Itaque difficultas restat in dubio

---

(a) n. 345.

466 *Tract. 19. De Censuris, et Irregularitatibus.*

negativo, et respondetur: quòd si dubium est juris, nempe an adsit vel ne talis lex quæ irregularitatem tali facto affingit, tunc in nullo foro censendus est irregularis, tùm ex dictis num. præcedenti, tùm quia in dubio nemo spoliandus est suo jure, ita commun. DD. *Sanch. Suar. Castr. Tourn. Habert*, etc. (a). Si dubium est facti, nempe an commiserit tale delictum (Homicidio excepto, de quo num. sequenti), duæ adsunt sententiæ. Prima affirmat cum *Concin. Tourn. Habert*, etc. ratione acceptâ ab homicidio, de quo in *cap. Ad Audientiam, de Homic.* dicitur: *Cùm in dubiis semitam debeamus eligere tutiorem, vos convenit injungere Presbytero memorato, ut in sacris Ordinibus non ministret.* Et ex hoc regulam statuunt generalem; in omni materiâ sequendam esse tutiorem. Secunda sententia communis, et verior negat, et hujus sententiæ sunt *Suar. Cabass. Ronc. Castr. etc.* et *Salm.* cum multis aliis. Ratio est, quia odia sunt restringenda, et in dubio nemo damnandus est. Ità ex *Reg. Favorabiliores*, ff. de *Reg. Jur.* et ex c. *Cùm sunt*; eod. tit. in 6. ubi dicitur: *Cum sunt Jura partium obscura, Reo favendum est potius, quàm actori.* Et ratio deducitur ab eo quod mox diximus; nam dùm dubitatur an dispositio de homicidio valeat ad alias materias, jam dubium est Juris, in quo dubio etiam Adversarii concedunt non incurri, dùm in præfato *cap. Is qui, de Sent. excomm.* in 6. declaratur quòd nulla irregularitas incurritur, nisi expressa sit in Jure, et ad *cap. Ad audientiam*, respondetur quòd ibi voluerit Pontifex decentiæ motivo uti, quæ tanti Sacrificii dignitatem decet, ut ab Altari repellatur qui dubitat esse homicidam, et quòd hoc erat decentiæ, et non præcepti apparet ex *cap. Petitio, de Homicidio*, ubi dicitur: *Cùm sit consultius in hujusmodi dubio (Homicidii) abstinere, quàm temerè celebrare.* Quâ de re quod in hoc loco consilii erat, voluit Pontifex ut in alio capite in præceptum transiret (b).

---

(a) n. 346. — (b) n. 347.



80. — Quæritur 1. An dubitans se esse homicidam, debeat semper censi irregularis? Alii dicunt in foro externo se gerere debere uti irregularem, non autem in interno; ita *Innoc. Sal. Sanch* etc. Alii verò dicunt universaliter in neutro foro censendum esse irregularem, *Host. Arm. Tab.* etc. sed communis et verior *Castrop. Bonac. Bon. Sanchez*, et *Salm.* cum multis aliis, tenent censendum esse irregularem in utroque foro. Nam ratio adducta in *Cap. Significasti*, *Ad Audientiam*, et in penult. de *Homic.*, nempe quòd in dubio tutior pars eligenda est, utrumque forum comprehendit. Notandum primo, quòd hoc currit quandò homicidium est certum, et solùm dubitatur an actio percussoris fuerit causa illius. Si verò dubitatur an homicidium factum sit, nec ne, tunc valdè rationabiliter dicunt *Pichl. Etbel, Dian. Tamb.* et *Spor.* non esse censendum irregularem. Ideoque dicit *Diana*, cum *Navarro*, *Menochio*, et *Quarant.* quòd si Medicus venam securit prægnanti, ut illa abortiretur, et postea ignorat an abortus nec ne evenerit, non est censendus irregularis, quia habetur in *Lib. 1. §. item illud, ff. Ad Syllam*, quòd non procedendum est ad poenam, nisi constet de delicti corpore. Secus autem si pharmaca essent ita efficacia, ut communiter ab eis soleat effectus consequi; ita *Nav. Mascard.* ex l. ult. de *Fide instrum.* vide dicta *Tom. I. Tr. VIII. n. 22.* Notandum 2. quòd dubitans de homicidio, debet uti talem se gerere in duobus effectibus, nempe in abstinendo à celebrando, et in petendâ dispensatione: quare infertur 1. quòd Laicus non incurreret talem irregularitatem; *Salm.* et *Roncagl.* 2. Quòd Clericus non incurrit privationem Beneficiorum; *Sanch. Suar. Roncagl. Salm.* et *Castrop.* cum *Panor.* etc. 3. Quòd dubitans de mutilatione, non est censendus irregularis; *Sanchez, Bon. Ronc. Salm.* et *Suar.* contra *Nav.* et *Henr. (a).*

81. — Ad incurrendam irregularitatem ex delicto, actus debet esse externatus, et mortalis; quia

---

(a) *Lib. 7. n. 347.*

568 *Tract. 19. De Censuris, et Irregularitatibus.*

irregularitas est pœna gravis cui difficulter relaxatur. Undè inferitur, 1. Quòd si actus ob aliquam circumstantiam exeursatur à peccato mortali, excusatur etiam ab irregularitate. 2. Quòd præceptum sub pœnâ irregularitatis ad grave peccatum obligat. 3. Quòd actus debet esse exterior; ideoque cùm dicitur dispensare in irregularitate mentali, intelligitur occulta; *Castrop. Conc. Aver.* et communis cum *Salmant.* 4. Quòd actus debet esse consummatus (a).

82. — Quæritur hîc 1. An ob delictum externè consummatum, sed omninò occultum, incurritur irregularitas? Tres adsunt sententiæ, sed verior affirmat de omni delicto; quia Ecclesia sibi reservat delicta etiam occultissima, ut est hæresis occulta omninò (ut dictum est num. 53. in fin.). Et quòd reverà ob delicta occulta incurritur irregularitas, apparet ex *Trid. sess. 24. cap. 6.* ubi conceditur Episcopis facultas absolvendi ab irregularitatibus occultis, et inter ista fit mentio hæresis, et homicidii occultorum; et sicut pro hæresi et homicidio occultis incurritur excommunicatio, ita pariter dicendum de aliis criminibus (b). Quinam autem possit dispensare in his, vide *Tract. XX. de Priv. Tom. III. n. 51. 52. 106. et 107.*

83. — Quæritur 2. An ad incurrendam irregularitatem requiratur scientia legis Ecclesiasticæ prohibentis? Sententia probabilior, et communissima (contrà *Suar. Azor. Holzm. et Felin.*) affirmat cum *S. Antonin. Ronc. Castrop. Navar. Silv. Sanchez. etc.* et *Salmant.* cum multis aliis; quia talis irregularitas habet rationem pœnæ, et cùm sit pœna, requiritur scientia saltem legis prohibentis. Et hoc probatur ex *cap. Proposuit, Dist. 42.* ubi Innoc. I. decrevit non deponendos fore quosdam Clericos incontinentes, quia ignorabant Constitutionem Sircii: undè *Castrop. Viva et Salm.* cum aliis affirmant, quòd si quis etiam ignoraret homicidio affixam esse irregularitatem, et homicidium com-

(a) n. 348. — (b) n. 349.

mitteret, non fieret irregularis: non ratione delicti, quia requiritur scientia: non ratione defectus, hanc enim incurrit tantum ministri iustitiae, vel cognitionis, vel executionis. Nihilominus quoad homicidium, sententia satis probabilis et tenenda est quod incurrit, quia haec irregularitas non tantum respicit delictum, aut defectum, sed etiam indecentiam; quae postulat, ne admittatur ad sacrificandum in Altari Dei Agnum mansuetissimum per manus ministri saevi, et crudelis; ideoque Trid. Sess. 14. c. 7. antequam reservet irregularitatem ex homicidio, adducit rationem quod repellendus est ab Altari homicida: *Cum etiam* (sunt verba Trid. mutuata à cap. 21. Exod.) *qui per industriam occiderit proximum suum, ab Altari evelli debeat.* Quis non videt Concilium ostendere ipsiusmet naturae legem expostulare huiusmodi ministros etiam per vim expellendos esse ab Altari (a)? Hoc non obstante, non audeo reprobare sententiam oppositam, dum hic casus non est expressus in iure.

84. — Queritur 3. An ultra scientiam prohibitionis Ecclesiasticae, requiratur scientia irregularitatis? Duplex est sententia: prima est *Suar. Laym. Croix, Tournel. Ponc. Sot. Vasq. etc.*, quae negat, quia irregularitas non est poena medicinalis, sed inhabilitas, sive poena merè punitiva, quare sufficit ut talis poena sit imposita à Lege illi actui; et ut reus scienter et culpabiliter illum patnaverit. Secunda sententia etiam probabilis, affirmat; nam irregularitas ex delicto, cum sit vera poena, et extraordinaria, ideoque cum praevideri non possit, ac praecognosci solet saltè in confuso poena ordinaria, non censetur Ecclesia tanto rigore velle ignorantiam punire (b); et sic tenent *Sylvest. Sanch. Ronc. Boss. Coninch. Sayrus, Cornejus, Rodriquez, et Salmant.* putant probabilem hanc sententiam aequè ac primam; et *P. Suarez* etiam probabilem vocat.

85. — Irregularitas multifariam tolli potest. I. Si cessat causa; cum irregularitas est ex defectu, v. g.

---

(a) n. 350. (b) n. 351.

470 *Tract. 19. De Censuris, et Irregularitatibus.*

ætatis, ignorantiae etc. *Suarez, Laym. Tourn.* etc. cum verò irregularitas provenit ex infamiâ, si hæc est popularis, per emendationem tollitur, *Can. 4. et 18. Dist. 59.* Si infamia est facti, tollitur per loci mutationem; *Tourn. et Ronc.*, sed si infamia est juris, nempe per Judicis sententiam, pro hac requiritur dispensatio. II. Si proveniret ex delicto, tollitur per Baptismum; undè qui antè Baptismum commisisset homicidium, non erit ampliùs irregularis, *Salm. cum Coninc. et Laym.* III. Per Pontificis dispensationem. IV. Per professionem Religiosam (a). Quandò et quibus in casibus possunt dispensare Episcopi, et Regulares vide *seq. Tract. XX. de Priv. n. 51. et 106.*

86. — Plura notanda sunt circa dispensationem. I. Dispensatio Pontificis sinè causâ est valida, sed illicita; ab inferiore autem est invalida. II. Qui plures irregularitates ejusdem speciei incurrit, in dispensatione sufficit exprimere se pluries illam incurrisse. III. Si Prælatus, qui facultatem habet dispensandi, scienter admittit irregularem ad Beneficium, censetur dispensare cum illo; *Bonac. Salm. cum aliis, etc. (b).*

87. — In irregularitate ex defectu solus Papa potest dispensare, et ille qui de hoc speciale Privilegium habet. Irregularitas ex defectu natalium potest tolli per professionem Religiosam, quoad Ordines, sed non quoad Prælaturas, ità commun. DD. tùm ex *Cap. 1. de Fil. Presbyt.* ex Concessionibus Gregor. XIV. Clem. VIII. et Pauli V. Dicunt autem *Diana, Barbos. Castrop.* etc. quòd Prælati Regulares possunt dispensare ad prælaturas in Capitulis Generalibus aut Provincialibus. Per *Prælaturas* non venit Episcopatus, *Bonac. et Tourn.* Prætereà omnes DD. (excepto *Soto*) dicunt verum non esse per Professionem in Religione approbatâ auferri omnes irregularitates (c). Quoad alias facultates Regularium, *Vide Tract. XX. de Privil. num. 106. et 107.*

---

(a) *Lib. 7. n. 352.* — (b) *n. 353.* — (c) *n. 354.*

## PUNCTUM IV.

Quænam sint irregularitates ex delicto.

- I. *Ob Sacramentum* 88. II. *Ob violationem censuræ* 89. III. *Ob exercitium solemne etc.* 90. IV. *Ob illicitam Ordinum susceptionem* 91. V. *Ob delicta enormia* 92. VI. *Ob homicidium* 93. *De homicidio voluntario* 94. 95. et 96. *De mandantibus, consilium dantibus, etc.* 97. et 98. *De coöperantibus* 99. *De ratihabentibus* 100. *De non impredientibus* 101. *De homicidio casuali* 102. ad 105. *Qui occidit ob defensionem* 106. *Qui occidit ad tuenda bona* 107. *De homicidio in rixâ* 108. *De mutilatione* 109. et 110. *De Dispensatione, remissivè* 111.

88. — **P** *PRIMA* oritur ob Sacramentum Baptismi non ritè susceptum; ideoque irregularis est, 1. Qui sinè necessitate recipit Baptismum ab Hæretico, *Can. Placuit, q. 4.* Sed intelligitur si illum recepit in adultâ ætate; nam contrâ declaravit S. C. Conc. 21. Maji 1716. non esse irregularem puerum qui baptizatus fuit ab hæretico. 2. Filius hæretici: *c. Statutum, de Hæret. in 6.* Sed, si postea parentes ad Catholicam fidem conversi sunt, tollitur irregularitas. *Suar. D. 143. Sect. 3. etc.*, et ità declaravit S. C. præfato die. 3. Qui differt Baptismum usquè ad periculum mortis, *c. Si quis, D. 57.* 4. Qui scienter bis baptizatur solemniter; et hanc incurrunt tam rebaptizatus, si est adultus, *Cap. Confirmandum Dist. 50.* quàm rebaptizans, juxtà communem DD. ex *c. Et litterarum*, ubi declaratur irregularis Acolythus assistens rebaptizationi. Excusant DD. si hoc fieret metu, sed nemo excusat si id faciat ex ignorantia culpabili, *Can. quibus, de Consec. D. 4. (a).*

---

(a) n. 356.

472 *Tract. 19. De Censuris, et Irregularitatibus.*

89. — *Secunda* est ob violationem censuræ, cùm qui ligatus est censurâ, solemniter exerceret Ordinem Sacrum. Dictum est *solemniter*, verb. gr. Si Diaconus cantaret Evangelium cum Stola et Manipulo, aut si Capitularis Hebdomadario fungens in Choro, cantaret: *Dominus vobiscum*. Et si is esset innodatus duplici censurâ unam incurreret irregularitatem duabus æquivalentem, sed in postulatione Dispensationis exprimi debet, *Tourn. etc. (a)*. Advertendum quòd non fieret irregularis qui solâ excommunicatione minore ligatus esset, *Cap. Si celeb. de Cler. exc. min.* Nec qui exercet Minores Ordines, etiam solemniter: *Laym. Navar. Salm. etc.*, et de hoc non ampliùs videtur dubitandum post Bullam, *Etsi Pastoralis* Bened. XIV. (*in tom. 1.*) de Dogm. et Rit. ab Italo-Græcis etc. ubi §. 7. n. 9. dicitur: *Promoti ad Primam Tonsuram vel ad altum quemcumque Ordinem sinè Dimissoriis, etc. suspensi sint, et si suspensi in sacris Ordinibus ministraverint, efficiuntur irregulares sicut Latini*. Nec qui concionatur, nec qui exercet actus jurisdictionis, nempe excommunicandi, Confessarios approbandi, Beneficia conferendi, assistendi, aut licentiam assistendi Matrimonio alteri dandi, Officium cantandi, aut vota dispensandi (*b*). Nec fit irregularis qui celebrat in Ecclesiâ pollutâ, fit autem qui in interdictâ celebrat, *C. Is qui, de Sent. excomm. in 6.* Contrâ advertendum, quòd Episcopus, aut alius Sacerdos qui cogeret censuratum ad celebrandum, fieret irregularis, *c. Illud, de Cler. excomm. min.* Sed ab ipsâ possunt dispensare Prælati Regulares, licet esset publica; et etiam cum secularibus ex Privilegio Martini V. Julii. II. (*c*).

90. — *Tertia* est quandò Clericus exereet Ordinem Sacrum quem non habet, *Cap. 1. de Cler. non Ord.*, putà si quis Clericus Diaconatu non initiatus Evangelium cum Stola cantaret, baptizaret solemniter, etc. An autem si Laicus tales functiones exer-

---

(a) num. 359. — (b) num. 342. et 358. — (c) num. 358. v. Not. III.

**Cap. 3. Punct. 4. Quænam sint Irregul. 473**

cet, dictum est quòd probabiliter non incurrit irregularitatem (a).

91. — *Quarta* incurritur propter Ordines non ritè susceptos; undè 1. est irregularis qui ordinaretur ab Episcopo suspenso, hæretico, schismatico, aut simoniaco, *C. Quod quidem, et Can. Statuimus*, 1. q. 1. et c. 1. et 7. de *Schism.* ubi dicitur quòd ad hujusmodi ordinationes requiritur Dispensatio. Et constat etiam ex cit. Bullâ *Etsi Pastoralis* Bened. XIV. §. cit. num. 15, ubi dicitur quòd Ordinati ab Episcopis Schismaticis, non ministrent, nisi cum ipsis super irregularitate à Sede Apostolicâ dispensatum sit. 2. Qui cum excommunicatione, aut suspensione, initiatur Ordinibus Sacris, aut se promoveri facit ab Episcopo non proprio, aut ordinatur per saltum (*Avila, Nav. Bonac. et Busemb.* dicunt tamen quòd iste tantum suspensus est ab exercitio Ordinis recepti per saltum) aut antè ætatem, aut sinè litteris Dimissorialibus, et hæ ordinationes appellantur à DD. furtivæ. Advertunt tamen *Suar. Castrop. et Salm.* quòd hæ potiùs dicendæ sunt suspensiones, ne ad Ordines superiores ascendi possit; affirmant tamen hanc absolutionem impetrandam esse à Papâ. Hinc ob furtivam ordinationem fiunt irregulares, 1. Qui ordinatur sinè approbatione Episcopi, *cap. 3. de Eo qui furt.* 2. Qui eodem die plures Ordines reciperet, quorum unus esset Sacer, sinè Dispensatione Papæ, c. 2. et 3. *eod. tit.* 3. Qui recipit Ordinem Sacrum post Matrimonium ratum, invitâ uxore, *Extrav. Antiqua, de Voto* (b).

92. — *Quinta* incurritur propter enormia crimina, si sint notoria, quæ à jure inducunt infamiam, prout sunt adulterium, incestus, perjurium in Judicio, hæresis, concubinatus, sodomia, etc. c. *Infamis*, 6. q. 1. Ad incurrendam hanc irregularitatem oportet, ut crimen sit notorium notorietate facti, et juris. Dicitur notorietas facti, cùm delictum est ità evidens, ut non possit ullâ tergiversatione celari: ideoque requiritur, ut saltem sit no-

---

(a) *L. 7. n. 359.* — (b) *num. 361.*

tum decem personis. Infamia juris habetur, aut rei confessione, aut Judicis sententiâ, saltem criminis declaratoriâ, *Sanch. Castrop.* cum aliis (a). Hæc irregularitas tamen tollitur per Baptismum, aut per emendationem notoriam saltem per tres annos (b). Sed si infamia provenit propter Judicis sententiam, potest ab ipsomet per aliam sententiam tolli, quâ reo fama amissa restituitur (c).

93. — *Sexta* oritur ex homicidio, aut ex injustâ mutilatione. Ex homicidio tam si sit voluntarium, nempe directè volitum, aut indirectè in causâ proximâ homicidii, ut dando venenum; quàm si sit casuale, nempe volitum in causâ, sed non proximâ homicidii, modò istud sit prævisum, et negligentia graviter culpabili non impeditum. Advertendum hic quòd quicquid dicitur de homicidio, totum valet de mutilatione (d).

94. — Quoad homicidium voluntarium, certum est esse irregulares omnes qui sunt causa immediatâ mortis alicujus, *C. Si quis, de Homic. et Trid. sess. 14. c. 7.*

95. — Quæritur 2. An homicida, antequàm percussus moriatur, si se poenitet, excusetur ab irregularitate? Negatur cum sententiâ veriore *Sanch. et Vivæ* (contrâ *Salm.*), causa enim physica, quæ voluntariè posita est, necessariò operatur; undè propinato veneno, non ampliùs est in ejus potestate efficere ne illud mortem inferat. Ideoque rectè *Suar.* non excusat mandantem ab irregularitate, si casu mandati revocatio non pervenit ad mandatarium (e).

96. — Quæritur 2. An sit irregularis qui fuit primus ad vulnerandum lethaliter, si vulneratus postea sit occisus ab alio? Affirmant *Fagnan. Covar. et Ugol.* argumentum sumentes ex *Cap. Significasti*, ubi Papa respondit non esse percussorem irregularem, si leviter percussit; secus verò, si lethaliter. Sed negant *Laym. Bonac. Avil. Coninc. Molin. et Escob.* cum *Henriq.* dùm *Cap. Significasti*, non obstat

---

(a) num. 363. — (b) num. 364. — (c) *Ibid.* — (d) num. 366. — (e) num. 367. et 368.



nostro casui; nam ibi agebatur quòd ambo percusserant, et nesciebatur cujus vulnere mors evenisset, ideoque respondit, si primus leviter percusserat non erat irregularis. Sed casus noster est quòd licèt primus lethaliter percusserit, mors tamen certè illata fuit ab alio; undè in jure cùm nulla adsit decisio, ideò potest excusari. Hoc nihilominus non currit, si sciretur quòd secundus tantum mortem accelerasset, sed etiamsi iste non percussisset, ille utique mortuus esset: v. g. si primus gravissimè vulnerasset eum in capite etc., tunc non posset ab irregularitate excusari (a).

97. — Sunt etiam irregulares omnes mandantes et consilium dantes, *cap. Si quis viduam, Dist. 50. cap. Significasti*, et *cap. Sicut, de Homic.* Sed mandans et consilium dans non fiunt irregulares, si homicidium alià de causâ patratum fuisset, *Sanch., Viva (b)*. Quando autem dubitaretur an mandatum, aut consilium fuerit causa efficax homicidii, multi DD. ut *Sanch. Salas, Navar. Salm.* etc. non excusant; tùm quia possidet mandatum, aut consilium, donec contrarium non probatur, tùm ex *Cap. Ad Audientiam*, quòd in dubio homicidii, tutior pars sequenda est, ut postea dignoscatur homicida, evitetur indecentia, et scandalum, et ita de mandante aut consulente dici debet. Sed excusant *Diana, Sporer, et Tambur.* quia Leges loquuntur de illis qui certè sunt homicidæ causâ mandati aut consilii, non autem de illis de quibus dubitatur, an sint causa illius, undè videtur quòd hæc secunda sententia non possit dici improbabilis (c).

98. — Sed si consilium antequàm executioni datum sit, revocatum esset, licèt *Navar. et Bon. cum Azor.* velint etiam incurri, quia licèt illud sit revocatum, etiam influit, attamen *Suar.* (qui dicit esse commune) *Silv. Filib. P. Navar. Avil. Salas* eum excusant, quia ut excusetur consilium dans sufficit, ut sicut suo consilio concurrit moraliter in homicidium, ita, eo revocato, influxum moralem

---

(a) n. 369. — (b) n. 370. — (c) L. 7. n. 371.

removet; et tunc homicidium potius imputatur malitiæ executoris, quàm consiliarii. Modò tamen revocatio sit homicidæ notificata antequàm crimen patraretur; et pariter, modò consilio suo non insinuaverit motiva; aut modum illud exequendi, quia tunc probabilius incurritur; licèt hâc ultimâ limitatione non obstante, improbabilem non censeo oppositam sententiam *Suar.*, juxtâ dicta *Tom. I. Tract. X. n. 48. (a).*

99. — Incurrunt etiam omnes cooperantes, ut homicidium celerius, audaciùs, aut securiùs fiat: Ideoque irregulares sunt 1. qui excitant ad citius patrandum homicidium eum qui jam paratus erat ad illud committendum, quia reverà directè est causa cur homicidium pro illo tunc fiat (b). 2. Omnes qui ad homicidium se excitant, licèt unus occidat. 3. Omnes qui præliantur in bello injusto, si ibi aliquis pereat, licèt quis certo sciat se non vulnerasse, nec sclopetum explosisse. 4. Qui ministrat arma aut pecunias ad homicidium, aut bellum injustum patrandum. 5. Accusatores, Testes et Judices injusti. 6. Qui verbis, aut suâ assistentiâ homicidæ animum præbet (c).

100. — Quæritur 1. An sit irregularis qui ratum habet homicidium patratum in sui gratiam? Negatur cum sententiâ communi, et veriore *Suar. Bon. Escob. Avil. et Salm.* cum aliis, contrà *Navar.* etc. quia in nullâ lege reperitur talis irregularitas; verum est quòd ratihabitio æquivalet mandato quoad culpam, sed non expressa est in lege, prout expressa est excommunicatio in eos qui ratum habent Clericorum percussione (d).

101. — Quæritur 2. An sit irregularis, qui cùm possit homicidium impedire, culpabiliter non impedit? Certum est quòd si obligatio est caritatis, etiamsi odio id negligat, non fit irregularis; ità communiter *Suar. Bonac.* etc. Dubium restat, si teneretur ex justitiâ nimirum ex pacto, aut officio, v. g. Medici, qui ad id recipit stipendium; Advo-

---

(a) n. 373. — (b) n. 372. — (c) n. 374. — (d) n. 374.

Cap. 3. Punct. 4. Quænam sint Irregul. 477

cati qui tenetur defendere reum; custodis viarum etc. Multi DD. ut *Rono. Hurtad. Vasq. Turr. Diana*, etc. negant hunc fieri irregularem, quia negativè influit in homicidium. Alii verò communius, ut *Nav. Suar. Castrop. Bon. Escob.* cum aliis, et *Salm.* cum pluribus aliis, affirmant; quia qui ex iustitiâ tenentur, et possunt defendere, videntur esse veri homicidæ, si non physicè, saltem moraliter. Hoc non obstante prima sententia etiam videtur probabilis, ex principio generali: quia ex Sacris Canonibus non constat esse irregulares, nisi solos homicidas, mandantes, consiliatores, et qui positivè concurrunt. Præterea *Tournely*, et *Escob.* excusant patrem, si suâ negligentia in cunâ puer fuisset mortuus, deducentes ex c. *Quæsitum*, de *Pœnit. et rem.* ubi declarantur irregulares dumtaxat patres qui scienter negligant impedire puerorum suffocationem in cunis (a).

102. — Quoad homicidium *casuale*, fit irregularis qui aliquâ suâ actione prævidet periculum mortis alterius, et culpabiliter negligit prospicere tali periculo. DD. communiter, et apparet ex *Clem. Si furiosus*, de *homic.* dictum est *culpabiliter*, quia cum hæc irregularitas sit ex delicto, requiritur peccatum mortale, ut communiter *Suar. Bon. Tourn. Conc.* etc. (b).

103. — Qui verò daret operam rei licitæ, adhibitâ sufficienti diligentia, ne accideret homicidium, non fieret irregularis, licet indè accidat mors; ita communiter DD. cum *S. Thomâ* (c); et patet ex *Cap. Joannes*, C. *dilectus*, et *C. Ultimo*, de *Homic.* Secus autem, si sufficiens diligentia negligatur; *Cap. Presbyterum*, et *Cap. Ad audientiam*, de *Hom.* Dicitur sufficiens illa diligentia, quæ adhiberi solet à quolibet prudenter, juxta facti qualitatem. Et advertendum quòd negligentia debet esse culpabilis moraliter, ut comm. DD. et probatur ex *Cap. Quæsitum*, de *Pœnit. et Rem.* et ex *C. fin de Homic.*

---

(a) num. 376. — (b) num. 377. — (c) 2. 2. q. 6. a. 8. ad 3.

4-8 *Tract. 19. De Censuris, et Irregularitatibus.*

Vide dicta n. 81. (a). Hinc inferitur non esse irregularem 1. Magistrum qui moderatè verberat discipulum, et patrem qui verberat filium, si casu accidat mors; secùs verò, si excederet graviter, *Cap. Presbyterum*, et *Cap. fin. de Homic.* 2. Qui equitando equum ferocem, casu puerum occidit, *Cap. Dilectus*, et *Homic.* 3. Qui animal ferox cautè custoditum tenet, si illud casu fugit, et aliquem necat; secùs, si illud in viâ teneret, aut suâ negligentia fugeret, *Salm.* cum aliis. 4. Qui tectum reficiens postquàm viam prætergredientes admonuerit, tabulas aut lapides projiceret; *Salm.* etc. 5. Qui bonâ fide infirmo aliquid cibi, vel potus præberet, aut si ab uno ad alium lectum eum transferret, aut eum volveret etc. et infirmus decederet; ità communiter omnes. 6. Si Sacerdos jubet incisionem alicujus membri, jam à Medico præscriptam, modò illam non faciat per seipsum, *Cabass.* Imò *Conc.* excusat Clericum qui Chirurgum coadjuvat ad membri incisionem. Et *Navar.* et *Covar.* (et *Salm.* putat probabile) dicunt non esse hunc irregularem, licèt in animo habeat, ut infirmus citò deficiat; quia licèt peccatum mortale adsit, deest tamen actio externa graviter injusta. Ego autem subjungo, modò adhibeatur diligentia ad vitandam mortem (b). 7. Medicus, si casu è vivis decedit infirmus ob farmacum ei præstitum, *C. Ad cæres*, de *Ætat. et quod Ord.* Et hoc procedit, etiamsi esset Clericus vel Monachus; modò 1. sit peritus, aut bonâ fide id faciat, præbendo aliquid infirmo in remedium, aut levamen. 2. Si est Clericus, modò medeatur sinè incisione vel adustione, *C. Sententiam*, de *Cler. vel Monac.* et si non obstante incisione, aut adustione, infirmus vi mali aut ob aliam causam obiret, eum ab irregularitate excusant *Castr.* et *Salmantic.* cum aliis. Imò communiter dicunt *Castrop. Tournet. et Salmantic.* cum multis aliis, quòd si nullus alius peritus adesset, poterit tunc

---

(a) n. 377. — (b) L. 7. n. 382. v. 4. Qui.

Clericus, vel Monachus sinè peccato et ab irregularitate immunis incisionem facere, et ignem applicare Et etiamsi Clericus esset Beneficiatus, si incisionem aut adustionem, sinè necessitate adhiberet, non censetur irregularis juxtà sententiam veriore *Tourn. cum Pontas, Giball. Bonac. et Mol. (contrà Nav. et Panorm.)* quia in *C. Sententiam* fit mentio de solis Clericis in Sacris (a).

104. — Si quis unquam daret operam rei illicitæ, sed non periculosæ mortis, adhibita sufficienti diligentia, non fit irregularis, licèt aliâ viâ peccet, v. g. si quis induceret alium ad furandum sinè periculo; et iste mero casu occideretur, quia tunc non est causa homicidii, cùm nec directè illud voluerit, nec indirectè illud præviderit; ità communiter DD. contrà *Palud. et Gabrin.*, qui citant *S. Thomam 2. 2. q. 64. a. 8.* Sed perperam, nam ibi Sanctus intelligit de eo qui aliquod homicidii periculosum facit, ut videre est ex respons. *ad 1. et 4.* Et Canon. *Cler. jacen. et Eos vero, D. 50.* intelliguntur de homicidio casuali, sed directè vel indirectè voluto; ut deducitur ex *Clement. de Homicid. (b).*

105. — Majus dubium restat, an fit irregularis, qui dat operam rei illicitæ, sed mortis periculosæ; si mors evenit? Duæ sunt opiniones probabiles. Prima affirmat, et hanc tuentur *Suar. Navar. Mol. Conc. Avil.* etc. inducti ex *Cap. Tua nos, de homicidio*, ubi irregularis declaratur Monachus peritus, qui incisit apostema cujusdam mulieris, quæ suâ incuriâ obiit. Sed secunda sententia quam docent *Castr. Tourn. Laym. Spor. Tamb. Elbel, Bonac. Salm.* cum aliis pluribus probabilius dicit, quòd si opera esset ità periculosa, ut ex illâ plerumque eveniat mors; (ut est accendere bombardam), tunc incurritur irregularitas; quia quantalibet diligentia adhibeatur ad mortem vitandam, non potest effici, ut illa opera proximè periculosa, talis non sit. Idem currit de eo qui præliatur in bello, aut inducit alium, ut se periculo mortis temerè exponat. Secus

---

(a) n. 384. — (b) n. 386.

autem, si opera rarè mortem inducit, et debita diligentia adhibeatur, quia tunc homicidium non est voluntarium, nec in se, nec in causâ. Ad textum *Tua nos* respondetur, quòd Monachus irregularis declaratus fuit, quia incisione per *C. Sententiam* vetitâ usus fuit. Nec obstat *C. Continebatur, de Homic.* quod opponitur, ubi irregularis declaratus fuit quidam Diaconus qui ferendo latentem falcem, et cum altero ludendo fuit causa, ut hic eum amplexans à falce feriretur, et mortem subiret; quia is Diaconus habitus est irregularis in foro externo, cum iudicatum fuerit eum in debitâ diligentia defecisse; quare *Suar. Bonac.* dicunt quod si iste illud periculum non animadvertisset, in conscientia non tenebatur ad se tenendum irregularem (a).

106. — Non est irregularis qui occidit, ut se defendat quandò est moderata defensio, *C. Significasti*, § *fin. de Homic. et Clement. Si furiosus*, eod. tit. ubi dicitur: *Et idem* (nempè non incurri irregularitatem) *de illo censemus, qui mortem aliter evitare non valens, suum occidit vel mutilat invasorem.* Et licèt adversari videatur *Trid. sess. 14. cap. 7.* dùm requirit dispensationem pro homicidio casuali, etiam pro defensione patrato; attamen dicitur cum *Ronc. Salm.* et cum *Decr. S. C. Concil.* intelligi de eo qui excedit, ut exprimitur in cit. *Clement.* Præterea *Suar. Ronc. Less. Bonac. Filliuc.* etc. excusant etiam qui occidit injustum invasorem innocentis; dùm irregularitas ex homicidio contrahitur ob peccatum mortale, ut deducitur ex *Cap. Ex litteris, de Homic.* Probabiliter autem dicunt *Ronc. Suar. Salm.* etc. esse irregularem illum qui conviciis et percussionibus provocaret aliquem, prævidendo periculum invasionis, si postea ob defensionem occidit aggressorem; quia tunc jam ponit actionem proximè periculosam. Ità etiam si adulter prævidendo aggressionem, adit concubinæ domum, ubi (postquam in se invasum est) ut se defendat occidit virum illius; aut si vir occideret uxorem, et adulter prævidisset hoc damnum (b).

---

(a) n. 387. — (b) *Lib. 7. n. 388.*

107. — Quæritur 1. An sit irregularis, qui occidit pro defendendis libertate, honore, pudicitia aut bonis temporalibus? Duæ adsunt sententiæ. Prima est affirmativa, quam tenent *Laym. Tourn. Spor. Navar. Silv. Armil. Fagnan.* etc. et probant ex *Cap. Suscepimus*, in quo declaratus fuit irregularis quidem Monachus qui occidit duos latrones; et etiam ob defectum lenitatis. Negat tamen sententia communior et probabilior, quam tuentur *Suarez* (qui vocat communem), *Less. Castr. Filliuc. Bonac. Holzm. Elbel, Ronc. Barbos. et Salm.* cum multis aliis. Et probatur ex *Cap. Quia te*, D. 50. ubi quidam Episcopus captivus factus à Saracenis, ad suam libertatem tuendam occidit multos, et postea declaratus fuit immunis ab irregularitate ab Urbano II. et *Boverius* ad annum 1571. n. 6. et *Raynaud.* asserunt quemdam Capuccinum nuncupatum P. Anselmum de Petramellarâ à Turcis captum, qui se ut ipseliberaret, septem Turcas interfecisset, à S. Pio V. immunem ab irregularitate declaratum fuisse. Item ex *Cap. Interfecisti*, ubi ab irregularitate eximitur qui occidit *ad defendendum se et sua*, illud *Et* significat *Vel*, aliàs nemo posset defendere se solum, nisi etiam defenderet bona simul: et frustra Pontifex apposuisset illud *sua*, si duntaxat ob vitæ defensionem evitaretur irregularitas. Et clarius ex *Cap. Dilecta, de sententiis excomm.* ubi Papa declaravit licere cuidam Decano defendere bona sua à violentiis cujusdam domini temporalis, et temporalibus viribus (nempè armis) et gladio spirituali; Rationem adducens, legibus permissum esse *viam vi repellere et defensare*; undè observatur quòd Papa censebat eâdem ratione, quâ quis potest defendere se ipsum, posse defendere etiam bona. Igitur sicut qui pro sui defensione occidit, non fit irregularis; ità nec pro tuendis bonis; modò non excedatur, et sint magni valoris. (Vide *Tom. I. Tract. VIII. num. 15.*) Et etiam assistit ratio, dùm talis irregularitas non esset ex delicto, quia sinè peccato, ut probatum est in *Tract. VIII. n. citat.*, nec ex defectu, quia hæc incurritur tantum à Ministris publicis jus-

titiae, à Militibus in pugna offensivâ, et à Clericis qui exercent medicinam cum incisione, et adustione, ut dictum est. Ad *cap. Suscepimus*, respondetur quòd Monachus excessit in defensione; nam postquam furtum de latronum manibus vindicavit, ille voluit eos vinctos ad Abbatem conducere, cum jam poterat eos dimittere, ubi bona jam nactus erat (a).

108. — Quæritur 2. An reputandum sit casuale homicidium commissum in rixâ? Ità censetur à *Diana*, et *Salm.* cum *Machado*, *Henriq. Rodrig.* etc., quia homicidium voluntarium propriè est illud: quod ex proposito commissum est, et per insidias, ut loquitur *Trid. per industriam, et insidias*, (*Sess. 14. c. 7.*) Sed probabiliùs negant *Suar. Navar. Holzm. Spor. Tambur. et Dian.* cum *Hurtad.*; nam *Trid.* post verba allata, subjungit: *Qui suâ voluntate homicidium perpetraverit, ... nullo tempore ad sacros Ord. promoveri possit.* Qui in rixâ occidit, jam occidit suâ voluntate, et ex proposito (licet commotus subitâ irâ), et perpetrat homicidium quod facere intendit. Verba *per industriam, et per insidias*, explicat *Glossa* in *c. 1. de Homic.* (undè *Trident.* transcripsit verba in cit. *Cap. 7.*) hoc modo: *Per industriam, idest non casu.* Et idem Concilium se ipsum declarat, dum post verba allata, quæ à *Cap. 1. de Homic.* mutuatum est, explicat eorum sensum, subjungens, *suâ voluntate, ex proposito*, ad differentiam casualis, de quo prosequitur sermo in secundâ parte.

109. — Incurritur irregularitas etiam per mutilationem, *C. Significasti, de Homic. et Clem. Furiosus, eod. tit.* Sed hic fit dubium, quid intelligatur sub nomine mutilationis membri? communissimè, et probabiliùs dicunt *Bon. Castr. Conc. Habert, Tourn. Cabass. Nav. Av. et Salm.* cum pluribus aliis, quòd intelligitur illa pars corporis, quæ proprium officium habet distinctum ab aliis, ut oculus ad viden-

---

(a) n. 389.



dum, manus ad operandum, pes ad ambulandum, lingua ad loquendum, etc. ideòque cætera, quæ inserviunt ad ornamentum, non reputantur membra, ut dentes, ungues, capilli, aures, (nam sublati cartilaginibus, etiam auditur) nasus, digitus quicumque sit; *Bonac. Castropal. Tourn. et Salm.* cum aliis pluribus. Et si in *Can. Qui partem, Dist. 55.* declaratur irregularis quidam qui sibi digitum recidit, id factum fuit ad puniendam sævitiam in propriam personam, *Tourn. Bonac. Castrop. et Salm.* cum multis aliis, et constat ex ipsomet textu (a).

110. — Quæritur 1. An sit irregularis, qui alteri abscindit testiculos, aut aliam corporis partem? Negant *Bonac. Aver. et Cornejus*, quia illi non sunt membra, sed partes membri. Sed probabilius affirmant *Ronc. Castr. et Salm.* cum *Diana*, quia testiculi jam propriam operationem habent, nempe elaborare semen aptum ad generandum (modo hæc abscissio sit injusta); secus verò si tantum unum abscindat, quia uterque ad eandem operationem concurrat. Esset irregularis qui abscinderet mulieri unam mamillam, quia officium unius est independens ab alterius. Idem docent *Suar.* et alii apud *Vivam* de eo qui abscinderet alteri medietatem manûs; *Tournely* tamen id negat, quia in *Cap. 2. de Cler. ægrot.* qui duos digitos amisit, et medietatem manûs, non dicitur mutilatus, sed debilitatus, et communiter dicunt, quod qui debile alteri redderet membrum, licet inhabilem suo muneri redderet, non fieret irregularis; *Nav. Gibal. Suar. Av. Salmant.* cum multis aliis, et *Croix* cum aliis; Imò *Castrop. Nav. et Covar.* etiamsi membrum restaret mortuum; sed huic adversantur valde probabiliter *Suar. Cabass. et Salm.*, quia tale membrum, licet materialiter non sit mutilatum, reverà tamen est abscissum formaliter; dum non est amplius animatum; sicut contrà probabi-

---

(a) *Lib. 7. n. 365. et 415.*

484 *Tract. 19. De Censuris, et Irregularitatibus.*

liter dicunt *Salm.* quòd qui abscinderet hujusmodi membrum aridum, non fieret irregularis. Nec qui excæcaret aliquem, quin oculum foras obrueret, quia non esset mutilatio; *Busemb. Dian. et Megala.* In his irregularitatibus ex mutilatione, quandò est secreta, potest dispensare Episcopus, cum tantum ei vetitum sit in homicidio voluntario, *Suar. Bonac.* etc.

. III. — Quoad Dispensationes super his irregularitatibus, Vide *Tract. seq. de Privileg. ex n. 51. et 106. (a).*

---

(a) n. 380. et 381.



## PUNCTUM V.

### De irregularitate ex defectu.

1. *Ex defectu animæ* 112. *De lunaticis, et obsessis* 113. *De illiteratis* 114. *De neophytis* 115. II. *Ex defectu corporis, et* I. *De cæcis* 116. II. *De surdis.* 117. III. *De mutis* 118. IV. *de claudis* 119. V. *De iis qui manu carent* 120. VI. *De febris laborantibus* 121. *De deformibus* 122. *De leprosis* 123. *De monstruosis* 124. *De eunuchis* 125. III. *Ex defectu natalium* 126. ad 128. *De expositis* 129. IV. *Ex defectu ætatis* 130. V. *Sacramenti, nempe bigamie.* *De bigamia verò* 131. *De interpretativâ* 132. *Qui ducit corruptam* 133. *Qui contrahit cum eâ invalidè* 134. *Si vir cognoscit uxorem adulteram* 135. *Quis contrahit duo Matrimonia* 136. *Si vir accusat uxorem, et reddit debitum, etc.* 137. *De similitudinaria* 138. *Quomodò tollitur irregularitas ex bigamiâ.* 139. VI. *Ex infamiâ.* VII. *Ex defectu libertatis.* *De servis* 140. *De conjugatis* 141. *An conjux possit ingredi Religionem, alio relicto in sæculo* 142. *De curiæ addictis, militibus, etc.* 143. VIII. *Ex defectu lenitatis; circa Bellum* 144. *Circa Judicium* 145. et 146. *De dispensationibus* 147. *De facultatibus Sacræ Pœnitentiariæ* 148.

112. — **P** RIMA est ex defectu animæ, ex quo sunt irregulares omnes amentes, phrenetici, epileptici, sive lunatici, et obsessi. Quoad amentes (et idem de ceteris) distinguendum: aut talis defectus suboritur post ordinationem, et tunc, cessato defectu per diuturnum tempus plurimorum annorum, Ordinarii judicio poterit ministrare in susceptis ordinibus; *Suar. Nav. Silv. S. Bonav. Bonac.* et multissimi alii: Si adhuc non est ordinatus, non poterit amplius ordinari, si origo dependet à causa permanente, nempe ab organorum læsione, quia hujusmodi relebantur, *Can. Maritum, D. 33. Se-*

cùs si defectus ab aliquâ accidentali causâ proveniret, ut à febris, vulnere, aut ab aliquâ transeunte passione; *Suarez, Bonac. Ronc. etc. (a).*

113. — Idem dicendum de lunaticis, et obsessis; si morbus præcessit ordinationem, sunt perpetuò irregulares, *Can. Communiter, D. 33.* Advertit *Cabass.* quòd si talis morbus accidit in impubertate, et postea perfectè ab illo convaluit in pubertate, possit ordinari, quia asserit *Hippocrates*, quòd epilepsa sæpè in pubertate perfectè curatur; sed si accideret in pubertate, præsertim post annum 25, desperatur quasi posse convalescere. Ex cit. *C. Communiter* habetur, quòd si per annum sit liber sive à morbo, sive à Dæmonis vexatione, iudicio Episcopi potest ad ordinis suscepti administrationem admitti. Imò dicunt commun. DD. *Suar. Nav. Laym. S. Antonin. etc.*, quòd si talis morbus raro accidit (nempè semel in mense), nisi infirmus in terram cadat, nec spumet, adjuncto sibi Sacerdote jejuno, poterit privatim celebrare (b).

114. — Illiterati qui sufficienti doctrinâ pro Ordinibus præditi non sunt. Pro *Primâ Tonsurâ* saltem legere et scribere sciant; *Trid. Sess. 23. cap. 4.* Pro *Ordinibus Minoribus*, sciant linguam latinam, *loc. cit. cap. 2.* Pro *Subdiaconatu, et Diaconatu*, ultra literarum humaniorum peritiam, requiritur scientia eorum, quæ sunt necessaria ad præfatorum Ordinum exercitium; *ib. cap. 13.* Pro *Sacerdotio* requiritur scientia ad docendum populum ea quæ sunt necessaria ad salutem, et ad Sacramentorum administrationem, c. 14. et 25. Sed quoad Regulares vitæ contemplativæ addictos, sufficit eos Grammaticam callere, secùs irregularitas est de *jure Divino*, adèd ut nec Papa possit in hoc dispensare (c). Vide in *Append. III. n. 35. et 36. de Exam. Ordinand.*

115. — Neophiti, illi nempe qui in adultâ ætate recenter sunt baptizati. Sed si elapso aliquo tem-

---

(a) num. 398. — (b) num. 399. — (c) Lib. 6. num. 791.

pore, ordinarius eos sacris Ordinibus judicat idoneos, possunt ordinari; *Suar. D. 43. Sect. 2. n. 6. et 7. Sanch. in Dec. l. 2. c. 28. n. 11. Bonac. apud Thesaur. Decis. S. C. tract. 1. part. 97.* Sed putat *Toletus*, quod post 10. annos non sunt amplius irregulares (a).

116. — *Secunda* est ex defectu corporis. Et hæc duobus ex capitibus incurritur, aut quia ad exercitium Ordinis ineptus quis redditur; aut quia aliis notabilem indecentiam, aut horrorem asserit; ita DD. comm. cum *S. Thomã (b)*. Hinc ex primo capite est irregularis cæcus omninò, *c. ult. D. 55.* Sed in hoc notanda sunt plura: 1. quòd, si quis jam sit Sacerdos, et constet eum non posse errare, potest dispensari à Papâ ad celebrandum, prout 23. Augusti 1725. S. C. dispensavit cum quodam Parocho Florentino, ut celebraret cum assistentiâ Sacerdotis (c). 2. Quòd si quis caret visu oculi sinistri, est irregularis, ut docent DD. communissimè. Nonnulli tamen excipiunt si dexter oculus sit aptus ad legendum Canonem, imò dicunt posse huic prospici incommodo aptando Missale juxta medium Altaris; *Laym. Dian. Croix* et multi alii, et *P. Suar.* id vocat practicè probabile. 3. Quòd cæcutiens est irregularis ad suscipiendos Ordines, sed ad susceptorum exercitium potest cum eo dispensari, ut possit celebrare Missam de Beatissimâ Virgine diebus Festivis, et Defunctorum in ferialibus (d). *Lambertinus* loco cit. dicit quòd pro omninò cæco non dispensatur, ne ad primam quidem Tonsuram, ut habilis fiat ad Beneficium. 4. Quod visu debilis, si potest perspicillis uti, aut si oblique intuetur (vulgò *Guercio*) non est irregularis. DD. communiter.

117. — II. *Surdus* qui penitus non audit; ita communiter DD. ex *Can. 7.* qui appellantur *Apostolorum*, ob indecentiam quod non possit audire vocem Ministri. Hanc indecentiam tamen negant

---

(a) *Lib. 6. n. 402.* — (b) *Suppl. q. 39. a. 6.* — (c) *Lib. 6. num. 404. Lambert. Notif. 4. num. 5.* — (d) *cit. n. 404.*

488 *Tract. 19. De Censuris, et Irregularitatibus.*

*Henriq. Præpos. Gobat.*, nam potest ex aliis signis percipere quid Minister responderit, sed communissima est contraria; concedunt tamen *Bonac. Tambur. Conc. Castrop. Lazm. Nav. et Salmant.* cum aliis, quòd si surditas Sacerdoti supervenerit post Sacerdotium, faciliùs toleratur defectus, sicut de cæcutiente. Surdaster verò excusatur ab irregularitate (a).

118. — III. *Mutus*, sivè talis omninò sit, sivè verbum proferre nequeat, quin aliquid omittat, *Tourn. et Holzm.*, et *Salm.* addunt etiam si loqui nequeat nisi cum magnâ difficultate. Et idem dicit *Holz.* de eo qui loquelam valdè præcipientem habet. Balbutientes aut dentibus carentes non sunt irregulares, modò risui, aut contemptui aliis non sint, *Navar. Tambur. Coninch. Sayr. Filliuc. Præpos.* etc. (b).

119. — IV. *Claudus*, aut qui tibiis caret, aut qui sine baculo non potest ad Altare accedere, *Can. Nullus Episcopus*, 54. de *Consecrat. D. 1.* Hoc explicatur à Glossâ: *Si sinè baculo non possit sustentari in Altari*, et ità explicant reliqui AA. Ceterum non est irregularis, qui hoc non indiget. *Can. Si Quis* 10. *D. 55.* aut sit distortis tibiis, non est irregularis, quia talis defectus veste talari abscondi potest, *Tournely, Croix, Salmant.* etc. Excipit *Laym.* modò non sit valdè deformis. Qui utitur tibiâ ligneâ, et jam reperitur Sacerdos, cum possit indecentia reparari, Ordinarii iudicio benè potest celebrare, *Tambur. Silv. Rosel. Major. et Gibal.* (c).

120. — V. Qui caret manu, aut digitis omnibus, aut pollice tantum, *Cap. ultim. de corpor. vitiat.* idem dicunt *Busemb. Ren. Tambur. Filliuc. Bon. Suar.* etc. Si careret indice aut pollicis parte, non autem solis unguibus, *Cap. Thomas eod. titul.*, aut si illi digiti sint adeò debiles, ut non possint hostiam elevare, ve eam frangere, cit. *C. Thomas.* Si autem careret indice, et jam esset ordinatus,

---

(a) *Lib. 7. num. 405.* — (b) *num. 405.* — (c) *num. 407.*

potest adhibere digitos posteriores, aut in necessitate potest iis etiam ministrare Eucharistiam (a). Si verò tribus posterioribus digitis careret, etiam esset irregularis (secus si duobus); ità *Anacl. Holz. Cajet. Nav. Tourn. et Pontas*. Notat tamen *Tourn.* quòd si quis careat indice, poterit dispensationem impetrare (b).

121. — VI. Qui laborat feбри continuâ (non autem quartanâ aut levi) aut gravi capitis dolore, adeo ut non posset celebrare sinè periculo graviter errandi aut deficiendi, *Bon. Sayr. Sol. Avil.* Item paralyticus, cujus manus ità tremant, ut adsit periculum effundendi Calicem; *Busemb. Conc. Castrop.* etc. Qui patitur talem tussim, ut periculum adsit in communicando, et præsertim expuendi sanguinem, *Bonac. Ugol. Majol.* etc. Abstemius qui in periculo est vomitûs, *Tourn. et Coneina*, et cum isto nec Papa dispensare potest (c).

122. — Ex secundo capite, quòd inducatur irregularitas ex vitio corporis deformitatem, aut horrorem afferente, *C. Presbyterum, et seq. de Cler. ægrot.* fiunt irregulares I. illi qui carent aliquo membro, v. gr. naso, *C. Penult. de corp. vit.*, aut habet illud valdè distortum, aut valdè aduncum, aut valdè elevatum; *Tamb. Bonac. Viva* etc. Ille cui oculus obrutus est, *C. ult. D. 55.* Probabiliter tamen dicunt *Silv. Tourn. Pont. Ronc. cum Tamb.* etc. quòd tollitur talis irregularitas, si possit oculo crystallino reparari. Ità pariter qui caret auriculis, nisi talis deformitas capillis, aut aliter tegatur; *Busemb. Diana, Bonac. Salm. et Tourn. cum aliis (d)*.

123. — II. Leprosi, *Cap. Tua nos, de Cleric. ægrot.* propter scandalum et abominationem populi; undè in privato celebrare potest, *Castrop. Salm. Bonac. cum aliis*; ità etiam qui habet labia corrosa, vel ad instar leporis abscissa; *Tamb. Tourn. et Viva*. Ità pariter laborans morbo gallico foris ap-

---

(a) *Lib. 6. n. 408.* — (b) *Ibid.* — (c) *Lib. 7. n. 409.* — (d) *n. 410.*

490. *Tract. 19. De Censuris, et Irregularitatibus.*

parente; *Tourn.* et *Holz.*, aut habens faciem valdè maculatam; *Laym.* (a).

124. — III. Monstruosi, nempè qui gibbam habent valdè enormem; *Busemb. Anact. Bonac.* etc. *Pigmæi*, sivè nani, staturâ ità breves, ut ad risum moveant, præsertim si capite sint nimis grandi, *Tambur. Ren. Tourn.* etc. aut si non possent tantùm brachia distendere, quantùm opus esset ad Altaris ministerium. *Ætiopes* apud nos qui risum afferrent, *Tournely* etc., *Hermaphroditi*; licèt dicant *Tolet. Escob.* cum *Tournely* contrà *Conin.*, quòd si hic defectus est occultus, et prævaleret sexus virilis, non inducit irregularitatem. Notandum ceteroquin quòd si hi defectus superveniunt Ordinibus Sacris, potest Sacerdos exercere illos actus quos potest, verb. grat. si Sacerdos est cæcus, potest Confessiones audire etc. *Cap. 7. de Cler. ægrot. (b).*

125. — Eunuchus qui morbi causâ abscissus est, aut in infantiâ, vel propter injuriam alterius, aut à domino, non est irregularis. Sed irregularis est si se ipse abscindere fecit, aut etiam ab aliis ipso consentiente; licèt zelo castitatis, *Cap. Si quis à medicis, Si quis, 4. D. 55.* et alia *Cap. De Corp. viliat. (c).* Putant probabile *Palaut, Tamb. et Pelliz.* contrà *Suar. Molin.* et *Sayr.* quòd si quis sibi abscinderet testiculos ad vocis conservationem, non fit irregularis, dicentes quòd textus allati loquuntur de abscissione, aut sectione, quæ intelligi potest, si abscindantur virilia omninò (d).

126. — *Tertia* irregularitas provenit ex defectu natalium. Et ex hoc sunt irregulares omnes illegitimi, *Cap. 1. et ultim. de Fil. Presbyt.*, licèt sint occulti, communiter DD. (e). Possunt hi legitimari per subsequens Matrimonium, modò non sint spurii; nempè nati tempore quo valdè non poterat Matrimonium contrahi, v. gr. quia tunc temporis Matrimonio unus illorum cum aliâ ligatus erat, C.

---

(a) n. 411. — (b) n. 411. et 412. — (c) n. 416. — (d) n. 418. — (e) n. 420.



*Tanta*, qui filii etc. Sufficit tamen ad legitimandam prolem, et ad reddendam immunem à tali defectu natalium, quòd Matrimonium contrahi poterat tempore nativitatis; ità probabiliter *Sanch. Ponc. Anacl. Bonac. et Salm.* cum multis aliis contrà *Suar. et Tourn.* ex Cap. *Tanta*, ubi dicitur: *Si vir vivente uxore aliam cognoverit, et ex eà prolem suscepit*, nam Tò *suscepit*, respicit veriùs natiuitatem, quàm conceptionem (a). Et novissimè Benedictus XIV. hanc sententiam amplissimâ dissertatione in formâ Epistolæ (b) responsivæ ad Archiep. S. Dominici in insulâ Hispaniolâ illustravit, et sic de hoc casu §. 3. suum sensum aperit: *In quâ controversiâ satis arduâ cùm inveniantur Textus Textibus contrarii, cùm Doctores Doctoribus adversentur, si à Nobis iudicium interponendum foret, non aliter id à Nobis fieret, quàm secundum sententiam in Tribunalibus, et Curia illius Regionis receptam, in quâ esset pronunciandum.* In §. 4. procedit ad aliud dubium, quod ità resolvit: *Sed cùm certum est Matrimonium inter illius parentes contractum, incertum verò tempus, quo filius conceptus, et in lucem editus fuerit, filium hunc legitimum censeremus, cum Iudex in dubio debeat in bonum, et commoda prolis propensus esse.* His positis, sic ego pro primâ sententiâ argumentor. Igitur si in dubio Iudex in bonum prolis judicare debet, ubi talis casus nullâ tribunalium sententiâ decisis reperitur, cùm simus in dubio ob Textuum, et Doctorum discrepantiam, potiùs proles judicanda est legitima, quàm illegitima, siquidem etiam in hoc casu certum est eam in Matrimonii constantiâ editam fuisse, et incertum an debeat attendi tempus conceptionis, an verò ortûs.

127. — Hinc notandum 1. cum *Salm.* quòd si filius naturalis ordinatus esset antè Matrimonium parentum adulterorum, poterit ritè ministrare, secuto eorum Matrimonio, sinè dispensatione. 2. Quòd talis legitimatio fit per Matrimonium ratum dum-

---

(a) n. 422. — (b) *Bullar. suo tom. 1. in Ordine* 213.

492 *Tract. 19. De censuris, et Irregularitatibus.*

taxat, c. *Tanta*. cit. 3. Quòd filii nati ex Matrimonio irritò ob impedimentum occultum, sed validum putatum saltem ex unâ partè conjugum, legitimi censentur; ità DD. communiter ex c. *Cùm inter 2. Qui filii sint legitimi. c. Ex tenore, eod. tit.* Secùs autem si ambo parentes erant in malâ fide. C. *Cùm inhibitio*, §. *Si quis*, de *Cland. Desp. 4.* Quòd filii nati ex Matrimonio contracto in gradu prohibito, omissis proclamationibus, nec accedente Episcopi Dispensatione, licèt contractum coram Parocho, et testibus, censentur illegitimi, non obstante quòd in bonâ fide, aut ex ignorantia illud contraxissent, c. *Cum inhibitio, eod. tit. §. Si quis (a).*

128. — Filii legitimantur I. Per Professionem Religiosam, ut dictum est n. 85. II. Per Pontificis dispensationem, qui solus potest cum illegitimis dispensare, et concedere legitimationem, quoad omnes effectus, communiter DD. cum *Sanch. Castrop. Salm.* etc. (b). Quid possint circa hoc Episcopi, et Prælati Regulares, vide *Tract. XX. de Privileg. n. 51. et 106.*

129. — Quæritur an filii expositi (nempè nati ex parentibus ignotis) sint irregulares? Affirmant multi, prout *Tournel. Fill. Bonac.* etc. quia vehementes adsunt conjecturæ hos esse illegitimos, dùm nunquàm videntur parentes (quantumvis egestate laborent) eo esse animo crudeliori, ut velint propriam prolem exponere; inauditum enim hucusque est, quòd prægnans mater partum suum in Ecclesiam baptizandum non conferri curaverit, et quòd post Baptismum, si observaretur deesse filium matris, Justitia de hoc non inquireret. Secunda sententia tamen probabilior est cum *Castrop. Pont. et Salm.*, et *Suar.* vocat probabilem; nam ut aliquis sit irregularis, debet constare eum esse illegitimum, sed expositi sunt dubiè tales, dùm aliquandò paupertate oppressi parentes filios exponunt. Et AA. citati asserunt Gregor. XIV. anno 1591. in favorem

(a) n. 423. 424. et 425. — (b) num. 426. et 427.

Cap. 3. Punct. 5. De Irregularitate ex etr. 493

cujuslibet Confraternitatis pro Expositis erectæ declarasse tales expositos non fore habendos illegitimos, donec tales non probarentur; *Gibal.* apud *Tournely* (a).

130. — *Quarta* ex defectu *Ætatis*; sed de hoc loquimur in *Append. III. Exam. Ordinand. n. 43. et 44.*

131. — *Quinta* ex defectu *Sacramenti*, aut significationis *Matrimonii*, quod significat conjunctionem Christi unici sponsi cum Ecclesiâ unicâ sponsâ, et contrahitur per *Bigamiam*, in quantum, quia bigamus, qui carnem suam cum pluribus divisit uxoribus, talem unionem non repræsentat. Et talis irregularitas constat ex toto *tit. de Bigamiâ*. Definitur bigamia: *Est Matrimonii multiplicatio*. Et est trifariam. Vera, Interpretativa, et similitudinaria. I. *Vera* est quando successivè unus duxit plures uxores, et cum omnibus Matrimonium consummavit, modò quo dictum est *Tractatu XVI. num. 68. c. Præcipimus, et cap. Debitum de Bigam.* (b).

132. — II. *Interpretativa* habetur cum quis contraxit et consummavit Matrimonium cum viduâ jam prius à primo viro cognitâ, et licèt cum istâ invalidè contraxisset, ut habetur ex *c. A nobis, de Bigam.*, aut cum corruptâ ab aliis, *c. ultim. D. 51.* aut cum cognoscit propriam uxorem, postquam hæc adulteravit, *C. Si cujus*, et *c. Si Laicis, D. 39.*, aut si quis contraxisset, et consummasset duo Matrimonia, unum validum, invalidum alterum. De hac ultimâ specie textus non reperitur aliquis, sed adest commune DD. judicium ex *c. Nuper*, cum *S. Th.* (c). Super hac Bigamiâ tres occurrunt quæstiones.

133. — Quæritur 1. An sit irregularis qui bonâ fide contrahit cum corruptâ? Affirmant communit. DD. cum *S. Thom.* (d) (contrâ *Sâ, Ledesma*, etc.) quia cum hæc sit irregularitas ex defectu significationis Christi cum Ecclesiâ suâ unicâ sponsâ, bona fides non efficit, quin viri caro cum corruptâ divisa sit, licèt credat illam esse virginem (e).

---

(a) num. 432. — (b) num. 436 — (c) *Suppl. q. 66. a. 2.* — (d) *loc. cit. a. 3. ad 5.* — (e) n. 439.

134. — Quæritur 2. An fiat irregularis qui contrahit invalidè cum corruptâ ob aliquod impedimentum dirimens? *Prima* sententia est affirmativa, et hanc tenent *Suarez* ( qui vocat communem ) *Tourn.* *Covar.* *Cornejus*; ità etiam *Fagnanus* (a) cum *Host.* *Joanne Andread*, *Card. Brut.* et omnibus ceteris ( ut ipse dicit ) de Clerico non in *Sacris*, et cum *Silv.* et *Nav.* de laico. Et probatur ex *Cap. A nobis*, de *Bigam.*, ubi declaratus fuit irregularis Subdiaconus qui contraxerat cum viduâ, inter quos ( dixit *Innoc. III.* ), licèt non fuerit *vinculum maritalè contractum* ( stante inhabilitate eorum ), cum eo tamen tanquàm cum marito viduæ dispensare non licet, non propter *Sacramenti defectum*, sed propter *affectum intentionis cum opere secuto*. Ubi jam observatur, quòd talis Subdiaconus non fuit declaratus irregularis, quia post contractum conjugium spirituale per *Ordinem sacrum*, contraxit conjugium carnale; sed quia se conjunxit cum viduâ, quam ob causam habitus fuit tanquàm *maritus viduæ propter affectum intentionis*, etc. *Secunda* sententia negat talem irregularitatem, et hujus sunt *Sanch.* *Nav.* et *Salm.* cum quâdam *Decis. S. C.* apud *Farinacium*, dicendo quòd talis Subdiaconus habitus fuit irregularis, quia contraxit duo *Matrimonia*, unum spirituale; et alterum carnale, licèt invalidum. Ad hanc rationem probatio primæ sententiæ pro responsione etiam valet (b). Contrà irregularitas ab adversariis intellecta contrahitur à Subdiacono, licèt contraheretur cum virgine, ut dicemus n. 140. Ad decisionem *S. C.* respondemus, quòd decisiones allatæ à *Farinacio* fuerunt declaratæ incertæ à *Gregor. XIV.* an. 1621. (c). Et notandum hic quòd die 29. Augusti 1631. de mandato *Urbani VIII.* fuit declaratum à *S. C.* non esse præstandam fidem *Decret. S. C.* nisi illa authenticè constarent, nempe cum subscriptione *Cardinalis Præfecti* (d).

---

(a) *In c. Nuper*, de *Bigam.* n. 13. et 43. — (b) n. 240. —  
 (c) *Ap. Croix* l. 1. n. 219. — (d) *Vide Potestas* t. 1. p. 1. n. 219.

135. — Quæritur 3. An sit irregularis qui uxorem adulteram cognovit, quandò adulterium est occultum? Negant *Henriq.* et alii apud *Elbel* : ex *C. Si cujus*, *D.* 34, ubi dicitur : *Si evidenter fuerit comprobatum uxorem adulterium commisisse.* Sed nos affirmamus cum communi apud *Elb.* ; et sic sentiunt *Tourn.* et *Ronc.* cum *Suar. Ugol. et Filliuc.* Et hoc currit etiamsi uxor vi oppressa fuisset. Ratio est eadem casûs primi quæsiti ; ideoque parùm refert utrùm vi oppressa sit, aut vir non sit culpæ reus, dùm semper reverà adfuit divisio carnis ; ità *Fagnan.* (a), cum *Ugol. Host. etc.* dicens : *Non agitur hîc de vitio ordinandi, sed de defectu Sacramenti, quem etiam ignorans potest pati.* Ad textum respondetur ; quòd verba *si evidenter comprobatum etc.* tantùm probant, quòd si vir non est cêrtus de adulterio uxoris, non est censendus irregularis (b) ; licèt maritus adulterii inscius esset, tamen in se est irregularis (c).

136. — Ex hoc infertur 1. Quòd idem dicendum est ob eandem rationem cum *S. Thomâ* (d), *Suarez*, *Tournel. Conc. S. Antonia.* et multissimis aliis communissimè de eo qui contrahit duo Matrimonia invalida (e), licèt in bonâ fide, ut deducitur ex *C. A nobis*, præfato, et explicato *n.* 132. Fit 2. etiam irregularis qui fictè contrahit secundum Matrimonium ad copulam extorquendam ; ità *Suar. Tourn.* et *Salm.* cum aliis contrà *Palaum* qui innititur verbis *propter effectum intentionis* ; sed nos dicimus, quòd hæc verba non significant, quòd ille Subdiaconus verè cogitasset verum contrahere Matrimonium, dùm illum latere non poterat id effici non posse, sed quòd affectum habebat in executionem illud ponere. Itàque idem est desiderare Matrimonium impossibile in effectum ponere, ac fingere illud efficere, quod efficere non intendit (f).

---

(a) In *Cap. Nuper de Big.* — (b) *Lib. 7. n. 442.* — (c) *n. 443.* — (d) *Suppl. q. 66. a. 2.* — (e) *n. 445.* — (f) *n. 447.*

496 *Tract. 19. De Censuris, et Irregularitatibus.*

137. — Glossa in *Can. Si cujus*, *D. 34.* proponit casum : Si vir adulterii accusaret uxorem, et lite pendente, quæsitus esset de debito conjugali, an reddendo fieret irregularis? Respondetur quòd dato quòd vir non est certus de uxoris adulterio, cum certè teneatur reddere, tunc ille (ait Glossa) *potiùs dicitur cognosci ab uxore, quàm cognoscere ipsam*, idèdque reddendo non fieret irregularis. Hâc ratione ductus puto idem dicendum de viro qui bonâ fide contraxit cum corruptâ ut in *n. 135.* si reddit, et non petit : ac de eo qui reddit uxori occultè adulteræ.

138. — III. Bigamîa *Similitudinaria* contrahitur per Matrimonium (licet nullum, et licet cum virgine) contractum post voti solemnem emissionem, sive Religionis, sive Ordinis Sacri. Hæc bigamia inducit irregularitatem, quoties Matrimonium consummatum est, *c. 13. Quotquot, et Can. 23. Monaco*, 27. q. 1. ubi dicitur : *Si uxori fuerit sociatus, nunquàm Ecclesiastici gradûs officium sortiatur.* Dicunt *Hurtad. Abb. et Archid.* quòd hæc irregularitas contrahitur tantùm à Monachis ; sed communissimè DD. docent incurri etiam à Clerico in sacris, ex *Cap. 2. Qui Cler. vel Mon.*, ubi dicitur quòd Episcopus possit dispensare cum Diacono qui uxorem duxerat, ad ministrandum, etc. ; etc. 2. *eod. tit.* ubi præcipitur Episcopo, ne permittat Subdiacono, qui Matrimonio jungitur, ministrare. Sed putat *Sanct.* hanc irregularitatem potiùs ex delicto, quàm ex bigamiâ. Attamen non esset irregularis qui sacris non initiatus Matrimonium cum Moniali contraheret, quia leges loquuntur de eo qui Matrimonio jungitur post proprium votum (a).

139. — Hæc irregularitas bigamiæ non tollitur per Baptismum, *Can. Si quis viduam*, *D. 34.* ita commun. cum *S. Thomâ (b)*. Potest tamen dispensare Papa ex gravi causâ *Sanct. Conc. Salm.* cum aliis ; et *Tournely* cum communi affert Lucium III. jam dispensasse (c). Quid autem possint Episcopi, et Re-

---

(a) 448. et 449. — (b) *Suppl. q. 66. a. 4.* (c) *n. 450. et seq.*

*Cap. 3. Punct. 5. De Irregularitate ex etc. 497*  
gulares, vide seq. *Tract. XX. de Privilegiis n. 51.*  
et 106.

140. — *Sexta* oritur ex infamia. Sed de hac sat actum est *num. 62. Septima* ex defectu libertatis; hinc sunt irregulares 1. Servi, nempe Mancipia donec libertate non donentur. Sed si servus, sciente et non contradicente domino, ordinetur (licet primâ Tonsurâ), eodem actu libertatē acquirit, *Can. Si Servus; et Can. Nulli, D. 54*; potest tamen etiam donare libertate, cum conditione, ut ei inserviat in iis quæ Clericali statui non repugnant, et deducitur ex *cap. Nullas, de Serv. non ord.* Sed si in seio domino ordinatus esset, remanet servus, modò non sit in Sacris, et modò ab Episcopo, aut à cooperantibus duplū non reddatur domino; sed si isti essent impotentes, servus etiam si Diaconus remanet servus, et si est Sacerdos, tenetur inservire in iis quæ statum decent, et celebrare pro domino: modò dominus id cognoscendo per annum non dissimulet (a).

141. — *Uxorati*, si uxores non consentiunt, et voto castitatis non se adstringunt, *cap. ult. de Temp. Ord. in 6. et Extrav. Antiq. de Voto*; et etiam si Matrimonium esset ratum dumtaxat; quia tantū permissum est infra duos menses ingredi Religionem, *ead. Extrav.*, probabile tamen est, quòd si ordinatus esset in Sacris, non teneretur ad ingrediendam Religionem, cū hoc sit onus nimis grave; *Sanch. Aver. Salmantic. Sanct. Antonin. etc. (b).*

142. — Quæritur, an maritus possit initiari Sacris, aut Religionem ingredi cum uxoris licentiâ, si illa Religionis statum non amplectitur? Alii AA. negant innixi *Cap. Conjugatus, de Conver. Conjug.* ubi dicitur quòd maritus ordinari non potest, nisi ab uxore continentiam profitente fuerit absolutus; igitur dicunt sufficere si uxor castitatem voveat; dū Textus dicit *Continentiam* (non jam Religionem) *profitente*. Sed omninò negandum, cū id lu-

---

(a) n. 455. — (b) L. 6. n. 812.

498 *Tract. 19. De Censuris, et Irregularitatibus.*

culentur sit expressum in cap. *Cùm sis*, eod. tit. ubi dicitur : *Ignorare non debet SS. Patrum constitutioni esse contrarium, ut vir, uxore suâ, aut uxor, viro ejus non assumente Religionis habitum, debeat ad Religionem transire.* Idem respondit Nicolaus Papa in *Cin. Scripsimus*, 27. q. 2. de uxore regis Lotharii dicens : *Non hoc aliter fieri posse, nisi eandem vitam conjux ejus ac Lotharius elegerit.* Et ad textum oppositum respondetur, quòd verbum *profidente*, intelligendum est de Professione solemnî. Cæterùm omnes conveniunt quòd si uxor est juvenis, non potest in sæculo remanere, si vir Religionem ingreditur; contrà si illa est ætate provectâ, idem textus *Cùm sis*, concedit quòd possit remanere in sæculo, simplex votum castitatis emittendo.

143. — III. *Curialistæ* qui tenentur servire Curie sive juramento, sive stipendio, prout sunt Judices, Advocati, etc. per illud tempus quo ea officia durant, c. 1. 2. et 3. *D. 51.* modò licentiam à Papâ, aut à consuetudine non obtinuerint, ut possint ea munia exercere, prout sunt regii Consilarii in causis civilibus; *Laym. Castrop. Suarez. Salm.* cum aliis (a). IV. Milites pro eo tempore quo juramento adstricti sunt. Item Thesaurarii, Depositarii publici, et alii qui Rempublicam, administrant. Item Excubiæ Regis, et cæteri omnes qui aliquo severitatis munere, aut turpi funguntur, aut Ministerium egerunt in causâ sanguinis (b).

144. — *Octava* est ex defectu lenitatis, nempe ex licitâ mutilatione, vel occisione in bello offensivo licet justo. Sed ad incurrendam hanc irregularitatem, oportet, ut occisio manu propriâ sit factâ; *Busemb. Holzm. et Lambertinus*, ex cap. *Dilectus*, et cap. *Significasti*, de *Homic.* Dicunt *Busemb.* et *Bonacin.* quòd qui in bello justo hortaretur ad occidendum istum vel in illum, fieret irregularis; sed probabiliter contradicunt *Salm.*, quia textus loquitur de eo qui occidit, vel mutilat, non verò de eo qui hortatur. Sed si bellum est justum, et non

---

(a) *Lib. 7. n. 456.* — (b) *Ibidem.*



est offensivum, sed defensivum, occidens non fit irregularis, cap. 2. de Imm. Eccl. et Clem. un. de Homic. In bello autem injusto sufficit, ut unus occidatur ut omnes fiant irregulares, omnes DD. cum S. Thomâ 2. 2. q. 64. a. 8. (a). Hic notandum Clericum (modò fuerit in Sacris, aut Beneficiatus, et etiam in conflictu bombas emiseric) esse irregularem, si militat, etiamsi juret se ne unum quidem læsisse, ut apud Lambertin. legere est Notif. 101. n. 19.

145. — Defectu lenitatis fiunt irregulares Judices, et omnes qui coöperantur in Judicio justo ad mortem, vel mutilationem Rei activè, efficaciter, et proximè, per actionem naturâ suâ ad id ordinatam; Clem. Si furiosus, de Homic. cap. Cler. et cap. Sententiam, ne Cler. vel Mon. Dictum est activè, idest qui sunt ex parte occidentium, non verò ex parte occisi, ut esset Confessarius hortans reum ad ferendam mortem, etc. (b). Dicitur efficaciter, quia qui bajulat ligua, ut cremetur cadaver, non est irregularis: nec qui assistit, et licet in dicto cap. Sententiam vetetur Clericis hujusmodi suspliciiis adesse, tamen dicitur hic Canon vel esse abrogatus, vel non obligare sub gravi; Bonac. Salm. et Tour. vocant communem. Imò Navar. et Avil. exousant Minoristam ab omni culpâ (c). Dicitur proximè, nam non est irregularis, qui gladios cudit, aut vendit, aut qui hortatur ut puniantur rei, aut alius qui non minister necessarius, et remotè concurrat; undè valdè probabiliter dicunt Suar. Reginald. Laym. Avil. Busemb. etc. non esse irregularem Confessarium, qui diceret Judici talem reum esse morte dignum. Dicitur tandem per actionem suâ naturâ ad mortem ordinatam; hinc non est irregularis Confessarius, qui diceret Carnifici: *Functus sum meo officio, te non impedio quominus tuum facias*; nec Judices Ecclesiastici qui degradatum Curiae sæculari tradunt, nec Clericus accusator in causâ criminali, modo protestetur, se non inten-

---

(a) n. 459. et 460. — (b) n. 461. et 462. — (c) n. 463.

500 *Tract. 19. De Censuris, et Irregularitatibus.*

dere poenam sanguinis, *Bonac. Busemb. Tambur.* etc. (a).

146. — Contrà sunt irregulares 1. Judex ejusque Assessores, Scriba sententiam scribens (non autem qui illam transcribit) et cæteri omnes, qui sententiam exequuntur (b). Secus qui sententiam aliis committunt, *cap. ult. Ne Cler. etc.* nisi jubeant, ut detur sententia mortis in tali causâ, vel ut expediat talem causam mortis; *Castrop. Salm.* cum aliis. 2. Testes voluntarii, qui ultrò se offerunt, licèt protestentur; ità communiter DD.; et idem dicendum de Advocatis, et Procuratoribus accusatoris, nisi coacti sint ad eum tuendum, *Salm.* cum iisdem. 3. Accusatores criminis capitalis vindictam petentes criminalem. Et si iste erit Clericus Beneficiatus aut in Sacris, præter irregularitatem, peccat mortaliter ex *cap. Sent.* ubi vetitum est Clericis se in causam sanguinis ingerere. Non erit irregularis, qui accusat reum solummodò, ut sibi compensentur damna, semper adhibitâ protestatione se nolle poenam sanguinis, *c. Prælati, de Homic.* Et hoc tam in causâ propriâ, quàm in causâ cognatorum usque ad 4. gradum, aut domesticorum, aut propriæ Ecclesiæ; *Suar. Castr. Conc. Salm.* cum *Bon.* et aliis. Et hoc valet etiamsi protestatio simulatè fieret, *Suar. Bonac. Castrop.* et *Salm.* cum multis aliis; et etiamsi illam faciat post accusationem, sed antè sententiam, *Bon. Sayr. Pelliz.* et *Salm.* (c).

147. — Dispensationes super irregularitatibus ex defectu omnes reservatæ sunt Pontifici, quoad Sæculares; quoad Regulares verò, vide *Tract. XX. de Priv. n. 106.* et 107.

---

(a) n. 464. ad 467. — (b) n. 461. — (c) *Lib. 7. n. 468. v. Advertendum.*

DE FACULTATIBUS SACRÆ POENITENTIARIÆ.

148. — **N**ON parùm conferre judicavi hìc adnotare principales Facultates Sacræ Poenitentiariæ, ad hoc ut Confessarium non fugiat, pro quibus casibus possit ad illam recurri. Benedictus XIV. 13. Aprilis 1744. per Bullam quæ incipit *Pastor bonus*, (quæ est 95. in suo Bullar. tom. 1.) confirmavit plures facultates ab aliis Pontificibus concessas, et alias ipse adjecit Sacræ Poenitentiariæ. Itaque in præfatâ Bullâ habetur posse Sacram Poenitentiam I. absolvere à quibuscumque casibus et censuris, etiam Bullæ Cœnæ, Regulares pro utroque foro; Sæculares verò tam Ecclesiasticos, quàm Laicos etiam in utroque foro à censuris publicis latis à jure; et etiam ab homine, si expirata sit jurisdictio Judicis, vel si lator censuras illas reservavit Sedi Apostolicæ, modò Judici, et parti satisfecerint. Quod si pars injustè refutet satisfactionem oblatam, potest Poenitentiarius convenientem satisfactionem arbitrari. II. Posse absolvere hæreticos occultos, modò nullos actus extrinsecos fecerint, ex quibus potuerint alii dignoscere eos ut hæreticos; item publicos hæreticos, casu quo non est opus, complices denunciare. Posse etiam absolvere Principes, Administratores Rerumpublicarum, et Episcopos, ac alios Prælatos à casibus publicis Bullæ Cœnæ. III. Posse dispensare in occultis irregularitatibus et inhabilitatibus, etiam ex homicidio voluntario, non tamen, ut post homicidium possint promovere ad episcopatum. Item etiam ab inhabilitatibus propter hæresim, modò fuerint penitus occultæ. IV. Posse dispensare cum homicidis, et aliis, ut valeant profiteri in Religione approbatâ et fieri deindè etiam Sacerdotes. V. Cum malè promotis, ut omissos Ordines possint clam suscipere, non servatis interstitiis, et temporibus, non autem Sacros unâ die. VI. Posse dispensare cum occultis simoniacè ordinatis. VII. Posse convalidare titulos Beneficiatorum cum occultâ inhabilitate obtentorum. VIII. Posse

partem pretii simoniaci condonare ob delinquentis paupertatem. IX. Posse cum Gallis, Belgis, Polonis, et ulterioribus remittere fructus malè perceptos, componere verò cum Italis, Hispanis etc. et cum pauperibus etiam remittere. X. Posse remittere partem de malè ablatis, vel retentis, si dominus sit incertus, casus occultus et delinquens pauper, reliquum erogando in pauperes, vel pia opera in locis, si fieri potest, ubi illa ablata sunt. XI. Posse absolvere qui munera acceperint à Regularibus, modò non excedant decem scutos, vel etiam si excedant, factà priùs restitutione, vel præstità obligatione satisfaciendi. XII. Cum puellis quæ virgines non sunt posse dispensare, ut fruantur legato virginibus relicto, in casibus tamen occultis, et in foro conscientiae, vel cum virginibus. ut intrent Monasterium mulierum Pœnitentium. XIII. Posse relaxare juramenta, quæ non sunt in favorem alterius. XIV. Posse vota simplicia etiam castitatis dispensando commutare, aut implementum differre. XV. Dispensare commutando in alias preces, vel alia pia opera recitationem Divini Officii. XVI. Dispensare in occultis cum Regularibus à quibusvis irregularitatibus, inhabilitatibus, et pœnis; non autem in publico defectu Natalium quoad Generalatum; in publicis verò nonnisi auditis Superioribus. XVII. Posse absolvere Apostatas à censuris, cum reincidentia si non redeant intrà præfinitum tempus, dilatà dispensatione super irregularitate, si quam contraxerint usquè ad actualem redditum. Posse etiam concedere, ut ipsi transeant ad alium Ordinem. XVIII. Posse concedere transitum ad Religionem laxiorem, modò ibi vigeat regularis observantia; non tamen ad Ordinem S. Benedicti antiquioris observantiae; neque ad consimiles Congregationes cujuscunque Ordinis. Idem quoad Moniales ultrà montes. XIX. Posse absolvere, et dispensare super defectibus, et censuris etiam ob Clausuræ violationem. XX. Item concedere Confessarium Monialibus; (*vide dicta de hoc lib. 6. num. 576.*) XXI. Vacante Sede Apostolica habere facultatem in foro conscientiae etiam in casibus, à quibus vivente Pontifice non habebat;

**Cap. 3. Punct. 5. De Irregularitate ex etc. 505.**

tamen cum reincidentiâ , si ad novum Pontificem, petentes non se præsentent; hancque facultatem post Cardinalis Pœnitentiarîi ingressum in Conclave transire ad Signaturam. Alia quæ pertinent ad Matrimonii materiam, *vide l. 6. n. 1144.* Alia minùs scitu necessaria observare potes in citatâ Bullâ, *Pastor bonus.*

Demùm hîc nota, quòd cùm Literæ S. Pœnitentiariæ committuntur Magistro Theologiæ, vel Decretorum Doctori, possunt eas exequi Confessarii Societatis Jesu designati à Generali, vel Provinciali de ejus licentiâ, ut concessit Gregorius XIII. 3. Apr. 1582. Et idem possunt Lectores jubilati Ordinis Minorem ex concessione Innocentii XI. 27. Nov. 1679. Ac ideo idem possunt omnes Regulares in privilegiis eorum communicantes; ità refert *Elbel to. 3. Conf. 20. p. 506. num. 513.*

***Finis Tomi Secundi.***

# INDEX

## RERUM NOTABILIMUM,

*Quæ in hoc secundo Tomo continentur.*

Primus numerus denotat *Tractatum*, posterior  
Arabicus denotat numerum marginalem.

### A

**A**BBATISSA, an possit colloqui cum omnibus. XIX. 42.

*Ablutio*, trina in Baptismo. XIV. 13.

*Abortivus*, et *Abortus*. Fœtus abortivi circa Baptismum. XIV. 20. Quando dubitatur de fœtus animatione. XIX. 80.

*Absolvere*, et *Absolutio*. Verba necessitatis etc. XVI. 5. Absolutio conditionata. 6. Danda moribundis si dant signa. 35. Si alius testetur, etc. 36. Si nullum signum etc. 37. Si in actu peccati etc. 38. Certitudo dispositionis. 118. Absolutus à reservato in bonâ fide. 139. Si absolvitur antè denuntiationem etc. 176. Qui à Censuris. XIX. 11. Si per sententiam generalem, et si Episcopus foris existens. 11. An requiratur præsentia censurati. Absolutio conditionata etc. An extrâ Confessionem. 13. Requisita pro absolutione à censuris 14. (*An Censuræ extrâ Confessionem etc. vide etiam Tom. III. Tract. XX. n. 4.*) An Peregrinus etc. vide *Peregrinus*.

*Admonitio*. An liceat admonere complicem, de Pœnitentis licentiâ. XVI. 152. An admonere Pœnitentem sinè ejus licentiâ etc. 124. An intrâ Confessionem. 156. *in fine*, vide *Monitio*.

*Adulterium*, et *Adulter* circa divortium. XVIII. 93. et 94. De jure revocandi etc. 95. Affinitas circa Matrimonium. 67. De impedimento ad petendum. 68.

*Ætas* circa Matrimonium. XVIII. 66. Circa irregularitatem. XIV. 130. (*Circa Ordines App. III. n. 43. et 44.*)

*Alimenta* uxori debita. XVIII. 51.

*Altare*. Si non celebrare in Altari Privilegiato. XV. 75. In Privilegiato quando lucrifunt Indulgentiæ. 83.

*Amens*. An amentibus conferenda sit Confirmatio. XIV. 49. An Extrema-Unctio. XVII. 12. Si petant debitum conjugale. XVIII. 49. Circa irregularitatem. XIX. 112.

*Amor*

*Amor prædominans* an sit necessarius pro Confessionibus XVI. 14. et 15.

*Annus Jubilæi*. XVI. 72.

*Anulus* missus à sponso etc. XVIII. 6.

*Applicare*, et  *Applicatio*. Pro quo applicare debet Curatus. XV. 72. Pro quo Beneficiati, et Monialium Capellani etc. et an pro aliis, aut abstinere etc. et si ægrotant. Missa Conventualis. 73. Si Religiosus applicat Missam contra voluntatem Prælati. 79. Applicatio habitualis. 80. Confusa, aut conditionata; 81. et 82. In die Defunctorum etc. De Altari privilegiato. 83. (*vide alia in Append. III. num. 114.*)

*Approbatio*, et  *Approbatus*. Approbatio ad Confess. XVI. 74. et 75. Injustè revocata, *ibid* An simplex Sacerdos possit absolvere à venialibus etc. 76. An Parochus sibi adsciscere possit Parochos alterius Diocesis. 77. An ejusdem. 78. A quo Episcopo etc. 79. De Regularibus circa suos subditos. 37. Circa Laicos. 80. Quique confiteri potest approbatus. 86. An simplex coram approbato etc. 93. Casus excepti. 94. An inferior etc. 133.

*Assistentia* Parochi in Matrimonio peccatorum. XVIII. 26. ad I. Si repugnat ad IV. Si assistit in peccato ad V. Si Matrim. reconvalidatur ex dispensatione, ad VI. Assistentia Testium, et Parochi. 70. et 73.

*Actus* Fidei, Spei, etc. an in Contritione, etc. XVI. 13.

*Attentio* in Sacramentis. XIV. 1.

*Attritio* sinè amore prædominante. XVI. 12. An actus Fidei etc. 13. An amor prædominans ex se deleat etc. 14. 15. et 16. An ex pœnis temporalibus etc. 17.

*Auctoritas*. An propria auctoritate possint solvi Sponsalia. XVIII. 26. An fieri divorcium. 97.

## B

**B**APTISMUS. Quotuplex est. XIV. 7. Materia remota 8. Proxima. An possit incidi mater etc. 9. Aut in utero etc. Et in quo membro. 10. ad 12. Trina ablutio. 13. Forma. 14. Minister. 15. et 16. Exteri. 17. Dilatio. 18. Baptizari domi *ibid*. et 30. Rebaptizantes etc. 19. Baptismus sub conditione. 23. An Expositis. 24. Baptism. collatus à Laicis. 25. Ab Hæreticis. 26. Dubius 27. Dispositio. 28. Aqua consecrata. 29. In quantum ad Patrinum, *vide Patrinus*.

*Benedictio* Chrismatis. XIV. 40. Matrimonii. XVIII. 53 ad 11.

*Beneficiatus*, et  *Beneficium*. Beneficiatus pro quo applicare debet Missam. An possit abstinere. Si ægrotat. XV. 73. De beneficiis respectu excommunicatorum. XIX. 19. Respectu irregularium. 76. et 77.

*Tom. II.*

Y

*Bigamiæ* circa irregularitatem. XIX. 138. ad 141.  
*Bullæ* Bened. XIV. in Confessarium nomen complicitis exquirentem. XVI. 43. In Confessarium complicitem in peccato turpi. 95. Circa Jubilæum. 64. *Bullæ* Greg. XV. in sollicitantes. 165. *Bulla Cœnæ* in Hæreticos. XIX. 53. in Fautores. 54. De Libris prohibitis. 55. ad 62. De aliis casibus *Bullæ*. 63. De Confir. potestate Sacerdotibus delegatâ. XIV. 44. De Missâ pro populo. XV. 72. De Confessore extraordinario. XVI. 89. Examen Confes. Monialium *ibid.* De causis dispens. Matrim. XVIII. 87. De mulieribus Clausuram etc. XIX. 47.

## C

**C**EREMONIÆ. Baptismi. XIV. 29. et 30. Confirmationis. 50. et 52.

*Capellanus* potest sibi retinere partem stipendii. XV. 67. Pro quo applicare debet. An possit abstinere etc. Si ægrotat. 73. An possit mutare Ecclesiam vel Altare. Et si est Privilegiatum. Si celebrat per alios. 75. Si deficient reditus etc. 77. *Capellani* Exercituum an possint absolvere. XVI. 85. *in fine.* An assistere Matrim. militum. XVIII. 72. *in fine.*

*Cardinales* an possint sibi eligere Confessarium. XVI. 85. *Castitas.* An votum castitatis solvat sponsalia. XVIII. 25. *Episcopi et Regulares* dispensant conjugibus in voto castitatis. 54. ad VI.

*Casus.* Si pœnitens est surdus. XVI. 155. *Casus* sollicit. 181. et 182. Reservati, vid. *Reservatio.*

*Catalogus* Decr. S. C. circa Missam. XV. 88.

*Causa.* Causæ excusantes à confitendo antè Communionem. XV. 24. Si conditio dat causam sponsalibus etc. XVIII. 2. Causæ pro omittendâ dispensatione Matrim. etc. 84. Causæ divortii. 91. et 94. Si causa censuræ est falsa. XIX. 16. Causæ communicandi cum excommunicato vitando. 22. ad 26.

*Celebrare.* Qui inter celebrandum recordatur peccati aut censuræ. XV. 25. Quomodò intelligitur *Tò Quamprimum* etc. 30. Si post Consecrationem etc. 31. Qui celebrat sacrilegè. 32. Si non jejunos celebrat ad præbendum Viaticum. 51. Si celebrans remittit partem stipendii etc. 69. Qui celebrat festivanter. 84. ad 86. Inhabilitas sollicitantium ad celebrandum. XVI. 183. ( *De obligatione celebrandi, de modo, et hora, et de loco, et de rubricis, et de requisitis ad celebrandum, vide Tom. III. App. III. ex n. 113. ad 122.* )

*Censuræ.* An per verba *absolvo* etc. XVI. 5. Quæ censuræ in Jubilæo etc. 72. An in necessitate Clericus possit absolvere. 73. ( *An solæ censuræ possint absolvi extrâ Confessionem, vide Tom. III. Tract. XX. num. 4.* ) An simplex



Confessarius in mortis articulo coram Superiore etc. XIV. 96. An à censuris Papalibus. 97. Ignorantes casus Papales, et Episcopales. 129. An Peregrinus incurrat censuras reservatas. 138. Censura quandonam est *Lata*, aut *Ferrendæ*. XIX. 2. Quis eam ferre potest. 3. Ut incurratur. 4. An Episcopi, Reges, et Communitas etc. *ib.* An Episcopus extrà Diocesim etc. et an in subditum absentem. 5. Peregrini. 6. peccati etc. Mandantes etc. 7. Ignorantia aut metus etc. An ob delicta præterita. 8. Solemnitas. 9. Si causa est falsa aut dubia. 10. Circà Conceptionem B. Virginis. 31. et 32. An irregularitas sit censura. 73.

*Certitudo* dispositionis ad Communionem. XV. 34. Ad Confessionem, XVI. 118.

*Cessatio à Divinis*. XIX. 71.

*Charta*. An frangat jejunium etc. XV. 42. et 43. Qui legit chartam Confessionis etc. XVI. 151. *Schedula* Confessionis etc. 162. *Charta* sollicitationis. 166.

*Chrisma*. Materia remota. XIV. 39. Chrisma an debeat esse benedictum. 40. Materia proxima; an extensio manuum Episcopi. 41. Quà manu etc. An instrumento etc. 42. Forma. 43. Minister etc. 44. Si chrismandus sit exterius. 45. Obligatio conferendi Confirmationem. 46. Qui recepit ordines etc. 48. Amentes et infantes. 49. Cæremoniæ. 50. et 51. Patrini. 52. Effectus. 53.

*Cibus*. Reliquiæ ciborum in ore. XV. 36. Si cibus non est digestus. 44.

*Circumstantiæ* aggravantes in Confessione. XVI. 29. Impertinentes circà sigillum. 153. ad V.

*Clandestinum*, au Parocho repugnans etc. XVIII. 29. ad 4. De Matr. clandest. defectu proclamationum. 55. Defectu assistentiæ Parocho etc. 70. et 71.

*Claudus*, quandò est irregular. XIX. 119.

*Clausulæ* in Bullà contrà sollicitantes. XVI. 166. *et seq.* Sacræ Pœnitent. in Dispens. Matr. XVIII. 87.

*Clausura* Monialium. XIX. 23. ad 39. De colloctione cum Monialibus. 40. ad 45. Clausura Religiosorum. 47. vide etiam *Monialis*.

*Clericus* quoad percussione. XIX. 16. et 48. (*Quis potest ab hâc excommunicatione absolvere, vide Tom. III. Tract. XX. n. 46. ad 48.*)

*Cognatio* spiritualis etc. XIV. 33. impedimentum cognationis in Matrim. XVIII. 62. ad IV.

*Cohabitatio* conjugum. XVIII. 51. Communicatio cum excommunicatis. XIX. 15. In forensibus. 20. ad VI. In civilibus: et in quibus. 21. Quandonam est peccatum mortale 22. Causæ excusantes 23. ad 36.

*Communio* deneganda peccatoribus. XIV. 5. et XV. 15. Qui communicat cum veniali actuali XV. 7. Obligatio Parocho-

rum etc. an omnes Sacerdotes et Regulares possint eam præhere. 8. An Diaconi 9. An Sacerdotes ex seipsis etc. 11. An digitis posterioribus etc. 13. An in utràque specie; et an in Hostiâ majore etc. An pueris et amentibus. 14. Capite damnatis. 15. In Missâ defunctorum. 16. In quâ horâ et die. 17. Fragmenta. 18. Confessio præmittenda. 22. Qui post Confessionem recordatur etc. 23. Excusat necessitas. 24. Si inter celebrandum recordetur peccati etc. 25. Si deest Confessarius, et quomodò hoc intelligendum. 26. Si peccatum est reservatum 27. Si peccato annexa est excommunicatio. 29. Quamprimum quomodò intelligendum. 30. Si post Consecrationem etc. 31. Si quis sacrilegè celebrat. 32. An Laici etc. 33. Qui dubitat de peccato. 34. Qui post Communionem expuit. 45. An pollutio impediât Communionem. 56. An copula conjugal. 57. An lepra, aut menstruum, vel immodestia peccatoris. Si Sacerdos communicat extrâ Missam. 58. Communio in Missâ pro defunctis. 88. *Decr. X.* Religiosi an debeant communicare singulis mensibus XVI. 2. Vide etiam *Eucharistia*, et *Viaticum*.

*Communitas* an possit censurari. XIX. 4.

*Commutatio* pœnitentiæ. XVI. 65. Operum Jubilæi *ib.*

*Complex* an possit et debeat manifestari in Conf. XVI. 41. Si Confessarius exquirat nomen complicitis. 42. Confessio complicitis in peccato turpi. 43. An de peccatis complicitis adsit sigillum. 152. An possit admoneri de licentiâ pœnitentiæ *ib.*

*Conceptio* B. Virginis, censuræ etc. XIX. 31. et 32.

*Conditio*. Sacramentum sub conditione. XIV. 3. Baptismus sub conditione. 23. Applicatio conditionata. XV. 82. Absolutio conditionata. XVI. 6. Moribundis si dederunt signa. 36. Si nulla. 37. Si in actu peccati. 38. Pœnitentia conditionata. 52. Legatum sub conditione si nubit, aut si non nubit. XVIII. 12. Consensus conditionatus in Matrimonio. 33. et 34. Conditio servorum circa Matrimonium. 62. Absolutio conditionata à censuris. XIX. 13.

*Confessio* præmittenda Commun. XV. 22. ad 34. vid.

*Communio*. Confessio valida et informis. XVI. 18. Debet esse vocalis. 27. Secreta, *ib.* Vera; an qui mentitur in Conf. 28. Integra. 29. Peccata dubia. 30. ad 32. Dubiè confessa. 33. Si postea fiant certa etc. 34. Excusat à Confessione impotentia physica. An per interpretem. 35. Moribundi. 36. ad 38. Impotentia moralis. 39. An manifestandus sit complex. 40. An nomen complicitis. 41. Reconvalidatio Confessionis. 43. ad 46. Si error non est certus. 47. Necessitas Confessionis in Jubilæo. 64. ad I. An Sacerdos simplex debet habilitari. 126. et 127. Qui legit chirographum Confes. 151. *Schedula* Confessionis. 162. Admonitio intrâ Conf. 156. *in fine*. An uti possit Confessionis notitiâ ad gubernationem etc. 159. Ut sibi caveat 161.

*Confessor.* Si exquirat nomen complicitis. XVI. 41. Si absolvit complicem in peccato turpi. 95. Confes. Monialium. 89. Confes. simplex an possit absolvere à reservatis coram superiore. 96. An à Papalibus. 97. Munia Confessariorum. 99. Tenetur examinare Pœnitentem. 102. Et quomodo. 103. Debet eum instruere et disponere. 105. Admonere. 106. et 107. Si admonitio non est profutura 108. ad 112. Debet absolvere. 117. Certitudo dispos. 118. Si Pœnitens habet pro se opinionem prob. 119. Si tacet aut negat peccatum. 120. De reparandis erroribus. 121. ad 124. Obligatio audiendi Confessionem. 125. Admonere intra Confessionem. 156. Uti notiâ ad gubernationem. 159. An cavenda damna. 161. An possit præbere schedulam Confes. 162. Si pœnitens minatur. 163. Opin. prob. circa sigillum cum gravamine etc. 164. An Episcopi possint sibi eligere Confes. XVI. 85. An qui consultus de Confessione ex pœnit. licent. etc. 149. Si redit Pœnit. malæ conscientiæ. 160. An possit absolvere à censuris extra Confes. XIX. 13.

*Confidentia.* Qui peccat in confidentiam Jubilæi. XVI. 69. Qui in confidentiam licentiæ. 144.

*Conjux* si se retrahat à semin. XVIII. 40. An tempore prægnationis etc. Si impeditur petere ob votum, vel incestum. 41. An conjugi liceant tactus et delectationes. 42. Quando teneatur petere. 43. Si conjux cohibeat femin. 50. An separandus ab adultero. 93. et 94. An possit eum revocare. 95. An fieri Religiosus facto divortio. 97. Consummatio Matrimonii in feriis; et an sinè benedict. etc. XVIII. 53. ad II. Circâ irregularitatem. XIX. 140. An fieri Religiosus. 142.

*Consecratio* in alterutrâ specie. XV. 3. et 4. Qui post Consecrationem recordetur peccati. 31.

*Consensus* præsumptus Episcopi pro Conf. XVI. 83. Sponsalium solutio etc. Quid de impuberibus. XVIII. 14. Divortium ex consensu 91. ad III. Consensus in Matrimonio per signa. 31. Per procuratorem, aut epistolam. 32. Consensus condit. 33. et 34. Qui fictè contraxit Matr. 79. et 80. Quomodo exigendus sit consensus. 82.

*Consilium* dare. Quem consulit Confessarius de pœnit. licentiâ. XVI. 149. Quem consulit pœnit. 150. Circâ censurarum incursionem. XIX. 7.

*Contritio* in quo consistat. XVI. 8. Motivum. 9. Quo tempore necessaria est. 10. An in morte. 11. An sufficiat contritio generalis peccatorum. 12.

*Copula* conjugalitatis an impediât à Communionem. XV. 57.

*Crimen.* Vide *Delictum*.

*Curialistæ* sunt irregulares. XIX. 145.

## D

**D**AMNATI capitis an debeant communicare. XV. 15.

*Damnū* excusat ab integritate Confessionis. XVI. 40. In Jubilæo, si non satisfecit etc. 70. Monitio damni communis. 116. An liceat sibi cavere ex notitiâ Confessionis. 161.

*Decreta* S. C. Rit. XV. 87. Catalogus Decret. 88. Decret. S. C. si de ipsis non constat authenticè, non est danda fides. XIX. 134.

*Defectus* naturales quoad sigillum. XVI. 134. Quomodò tollitur irregularitas ex defectu. XIX. 87. De irregularitate ex defectu 112.

*Deformis* quandò est irregularitas. XIX. 122. Degradatio. 67.

*Defunctorum* die Missa an possit applicari etc. XV. 83. Communio in Missâ Defunctorum. 88. Decr. X.

*Degradatio*. XIX. 67.

*Delegatus*. De Jurisdictione delegatâ. XVI. 81. An terminet morte; et si habeatur à Principe, aut ad Universitatem causarum 82. (Qui potest delegare vide *Tom. III. Tract. XX. n. 34.*)

*Delectatio* morosa conjugum. XVIII. 42.

*Delictum*, ob quod solvuntur sponsalia. XVIII. 18. An per fornicationem, *ib.* Impedimentum criminis pro Matrim. 63. Crimen quandò est causa Divortii. 91. ad 1. An ob delicta præterita possit quis censurari. XIX. 8. Ad incurrendam irregularitatem ex delicto. 81. Si delictum est occultum. 82. Quomodò tollitur hæc irregularitas ex delicto. 85. De irregularitate ex delicto. 92.

*Denunciatio* impedimentorum Matrimonii. XVIII. 56. vide *Sollicitatio*.

*Dispositio*. XIX. 67.

*Diaconus* an possit baptizare. XIV. 15. An communicare. XV. 9.

*Digitus*. An posterioribus digitis possit præberi Communio. XV. 13.

*Dilatio* Baptismi. XIV. 18. Pœnit. XVI. 68.

*Diœcesis*. Si adsciscatur Parochus alterius Diœcesis. XVI. 77. Si ejusdem. 78. Qui Episcopus approbare debeat. 79. Regulares approbati in unâ Diœcesi. 80. An Episcop. extrâ Diœcesim possint ferre censuras? Et si subditus sit extrâ. XIX. 5.

*Discessio*. An solvantur sponsalia ob discessionem etc. XVIII. 20.

*Disparitas*. An solvat sponsalia. XVIII. 16. An accessio hæreditatis, vel melior occasio etc. 19. Disparitas cultûs. 64. ad VI.

*Dispensatio.* Sponsalia sub conditione, si Papa dispenset. XVIII. 6. Superveniente impedimento sponsalibus etc. 15. Quando reconvaleatur Matrim. 29. ad 6. An ablato impedimento, nullitas etc. 81. Quando exquirendus sit consensus. 82. In quo impedimento dispenset Papa. 83. An in Matrimonio ratio 90. (in quo *Episcopi vide Tom. III. Tract. XX. n. 54. etc.*) Causæ justæ dispens. An explicanda omnia impedimenta. 84. An incestus, etc. 85. An gradus. 86. Clausulæ S. Pœnit. 87. Formulæ supplicationum. 88. Ad dispens. executionem. 89. Dispensatio super irregularitat. XIX. 86. (*vide etiam Tom. III. Tract. XX. n. 51. et 104.*) Dispensatio in radice Matrimonii. XVIII. 81.

*Disponere*, et *Dispositio* ad Baptismum. XIV. 28. Ad Communionem si dubitatur de peccato. XV. 34. Certitudo moralis pro Confessione. XIV. 118. Confessarius tenetur disponere Pœnitentem. 105. Si Pœnit. habeat probabilem pro se. 119. Si negat aut tacet etc. 120. Dispositio ad Extremam Unionem. XVII. 9.

*Dives.* An possit recipere stipendium pro Missâ. XV. 59.

*Divortium quoad vinculum.* XVIII. 90. Quoad torum. I. ob delictum. II. ob morbum. III. ex consensu. 91. IV. ob timorem. 92. V. ob adulterium. 93. et 95. An propriâ auctoritate etc. 96. An possit fieri Religiosus etc. 97.

*Dolor generalis peccatorum.* XVI. 12. An debeat præcedere Confessionem. 19. Quantum temporis duret. 20. Qui statim se reconciliat etc. 22. Peccatorum venialium, 23. vide *Contritio et Attritio*.

*Dubium*, et *Dubitare.* Sacramentum dubium in necessitate. XIV. 3. Baptismus dubius. 27. Qui dubitat de peccato circa Comm. XV. 34. In dubio jejunii etc. et si sunt duo horologia etc. 35. Peccatum dubium circa Confes. XVI. 30. ad 32. Dubie confessum. 35. Si postea fiat certum. 34. In dubio nullitatis Confessionum. 47. Qui absolvit cum jurisdictione dubiâ. 84. In dubio an correptio sit profutura. 116. Peccatum dubiè reservatum. 142. Sollicitatio dubia. 180. An possit contrahi Matrimonium cum impedimento dubio. XVIII. 35. Et an tunc liceat petere vel reddere. 36. Quid si Matrimonium sit irritum cum dubio. 37. Irregularis dubius. XIX. 79. Homicida dubius. 80.

## E

**E**BRIVUS si petit debitum conjugale. XVIII. 49.

*Ecclesia.* De Baptismo in Ecclesiâ. XIV. 18. et 30. De confirmatione. 50. ad 3.

**Effectus Confirmationis.** XIV. 53. **Eucharistiæ.** XV. 5. **Extremæ Unctionis.** XVII. 1. **Excommunicationis majoris.** XIX. 17. et seq. **Irregularitatis.** 75. ad 77.

**Eleemosyna** circà Jubilæum. XVI. 65. Circà Missam, vide *Stipendium*.

**Eligere Confessarium** quis potest. XVI. 85.

**Episcopus** debet benedicere **Chrisma.** XIV. 40. An extensio manuum in Confirmatione etc. 41. An manu dextrâ, aut instrumento etc. 42. Minister **Confir.** et an **Exteri** etc. 45. **Obligatio** **Confirmandi.** 46. **Episcopus** potest prohibere stipendium minus, non autem majus. XV. 62. An possit reducere Missas. 76. Aut eas diminuere. 77. **Approbatio** ad **Confes.** XVI. 74. Si injustè eam revocet. An successor possit revocare ad examen. 73. Quisnam **Episcopus** potest approbare. 79. **Regulares** circà **Laicos** etc. 80. An **Episcopus** possit sibi eligere **Confessarium.** 85. An **Confes.** simplex coram **Episcopo** etc. 96. An possit absolvere à **Papalibus.** 97. An moribundus per literas etc. 98. Si **Episcopus** dispensat cum **Conjugibus** circà votum castitatis. XVIII. 54. et ad VI. Si dispensat in proclamationibus. 58. ( *In quibus Impedimentis Matrimonii dispensat, vide Tom. III. Tract. XX. nu. 54.* ) An **Episcopus** possit censurari. XIX. 4. An absolvere à **Censuris**, extrà **Diocesim** existens. 12.

**Error.** Vini error in **Missâ.** XV. 54. **Confessiones** repetere, cùm constat de errore. XVI. 47. **Error communis** circà **Confessionem.** 90. Quomodò **Confessarius** debet reparare errores. 121. et 122. **Error** circà sponsalia. XVIII. 1. Circà **Matrimonium.** 61.

**Eucharistia.** **Essentia.** **Ratio specifica,** et **unitas.** XV. 1. An sit necessaria necessitate medii. 2. **Consecratio** in alterâ specie, etc. 3. **Casus excepti.** 4. **Effectus.** 5. An dùm durant species etc. 6. **Conservatio,** et **obligatio** eam dispensandi. 8. **Expositio.** 88. **Decr.** XII. et XXIII. vide *Communio,* et *Viaticum.* Vide cetera in *Tom. III. Append. III. n. 98.* ad 101.

**Bunuchus** est irregularis. XIX. 125.

**Examen** non est necessarium pro approbatione **Confess.** XVI. 74. Successor potest revocare ad examen 75. ( *An possit revocare Regulares, vide Tom. III. Tract. XX. n. 103.* ) **Confes.** tenetur examinare **Pœnitentem.** XVI. 102. Et quis ei modus tenendus est in illo examine 103. ( *Examen Rudium, et aliorum, vide Tom. III. Tract. ult. ex n. 18.* )

**Excommunicatio.** **Affectus** **excom.** reservatâ si communicare debet. XV. 29. In non denunciante sollicitantem. XVI. 177. **Effectus** **excom.** major. XIX. 17. Minoris. 27. **Privat Benef.** **Dign.** et **Pens.** 19. **Excomm.** non reservatæ, ex num. 28. **Excom.** resery. 30. *Bullæ Cœnæ* ex 53. In **Hæreticos** et eorum **Fautores.** 53. et 54. Circà **libros Hæreticorum.** 55. ad

59. Circà libros prohibitos in Indice. 61. et 92. An casus *Bullæ Cœne* 63.

*Excommunicatus* vitandus an possit absolvere moribundos. XVI. 92. De toleratis, et vitandis. XIX. 15.

*Expositio* Eucharistiæ. XV. 88. Decr. XXII. An statuæ et Reliquiæ, *ib.* Decr. XXIII.

*Expositi* circà Baptismum. XIV. 24. An sint irregulares. XIX. 129.

*Expuere* post Communionem. XV. 45.

*Extensio* manuum circà Confirmationem. XIV. 41.

*Extrema-UNCTIO.* Essentia et effectus. XVII. 1. Materia remota. 2. Proxima. 3. An Unctio omnium sensuum, etc. 4. Forma. 5. Minister. 6. Subjectum. Quandò debet et potest dari Extrema Unct. 7. Quandò potest repeti. 8. Dispositio. 9. Pueri. 10. Amentes, Impœnitentes, etc. 11. Obligati eam suscipiendi. 12. Administratio. 13.

## F

**F**ACULTAS injustè negata circà reservata. Si denegetur Regularibus. XVI. 134. Facultates S. Pœnitent. XIX. 148. (*Facultas delegandi, vide Tom. III. Tract. XX. n. 34.*)

*Fama* impedimenti ad Matr. XVIII. 57.

*Fatuus.* Vide *Amens.*

*Febriticans* quandò est irregularis. XIX. 121.

*Fides.* Qui bonà fide est absolutus à reservatis. XVI. 139.

*Filii* Infidelium an possint baptizari. XIV. 20. et 21. An vendi infidelibus. 22. Si Pater promittit sponsalia pro Filio. XVIII. 5. Si Filius contrahit sponsalia sinè Patris consensu. 10.

*Fines* essentielles et justì ad Matrimon. etc. XVIII. 30.

*Fœtus* abortivi an baptizandi sint. XIV. 20.

*Forma* Baptismi. XIV. 14. Confir. 43. Extremæ Unct. XVII. 5. Matrim. XVIII. 28. An Materiæ et formæ in specie sint à Christo Domino etc. XVII. 15. (*Forma Euch. vide Tom. III. Append. III. n. 100.*).

*Formulæ* supplicationum ad S. Pœnit. XVIII. 88. Formula executionis Dispensationis. 89. Formula Contritionis. XVI. 117.

*Fornicatio.* An per fornicationem solvantur sponsalia? Et an fornicatio sponsorum sit duplex peccatum. XVIII. 18.

*Fragmenta* Hostiæ, quid si residui sint. XV. 28.

## G

**G**RADUS circà Matrimonium quomodò numerandi. XVIII. 62. *in fin.* An in supplicat. debeant omnes explicari. 86.

*Gravamen.* Qui in gravamen Pœnit. utitur notitiâ Confess. XVI. 159. An liceat uti opinione probab. In gravamen. 164.

*Gubernatio.* Qui ad bonam gubernationem utitur notitiâ Confessionis. XVI. 159.

## H

**H**ABILIS fieri ad Confessiones. XVI. 126. et 127

*Habitualis* intentio in Sacram. XIV. 1. 2. In applicatione Missæ. XV. 80.

*Hæreditas* superveniens an solvat sponsalia. XVIII. 19.

*Hæreticus.* Baptizati ab Hæretico. XIV. 26. Excomm. in Hæreticos, et Fautores. XIX. 53. De eorum libris etc. 55. ad 62.

*Homicidium*, quoad irregularitatem. Dubius de homicidio. XIX. 80. Ob quod homicidium incurritur etc. 83.

*Hora.* In quâ diei horâ potest dari Communio. XV. 17.

*Hostia.* An possit dari Communio in Hostiâ magnâ. XV. 14. Quid si supersint fragmenta. 18.

## I

**I**DIOMA. An ignarus idiomatis teneatur ad integritatem Confes. et an teneatur uti interprete. XVI. 35.

*Jeiunium* naturale. Qui dubitat an possit commun. An duo horologia, etc. Quod ab extrâ sumitur. XV. 35. Reliquiæ ciborum. 36. Aquæ, aut sacchari. 37. Tabacus nare sumptus. 38. Fumo. 39. Ore. 40. Si nare casu etc. 41. An capilli, charta. lapillus etc. 42. et 43. Scandalum. 53. ad perficiendum Sacrificium, si vinum est dubium. 54. An ad vitandam mortem. 55.

*Ignorantia.* An ignorantia excuset à censuris. XIX. 8. Ignorans reservationem, aut censuram. XVI. 129. An Ignoranti detegenda sit nullitas Matr. XVIII. 81. Quomodò exquirendus est consensus ab Ignorante. 82. Ignorantia legis, et pœnæ circa irregularitatem. XIX. 83. et 84.

*Illegitimus* est irregularis. XIX. 126. 128. Quomodò legiti-  
mentur. An sufficiat ut tempore partûs possent copulari in Matrim. etc. 126.

*Impedimentum.* An impedimentum solvat sponsalia. XVIII. 15. An debeat tunc impetrari dispensat. *ib.* An liceat contrahere cum dubio imped. 35. An petere, et reddere. 56. Si nuptiæ sint initæ cum dubio. 37. De imped. petendi ob incestum. 47. De impedimentis impediētib. 52. et seq. An consummare Matrim. in Feriis, et sinē bened. 53. ad II. De



voto castitatis. 54. De denunciandis impedimentis. 56. An An sufficiat fama? Et an sponsi interrogandi etc. Si Parochus cognovit. 57. An possit dispensare Episcopus. 58. An Vicarius, aut Parochus. 59. De impedimentis dirimentibus. 60. Error. 61. Conditio, votum et cognatio. 62. Delictum. 63. Disparitas cultûs, Vis, et Metus. 64. Ordo, Ligamen, et Publica Honestas. 65. Ætas. 66. Affinitas. 67. Impedim. ad petendum. 68. Quis potest dispensare. 69. Cland. assistentia testium. Et assistent. Parochi. 70. et 71. De exteris. 72. Impotentia. 74. et 75. Raptus. 76. Quandonam impedimentum dicitur occultum. 77. Si parochus et Testes erant conscii de impedimento. 78. An in supplicatione debeant exprimi omnia impedimenta. 84. et an omnes gradus. 86.

*Impedire.* Qui non impedit Clerici percussionem. XIX. 49.

*Impositio manûs in Confirmatione.* XIV. 41. Circa ordinem. XVII. 16.

*Impotentia physica ad Confess.* XVI. 35. Moribundi. 36. ad 38. Impotentia moralis. 39. Impotentia circa Matrim. XVIII. 74.

*Impuberes.* Sponsalia inter Impuberes. XVIII. 7. An solvantur ex consensu. 14.

*Incestus.* Si conjux ob incestum impediatur a petendo, si petat etc. XVIII. 41. De hoc impedimento petendi 49. An explicandus incestus pro suppl. pro dispensat. 85.

*Indulgentia* quid sit. XVI. 62. An plenaria possit particulariter comparari. 63.

*Infamia* circa Irregularitatem. XIX. 140.

*Infantes* expositi circa Baptismum. XIV. 24. An Confirmatio possit dari infantibus. 49. Expositi an sint irreg. XIX. 129.

*Infectio.* An periculum infect. excuset ab integritate Conf. XVI. 40. ad 45.

*Inferior* quandò potest absolvere à reservatis. XVI. 133.

*Infideles.* An eorum filii possint baptizari. XIV. 20. et 21. An vendi suis parentibus. 22.

*Infirmus, et Infirmitas.* Si Capellanus est infirmus. XV. 73. An dùm infirmo defertur Viaticum si dignoscatur Confessiones fuisse nullas. XVI. 39. Infirmitas quandò est causa Divortii. XVIII. 91. ad 11.

*Integritas* materialis Confessionis. XIV. 29. Circumstantiæ aggravantes, *ibid.* De integr. formali etc. Ab integritate materiali excusat impotentia physica: Muti, surdi, ignorantes idioma, infirmi. 35. Moribundi. 36. et 37. Impot. moralis, scrupulosi, Viaticum etc. Necessitas etc. Infectio. etc. Bellum etc. Damnum. etc. Si expectare nequit 39. (*Confessarius tenetur examinare Rudes, vide Tom. III. Tract. ult. n. 18. ad 31.*)

*Instruere.* Confessarius tenetur instruere Pœnitentem. XVI. 105.

*Intentio* ad adimplendam pœnitentiam. XVI. 56.

*Interdictum*. XIX. 68. ad 70.

*Interpres*. Confessio per interpretem. XVI. 35.

*Irregularitas*, an sit censura. XIX. 72. et 73. Effectus præsertim circà Benef. 75. et 77. Debet esse expressa. 78. Irregularis dubius. 79. Homicida dubius. 80. Ad incurrendam irregularitatem. 81. Si delictum est occultum. 82. Scientia legis. 83. Scientia irregul. 84. Quomoddò tollatur. 85. Dispen-satio. 86. Quomoddò tollatur irregularitas ex defectu. 87. De irregularitatibus ex delicto. 88. ad III. De irregularitate ex defectu. 112. ad 146.

*Jubilæum*. Dubia declarata à Bened. XIV. *Tract. XVI. 64.* An in unâ hebdomadâ etc. De oratione, Eleemosynâ et commun. 65. An per Confess. nullam auferantur reservat. etc. 66. Si absolutus non adimplet etc. 67. Qui obliviscitur reservati etc. 68. Qui in Jubilæi confidentiam. 69. Satisfactio Partis. 70. In quibus casibus et censuris etc. 71. Jubilæum anni sancti. 72.

*Judex*. An requiratur ejus sententia ad solvenda sponsalia. XVIII. 26. Et qualis probatio, etc. 27. An ad divortium etc. 97.

*Judicium* de peccatis faciendum à Confessario. XVI. 104.

*Jurisdictio*. Quinam habeat ordinariam, et quinam delegatam. XVI. 81. De delegatâ. 82. Consensus præsumptus Episcopi. 83. Jurisd. dubia. 84. Eligere sibi Confessarium etc. 85. Peregrinus. 87. Cui Religiosi confiteri etc. 88. Cui Moniales. 89. Titulus coloratus, et error communis. 90. Jurisdic-tio probabilis. 91. An excommunicati. 92. Sacerdotes coram approbatis. 93. Casus excepti. 94. Complex in peccato turpi. 95. Confes. simplex coram Superiore. 96. An à Papalibus. 97. Moribundus an per literas etc. 98. Reservatio est restric-tio Jurisdictionis. 128. et 129. Excommunicatio privat Juris-dictione. XIX. 20. ad. VII.

## L

**L**AICI. Baptizati à Laicis. XIV. 25. An Laici qui commu-nicant sinè Confessione, teneantur ad *Quamprimum* XV. 33.

*Lapis*. An frangat jejunium naturale. XV. 42. et 43.

*Legatum*, si nubet, aut si non nubat etc. XVIII. 12. Legatum relictum virginibus, aut Pœnitentibus. XIX. 148. ad. XII.

*Lenitas* quoad irregul. XIX. 144. et 146.

*Lex*. Irregularitas sit expressa in lege. XIX. 78. Scientia legis circà irregular. 83. Circà impedim. ad petendum. XVIII. 68.

*Liber.* Qui legit aut retinet libros Hæreticorum. XIX. 55. ad 59. Qui audit legere 58. Manuscripta. 59. Libri prohibiti in Indice. 60. et 61. Qui retinet. 62.

*Licentia.* An sinè licentiâ possit admonere pœnit. XVI. 124. Qui peccat in confidentiam licentiæ. 144. An licentia extendatur ad peccata posteriora. 145. An si Confessarius alium consulat de Pœnit. licentiâ etc. 149. An possit admoneri Complex de licentiâ Pœnit. 152. Licentia ingrediendi Monasteria Monial. XIX. 34. ad 39. Ad colloquendum cum Monialibus. 40. ad 45.

*Lingua.* Vide *Idioma*.

*Literæ.* An Moribundus teneatur per literas facultatem impetrare etc. XVI. 98. An Pœnit. teneatur denunciare per literas. XVIII. 32.

*Lunatici* an sint irregulares. XIX. 123.

## M

**M**ANDANS circâ Censuras. XIX. 7. Circâ Clerici percuss. 49. Circâ irregularitatem. 97. et 98.

*Manus.* Extensio manuum in Confirmat. XIV. 41. An manu dextrâ aut instrumento ungi etc. 42. Impositio manuum circâ Ordinem. XVII. 16.

*Manuscripta* Hæreticorum. XIX. 59.

*Martyrium*, an liceat illi se exponere. XIV. 7. *in fin.*

*Mater* an debeat incidi ad baptizandam prolem. XIV. 9.

*Materia* Baptismi. XIV. 8. et 9. Materia remota Confirmat. 39. et 40. Proxima et an extensio manuum Episcopi etc. 41. Materia Euch. (vide *Tom. III. Append. III. n. 89, ad 101.*) Materia proxima, et remota Pœnit. XVI. 1. An peccata confessata sint materia sufficiens etc. 3. Materia remota Extrem. Unct. XVII. 2. An unctio omnium sensuum etc. 4. An materiæ, et formæ in specie à Jesu Ch. etc. 15. Materia Matrimonii. XVIII. 28.

*Matrimonium.* Si contrahit cum peccatore. XIV. 6. In Matrimonio nullo an Confessar. admonere debeat. XVI. 113. Et si Sponsi jam parati sunt etc. 114. In dubio an Matrim. aut libertas etc. XVIII. 6. Qui contrahit postquam sponsalia etc. 13. Materia, Forma, et Minister Matr. 28. Illationes. 29. Si Parochus assistit peccatoribus; et an sponsi in peccato etc. *ibid.* An liceat simulare etc. *ibid.* ad 2. An per procuratorem, *ibid.* ad 3. Si clandestinè, *ibid.* ad 4. Si Parochus assistit in peccato, et si omittit, *Ego vos Conjungo* etc. *ibid.* ad 5. An in convalidatione etc. *ibid.* ad 6. Fines Matrimonii. XVIII. 30. Consensus per signa. 31. Matrim. per procuratorem, aut per literas, 32. Consensus conditionatus. 33. Adim-

pletà conditione. 34. An liceat contrahere in dubio etc. 35. De usu, vide *Usus*.

*Membrum* in quo debet dari Baptismus. XIV. 11. et 12.

*Mendicantes*. Vide *Regulares*.

*Menstruum* an impediat à Communione. XV. 58. An ab usu Matrimonii. XVIII. 38.

*Mentiri* in Confessione. XVI. 28.

*Metus*. Sponsalia per metum. XVIII. 3. Censura per metum. XIX. 3. An metus excuset à censurà. 8.

*Minæ*. Si Pœnitens minatur mortem etc. XVI. r63.

*Minister* Baptismi. XIV. 15. et 16. Confirmationis. 44. Extremæ Unct. XVII. 6. Matrim. XVIII. 28.

*Missa*. Communio in Missà Defunct. an liceat. XV. 16. Stipendium Missæ. 59. ad 73. Vide *Stipendium*. Præscriptio circa Missas. 74. Reductio. 76. Si redditus deficiunt etc. 77. Missæ Gregorianæ, *ib. in fin.* Missa festinanter etc. 84. ad 86. Catalogus Decretorum. 88. Vide  *Applicatio ( Reliqua vide Tom. III. Append. III. Sectio III. )*

*Monasterium*. An lædatur sigillum si nominaretur Monasterium, etc. XVI. 157. Qui cogit ad ingrediendum Mulieres, etc. XIX. 29.

*Monialis*. Monialibus etiam vetitum est esse commatres. XIV. 37. Confessarius Monial. XVI. 89. Confess. ut Monasterium ingrediatur, etc. XIX. 37. Medicus. 38. et 39. De collocatione cum Monial. 40. ad 45. Si Monialis frangit clausuram. 46.

*Monitio*. facienda pœnitentibus. XVI. 106. et 107. Si non est profutura. 108. ad 112. Si Matrim. est nullum. 113. Sponsi in Ecclesià etc. 114. Circà restitutionem, et quid si speratur Monitio postea profutura. 115. Si Pœnitens interogat. Et si adest damnum commune. 116. In dubio an profutura *ibid.* Monitio facienda pœnitenti sollicit. 178.

*Monstruosi* sint irregulares. XIX. 124.

*Moribundus* si dat signa. XVI. 36. Si alii testantur. *ibid.* Si nullum dat signum. 37. Si in actu peccati etc. 38. An possit absolvi à vitando. 92. An teneatur suscipere Extr. Unct. XVII. 12. An teneatur per literas in censuris Papalibus etc. XVI. 98.

*Mors*. Vide *Necessitas*, et *Periculum*.

*Mortui*. Vide *Defuncti*.

*Mortale*. Qui peractà Confess. recordatur mortalis, an possit communicare. XV. 23. Qui dubitat. 34. Si adest scandalum etc. 24.

*Mutare*, et *Mutatio*. An sponsalia ob mutationem notabilem etc. an ob hæreditatem, aut meliorem occasionem. XVIII. 19. vide *Permutare*.

*Mutilatio* circà irregular. XIX. 109. et 110.

*Mutus* circà Confessionem. XVI. 35. Quando est irreguli. XIX. 118.

**Mutuus.** Promissio mutua in sponsalibus. XVIII. 4. Externata; et si Pater promittit nomine filii. 5. Mutuo consensu solvantur sponsalia; quid de Impuberibus? 14.

## N

**NARES**; Tabacus per nares. XV. 38. Aqua per nares etc. 41.

**Natalia** circa irregularitatem. XIX. 126. ad 128. Quis dispensare potest et circa Regulares. 87. (*Vide etiam T. III. Tract. XX. n. 104. et 105.*)

**Necessitas.** Sacramentum dubium in necessitate. XIV. 3. Baptismus dubius. 27. An Euch. sit de necessitate medii. XV. 2. Necessitas quando excuset à Confess. antè Commun. 24. Si tunc deest copia Conf. 26. Ab integritate Confess. excusat necessitas praelii, naufragii etc. XVI. 39.

**Notitia.** Qui in gravamen Pœnit. etc. XVI. 156. An propter notitiam Confessionis possit Confess. sibi cavere à damno. 161.

**Nullitas.** Revalidatio Confessionum nullarum. XVI. 44. ad 46. An in Matrim. nullo debeat Confess. admonere Coniuges. 113. An sponsos qui se parant ad contrahendum. 114. Confessio nulla de reservato coram superiore etc. 141. ad 143. An sublato impedimento debeat patefieri nullitas etc. XVIII. 81. Quomodo exigendus est consensus. 82.

## O

**OBJECTUM** peccati cadit sub sigillo. XVI. ad III. 153.

**Obligare**, et **Obligatio.** Patrinus Baptism. ad quid etc. XIV. 31. Obligatio conferendi Confirmat. 46. eam suscipiendi. 47. Qui suscipit Ordines etc. 48. Obligatio injungendi pœnitentiam. XVI. 48. Et eam injungendi saltem sub levi. 49. Eam acceptandi. 55. Exequendi. 56. Qui eam differt. 57. Qui illius obliviscitur. 59. Obligationes Confessarii. 61. vide ex n. 99. Obligatio excipiendi Confessiones, et cum periculo etc. 145. Obligatio suscipiendi Extr. Unct. XVII. 12. Sponsalia sine animo etc. XVIII. 1. Obligatio adimplendi sponsalia. 8. Qui promittit duabus mulieribus. 9. Si filius sine consensu patris etc. 10. De pœnâ in sponsalibus. 11.

**Occasio.** Sollicitatio occasione Confessionis. XVI. 167. et 168. Occasio proxima (*Vide Tom. III. Tract. Ult. ex n. 1. ad 7.*).

**Occultum.** Quando impedimentum dicendum est occultum. XVIII. 77. Si est notum Parocho, et Testibus. 78. Adest

obligatio detegendi nullitatem etc. 80. et 81. Delictum occultum circa irregularitatem. XIX. 82.

*Opinio.* Probabili opinione an liceat uti circa sigillum etc. XVI. 164. vide *Probabile*.

*Oratio* circa Jubilæum. XVI. 65.

*Ordinarius.* Quisnam habeat jurisdictionem ordinariam, et an possit eam delegare. XVI. 81. (*vide etiam* Tom. III. *Tract. XX. n. 34.*)

## P

**P**ACTA. Pro stipendio Missæ. XV. 64. De non appellando à sententiâ latâ pro Matrimonii nullitate. XVIII. 11. *in fin.*

*Papa*, et *Papal.* An Papa possit dispensare cum Ordinatis ad Matrim. etc. XVIII. 65. In quibus impedimentis dispensare possit. 83. An dispensare possit in Matrim. rato. 90. circa fin. An Confes. simplex coram superiore possit absolvere à Papalibus. XVI. 97. Differentia inter Papales, et Episcopales. Et ibi de accusatione falsâ sollicit. et de donis à Religiosis. 129.

*Parentes infideles* si repugnant in Baptismo filiorum. XIV. 21. An liceat vendere illis filios. 22. Si Parentes baptizant. 34. Si filius Patre dissentiente init sponsalia. XVIII. 17. Vide etiam *Pater*.

*Parochus.* Circâ Patrinos. XIV. 38. Circâ conservationem, et dispensationem. Euch. XV. 8. Pro quo celebrare debeat. 72. An possit sibi adsciscere Parochos alterius Diœcesis. XVI. 77. An ipsiusmet. 78. Si assistit Matr. Peccatorum XVIII. 29. ad 1. Si repugnat etc. ad 4. Si existit in peccat., et si omittit, *Ego conjungo vos etc.* ad 5. Si Matrimonium convalidatur etc. ad 6. Si Parochus est conscius impedim. XVIII. 57. An possit dispensare in Denunc. aut declarare etc. 59. Assistentia in Matr. 70. et 71. Si cognoverat impedim. etc. 68.

*Pars.* Qui sibi retinet partem stipendii etc. XV. 65. ad 71.

*Pater.* Si pater promittit sponsalia pro filio XVIII. 5.

*Patria.* Vide *Peregrinus*.

*Peccare*, et *Peccatum.* An peccatum confessum sit materia suffic. etc. XVI. 3. An distinguenda sint confessa etc. 4. Dolor generalis etc. 12. Dolor de venialibus. 22. Peccatum dub. 30. ad 32. Dubiè confessum. 35. Si postea sit certum. 34. Complex in peccato turpi. 95. Qui adimplet pœnit. in peccato. 60. Qui peccat in confid. Jubilæi. 69. Judicium de peccatis. 104. Si pœnit. negat aut tacet peccatum. 120. An possint reservari venialia, aut interna, aut non consummata. 132. An cadant sub sigillo peccata complicitis, et an possit admoneri compl. cum licentiâ pœnitent. 152.

Circumstantiæ circa sigillum. 153. ad V. Qui manifestaret peccata alicujus oppidi etc. 158. Si conjux petit cum peccato mortali. XVIII. 46. Si velit coire extrâ etc. 47. Si petat cum veniali. 48. Ad incurrendam censuram. XIX. 7. vide *Delictum*.

*Peccator*. Sacramentum si petat. XIV, 4. et XV. 15. Communio. XIV. 5. Sponsi in peccato existentes. 6.

*Pensio* quoad excommunicatos. XIX. 10.

*Percussor* Clerici quando est vitandus. XIX. 16. Quando incurrit excom. 48. ad 52. (*de Absol. hujus excomm. vide Tom. III. Tract. XX. n. 45. ad 48.*)

*Peregrinus* cui confiteri potest. XVI. 87. Si incurrit censuram. XIX. 6. Religiosi peregrini. XVI. 88.

Quando casus est reservatus extrâ ; et quando dumtaxat in patriâ. 135. Quomodo intelligitur *Tò in fraudem*. 136. An ibi Confess. habeat facultatem etc. 137. Qui peccavit extrâ Patriam etc. Si extrâ censura est reservata 138. Peregr. si loquitur cum Monialibus. XIX. 44.

*Periculum*. An liceat celebrare non jejuno ad vitandam injuriam Sacramenti. XV. 52. ad vitandam mortem. 55. An adsit obligatio excipiendi Confes. cum periculo etc. XVI. 125. An liceat usus Matr. cum periculo sanitatis. XVIII. 38. An sit obligatio reddendi etc. 49.

*Permutare*. Qui permutat Missas , an possit retinere stipendium. XV. 71. Qui permutat Ecclesiam , aut Altare etc. et si est Privilegium. 75. Quinam potest mutare Pœnitentiam. XVI. 61.

*Pœna*. Pœnæ temporales circa Attritionem. XVI. 16. Pœna apposita in sponsalibus. XVIII. 11. Quando nam Irreg. habet rationem pœnæ. XIX. 84.

*Pœnitens*. Præsentia necessaria Pœnit. XVI. 5. Si Pœnitens interrogat. 116. Si tenet opinionem probab. 119. Si negat aut tacet etc. 120. Absolutus an debeat se præsentare etc. 133. Si de licentiâ Pœnitentis Confessarius consultit etc. 149. Qui est requisitus ab eodem Pœnitente. 150. An cum licentiâ Pœnitentis possit admonere complicem. 152. Casus si Pœnitens est surdus. 155. Quomodo debet esse licentia Pœnitentis. An intrâ Confessionem etc. 156. Si in gravamen Pœnitentis. 159. Pœnitens peccator qui redit etc. 160. Qui minatur. 163.

*Pœnitentia*. Vide *Satisfactio*.

*Pœnitentiaria*. Clausulæ S. Pœnitentiariæ in Dispens. Matrim. XVIII. 87. Formula in suppl. 88. Executiones. 89. Facultates S. Pœnitent. XIX. 148.

*Pollutio* an impediât a Communionem. XV. 56.

*Præscriptio* pœnitentis necessaria. XVI. 5. Censurati ad absolutionem obtinendam. XIX. 15.

*Præsentia* Missarum. XV. 74.

- Præsentare.* Pœnitens absol. debet præsentari etc. XVI. 133.  
*Prætextus.* Sollicitatio *prætextu Confes.* XVI. 169.  
*Privilegiatum.* Vide *Altare.*  
*Probabile.* Jurisdictio prob. XVI. 91. Si Pœn. tenet opinionem prob. 119. An liceat uti eâ in gravamen Pœn. etc. 164.  
*Proclamationes* circâ Matrim. XVIII. 55. Potest dispensare Episc. et quâ de causâ. 58. An Vicarius, vel. Parochus. 59.  
*Procura.* Matr. per procuram. XVIII. 32. Qui contrahit per procuram an debeat esse in gratiâ. 29. ad III.  
*Professio Relig.* solvit sponsalia. XVIII. 22.  
*Proles.* An ad baptizandam prolem possit incidi mater. XVI. 9. An baptizari possit in utero; et in quo membro etc. 10. ad 12. Matr. contrâ bonum prolis. XVIII. 30. Usus Matr. cum damno prolis 49.  
*Promissio.* Qui promittit Missam pro tenui stipendio. XV. 63. Promissio mutua in sponsal. XVIII. 4. An debeat esse externata? Si pater promittit pro Filio. 5. Qui promittit duabus mulieribus. 9.  
*Propositum.* Qui credit lapsum in etc. XVI. 24. Debet esse universale. 25. Efficax. 26. An relapsus etc. et an debeat esse explicatum. *ib.*  
*Publicum.* De Pœnit. publicis. XVI. 53. Publica honestas. XVIII. ad 65. ad X. vide *Occultum.*  
*Puella* an possit expellere semen etc. XVIII. 50.  
*Pueri* circâ Comm. XV. 14. Circâ Extr. Unct. XVII. 10. Circâ sponsalia, si antè septennium. XVIII. 1. Sponsalia Puerorum. 7.

## R

**R**APTUS circâ Matrimonium. XVIII. 76.

*Ratum*, et *Ratihabitio.* Matrimonium ratum, quomodo intelligendum. XVIII. 28. An Papa possit dispensare in Matr. rato. 90. Ratihabens percussionem Clerici. XIX. 48. Circâ irregularitatem. 100.

*Rebaptizantes*; de illorum pœnâ. XIV. 19.

*Recedere.* Qui recedit à sponsalibus et de pœnâ in recedentes. XVIII. 11.

*Reconvalidatio Confess.* XVI. 43. et seq. Matr. XVIII. 77. ad 82. An requiratur assistentia Parochi. 29. ad V.

*Recidivi* ( vide *Tract. ult. ex n. 8.* )

*Reditus* si deficiunt an possit Capellanus diminuerè Missas. XV. 78. An possit Episcopus. 77.

*Reductio.* Missar. XV. 76. Si reditus deficiunt etc. 77. et 78.

*Regularis.* Regularibus vetitum est esse Paternos. XIV. 57. Quoad dispensandum Euch. XV. 8. ( *Temp. Pasch. vide Tom. I. Tract. XII. n. 41. et 42.* ) An Regular. possit applicare



Missam contrà voluntatem super. XV. 79. De Confess. quolibet mense. XVI. 2. Approbatio quoad seipsos 73. Quoad Laicos. 80. Peregrinantes. 88. Casus reservati. 130. An possit dispensare cum conjugibus in voto Castit. XVIII. 54. in fin. De collocut. cum Monialibus. XIX. 40. ad 43. Clausura Monialium. 33. ad 39. Clausura Regularium. 47. (*De Privilegiis Regul. Vide Tom. III. Tract. XX. Cap. IV.*)

*Religio.* An per ingressum in Religionem etc. solvantur sponsalia. XVIII. 22. An antè ingressum teneatur etc. 23.

*Religiosus.* An conjux possit fieri Religiosus facto divortio. XVIII. 97. An altero in sæculo remanente etc. XIX. 142.

*Reliquiæ* ciborum. XV. 36. Aquæ, aut sacchari. 37. Tabaci etc. 40.

*Repetere* : Quandò possit repeti Baptism. XIV. 25. Quandò Viaticum. XV. 46. et 47. Quandò Confessio. XVI. 45. ad 47. Extr. Unct. XVII. 8.

*Requisita* ad absolvendum à Censuris. XIX. 14.

*Reservatio.* Si communicaturus habet reservata. XV. 27. An Confessarius si reservata etc. 28. Si habet excom. reserv. 29. An per Confess. nullam in Jubilæo. XVI. 66. Qui obliviscitur reservati etc. 68. Qui casus in Jubilæo. 71. An in morte Confess. simplex etc. 96. et 97. An reservatio sit restrictio. 128. An Ignorantes etc. Accusatio falsa de sollicit. Dona Religios. 129. Quisnam reservare potest casus Regular. 130. Reservatio injusta. An possit alii remittere pro non reservatis. 131. An peccata venialia vel interna etc. 132. Quandò Inferior etc. et an Pœnitens debeat se præsentare. 133. Peregrini. 135. ad 138. Qui obliviscitur etc. 140. An si Confessio est nulla. 141. Reservata dubia. 142. et 143. Qui in confidentiam licentiæ. 144. Qui peccat post licentiam 145. (*Facultates Episcop. vide Tract. XX. ex n. 29. Regul. n. 97.*)

*Resolutio.* Vide *Decretum*.

*Restitutio.* Si monitio non est profutura etc. XVI. 115. Si Confes. erravit circa restitutionem. 122. ad 124.

*Retentio* partis stipendii. XV. 65. Si celebrans remittit etc. 69.

*Rudes*, si invalidè confessi sunt. XVI. 46.

## S

**S**ACERDOS an possit benedicere Chrisma. XIV. 40. An Confirmare etc. 44. An dispensare Commun. XV. 9. An communicare ex se. 11. Quomodò intelligitur illud *Quamprimum* etc. Si communicat modo Laicorum. 58. Circà stipendium Missæ. 59. ad 72. Si retinet partem : si dat ad celebrandas Missas aliis minori probitate. 65. An simplex Sacerdos possit

absolvere à venial. xvi. 76. An Sacerdotes teneantur se red-  
dere habiles ad Confess. etc. 126. et 127.

*Sacramentum*. Attentio et Intentio. xiv. 1. Intentio Mi-  
nistri. 2. Sub conditione. 3. Peccatoribus. 4. Validum et  
informe. xvi. 18. An omnes septem Ordines etc. xvii. 14. An  
materiæ, et formæ fuerint à Jesu Christo etc. 15. Excom.  
major privat ab usu passivo xix. 17. De activo. 18. ad III.  
Excom. minor privat à passivo : an etiam ab activo. 27.  
(*vide alia App III. Cap. I.*)

*Sacrilegus*. An non jejunus etc. ad perficiendum Sacrifi-  
cium. xv. 54. (*Reliqua huc spectantia vide Tom. III. Ap. III.  
ex n. 97.*)

*Sacrilegus* an teneatur ad *Quamprimùm*. xv. 32.

*Sanitas*. Vide *Periculum*.

*Satisfacere*, et *Satisfactio*. Obligatio imponendi satisfac-  
tionem. An possit dari post Absol. xvi. 47. An sub levi. 48.  
Infirmis corpore. 49. Spiritu. 50. et 51. Quæ species Pœnit.  
52. ad 54. Obligatio acceptandi. 55. Exequendi. 56. Qui dif-  
fert 57. Intentio adimpl. 58. Qui obliviscitur. 59. Qui implet  
in peccato. 60. Quis mutare potest. 61. An cadat Pœnit. sub  
sigillo. 153. ad iv.

*Scandalum*. Circà comm. omissa Confess. xv. 24. et seq.  
An non jejunus etc. 53.

*Scientia* requisita in Conf. xvi. 97. et 100. Pro Ordinib.  
xix. 114. Scientia legis, et pœnæ circà imped. ad petendum.  
xviii. 68. Circà irreg. xix. 83. et 84.

*Scriptum*. Confessio in scripto. xvi. 27.

*Scrupulus*, et *Scrupulosi*. An scrupulosus excusetur ab  
integritate Confes. xvi. 32. An scrupuli cadant sub sigillo.  
153. ad vii.

*Seminare*. Si conjux se retrahat à semin. xviii. 40. Si vir  
seminat extrà vas. 47. Si cohibeat femin. Si senex extrà  
etc. 50.

*Sensus*. An Extrema-Unctio omnibus sensibus etc. xvii.  
4. An ebris etc. 11. De absolutione Moribund. sensibus etc.  
xvi. 36. et seq.

*Sententia*. Quandò censura dicitur latæ aut ferendæ sent.  
xix. 2. Absol. à censuris per sententiam generalem. 12.

*Sepultura* circà Excommunicatos. xix. 20. ad viii.

*Servi* circà Matr. xviii. 62. ad ii.

*Sexus* circà Patrilinos. xiv. 36.

*Sigillum* Sacramentale quomoddò obligat. xvi. 147. Consul-  
tus à Confes. etc. 149. A Pœnit. 150. Qui legit chartam  
Confes. 151. Peccata compl. 152. An cum licentiâ possit mo-  
neri complex. *ib.* Objectum peccati. 153. ad iii. An pœniten-  
tia, ad iv. Circumstantiæ impertinentes, ad v. Virtutes  
et scrupuli, ad vii. Defectus naturales. 154. Surdus. 155.  
Qui dicit *sub sigillo Conf.* etc. Licentia Pœn. 156. Qui dicit,

*in tali Monasterio.* 157. Aut in oppido etc. 158. Gubernatio in gravamen Pœn. 159. An cavere à damnis. 161. Scheda de Confess. 162. Si Pœn. minatur. 163. An liceat opin. prob. etc. 164.

*Signum.* Si Morib. dat signa. xvi. 35. Si alii testantur. 36. Si nullum signum. 37. An Sponsalia per signa etc. xviii. 5. Consensus in Matr. per signa. 31.

*Simulare, et Simulatio.* Simulatio Conf. circa sollicit. xvi. 170. An possit simulari Matrim. xviii. 29. ad 31. (*Simul administr. Sacr. App. III. n. 16.*).

*Solemnitas* pro censuris. xix. 9.

*Sollicitatio* in actu Confes. xvi. 166. Sive antè sive post immediatè etc. 167. Occasione Confes. 168. Prætextu Confes. 169. In Confessionario etc. et an requir. simulat. 170. Si Pœnit. sollicitat. 173. Si Confess. divertat ad tactus. 174. Emendatus. 175. Si antè denunciât. Et au per litteras etc. Et si repugnat etc. 176. De excomm. 177. Si monitio. 178. Denunciatio etiam ab aliis etc. 179. Sollicitatio dubia. 180. Casus particulares. 181. et 182. Inhabilitas ad celebrandum. 183. Si Pœnitens accusat falsò. 129.

*Species.* Consecr. in alterutrâ specie. xv. 3. 4. An dùm durant species augeatur gratia. 6.

*Sponsalia* Puerorum. xviii. 1. Qui sinè animo etc. et qui dolo, errore, etc. *ibid.* Si conditio dedit Causam. 2. Metus. 3. Promissio mutua. 4. Externata etc. Si Pater pro filio etc. 5. In dubio etc. Qui promittit se non ducturum aliam. De Anulo etc. Si dispensatio etc. 6. Impuberes etc. Tactus inter sponsos. 7. Legatum etc. 12. Dissolvuntur. I. Nuptiis; et an nocens remaneat solutus. 13. II. Consensu. An Impuberes etc. 14. III. Impedimento. An Dispensatio etc. 15. An Disparitas etc. 16. Dissensus parentum. 17. iv. Delicto. An propter fornicat. 18. v. Mutatione. 19. vi. Discessu. 20. vii. Terminò. 21. viii. Professione, et ordine. 22 ad 24. An votum castit. etc. 25. An Judicis auctoritas. 26. Qualis probatio. 27.

*Sponsi.* Qui contrahit cum peccatore. xiv. 6. Si sunt parati ad contrahendum. xvi. 114. Tactus inter sponsos. xviii. 7. Si contrahunt in peccato. 29. ad II. An simulare etc. *ib.* Si de impedim. interrogati. 57.

*Statuæ* in expositione SS. Sacramenti. xv. Decr. xxiii. 88.

*Stipendium* Missæ, an à divitibus etc. xv. 59. An plura stipendia pro unâ Missâ. 60. Stipendium justum. 61. An inferior vel major taxa etc. 62. Missa promissa pro parvo stipendio. 63. Conventio stipendii. 65. Qui sibi retinet partem etc. aut celebrare faciat per alios minùs probos. 65. Si speciali intuitu etc. 66. Capellani. 67. Administratores. 68. Si celebrans remitti etc. Execut. test. 69. Qui colligit etc. 70. Permutatio Missarum. 71.

*Stolæ.* Si Sacerdos communicat extrâ Missam. xv. 58.

*Subditus* ut censuretur. xix. 4.

*Superior.* An pro non reservatis possit remittere etc. xvi. 131. Qui obliviscitur reservati coram superior. 140. Qui invalidè confitetur. 141. et 143.

*Surdus* circa Confes. xvi. 35. *Casus Pœnit. surdi.* Quando nam surdus est irregularis. xix. 117.

*Suspensio.* xix. n. 64. ad 66.

## T

**T**ABACUS naribus quoad jejunium etc. xv. 38. Famo. 39. dentibus attrit. 40.

*Tabella* Missarum assignenda in Sacristiâ. xv. 68.

*Tactus.* Si Confess. sollicitatus divertat ad tactus. xvi. 174. inter Sponsos. xviii. 7. Inter conjuges, et cum seipsis 42.

*Taxa* stipendii Missæ xv. 62. et 64.

*Terminus*, an sponsalia elapso termino etc. xviii. 21.

*Testis* si testatur moribundum dedisse signa. xvi. 37.

De assistentiâ in Matrimonio. xviii. 70. Si testis sciebat impedim. 78.

*Timor.* Qui timet relapsum iri, circa prop. xvi. 24. Quando nam timor est causa Divortii. xviii. 92. vide *Metus*.

*Titulus* coloratus cum errore communi circa Confess. xvi. 21.

*Transmissio* instrumentorum in Ordine. xvii. 16.

## V

**V**AGI circa Matrimonium. xviii. 72.

*Veniale.* Dolor de venialibus. xvi. 23.

*Vera.* Confess. debet esse vera sinè mendacio. xvi. 28.

*Viaticum.* An possit dari à Laicis, aut se ipsis etc. xv. 10. Quomoddò dandum est. 12. Obligatio suscipiendi Viaticum, et quandò. 19. Si vomitum etc. 20. Tussis. 21. De jejunio etc. et quandò repeti potest. 46. et 47. Qui paucis antè diebus etc. 48. Qui eodem mane. 49. An omitti *Accipe Viaticum* etc. 50. An ad dandum Viaticum sit excusatus à Confess. etc. et an cùm jam pervenit Viat. percipiatur Conf. fuisse nullam. 24.

*Vicarius* Episcopi an habeat jurisdictionem ordin. et possit eam delegare. xvi. 81. An possit dispens. in Proclamat. Matr. xviii. 59.

*Vinum.* Cùm deprehenditur error in Missâ etc. Et quid in dubio etc. xv. 54.

## CONSEILS

SUR

## LA MANIÈRE DE LIRE L'ÉCRITURE-SAINTÉ.

Pour lire l'Écriture-Sainte avec fruit, il faut que nous soyons portés par de bons motifs à en entreprendre la lecture; car les Scribes et les Pharisiens la lisaient aussi, et ils n'en devenaient pas meilleurs. *Ils croyaient avoir la vie éternelle par elle, mais ils ne voulaient point aller à Jésus pour avoir la vie.* (Saint Jean, chap. V, v. 39 et 40.)

Il est des personnes qui lisent la Bible, parce qu'elle contient le récit d'événemens qui présentent un certain intérêt; il en est d'autres qui ont pris l'habitude d'en lire un chapitre le matin et le soir, et qui s'imaginent que c'est là une œuvre méritoire plutôt qu'un moyen d'instruction. D'autres personnes encore se proposent, en lisant la Bible, d'étendre leurs connaissances, mais plutôt pour faire parade de leur savoir que pour procurer à leur foi de solides fondemens et une bonne nourriture à leurs âmes, *prétendant être docteurs de la loi, quoiqu'elles n'entendent point ce qu'elles disent, ni les choses qu'elles assurent comme certaines, et ne se doutant pas que ce qu'elles devraient surtout chercher dans la Bible, ce sont les assurances du pardon que leurs péchés leur rendent nécessaire.*

Si ce n'est pas dans ce dernier sentiment qu'on lit la Bible, on aurait beau la connaître en son entier, malgré toute sa science, on serait un jour soumis à la condamnation. Entreprenons donc cette lecture avec le sincère désir d'être instruits et éclairés par elle, afin d'être rendus sages à *salut par la foi en Jésus-Christ* (II. Tim. chap. III, v. 15).

Faisons-nous l'habitude de prier toujours avant de lire la Bible, et que ce soit du cœur que partent nos prières. Prions aussi en la lisant, ce sera le meilleur moyen d'en tirer une véritable édification. Pour en donner un exemple, après avoir lu le 1<sup>er</sup> verset de la Genèse : *Dieu créa au commencement le ciel et la terre*, on peut prier ainsi : « O mon Dieu ! si tu as créé le ciel et la terre, tu es certainement plus grand que le ciel et la terre ; c'est pourquoi aussi mon âme s'écrie : *Seigneur, pourvu que je te possède, je ne désire ni le ciel ni la terre !* »

On peut s'arrêter de même à chaque verset, et, selon l'expression d'un saint homme, secouer chaque rameau pour voir s'il en tombera quelques fruits. Peut-être y trouvera-t-on en commençant quelque difficulté, et ne saura-t-on faire aucune prière en rapport avec le premier verset qu'on rencontrera ; mais qu'on ne se laisse pas rebuter, qu'on aille plus avant, qu'on secoue quelque autre rameau. On peut être assuré que si l'âme a vraiment faim, l'Esprit du Seigneur ne la laissera pas sans nourriture. Il arrive même souvent que l'on finit par découvrir dans le moindre passage de l'Ecriture une telle abondance de fruits salutaires, qu'on s'y arrête comme si l'on était sous un arbre abondamment chargé.

Il est bon de joindre la méditation à la prière, et de s'interrompre de temps en temps pour réfléchir sur ce qu'on a lu. On en profitera surtout, si l'on a eu soin de bannir de son cœur tout ce qui pouvait le distraire et l'agiter ; car de même que le soleil se réfléchit avec plus d'éclat dans une eau tranquille que dans un torrent, et la réchauffe davantage, de même l'Evangile opère plus efficacement dans un cœur calme et recueilli que dans celui qui serait encore distrait par de vaines pensées. Si tu désires donc lire l'Ecriture avec fruit, si tu veux t'y approvisionner de foi, d'espérance et de charité, puises-y dans le recueillement.

Que l'on ne perde toutefois pas courage, si l'on n'obtient pas de suite le succès qu'on attend; car, comme le dit un écrivain pieux : « On ne devient pas » parfait tout à coup; c'est en grimpant et non en volant, qu'on arrive au haut de l'échelle; grimpions » donc, et que la prière et la méditation soient comme » les deux pieds qui nous font avancer. La méditation » nous fait voir ce qui nous manque, et la prière » obtient de Dieu, qu'il ne nous manque rien; l'une » nous montre le chemin, l'autre nous y conduit; » la méditation nous fait clairement reconnaître les » dangers, la prière nous les fait éviter. »

Apprenons à méditer. Le premier verset de la Genèse nous a fourni un exemple pour la prière; le second nous en fournira un pour la méditation. *La terre était sans forme et vide, et les ténèbres étaient sur la face de l'abîme, et l'Esprit de Dieu se mouvait sur les eaux.* « Tel s'est montré notre » Dieu dès le commencement, tirant toutes choses » du néant par sa puissance, et formant avec sagesse » ce qui n'avait point de forme. C'est ainsi qu'il a » voulu glorifier son saint nom. » L'on peut ajouter une prière telle que celle-ci : « O mon Dieu ! de » même que tu as donné une forme à la terre, forme- » moi à la parfaite stature de Christ. Chasse les » ténèbres de l'ignorance et du péché loin de mon » âme; et que ton Esprit s'approche de mon âme » comme il se mouvait sur les eaux ! »

Si la prière doit précéder et accompagner la lecture de la Bible, elle doit aussi y succéder. On a besoin, après avoir quitté le volume saint, de s'écrier : « O notre Père céleste ! daigne par ton Es- » prit graver dans nos cœurs ce que nous venons » de lire, et mets-y le sceau de ta grâce, de peur » que Satan ne vienne nous l'enlever; car, nous » le sentons, nos lectures n'auraient aucun bon ré- » sultat, si ton Esprit ne venait les rendre salutaires » à nos âmes ! » On peut aussi prendre l'habitude

de former une prière de la portion de l'Ecriture Sainte qu'on a lue, et en faire le sujet de ses instances ou de ses actions de grâces.

Un autre moyen, hors de notre portée, mais dont Dieu se sert souvent lui-même pour nous faire comprendre la Bible, ce sont les épreuves; souviens-t'en, lecteur; et si quelque affliction de l'âme ou quelque épreuve temporelle t'est envoyée du Seigneur, examine s'il n'est pas quelque passage de la Parole de Dieu, qui se rapporte à ta situation. Lis un psaume, un chapitre des Prophètes, de l'Evangile ou des Epîtres, et le Saint-Esprit t'indiquera ce dont ton âme a besoin. L'Evangile se comprend mieux sous la croix que devant la croix. Plus tu mourras au monde, plus tu le comprendras; plus tu vivras au monde, plus tu seras aveugle et ignorant quant aux choses de Dieu.

*Que le Dieu de Notre Seigneur Jésus-Christ, le Père de gloire, éclaire les yeux de votre esprit, afin que vous connaissiez quelle est l'espérance à laquelle vous êtes appelés, quelles sont les richesses de la gloire de son héritage dans les saints, et quelle est l'infinité grandeur de sa puissance envers nous qui croyons par l'efficacité de sa vertu toute-puissante ! ( Ephésiens, chap. I, v. 17. ) A lui soient honneur, louanges et gloire aux siècles des siècles. Amen ! Amen !*

( Prix : 1 fr. 50 cent. les 100 exempl. )

PUBLIÉ PAR LA SOCIÉTÉ DES TRAITÉS RELIGIEUX DE PARIS, ET  
SE TROUVE A L'AGENCE DE LA SOCIÉTÉ, CHEZ HENRY SERVIER,  
LIBRAIRE, RUE DE L'ORATOIRE-SAINT-HONORÉ, N° 6.

Imprimerie de J. Smith, rue Montmorency, n° 16.



*Virtutes.* Pœnit. an cadant sub sigillo. xvi. 153. ad vi.

*Vitandus* an possit absolvere Moribun. xvi. 92. Quinam dicatur vitandus. xix. 15. Percussores Clericor. 16.

*Vocalis.* Confessio debet esse vocalis. xvi. 27.

*Votum.* An votum castitatis, aut suscipiendi Ordines solvat Sponsalia. xviii. 25. Si conjux impeditur ob votum ab usu Matrim. 41. An Episcopi et Regulares dispensare possint in voto cast. 54. ad vi. Votum solemne imp. Matrim. 62. ad iii. An Papa dispenset. 65.

*Usus Matrimonii.* An liceat contrahere cum dubio imp. xviii. 35. An petere aut reddere cum dubio. 36. Si nuptiæ contractæ sint cum dubio. 37. An cum periculo sanitatis. 38. Ob voluptatem, aut mente adulterâ; aut modo indebito. 39. Si conjux se retrahat etc. 40. Si loco aut tempore incestus etc. 41. An tactus, et delectationes morosæ etc. 42. Quando conjux tenetur petere. 43. Si neget semel. 44. Ne plures filii etc. 45. Si vir seminet extrâ etc. 47. Si amens, aut ebrius petat. De imp. ob incestum. Si cum damno sanitatis, aut prolis. 49.

*Uterus.* An possit baptizari puer in utero. xiv. 10.

*Uxor.* Alimenta debita uxori. xviii. 51. Si uxor post coitum surgit, aut mingit. 50.

### *Finis Tomi Secundi.*

---

Apud Typographum hujus prostant opera  
sequentia :

*Theologia ad usum Seminariorum, auctore Rev. ac  
Erud. Domino P. DENS, Seminarii Mechlin. Præ-  
side, etc. etc. Editio octava multum auctior et  
emendatior. Mechl. 1819. 7. vol. in 8.º cum effigie  
Auctoris.*

In hac editione plures erroneæ citationes Scripturæ Sacræ,  
Concilii Tridentini, S. Thomæ etc., quæ in alias editiones  
irrepserunt, diligenter emendatæ sunt; ac plurimi textus  
Scripturæ Sacræ, in aliis editionibus penitus omissi aut  
nonnisi partim allati, integri inserti sunt. Dein additæ sunt  
passim breviores notæ, quibus errores corriguntur qui Auc-  
tori exciderunt, aut alia scitu necessaria aut utilia indican-  
túr. Præterea ad calcem cujusque tomi, sub *Appendicis* ti-  
tulo, accesserunt propositiones à Pio VI. damnatæ per  
Bullam *Auctorem fidei*, variæ Constitutiones Benedicti XIV.  
ac selecta quædam ex ejus opere de *Synodo diocesana*. Tan-  
dem ad postremi voluminis calcem additus est Index alpha-  
beticus, exhibens res quascumque notabiles septem tomis  
contentas.

*Commentarius in Sanctum Jesu Christi Evangelium  
secundum Matthæum, etiam collatum cum Evan-  
gelio Marci, Lucæ et Joannis in iis quæ habent  
communia, nec non in Sanctum J. C. Evan-  
gelium secundum Marcum, Lucam et Joannem, etc.  
Per P. JACOBUM PIRES, Societatis Jesu, Sacræ  
Scripturæ Professore. 1. vol. in - 12. 1823.*

*BENEDICTI XIV. Pontificis Maximi de Synodo Diæ-  
cesana Libri tredecim. Editio post plurimas, præ-  
sertim Patris Emmanuelis De Azevedo S. J. auc-  
tior et castigatior. 4. vol. in-12. 1823.*

Pro cujus commendatione abundè facit, illud nominasse.  
Vide De Feller Dict. hist. art. Benoît XIV.

*De Primatu et Infallibilitate Romani Pontificis.  
Auctore Laurentio VEITH, Societatis Jesu, SS.  
Theologiæ Doctore, ejusdemque in Lycæo catholico  
augustano professore publ. et ord. Editio nova,  
emendatior et correctior. Accessit Selectorum Mo-  
numentorum collectio ad Rom. Pontificis Aucto-  
ritatem spectantium. 1. v. in-12. Mechliniæ, 1824.*